



LEWENDE  
WATER

**Artikels, Reglemente, Vorms en Aanvullende/Toeligtende Besluite**  
soos vasgestel deur die **Algemene Sinode in Oktober 2023**  
— en die **Vrystaat Sinode in Junie 2026** —



# KERKORDE

VAN DIE NEDERDUITSE GEREFORMEERDE KERK VRYSTAAT

Saamgestel deur die **Sinodale Diens Regte (SDR)** van die Vrystaat Sinode



## VOORWOORD

Watter leesstof behoort in die hande van 'n Christen (dominee) te wees? Sekerlik moet die Bybel jou nommer een boek wees. Dit is ook goed om soms ander Christelike en teologiese boeke oop te slaan.

Maar die Kerkorde ... kan daar nou vreugde in die lees hiervan wees? Wel, dalk nie altyd vreugde nie, maar beslis nut.


Ek sê altyd tong in die kies, dat 'n predikant wat sê dat hy net die Bybel lees en nie die Kerkorde nie, seker totaal uitgeput en siek moet wees, want hy/sy kry nooit verlof of siekverlof nie. Sover ek weet word verlof nêrens in die Bybel as 'n diensvoordeel uitgelig nie, maar die Kerkorde stel dit darem duidelik dat daar iets soos verlof beskikbaar is.

So lees maar soms jou Kerkorde - en gelukkig sit jy nou met die nuutste Kerkorde in jou hand.

Al die Sinodes deel die Kerkorde en Reglemente van die Algemene Sinode (2023), maar jy sal ook hier die eie Reglemente en Handleidings van die Vrystaat Sinode (2026) vind, saam met 'n aantal Vorms en Besluite, alles in een dokument.

Hierdie dokument het egter nie uit die lug geval nie. Daar is ure se werk in. Dank aan die lede van die voormalige Sinodale Taakspan Kerkorde (STK): Dave Samuel, Werner Burger en Dominique Basson, wat elkeen saam met my aan 'n afdeling geskaaf het. Die leeu-aandeel van die werk is egter gedoen deur Christo Weideman, wat nie net baie van die hersiening en opstel van reglemente behartig het nie, maar hier aan die einde weer deur die hele dokument gegaan het om al die wysigings, soos byvoorbeeld taakspanne se name wat by die onlangse Sinodesitting verander is, by te werk.

1 Korintiërs 14:33 sê: *"God is tog nie 'n God van wanorde nie, maar van orde en vrede."* Mag jy in hierdie dokument dan orde, maar ook vrede, vir jou gemoed vind.



Dr Leon Oosthuizen

**AKTUARIUS: VRYSTAAT SINODE**



# INHOUDSOPGAWE

## AFDELING A: AS KERKORDE 2023 MET VRYSTAAT BESLUIE

### HOOFSTUK 1

DIE BELYDENIS, AARD EN ORDE VAN DIE KERK.....	1
---	---

### HOOFSTUK 2

DIE AMPTE VAN DIE KERK .....	4
<i>Algemene bepalinge</i> .....	4
<i>Predikante</i> .....	4
<i>Ouderlinge en diakens</i> .....	10

### HOOFSTUK 3

DIE VERGADERINGE VAN DIE KERK.....	12
<i>Algemene bepalinge</i> .....	12
<i>Besondere bepalinge</i> .....	13
<i>Die kerkraad</i> .....	13
<i>Die ring</i> .....	15
Die sinode.....	17
Die Algemene Sinode .....	19

### HOOFSTUK 4

DIE ARBEID VAN DIE KERK .....	23
Die openbare erediens.....	23
Die sakramente .....	24
Die doop .....	24
Die nagmaal.....	24
Die jeugbediening .....	24
Die herderlike sorg .....	25
Gemeentebediening .....	25
Gestuurtheid ( <i>Missio Dei</i> ) .....	25
Diens van barmhartigheid.....	26
Dienswerk van die gelowiges .....	26
Leer en aktuele sake .....	27
Rentmeesterskap .....	27
Diensverhoudinge .....	27

## HOOFSTUK 5

KERKLIKE OPSIG, TUG EN DISSIPLINE.....	28
Doel en voorskrifte.....	28
Kerklike opsig en tug .....	28
<i>Tugwaardige sondes</i> .....	28
Lidmate, ampsdraers, gelegitimeerdes en werknemers .....	29
Kerklike dissipline.....	29
Tug- en dissiplinêre maatreëls .....	29
Appèl .....	30
Opheffing van tug- en/of dissiplinêre maatreëls .....	31

## HOOFSTUK 6

BETREKKINGE VAN DIE KERK NA BUITE .....	33
Kerk en staat .....	33
Kerk, maatskappy en vrye vereniging.....	33
Kerk en onderwys .....	33
Kerk en ekumeniese betrekking.....	34
Tussen-orde .....	34

## AFDELING B: REGLEMENTE EN HANDLEIDINGS VAN DIE VRYSTAAT SINODE

### ALGEMEEN

1. Vloiediagram van die sinodale struktuur van die NG Kerk Vrystaat.....	36
2. Reglement van orde: NG Kerk Vrystaat .....	37

### MODERAMEN EN SUB-TAAKSPANNE

3. Reglement vir die Moderamen .....	45
4. Reglement vir Ringe.....	49
5. Reglement vir die Sinodale Diens Regte (SDR) .....	64
6. Reglement vir Kantoorhoofde.....	65

### FUNKSIONELE BEDIENINGE, DIENSTE EN FONDSE

7. Reglement vir Ondersteuning .....	66
8. Reglement vir Bedieningsbegeleiding.....	72
9. Reglement vir Vennote in Getuienis .....	74
10. Reglement vir Diens van Barmhartigheid .....	76
11. Reglement vir Kerklike Fondse.....	78

12. Reglement vir die Helpmekeer Studiefonds.....	87
13. Reglement vir die Beursfonds .....	89
13.1 Reglement vir die Beursfonds vir Teologiese opleiding: Gemeenteleraars .....	89
13.2 Reglement vir die Beursfonds vir nagraadse Teologiese studie .....	89
13.3 Reglement vir die Beursfonds vir diverse Teologiese opleiding.....	91
13.4 Reglement vir Teologiese studente bystandsfonds .....	91
14. Reglement vir die Sinodale Argief- en Inligtingsdiens.....	92
15. Reglement vir Kommunikasie .....	110
16. Reglement vir Klank-en Beeldopnames van vergaderings.....	112

## AFDELING C: KERKLIKE VORMS VAN DIE VRYSTAAT SINODE

Vorm 1: Beroepsbrief vir 'n Bedienaar van die Woord.....	114
Vorm 2: Benoemingsbrief vir predikante in Sinodale diens .....	117
Vorm 3: Akte van bevestiging .....	120
Vorm 3A: Akte van bevestiging: Diensleeraar .....	121
Vorm 4A: Akte van demissie .....	122
Vorm 4B: Akte van demissie by emeritering .....	124
Vorm 4C: Akte van demissie vir 'n predikant in Sinodale diens.....	126
Vorm 4D: Akte van demissie by aanvaarding van 'n ander werk met behoud van Bevoegdheid .....	128
Vorm 4E: Akte van demissie by aanvaarding van emeritaat weens swak gesondheid .....	130
Vorm 4F: Akte van demissie vir 'n Brugpredikant .....	132
Vorm 4G: Akte van demissie by die losmaak van die band met behoud van Bevoegdheid .....	133
Vorm 4H: Akte van demissie vir 'n vastermyn pos .....	134
Vorm 5: Geloofsbrief vir 'n vergadering van die Sinode .....	135
Vorm 6: Geloofsbrief vir 'n vergadering van die Ring .....	137
Vorm 7: Verklaring van doop .....	139
Vorm 8: Verklaring van lidmaatskap .....	140
Vorm 9: Attestaat .....	141
Vorm 10: Beëindiging van lidmaatskap .....	142
Vorm 11: Verklaring: Lidmate van ander kerkgenootskappe .....	143
Vorm 12: Rektifikasie in die doopregister .....	144
Vorm 13: Rektifikasie in die Belydende lidmateregister.....	146
Vorm 14: Onopspoorbare Lidmaatskap.....	148
Vorm 15: Gemeentesertifikaat.....	149
Konstitusie vir NG Gem (Afrikaans).....	150
Konstitusie vir NG Gem (Engels) .....	153

**AFDELING D: SINODALE REËLINGS VAN DIE VRYSTAAT SINODE**

D1 Pligte van 'n kerkraad .....	156
D2 Pligte van die kassier .....	158
D3 Advies oor reis- en trek onkoste .....	159
AFDELING E: REGLEMENTE VAN DIE ALGEMENE SINODE.....	160
AFDELING F: RIGLYNE WAT KERKORDE ARTIKELS EN REGLEMENTE AANVUL EN TOELIG.....	328
AFDELING G: GEDRAGSKODE VIR PREDIKANTE VAN DIE NG KERK.....	360
AFDELING H: BESLUTE WAT KERKORDE ARTIKELS EN REGLEMENTE AANVUL EN TOELIG.....	364

# DIE KERKORDE

## HOOFSTUK 1

### DIE BELYDENIS, AARD EN ORDE VAN DIE KERK

#### Artikel 1

Die Nederduitse Gereformeerde Kerk staan gegrond op die Bybel as die heilige en onfeilbare Woord van God. Die leer wat die kerk in ooreenstemming met die Woord van God bely, staan uitgedruk in die Formuliere van Eenheid soos vasgestel op die Sinode van Dordrecht in 1618-1619, naamlik die sewe en dertig artikels van die Nederlandse Geloofsbelydenis, die Heidelbergse Kategismus en die vyf Dordtse Leerreëls.

#### **Aantekening by Artikel 1:**

*Artikel 1 moet saam met Artikel 44 gelees word.*

#### Artikel 2

Die Nederduitse Gereformeerde Kerk is deur God Drie-enig geroep om deel te neem aan die missie van God in die wêreld. Die kerk word deur die Heilige Gees opgebou om God se eer te dien en verkondig die bediening van versoening en die heil van Christus.

#### Artikel 3

- 3.1 Waar die Woord van God eis dat in die gemeente van Christus alles welvoeglik en ordelik moet toegaan (1 Korintiërs 14:40), word in die volgende artikels 'n aantal bepalinge gegee vir die lewe en werk van die kerk met die oog op die volbrenging van sy taak en roeping ooreenkomstig die Heilige Skrif en die belydenis.
- 3.2 Hierdie bepalinge handel oor die ampte in die kerk, die vergaderinge van die kerk, die werksaamhede van die kerk, regering en tug van die kerk en die betrekkinge van die kerk na buite.
- 3.3 Die Nederduitse Gereformeerde Kerk reël sy eie interne orde op grond van sy onvervreembare roeping en interne bevoegdheid as kerk van Jesus Christus en ook op grond van sy reg tot vryheid van godsdiens.

#### **Besluite by Artikel 3:**

##### **3.1 Sinodale verband**

- 3.1.1 *Die sinodale verband van die Nederduitse Gereformeerde Kerk Vrystaat word saamgestel uit die Nederduitse Gereformeerde gemeentes in die Vrystaat-provinsie.*
- 3.1.2 *Elke Nederduitse Gereformeerde gemeente het vasgestelde grense en bestaan uit die volgende lidmate.*

##### **3.2 Gemeentegrense**

- 3.2.1 *die belydende lidmate wat binne die grense van die gemeente woonagtig is en wie se lidmaatskap deur die kerkraad in ooreenstemming met die kerklike bepalinge erken en aangeteken is.*
- 3.2.2 *die dooplidmate, dit wil sê gedoopte kinders van belydende lidmate wat binne die gemeentegrense woon en ander dooplidmate wie se domisilie in die gemeente is;*

3.2.3 *die nog ongedoopte kindertjies van belydende lidmate wat kragtens die verbond van God deel van die verbondsgemeente is; en*

3.2.4 *lidmate buite die gemeentegrense wat kragtens Besluit 3.5.3 hieronder erken word.*

### **3.3 Duur van lidmaatskap**

3.3.1 *Die persone in 3.2 genoem bly lidmate van die Nederduitse Gereformeerde gemeente totdat:*

3.3.1.1 *hulle deur skriftelike kennisgewing of voor 'n kommissie van die kerkraad bevestig dat hulle hul verband met die Kerk verbreek en die kerkraad vervolgens hulle betrekking tot die gemeente as verval verklaar (Vorm 10); of*

3.3.1.2 *hulle van die gemeente afgesny word.*

3.3.2 *'n Lidmaat wat sy verband met die Nederduitse Gereformeerde Kerk verbreek om na 'n nie-erkende kerk of 'n sekte oor te gaan, kan alleen terugkeer na betoning van berou en moet, na ondersoek oor sy gehegtheid aan die leer van die Kerk en nadat bewys gelewer is dat die kategese voorheen deurloop is, voor die kerkraad of 'n kommissie van die kerkraad belydenis van geloof aflê.*

3.3.3 *Wanneer 'n lidmaat uit die familie van Nederduitse Gereformeerde Kerke aansoek doen om as lidmaat opgeneem te word, behoort die kerkraad in die oorweging van so 'n aansoek 'n deeglike gesprek met sodanige persoon te voer oor die Formuliere van Eenheid as die enigste belydenisgrondslag van die Nederduitse Gereformeerde Kerk*

### **3.4 'n Lidmaat wat na 'n ander gemeente vertrek**

3.4.1 *Waar 'n lidmaat na 'n ander gemeente vertrek, word op aanvraag en as die kerkraad dit goedvind, aan hom 'n attestaat oorhandig op die vasgestelde vorm (Vorm 9) wat deur die bedienaar van die Woord of die skriba onderteken moet word. Hierdie attestaat moet binne ses maande na uitreiking by die kerkraad van die ander gemeente ingedien word.*

3.4.2 *Waar 'n lidmaat reeds langer as ses maande vertrek het of waar daar by die opsieners beswaar bestaan om 'n attestaat uit te reik, word 'n bewys van lidmaatskap, onderteken deur die bedienaar van die Woord of die skriba van die kerkraad, uitgereik. 'n Bewys van lidmaatskap word verkieslik aan die skriba van 'n gemeente gestuur en nie aan die lidmaat wat vertrek persoonlik gegee nie*

3.4.3 *'n Bewys van lidmaatskap moet onverwyld by die betrokke kerkraad ingedien word. Die oorkoms van sodanige lidmaat moet tydens die erediens deur afkondiging aan die gemeente bekend gestel word.*

3.4.4 *Die kerkraad het die reg en is verplig om die attestaat of bewys van lidmaatskap van elke lidmaat en bedienaar van die Woord wat as lidmaat by die gemeente aanmeld, aan te vra. Dit geld in besonder vir 'n lidmaat wat in 'n tugsak betrokke is en weier om hom aan die tug te onderwerp op grond daarvan dat sy bewys van lidmaatskap nie ingedien is nie.*

*'n Kerkraad is verplig om op aanvraag die attestaat of bewys van lidmaatskap uit te reik, en indien dit tevore uitgereik is, te vermeld wanneer en na welke gemeente dit aangestuur is.*

3.4.5 *Sodra 'n lidmaat uit 'n gemeente vertrek, verval sy lidmaatsvoorregte in die gemeente wat hy verlaat, tensy hy skriftelik met die bepaalde gemeente reëlings betreffende sy voortgesette lidmaatskap getref het.*

3.4.6 *Hy het geen lidmaatsregte in die nuwe gemeente voordat sy attestaat of bewys van lidmaatskap ingedien is nie.*

### **3.5 Gemeentegrense**

3.5.1 *Die Algemene Sinode het besluit dat elke gemeente 'n duidelik omskrewe grens het as 'n aanduiding van die primêre bedieningsgebied van daardie gemeente. Daarmee handhaaf die NGK die beginsel dat die finalisering van lidmaatskap van 'n betrokke gemeente (doop- en belydend) deur die kerkraad van daardie gemeente hanteer word.*

- 3.5.2 *Persone/lidmate wat binne die grense van 'n ander gemeente intrek, sien toe dat hulle attestate of bewyse van lidmaatskap by hierdie kerkrade/gemeente ingehandig word. Die kerkrade neem goedkeurend hiervan kennis. Lidmate kan ook die administratiewe amptenaar van hulle vorige gemeente versoek om die dokumente te laat oorplaas.*
- 3.5.3 *Lidmate wat binne die grense van 'n gemeente woon of intrek, maar lidmaatskap van 'n ander gemeente verlang, kan dit doen deur hulle attestate of lidmaatbewyse by die betrokke kerkrade/gemeente in te handig.*
- Die inhandiging geskied met 'n kennisgewing aan die kerkrade binne wie se grense hulle reeds woon of gaan woon. Die twee betrokke kerkrade neem goedkeurend hiervan kennis. Sulke keuses moenie gemaak word as gevolg van hangende tugsake, growwe onmin of slegte verhoudinge in die geografiese gemeente nie. In sulke gevalle moet kerkrade/ringe die saak eers hanteer.*
- 3.5.4 *Gemeentes wat lidmate van buite hulle grense aanvaar, moet fisies in staat wees om hulle pastoraal te bearbei.*
- 3.5.5 *Lidmate wat binne die grense van 'n ander gemeente intrek, maar lidmate wil bly in die gemeente waarin hulle voorheen gewoon het, gee daarvan aan die twee kerkrade kennis. Die kerkrade neem goedkeurend hiervan kennis.*
- 3.5.6 *Die kerkrade van die gemeente waarbinne lidmate woon, moet geken word wanneer hierdie lidmate na 'n ander gemeente oorgaan. In gevalle van onsekerheid of twyfel kan kerkrade navraag doen oor die beweegredes van lidmate wat nie in hulle geografiese gemeente lidmaat wil wees nie.*

### **3.7 Kategoriale Gemeentes**

*Die Sinode onderskryf die volgende beginsels in verband met kategoriale gemeentes:*

- 3.7.1 *Kategoriale gemeentes het steeds geografiese grense.*
- 3.7.2 *Ter wille van ordelikheid en die behoorlike opsig van kerkrade moet lidmate wat by 'n kategoriale gemeente wil aansluit, dieselfde prosedure volg as wat die Algemene Sinode 1994 in verband met die oordrag van lidmaatskap oor gemeentegrense heen besluit het. (Handelinge 1994 bl 490, 491, 574).*
- 3.7.3 *Die ring moet 'n kategoriale gemeente, net soos enige ander gemeente, se grense bepaal, desnoods in samewerking met ander ringe.*

#### **Aantekening by 3.5 (Besluit van Vrystaat Sinode 2017)**

*In die toepassing van die besluite van die Algemene Sinode moet die eer van God en die welsyn van en orde in die kerk voorop gaan en nie die keuses van mense nie. Terselfdertyd moet die geestelike heil van die betrokke lidmate/gesin ook verreken word.*

*Lidmate moet daarop gewys word:*

1. *dat die Here ook 'n doel het met die plek van ons verblyf en dat dit bepaalde geestelike voordele vir die gemeente en die lewe van die lidmaat/gesin inhou;*
2. *dat die keuse ten opsigte van lidmaatskap van 'n bepaalde gemeente 'n saak van ernstige gebed behoort te wees.*

## HOOFSTUK 2

### DIE AMPTE VAN DIE KERK

#### 2.1 Algemene bepalinge

##### Artikel 4

4.1 Christus verrig al die dienswerk in sy kerk en koninkryk deur sy Woord en Gees. Hy doen dit onder meer deur gebruik te maak van:

4.1.1 die dienswerk<sup>1</sup> van die drie besondere ampte in die kerk, te wete:

- dié van predikant<sup>2</sup>, diensleraars en standplaasleraars
- dié van ouderling,
- dié van diaken,

om die gelowiges toe te rus vir hulle dienswerk in die kerk en die wêreld; én

4.1.2 die dienswerk van al die gelowiges<sup>3</sup>.

4.2 Die drie besondere ampte is gelykwaardig, maar word in opdrag en werk onderskei. By die uitoefening van hulle roeping mag geen ampsdraer oor ander ampsdraers heerskappy voer nie, aangesien Christus die enigste Hoof, Koning en Meester van sy kerk is.

##### Artikel 5

Niemand mag in die kerk van Christus in een van die besondere ampte dien sonder dat die persoon:

- op wettige wyse beroep (of verkies) is,
- die nodige approbasie verkry het, en
- bevestig is nie.

#### 2.2 Predikante

##### Artikel 6

6.1 Vir die toelating tot die bediening van die Woord word vereis:

6.1.1 geskiktheid vir die amp<sup>4</sup>;

6.1.2 deeglike teologiese opleiding<sup>5</sup>; en

6.1.3 ondertekening van die legitimasierverklaring waarin die ondertekening van die Formuliere van Eenheid vervat is.

---

<sup>1</sup> Vergelyk Artikel 10 van die *Kerkorde*.

<sup>2</sup> “Predikant” verwys ook na “bedienaar van die Woord”, “leraar”, “evangeliedienaar” en het die begrippe ooreenstemmende betekenis. Waar in hierdie Kerkordeboek na die manlike verwys word, sluit dit ook die vroulike in en omgekeerd, tensy spesifiek anders vermeld.

<sup>3</sup> Vergelyk die *Kerkorde* Artikel 55.

<sup>4</sup> Vergelyk *Reglement 10 vir die Opleiding en Legitimasië van Predikante*, 4.1.1.

<sup>5</sup> Vergelyk *Reglement 10 vir die Opleiding en Legitimasië van Predikante*, 4.1.2.

- 6.2 Die Algemene Sinode bepaal die vereistes vir die opleiding, die aard en die toesig daaroor en die plekke waar dit moet geskied op aanbeveling van die Algemene Kuratorium.
- 6.3 Die Algemene Kuratorium word saamgestel deur die Algemene Sinode volgens *Reglement 9 vir die Algemene Kuratorium*.
- 6.4 Wanneer meer as een sinode om historiese of ander redes by 'n plaaslike kuratorium betrokke is, reël die betrokke sinodes onderling die wyse waarop die kuratorium saamgestel word. Ander sinodes het die reg om, op eie koste, elk een verteenwoordiger in die kuratorium te benoem.
  - 6.4.1 Die sorg vir, asook die beheer en toesig oor die opleiding van evangeliedienaars, word deur 'n plaaslike kuratorium behartig.
  - 6.4.2 Die plaaslike kuratorium is verantwoordelik vir die keuring, begeleiding, toesighouding oor, eksaminering en aanbeveling vir toelating tot die evangeliebediening van teologiese studente. Hierdie verantwoordelikhede kan namens die kuratorium deur ('n) kommissie(s) van die kuratorium behartig word.
  - 6.4.3 Die NG Kerk Dosenteraad is meer bepaald vir die akademiese opleiding van die studente verantwoordelik.
  - 6.4.4 Een lid van die NG Kerk Dosenteraad het met adviserende stem sitting in die plaaslike kuratorium.
- 6.5 Die kuratorium benoem 'n proponentskommissie, wat bestaan uit soveel lede as wat hy nodig ag, uit bevoegde persone voorgelê aan die kuratorium deur die onderskeie sinodes. Hulle hoef nie noodwendig lede van die kuratorium te wees nie. Die proponentskommissie het as opdragte:
  - 6.5.1 Die keuring en aanbeveling by die kuratorium van kandidate ná voltooiing van hul teologiese studies.
  - 6.5.2 Die afneem van *colloquium doctum*.

## Artikel 7

Die verlening van bevoegdheid om as predikant beroep te word, die behoud daarvan en die beëindiging daarvan, geskied deur die Algemene Sinode of sy gevolmagtigde.

### **Aantekening by Artikel 7:**

*Vergelyk Reglement 9 & 11 KO 2023*

## Artikel 8<sup>6</sup>

- 8.1 'n Predikant, diensleeraar of standplaasleeraar word vir diens aan 'n gemeente beroep deur die kerkraad van die gemeente, met approbasie deur die gemeente en goedkeuring deur die ring.

<sup>6</sup> Vergelyk *Reglement 12 vir die Beroep, Bevestiging, Demissie en Emeritaat van Predikant, Diensleeraar en Standplaasleeraar*.

- 8.2 'n Predikant/diensleraar word vir diens aan die kerkverband deur 'n kerkvergadering of sy gevolmagtigde benoem, met approbasie deur die kerkverband en goedkeuring deur die betrokke sinodale regs-/kerkordekommissie.
- 8.3 Die bevestiging van 'n predikant, diensleraar of standplaasleraar vir diens aan 'n gemeente geskied nadat goedkeuring daartoe verleen is deur die ring of sy gevolmagtigde.
- 8.4 Die bevestiging van 'n predikant/diensleraar vir diens aan die kerkverband geskied nadat goedkeuring daartoe verleen is deur die betrokke sinodale regs-/kerkordekommissie.
- 8.5 Die bevestiging van 'n proponent geskied met handoplegging.
- 8.6 'n Predikant/diensleraar wat 'n beroep na 'n ander gemeente aangeneem het of 'n benoeming vir diens aan die kerkverband aanvaar het, ontvang 'n akte van demissie van die kerkvergadering in wie se diens gestaan is.
- 8.7 'n Predikant, diensleraar of standplaasleraar wat emeriteer, ontvang 'n akte van emeritaat.

**Besluite by Artikel 8:**

- 8.1 *Die voorsitter van die beroepende vergadering gee aan die beroepene sowel as Die Kerkbode kennis van die beroep.*
- 8.2 *Besware teen 'n beroep word in terme van Regl 12.2.3 en 12.8 van die AS Kerkorde 2023 hanteer.*
- 8.3 *Die ring sien toe dat die bepalinge van die Sinodale Pensioenfonds nagekom is.*
- 8.4 *In die geval waar 'n predikant of proponent uit die familie van Nederduitse Gereformeerde Kerke wat die Belhar-belydenis onderteken het, beroep word, moet hy opnuut verklaar dat hy die Formuliere van Eenheid as die enigste belydenisgrondslag van die Nederduitse Gereformeerde Kerk aanvaar alvorens hy in 'n gemeente van die Nederduitse Gereformeerde Kerk Vrystaat bevestig word.*
- 8.5 *Die beroepene moet so gou as moontlik bevestig word.*
- 8.6 *Die verantwoordelikheid van die beroepende kerkraad teenoor die bedienaar van die Woord begin op die datum waarop hy in sy vorige gemeente demissie ontvang het. Dit geld ook in die geval waar 'n bedienaar van die Woord na sy demissie maar vóór sy bevestiging sterf.*
- 8.7 *Die beroepende kerkraad dra die vervoerkoste van die beroepene en sy gesin, asook die verpakking en vervoer van sy meublement en boekery.*
- 8.8 *Die bevestiging geskied deur 'n bedienaar van die Woord in die plaaslike gemeente of die konsulent of, in geval van onvermydelike afwesigheid, deur 'n ander bedienaar van die Woord binne kerkverband wat daarvoor deur die konsulent gevra word. Die beroepene kan 'n bedienaar van die Woord van die Nederduitse Gereformeerde Kerk vra om 'n bevestigingsrede te hou.*
- 8.9 *In die geval van 'n proponent wat vir die eerste keer bevestig word, stuur die kerkraad sy Akte van Legitimasië aan die Aktuaris van die VS Sinode (Regl 12.9.2) wat aan hom 'n Akte van Bevestiging uitreik. (Vorm 3A)*

**Artikel 9**

- 9.1 Die amp van die predikant fokus op die bediening van die Woord in al sy gestaltes.
- 9.2 Die predikant is geroep om 'n volgeling van Christus te wees en sy lewe te wy in diens van die Here en sy kerk.

- 9.3 Die predikant funksioneer in 'n gemeente, in die kerkverband en in die diens van die kerk in die wêreld.
- 9.4 In die gemeente aanvaar die predikant verantwoordelikheid vir onderskeiding, die bestudering en verkondiging van die Woord van God, die bediening van die sakramente, die diens van die gebede en dissipelskap. Die predikant is ook saam met die ander ampte verantwoordelik vir:
- eredienste,
  - die opbou van die gemeente,
  - onderrig en toerusting van gelowiges vir hulle dienswerk,
  - die gemeente se dienswerk in die wêreld,
  - leiding en organisering van die gemeente,
  - uitoefening van Christelike liefde en tug,
  - pastorale versorging,
  - kerkplanting,
  - die voortdurende ontwikkeling van bedieningsvaardighede.

Die kerkraad onderskei en bepaal, saam met die predikant, die wyse waarop dié verantwoordelikhede, in lyn met bepaalde begaafdhede, uitgeleef word en vervat dit in 'n diensooreenkoms.

- 9.5 Die predikant neem ook deel aan die gesamentlike bediening van die kerkverband in die onderskeie kerklike vergaderinge en ekumeniese verhoudings.
- 9.6 As deel van die dienswerk van die kerkverband aan die wêreld tref die kerkverband reëlins oor wyses waarop die predikant diensbaar is in die kerk en in die wêreld.

### **Diensleraar**

- 9.7 Die diensleraar is geroep om 'n volgeling van Christus te wees en sy lewe te wy in diens van die Here en sy kerk.
- 9.8 Die diensleraar funksioneer in 'n gemeente, in die kerkverband en in die diens van die kerk in die wêreld.
- 9.9 Die diensleraar fokus op die toegespitste bediening in 'n spesifieke spesialisasieveld van opleiding.

### **Artikel 10**

'n Predikant mag geen ampspligte (vergelyk Artikel 9 van die *Kerkorde*) onder lidmate van 'n ander gemeente verrig sonder die toestemming van daardie kerkraad nie.

### **Artikel 11**

- 11.1 'n Predikant, diensleraar en standplaasleraar kan die kerklike bediening slegs om ernstige en gewigtige redes verlaat. Die persoon hou op om predikant, diensleraar of standplaasleraar te wees wanneer hy/sy nie meer in diens van 'n gemeente staan

- of kerklike werk verrig nie. Die persoon kan egter vooraf van die Algemene Taakspan Predikantesake verlof ontvang om proponentsbevoegdheid te behou.
- 11.2 Sodanige behoud van bevoegdheid kan alleen verleen word indien die betrekking wat aanvaar word, 'n geestelike karakter dra wat regstreeks met die verkondiging van die Woord in verband staan en ten bate van die Nederduitse Gereformeerde Kerk geag word.
- 11.3 Indien daar ander gewigtige redes is, kan sodanige behoud van bevoegdheid alleen verleen word indien die Algemene Taakspan Predikantesake, op grond van aanbevelings van die kerkraad en die ring, oordeel dat daar genoegsame *bona fide* redes<sup>7</sup> is om 'n ander betrekking<sup>8</sup> te aanvaar.

## Artikel 12

- 12.1 Die predikant, diensleeraar en standplaasleeraar word vir die uitvoering van die amp of bediening deur 'n kerkvergadering (kerkraad, ring, sinode, Algemene Sinode) in diens gestel.
- 12.2 Die predikant, diensleeraar en standplaasleeraar is, as geroepene van die Here deur sy kerk, aan die Here én aan die betrokke kerkvergadering verantwoording verskuldig.
- 12.3 Die kerkvergadering gee aan die predikant, diensleeraar en standplaasleeraar die respek en ondersteuning wat 'n geroepene van die Here en sy kerk in staat kan stel om die amp en bediening effektief uit te voer.
- 12.4 Indiensneming en diensbeëindiging geskied deur die betrokke kerkvergadering in wie se diens die predikant, diensleeraar en standplaasleeraar staan.
- 12.5 Slegs persone wat die nodige ampsbevoegdheid het (vergelyk Artikel 7 van die *Kerkorde*) kan in 'n gemeente of in die kerkverband as predikant, diensleeraar en standplaasleeraar dien.
- 12.6 Die predikant, diensleeraar en standplaasleeraar se dienste word met onmiddellike effek beëindig by verlies van bevoegdheid ingevolge *Reglement 11 vir die Bevoegdheid van Predikante, Diensleeraars, Standplaasleeraars, Proponente en Emeriti*.
- 12.7 Die betrokke kerkvergadering kan die dienste van 'n predikant, diensleeraar en standplaasleeraar in die volgende gevalle beëindig<sup>9</sup>:
- 12.7.1 op grond van wangedrag;
- 12.7.2 op grond van gebrekkige bedieningsvaardigheid of dienslewering;
- 12.7.3 op grond van die gemeente of kerkverband se bedienings- en bedryfsvereistes.

---

<sup>7</sup> *Bona fide* redes is wanneer 'n predikant, diensleeraar of standplaasleeraar bedank uit die werkkring sonder dat daar enigsins sprake is van dissiplinêre en/of tugoptrede. Redes kan inhou dat die predikant, diensleeraar of standplaasleeraar vir die huidige nie die weg oopsien om voort te gaan met die bediening nie.

<sup>8</sup> Met die toekening van proponentsbevoegdheid kan die volgende ook oorweeg word, naamlik: “dra die ander betrekking 'n geestelike karakter wat regstreeks met die verkondiging van die Woord in verband staan en ten bate van die Nederduitse Gereformeerde Kerk geag word”?

<sup>9</sup> Vergelyk *Reglement 21 vir die Bestuur van Diensverhoudinge vir Predikante/Diensleeraars by Ongeskiktheid en Onvermoë*.

## Artikel 13

Die gemeente of kerkverband in wie se diens 'n predikant, diensleeraar of standplaasleeraar staan, sien om na die persoon se geestelike, emosionele en fisieke behoeftes, is medeverantwoordelik vir die bedieningsontwikkeling en is verantwoordelik vir die lewensonderhoud soos ooreengekom<sup>10</sup>.

## Artikel 14

- 14.1 'n Predikant, diensleeraar of standplaasleeraar emeriteer op die ouderdom soos deur die Algemene Sinode bepaal<sup>11</sup>.
- 14.2 'n Predikant, diensleeraar of standplaasleeraar wat weens verswakte gesondheid, ouderdom of andersins uit die diens tree en daarvoor kwalifiseer, ontvang die voordele volgens die bepalinge van die betrokke pensioenfonds.
- 14.3 'n Emeritus ouer as die voorgeskrewe aftreeouderdom kan, met goedkeuring van die ring, vir 'n bepaalde termyn en vir 'n bepaalde taak beroep word<sup>12</sup>.
- 14.4 'n Emeritus wat weens verswakte gesondheid geëmeriteer het, moet eers weer beroepbaar gestel word deur die Algemene Taakspan Predikantesake. Hierdie aansoek moet vergesel wees van:
  - 14.4.1 'n toepaslike mediese sertifikaat en
  - 14.4.2 aanbeveling van die ring.
- 14.5 Emeriti jonger as die voorgeskrewe aftreeouderdom mag in enige predikantspos beroep word.

### **Besluite by Artikel 14:**

#### **14.1 Neerlê van die bediening, Akte van demissie**

- 14.1.1 *Die aftree-ouderdom van alle leraars van gemeentes, predikante in sinodale diens en aan inrigtings verbonde, word op 65 jaar gestel. 'n Leraar wat die ouderdom van 65 jaar bereik het, mag vir hoogstens ses maande na bereiking van sy 65<sup>ste</sup> verjaardag en met toestemming van die betrokke kerkvergadering/kommissie in sy diens aanbly. Die ring moet toesien dat gemeenteleraars binne ses maande na bereiking van die ouderdom 65 aftree.*
- 14.1.2 *Wanneer 'n bedienaar van die Woord van voorneme is om die bediening neer te lê, is hy verplig om ten minste een maand voor die tyd skriftelik aan die kerkraad met opgaaf van redes van sy voorneme kennis te gee en 'n afskrif van hierdie kennisgewing aan die ringskommissie voor te lê.*
- 14.1.3 *Die kerkraad verleen aan die bedienaar van die Woord op 'n wettige gekonstitueerde vergadering van die kerkraad 'n Akte van demissie (Vorm 4A) mits die voorskrifte van die Kerkorde nagekom is en die ringskommissie of die kerkraad geen beswaar daarteen inbring nie.*
- 14.1.4 *Indien beswaar ingebring word, mag die kerkraad die verlening van die Akte van demissie uitstel.*
- 14.1.5 *Waar 'n bedienaar van die Woord die bediening neerlê as gevolg van swak gesondheid of by aftree-ouderdom, geskied dit met behoud van bedieningsbevoegdheid en word aan hom 'n Akte van demissie (Vorm 4E) oorhandig. By aftree ouderdom word 'n Akte van Emeritaat aan hom*

<sup>10</sup> Vergelyk die A tot Z-beleid vervat in die Kerkordeboek of geplaas op die webblad van die NG Kerk [www.ngkerk.org.za](http://www.ngkerk.org.za).

<sup>11</sup> Vergelyk Riglyn 5: Predikant: *aftreeouderdom*.

<sup>12</sup> Vergelyk Reglement 16 vir *Vastetermynpredikantsposte*, punt 4.

gegee (Vorm 4B).

#### **14.2 Beroeping na emeritering**

14.2.1 'n Bedienaar van die Woord wat met behoud van bedieningsbevoegdheid ge-emeriteer het en weer tot die bediening wil terugkeer, moet aan die ringskommissie binne wie se ressort hy woon, 'n versoek rig en dokumentêr bewys dat hy begerig en in staat is om weer voltyds diens te aanvaar. Sy versoek moet vergesel wees van 'n getuigskrif met betrekking tot sy leer en lewe, uitgereik deur die kerkraad binne wie se grense hy woon.

14.2.2 Genoemde kommissie gee van die toegestane aansoek kennis aan die skriba van die Moderamen.

#### **14.3 Afsterwe van bedienaar van die Woord**

14.3.1 Wanneer 'n bedienaar van die Woord te sterwe kom en 'n weduwee of wewenaar of afhanklike minderjarige kinders nalaat, het die naasbestaandes vir 'n tydperk van 1 maand reg op die gehele onbeswaarde inkomste van die vakante predikant-standplaas met bewoning van die pastorie vir 'n tydperk van 3 maande of van die huishuur, of van die huissubsidie wat by onderlinge reëling daarvoor ontvang mag word. Die reistoelae word nie in dié geval by die onbeswaarde inkomste gereken nie. Die verhuisingskoste word deur die kerkraad betaal.

14.3.2 Wanneer 'n bedienaar van die Woord te sterwe kom en geen weduwee of wewenaar of minderjarige kinders nalaat nie, is bloedverwante en meerderjarige kinders wat van hom/haar afhanklik was en by hom/haar ingewoon het, geregtig op die bewoning van die pastorie en die lewensonderhoud vir een (1) maand.

### **2.3 Ouderlinge en diakens**

#### **Artikel 15**

15.1 Ouderlinge en diakens onderskryf met hulle bevestiging hulle instemming met die belydenis van die kerk en die Kerkorde.

15.2 Daar behoort 'n gereelde wisseling van ouderlinge en diakens te wees. Die dienstyl van ouderlinge en diakens word deur die kerkraad gereël.

#### **Besluite by Artikel 15:**

15.1 Na elke verkiesing moet 'n kerkraadslid opnuut bevestig word.

15.2 Dit word aanbeveel dat nadat 'n kerkraadslid vier jaar aaneen gedien het, hy soveer moontlik een jaar rus voordat hy weer verkies word.

15.3 Kerkraadslede word verkies volgens die Reglement van Orde (VS).

15.4 Die vergadering waarop 'n kerkraadslid verkies moet word, moet aan die gemeente tydens die erediens op die Sondag voor die verkiesing bekend gemaak word. 'n Persoon wat tot kerkraadslid verkies word, moet sonder versuim daarvan skriftelik kennis kry en sy verkiesing moet op twee agtereenvolgende Sondae tydens die openbare erediens afgekondig word.

15.5 'n Ongesensureerde lidmaat van die gemeente het die reg om tot 24 uur na die tweede afkondiging van die verkiesing skriftelik beswaar, met opgawe van rede(s), by die kerkraad in te dien, wat sonder versuim 'n vergadering van die kerkraad belê om die beswaar te oorweeg. By die stigting van 'n nuwe gemeente, moet 'n beswaar teen 'n verkose kerkraadslid voor die eerste Sondag na sy verkiesing, skriftelik by die konsulent ingedien word. Waar 'n beswaar gegrond bevind word, word die verkiesing nietig verklaar en moet die vakature so spoedig moontlik aangevul word.

15.6 'n Persoon wat tot kerkraadslid verkies is, moet binne agt dae na die tweede afkondiging skriftelik antwoord of hy die verkiesing aanvaar of bedank. By die bedanking moet redes vermeld word.

15.7 By afstigting moet 'n verkose kerkraadslid voor die eerste Sondag na sy verkiesing deur die gemeente

## Artikel 16

- 16.1 Die amp of bediening van die ouderling is gerig op geestelike onderskeiding en leiding, versorging, bestuur en toesig, en omvat:
- 16.1.1 die toerusting van lidmate vir hulle dienswerk;
  - 16.1.2 die regering van die gemeente;
  - 16.1.3 die doen van huisbesoek;
  - 16.1.4 die uitoefening van opsig en tug;
  - 16.1.5 waaksaamheid oor die suiwerheid van die leer;
  - 16.1.6 medeverantwoordelikheid vir die kategetiese onderwys;
  - 16.1.7 die roeping om ander na Christus te lei;
  - 16.1.8 die lei van eredienste waar die kerkraad en die ring daartoe vergunning gegee het<sup>13</sup>;
  - 16.1.9 dissipelskap; en
  - 16.1.10 ander opdragte wat deur die kerkraad bepaal word in die lig van artikel 16.1.
- 16.2 Die kerkraad bepaal met inagneming van artikel 16.1.1 tot 16.1.10 van die *Kerkorde* die bedienings-verantwoordelikheid van elke ouderling.

## Artikel 17

- 17.1 Die amp of bediening van die diaken is gerig op praktiese dienswerk. Dit begin in die erediens, en gaan vandaar uit na die gemeente en die wêreld waarin die lidmate leef. Die diakenamp omvat:
- 17.1.1 die toerusting van lidmate vir hulle dienswerk;
  - 17.1.2 die opheffing, vertroosting en ondersteuning van almal wat in een of ander opsig barmhartigheidsdiens benodig;
  - 17.1.3 die insameling en besteding van middele wat vir die diakonale werk nodig is;
  - 17.1.4 die organisering en leiding van die barmhartigheidsbediening van die gemeente;
  - 17.1.5 die lei van eredienste waar die kerkraad en die ring daartoe vergunning gegee het<sup>14</sup>;
  - 17.1.6 ander opdragte wat deur die kerkraad bepaal word in die lig van artikel 17.1.
- 17.2 Die kerkraad bepaal met inagneming van artikel 17.1.1 tot 17.1.6 van die *Kerkorde* die bedieningsverantwoordelikheid van elke diaken.

<sup>13</sup> Vergelyk artikel 48.3.5 van die *Kerkorde* en Riglyn 4: *Riglyne vir Bedienaars (Ouderlinge en Diakens met bevoegdheid)*

<sup>14</sup> Vergelyk artikel 48.3.5 van die *Kerkorde*.

## HOOFSTUK 3

### DIE VERGADERINGE VAN DIE KERK

#### 3.1 Algemene bepalinge

##### Artikel 18

Daar is vier kerkvergaderinge: kerkraad, ring, sinode en Algemene Sinode.

##### Artikel 19

Die opsig oor, die regering van en die tug en/of dissipline in die kerk word aan hierdie vergaderinge toevertrou.

##### Artikel 20

- 20.1 Die vergaderinge het, elkeen na sy eie aard en funksie, 'n kerklike gesag<sup>15</sup> deur Christus aan hulle toevertrou.
- 20.2 Die gesag van die ring, na aanleiding van sy aard en funksie, oor die kerkraad is dieselfde as dié van die sinode en die Algemene Sinode, na aanleiding van elkeen se eie aard en funksie, oor die kerkverband.

##### Artikel 21

Die kerkvergaderinge behandel sake vanuit kerklike perspektief, in die lig van die Woord van God en op kerklike wyse.

##### Artikel 22

- 22.1 In meerdere vergaderinge word alleen die sake behandel wat daar tuis hoort of daarheen verwys is deur mindere vergaderinge en wat nie in mindere vergaderinge afgehandel kon word nie.
- 22.2 'n Meerdere vergadering het die bevoegdheid om 'n saak wat 'n mindere vergadering moes afhandel, onder die volgende omstandighede te hanteer:
  - 22.2.1 waar 'n mindere vergadering nie bestaan nie; en
  - 22.2.2 in die geval van onvermoë of wanbestuur by die mindere vergadering.
- 22.3 'n Meerdere vergadering kan in die geval van wanbestuur of onvermoë 'n mindere vergadering ontbind en hersaamstel en/of onder die meerdere vergadering se bestuur plaas.

##### Artikel 23

#### Kerklike appèl, gravamen (beswaarskrif) en hersiening (revisie)

- 23.1 Die besluite van vergaderinge of hulle gevolmagtigdes is bindend, in soverre dit nie in stryd is met die Woord van God, die belydenis van die kerk en die *Kerkorde* nie (sien Artikel 1 en 2).

---

<sup>15</sup> Vergelyk *Artikel 4* en *21* van die *Kerkorde*.

**Aantekening by Artikel 23.1**

*Vergelyk Reglement 23 van die AS Kerkorde 2023.*

- 23.2. Alle ampsdraers en lidmate van die kerk word daartoe opgeroep om voortdurend met die Woord van God, die belydenis en die *Kerkorde* as maatstaf die werk van vergaderings en ampsdraers te beoordeel.
- 23.3. Besluite van kerkrade, ringe en sinodes kan by wyse van appèl of aansoek om hersiening (revisie) heroorweeg word volgens voorskrifte van die reglement.
- 23.4. In die geval van 'n besluit van die Algemene Sinode, kan 'n proseduriële beswaar, gravamen oor leer/etiese sake (beswaarskrif) of aansoek om hersiening (revisie) aan die Algemene Sinode gerig word.
- 23.5. Iemand wat appelleer, 'n gravamen (beswaarskrif) indien, of aansoek doen om hersiening (revisie) is verplig om die appèl, gravamen (beswaarskrif), aansoek om hersiening (revisie) of prosedurele beswaar in te dien in ooreenstemming met die reglement wat deur die Algemene Sinode daarvoor goedgekeur is. (Sien Regl 23.)
- 23.6. Lidmate, ampsdraers en predikante/diensleraars/standplaasleeraar in diens van die kerkverband van die Nederduitse Gereformeerde Kerk mag hulle nie tot die burgerlike hof wend in hulle beswaar teen 'n kerkvergadering se besluit(e) nie, voordat hulle nie eers die kerklike middele tot hulle beskikking aangewend en uitgeput het nie.

**Aantekening by Artikel 18 tot 23:**

*Artikel 18 tot 23 moet saamgelees word.*

*Elke kerklike vergadering het 'n eie werkerrein en 'n eie aard soos bepaal deur die Kerkorde en funksioneer met die gesag wat deur Christus verleen word.*

*Die kerklike wyse kom primêr en wesenlik na vore waar die Skrif, die belydenis en Kerkorde in die beraadslaginge en besluite spreek. Dit lê in die aard van 'n kerklike vergadering om te oorreed.*

*'n Meerdere vergadering behoort 'n saak na 'n mindere vergadering terug te verwys indien hy van oordeel is dat die saak nie na behore aandag ontvang het by die mindere vergadering nie.*

**Artikel 24**

Die handeling van elke vergadering word daagliks met Skriflesing en gebed begin en met danksegging beëindig.

**Artikel 25**

Elke vergadering het 'n voorsitter wat verantwoordelik is vir die leiding en ordelike verloop van die vergadering, en 'n skriba wat die handeling van die vergadering opteken.

**3.2 Besondere bepalinge**

**3.2.1 Die kerkraad**

**Artikel 26**

- 26.1 Elke gemeente het 'n kerkraad aan wie die opsig oor, die regering van en die tug en/of dissipline in die gemeente toevertrou is.

- 26.2 Die kerkraad bestaan uit al die predikante/diensleraars/standplaasleraars asook die ouderlinge en diakens<sup>16</sup>.

**Besluit by Artikel 26:**

*Die betrokke kerkvergadering wat 'n besluit neem, bly die verantwoordelike en aanspreeklike instansie (tensy die vergadering buite sy bevoegdheid opgetree het, in welke geval die persone teenwoordig aanspreeklik word). 'n Adviseur kan nie verantwoordelik gehou word nie, tensy daar moedswillige misleiding (mala fide) van die vergadering was. Alle besluite van kerkregtelike aard moet met die SDR uitgeklaar word.*

**Aantekeninge by Artikel 26:**

- 26.1 *Hierdie artikel moet saamgelees word met Artikels 20-25. Omdat die gemeente volledig kerk is, kan die kerkraad alle kerklike sake hanteer. Hy kan net nie die sake wat deur die Kerkorde aan meerdere vergaderings toegeken is, afhandel nie.*
- 26.2 *Die Buitengewone Sinode VS 1998 het die volgende in verband met kerkrade besluit: "Aangesien gemeentes as komplee kerke saam kerkverband vorm, moet die vorming van 'n nuwe kerkverband in die NG Kerkfamilie met al sy besonderhede (belydenisskrifte, kerkorde, toetreding van gemeentes, ringe en sinodes, stoflike aangeleenthede en al die ander sake vervat in die besluite van die Algemene Sinode van 1994) ook deur die kerkrade goedgekeur word."*

**Artikel 27**

- 27.1 'n Kerkraad mag desentraliseer en aan gedentraliseerde kerkrade<sup>17</sup> duidelik omskrewe bevoegdhede gee wat aan die ring vir goedkeuring voorgelê word.
- 27.2 Vir die behartiging van die besondere werksaamhede aan die onderskeie ampte verbonde, mag die ouderlinge en diakens gereeld afsonderlik vergader.

**Aantekeninge by Artikel 27:**

- 27.1 *Dit is wenslik dat 'n kerkraad nie uit te min persone bestaan nie. Om hiërargie en ampsoorheersing uit te skakel behoort daar 'n gelyke getal ouderlinge en diakens te wees.*
- 27.2 *Indien 'n hele kerkraad bedank, kan die ring deur middel van die ringskommissie die betrokkenes probeer oorreed om voort te gaan met hulle diens. Indien hierdie poging nie slaag nie, sou die aangewese weg wees om 'n gemeentevergadering te belê om 'n ander kerkraad te verkies.*

**Artikel 28**

- 28.1 Die kerkraad vergader minstens vier keer per jaar. In buitengewone omstandighede en met die goedkeuring van die ring kan die kerkraad minder vergader.
- 28.2 Die kerkraad kies jaarliks 'n voorsitter uit die lede van die kerkraad.
- 28.3 Buitengewone vergaderings van die kerkraad word deur die voorsitter byeengeroep na oorlegpleging met die predikant(e), indien die voorsitter nie 'n predikant van die gemeente is nie.
- 28.4 Indien die plaaslike predikant(e) nie by 'n gewone of buitengewone kerkraadsvergadering teenwoordig kan wees nie, óf indien die pos van predikant vakant is, woon die konsulent of 'n ander predikant (dienend óf ge-emeriteerd),

<sup>16</sup> Vergelyk *Nederlandse Geloofsbelydenis* Artikel 30. Die beginsel word gehandhaaf dat alle predikante, ouderlinge en diakens in die kerkraad (kerkraad en/of gedentraliseerde kerkrade) moet dien (vergelyk artikels 26.2 en 27.1).

<sup>17</sup> Gedentraliseerde kerkrade word saamgestel uit die predikant(e), ouderlinge en diakens, aangewys deur die kerkraad. Met die term "gedentraliseerde kerkraad" word enige groepering in die gemeente verstaan.

deur die ring of sy gevolmagtigde daartoe aangewys, die vergadering adviserend namens die ring by, met verslag aan die ring. Die persoon kan ook op versoek van die kerkraad as voorsitter optree.

### 3.2.2 Die ring

#### Artikel 29

As uitdrukking van die kerkverband en met die oog op behoorlike kerklike dissipline, word gemeentes onderling gegroepeer tot ringe. Hierdie groepering van gemeentes word van tyd tot tyd deur die sinode gedoen. Die ring vergader een maal per jaar of soos deur die betrokke sinode bepaal.

#### **Besluite by Artikel 29: Sien Reglement 4: Reglement van die Ringe**

##### **Aantekeninge by Artikel 29:**

- 29.1 *Om aan die ring as uitdrukking van die kerkverband gestalte te gee en ten einde die gelykwaardigheid van gemeentes te bevorder, behoort die ring om die beurt in verskillende gemeentes te vergader.*
- 29.2 *Ringe behoort ter wille van afwisseling die plaaslike leraar of een van die plaaslike leraars as voorsitter te verkies. Sodoende word hiërargie teengewerk en kry al die leraars 'n beurt in die voorsitterskap van die ring.*
- 29.3 *Die skriba behartig die pligte soos bepaal in die Kerkorde en soos deur die ring en sinode aan hom opgedra.*

#### Artikel 30

- 30.1 Die ring word saamgestel uit een predikant/diensleraar/standplaasleraar en een ouderling/diaken as afgevaardigdes deur die kerkraad van elke gemeente binne die ringsgebied. Waar die pos vir predikant/diensleraar/standplaasleraar vakant is, kan 'n ouderling/diaken in die plek van die predikant afgevaardig word.
- 30.2 As 'n gemeente meer as een pos vir predikant/diensleraar het, het die kerkraad die reg om meer predikante/diensleraars en nog een ouderling/diaken vir elke bykomende predikant/diensleraar af te vaardig, indien die sinode daartoe besluit. Waar in sodanige gemeente 'n pos vir predikant/diensleraar vakant is, mag die kerkraad 'n ouderling/diaken vir die vakante pos afvaardig.
- 30.3 Vir elke afgevaardigde word 'n sekundus aangewys. 'n Ouderling/diaken mag as sekundus vir 'n predikant optree.
- 30.4 Alle afgevaardigdes moet van geloofsbriewe voorsien wees.

#### **Besluite by Artikel 30:**

- 30.1 *Elke kerkraad binne die ringsgebied vaardig sy leraar(s) en een ouderling/diaken vir elke pos vir leraar(s) af na die ringsvergadering. Waar 'n gemeente nie 'n leraar(s) het nie of die pos van leraar(s) vakant is, word 2 ouderlinge/diakens afgevaardig. 'n Gelyke aantal sekundi word aangewys wat, indien nodig, in volgorde opgeroep word.*
- 30.2 *'n Primarius en sekundus ouderling/diaken mag mekaar tydens die ringsitting vervang, behalwe tydens 'n tugondersoek.*

## Artikel 31

Tot die werksaamhede van die ring hoort:

- 31.1 kerkvisitasie;
- 31.2 die opsig oor die gemeentes, om toe te sien dat kerkrade en gemeentes hulle roeping nakom;
- 31.3 advies en hulp aan kerkrade;
- 31.4 die stigting van nuwe gemeentes of ontbinding van gemeentes op versoek van kerkrade en die reëling van gemeentelike grense<sup>18</sup>;
- 31.5 die behandeling van sake wat óf in eerste instansie óf op appèl voor die ringsvergadering gebring word;
- 31.6 die begeleiding van gemeentes waar die behoefte ontwikkel vir nuwe geloofsgemeenskappe binne die ringsgebied, of in samewerking met ander ringe;
- 31.7 die behartiging van die gemeenskaplike roeping en gesamentlike werksaamhede van die gemeentes binne die ring soos telkens deur die ring bepaal;
- 31.8 die opsig, tug en/of dissipline oor alle ouderlinge, diakens, predikante, diens- en standplaasleraars wat emeriti en proponente insluit, sonder om die opsig van die kerkraad oor sy ampsdraers uit te sluit (vergelyk artikel 62.2 van die *Kerkorde*);
- 31.9 die aanwys van konsulente;
- 31.10 die aanwys van 'n ringskommissie as sy gevolmagtigde wat tussen vergaderings van die ring sake van spoedeisende belang en ander opdragte van die ring behartig;
- 31.11 die toekenning van beperkte bevoegdheid op versoek van kerkrade (vergelyk artikel 48.3.5 van die *Kerkorde*).

### **Besluite by Artikel 31:**

- 31.1 *Tydens sy gewone jaarlikse vergadering benoem die ring minstens twee visitatore met sekundi, vir elke gemeente binne sy gebied. Die beginsels van afwisseling, kontinuïteit, ervaring en bekwaamheid moet in ag geneem word.*
- 31.1.1 *Met die oog op die pastorale versorging en die welsyn van die gemeente(s) besoek die visitatore die gemeente(s) en sy leraar(s) aan hulle toegewys minstens een keer per jaar. Die tyd van die besoek(e) word deur die ring bepaal.*
- 31.1.2 *Die visitasie handel oor die leer en lewe van die gemeente aan die hand van die vrae waarop die ring besluit, met dien verstande dat die volgende rubrieke aandag kry: die getroue uitvoering van die ampswerk; die handhawing van die gereformeerde leer; die nakoming van die Kerkorde en besluite van meerdere vergaderings en die geestelike op- en uitbou van die gemeente.*
- 31.1.3 *Een van die visitatore lei na die ringsitting 'n erediens in die gemeente. By hierdie geleentheid praat hy ook oor die visitasie in die algemeen of oor sake waaroor met die kerkraad ooreengekom is.*
- 31.2 *Die ring benoem 'n konsulent vir elke gemeente, iemand anders as 'n leraar(s) van die gemeente.*

<sup>18</sup> Vergelyk Reglement 27 vir Vermeerdering, Kombinerings, Eenwording en Samesmelting van Gemeentes.

**Aantekeninge by Artikel 31:**

- 31.1 *’n Saak kan voor die ring gebring word by wyse van ’n beskrywingspunt deur ’n kerkraad of ’n ongesensureerde lidmaat met die toestemming van die kerkraad.*
- 31.2 *’n Konferensie met die gasheergemeente kan tydens die ringsitting gehou word. Die spreker(s) en onderwerp van die konferensie word normaalweg deur die gasheerkerkraad in oorleg met die ringskommissie bepaal.*

### **3.2.3 Die sinode**

#### **Artikel 32**

- 32.1 Die sinode word saamgestel uit afgevaardigdes van gemeentes wat geografies ’n eenheid vorm en maklik vergader. Die groepering kan deur die Algemene Sinode/Algemene Sinodale Moderamen gewysig word op versoek en met goedkeuring van die betrokke sinode(s)/sinodale kommissie(s).<sup>19</sup>
- 32.2 Gemeentes wat by ’n ander sinode wil inskakel, doen aansoek by beide sinodes/moderamens/sinodale kommissies wat dit oorweeg aan die hand van prosedures soos deur die Algemene Sinode/Algemene Sinodale Moderamen in oorleg met die Algemene Taakspan Regte vasgestel is. Indien beide die betrokke sinodes/moderamens/sinodale kommissies die aansoek goedkeur, word dit aan die Algemene Sinode/Algemene Sinodale Moderamen voorgelê vir goedkeuring.

#### **Artikel 33**

- 33.1 Sinodes word op een van die volgende maniere, waaroor elke sinode self besluit, saamgestel:
- 33.1.1 uit een predikant/diensleeraar/standplaasleeraar en een kerkraadslid (ouderling/diaken) as afgevaardigdes deur die kerkraad van elke gemeente binne die sinodale gebied. Waar die pos vir predikant/diensleeraar/standplaasleeraar vakant is, kan ’n ouderling/diaken in die plek van die predikant/diensleeraar/standplaasleeraar afgevaardig word; óf
- 33.1.2 as ’n gemeente meer as een pos vir predikant/diensleeraar/standplaasleeraar het, het die kerkraad die reg om meer predikante/diensleeraars/standplaasleeraars en nog een kerkraadslid (ouderling/diaken) vir elke bykomende predikant/diensleeraar/standplaasleeraar af te vaardig, indien die sinode daartoe besluit. Waar in sodanige gemeente ’n pos vir predikant/diensleeraar/standplaasleeraar vakant is, mag die kerkraad ’n kerkraadslid (ouderling/diaken) vir die vakante pos afvaardig; óf
- 33.1.3 ’n gelyke aantal predikante/diensleeraars/standplaasleeraars en kerkraadslede (ouderlinge/diakens) uit elke ring in die sinodale gebied. Die sinode besluit op die wyse van afvaardiging en die aantal afgevaardigdes per ring.
- 33.2 Die teologiese opleiding word in adviserende hoedanigheid verteenwoordig deur ’n NG dosent van die Teologiese Fakulteit Stellenbosch en/of die Teologiese Fakulteit Pretoria en/of die Teologiese Fakulteit Bloemfontein.

---

<sup>19</sup> Die onderskeie sinodes het verskillende benaminge (bv. moderamen, diensraad, sinodale dienskommissie) vir die liggaam wat die funksies van die sinodale kommissie verrig.

- 33.3 Vir elke afgevaardigde word 'n sekundus aangewys. 'n Kerkraadslid (ouderling/diakon) mag as sekundus vir 'n predikant/diensleeraar/standplaasleeraar optree.
- 33.4 Afgevaardigdes moet van geloofsbriewe voorsien wees.

**Besluite by Artikel 33:**

- 33.1 *Elke kerkraad binne die sinodale gebied vaardig ten minste een leraar en een kerkraadslid af na die Sinode. Gemeentes met meer as een leraar kan na goeddunke soveel addisionele leraars en 'n kerkraadslid vir elke leraar afvaardig, tot die totaal van die aantal poste vir die leraar van die gemeente, met dien verstande dat hulle proporsioneel bykomend sal bydra tot die koste van die Sinode. 'n Gelyke aantal sekundi word aangewys wat, indien nodig, in volgorde opgeroep word.*
- 33.2 *'n Primarius en sekundus afgevaardigde mag mekaar tydens die sinode vervang, met dien verstande dat die afvaardigende kerkraad self vir die ekstra koste instaan.*

**Artikel 34**

Die sinode vergader ten minste elke vier jaar, sover moontlik in die jaar na die gewone vergadering van die Algemene Sinode.

**Besluite by Artikel 34:**

- 34.1 *Die gewone vergadering van die Sinode word ten minste elke vier jaar gehou op 'n plek en datum soos deur die Moderamen bepaal.*
- 34.2 *'n Buitengewone vergadering kan deur die Moderamen bepaal word óf regstreeks óf wanneer minstens tien kerkrade uit verskillende ringe met opgaaf van redes daarvoor aansoek doen.*
- 34.3 *'n Gewone sowel as 'n buitengewone vergadering van die Sinode word deur die skriba van die Moderamen deur middel van 'n kennisgewing in Die Kerkbode byeengeroep.*

**Artikel 35**

Tot die taak en bevoegdheid van die sinode hoort:

- 35.1 die opstel en wysiging van bepalings en reglemente vir die werksaamhede aan hom toevertrou, mits dit nie met die *Kerkorde* in stryd is nie;
- 35.2 die behartiging van die gemeenskaplike roeping en gesamentlike werksaamhede van die gemeentes in sy gebied, met inagneming van Artikel 22 en daarom ook Artikel 26, 31 en 43 van die *Kerkorde*. Die aard en omvang van hierdie sake word deur die sinode self bepaal;
- 35.3 die opleiding van predikante/diensleeraars/standplaasleeraars soos deur Artikel 6 van die *Kerkorde* bepaal;
- 35.4 die opbou van die nodige fondse met die oog op eie werksaamhede en die finansiering van die Algemene Sinode volgens 'n aanvaarde formule;
- 35.5 die behandeling van alle sake wat in eerste instansie of by wyse van appèl voor hom gebring word;
- 35.6 die aanwysing van afgevaardigdes na die Algemene Sinode; en
- 35.7 die opname van ander belydenisskrifte in die kerklike bepalinge van die sinode, op voorwaarde dat:

- 35.7.1 die Algemene Sinode vooraf bevind het dat sodanige belydenisskrif nie in stryd is met die Skrif, die Formuliere van Eenheid en die erkende ekumeniese belydenisse nie;
- 35.7.2 minstens twee derdes van 'n sinode ten gunste daarvan besluit;
- 35.7.3 minstens twee derdes van die kerkrade van 'n sinode ten gunste daarvan besluit en die nodige approbasie verkry is;
- 35.7.4 dit sonder dwang vir lidmate, ampsdraers en ander kerkvergaderinge binne die sinodale gebied geskied, en
- 35.7.5 dit nie as 'n wysiging van die NG Kerk se gemeenskaplike belydenisgrondslag beskou word nie.

**Aantekeninge by Artikel 35**

- 35.1 *Sending, barmhartigheidsdiens, ensovoorts (Artikel 35.2), is die primêre taak van die gemeente. Slegs waar die taak te groot is vir een of meer gemeentes of ringe, word die saak sinodaal hanteer. Die Sinode waak daarteen om werk na hom aan te trek wat by gemeentes of ringe tuishoort.*
- 35.2 *Die Sinode herbevestig die uitgangspunt dat die plaaslike gemeente volledig kerk is.*
- 35.3 *Die Sinode erken dat gemeentes met mekaar in sinodale verband oorleg pleeg oor sake wat nié volledig onder die toesig van kerkrade en ringe tuiskom nie.*

**Artikel 36**

Die samestellende kerke of sinodes behou volle seggenskap oor hul eiendomme, finansies, werksaamhede, ensovoorts, wat hulle voor toetreding tot die algemene sinodale verband gehad het of daarna verwerf, behalwe die wat volgens die *Kerkorde* aan die Algemene Sinode oorgedra is of sal word, of deur die Algemene Sinode in trust gehou word.

**Artikel 37<sup>20</sup>**

Dit staan die samestellende kerke vry om met behoud van alle regte, voorregte, besittings, naam, ensovoorts, uit die algemene sinodale verband te tree wanneer hulle so 'n stap voor God in die lig van sy Woord kan regverdig.

**3.2.4 Die Algemene Sinode**

**Artikel 38**

**Samestelling en frekwensie van vergaderings**

- 38.1 Die Algemene Sinode vergader elke vier jaar.
- 38.2 Die vergadering van die Algemene Sinode bestaan uit 'n maksimum van 370 afgevaardigdes wat sovêr moontlik saamgestel word uit 'n gelyke aantal predikante en kerkradslede.
- 38.3 200 afgevaardigdes wat uit 20 persone per samestellende sinode saamgestel word, waarvan die helfte verkieslik jonger as 40 jaar moet wees.

<sup>20</sup> Die ATR interpreteer *Artikel 37* soos volg: *Artikel 37* is nie van toepassing op gemeentes nie; en die samestellende kerke waarna *Artikel 37* verwys, is tans die 9 sinodes waaruit die Algemene Sinode saamgestel is.

- 38.4 160 afgevaardigdes word proporsioneel volgens die aantal belydende lidmate van elke samestellende sinode aangewys.
- 38.5 Die Algemene Kuratorium wys 10 afgevaardigdes uit die vyf opleidingsentra, met volle sittingsreg aan. Hierdie persone word addisioneel bygevoeg by die getal afgevaardigdes uit die betrokke samestellende sinodes.
- 38.6 Diversiteit ten opsigte van geslag en ouderdom word in ag geneem met die saamstelling van afvaardigings.
- 38.7 Elke afvaardiging moet van 'n geloofsbrief voorsien wees.

### **Artikel 39**

Die afgevaardigde predikant met die langste diens, wat die oudste in jare is, open die vergadering en gaan voor totdat die moderator gekies is. Die algemene sekretaris help met die konstituering van die vergadering en die verkiesing van die moderator.

### **Artikel 40**

Die moderatuur (dagbestuur van die ASM) van die Algemene Sinode, bestaande uit 'n moderator (voorsitter), 'n assessor (ondervoorsitter) en 'n aktuaris, lei die vergadering van die sinode (vergelyk Artikel 25 van die *Kerkorde*). Die algemene sekretaris tree op as skriba van die vergadering, met adviserende stem. Die moderatuur word tydens die sinodesitting deur die moderators/voorsitters van die onderskeie sinodes bygestaan.

### **Artikel 41**

- 41.1 Aan die einde van die vergadering van die Algemene Sinode word die moderatuur (dagbestuur) deur die ASM verkies vir die duur van die volgende termyn.
- 41.2 Lede van die moderatuur kan nie vir meer as twee termyne in dieselfde posisie verkies word nie.
- 41.3 Die ASM (Algemene Sinodale Moderamen) konstitueer aan die einde van die Algemene Sinode vergadering<sup>21</sup>.

### **Artikel 42**

- 42.1 Die Algemene Sinode besluit self wanneer die volgende Algemene Sinode byeenkom, met dien verstande dat die Algemene Sinode nie langer as vier jaar uitmekaar vergader nie.
- 42.2 Die Algemene Sinodale Moderamen roep 'n buitengewone Algemene Sinode byeen indien dit nodig geag word.

### **Artikel 43**

- 43.1 Tot die taak en funksie van die Algemene Sinode behoort
- 43.1.1 dit wat uitdrukking gee aan die kerk se gemeenskaplike identiteit in terme van Woord, Belydenis, *Kerkorde*, roeping en beleid;
- 43.1.2 dit wat die kerk se nasionale en internasionale ekumeniese verhoudinge raak;

---

<sup>21</sup> Vergelyk *Reglement 2 vir die Algemene Sinodale Moderamen*.

- 43.1.3 dit wat die kerk se publieke getuienis op nasionale en internasionale gebied raak (vergelyk artikel 67.4 van die *Kerkorde*);
- 43.1.4 die viering van die kerk se onderlinge verbondenheid, eenheid en diversiteit;
- 43.1.5 die bevordering van sinergie tussen samestellende sinodes ten opsigte van roeping en getuienis;
- 43.1.6 die aanwysing van die Bybelvertaling(s) wat amptelik gebruik moet word;
- 43.1.7 die vasstelling van die belydenisskrifte ooreenkomstig Artikel 44, die *Kerkorde*, die liturgiese formuliere en gebruike, die liederebundel(s) en die liturgiese grondlyne vir eredienste;
- 43.1.8 die vasstelling van die formele vereistes vir die opleiding en bevoegdheid van die predikante, diensleraars en standplaasleraars;
- 43.1.9 die administrasie van vaste eiendom en fondse van die Algemene Sinode;
- 43.1.10 die oorsig en instandhouding van 'n konstruktiewe werksverhouding met die kerklike maatskappye naamlik Bybel-Media, CLF en Hugenote Kollege;
- 43.1.11 die hantering van appèlsake wat voor die Algemene Sinode gebring word;
- 43.2 Die agenda van die Algemene Sinode word bepaal deur die sake in 43.1.
- 43.2.1 Die Algemene Sinode hanteer nie sake wat deur die samestellende sinodes of gemeentes hanteer kan word nie.
- 43.2.2 Die agenda van die Algemene Sinode word saamgestel uit sake wat deur die sinodes verwys word en wat uit die werk van die ASM voortspruit, met dien verstande dat dit nie die mandaat in 43.1 oorskry nie.
- 43.3 Die Algemene Sinode gee 'n mandaat aan die ASM om as gevolmagtigde die werksaamhede, bedieningsprioriteite, besluite en opdragte van die Algemene Sinode uit te voer aan die hand van die toepaslike reglemente vir die Algemene Sinode en Algemene Sinodale Moderamen.

#### **Artikel 44**

- 44.1 Die wysiging van die belydenis kan alleen geskied nadat elke sinode afsonderlik met 'n tweederdemeerderheid én twee derdes van alle kerkrade elk met 'n tweederdemeerderheid ten gunste daarvan besluit het.
- 44.2 Artikel 44.1 en 44.2 van die *Kerkorde* word gewysig nadat elke sinode afsonderlik met 'n tweederdemeerderheidstem ten gunste daarvan besluit het en die Algemene Sinode daarna met 'n tweederdemeerderheidstem ten gunste daarvan besluit.
- 44.3 Die Algemene Sinode mag, met uitsondering van artikel 44.1 en 44.2 van die *Kerkorde*, die *Kerkorde* wysig of aanvul met 'n tweederdemeerderheidstem.
- 44.4 Sake in verband met leertug, leergeskille of geskille tussen sinodes en mindere vergaderinge kan by wyse van appèl voor die Algemene Sinode dien. In gevalle van leertug en leergeskille word 'n tweederdemeerderheidsbesluit vir die bekragtiging van die uitspraak van die Algemene Sinode vereis (vergelyk Artikel 65.2 van die *Kerkorde*).

44.5 Indien 'n tweederdemeerderheid nie verkry word nie, mag enige van die partye 'n verdere beroep op die afsonderlike sinodes doen. Die gesamentlike volstreekte meerderheid van stemme van die afsonderlike sinodes is dan beslissend.

#### **Artikel 45**

Die Algemene Sinode mag artikels van die *Kerkorde*, met die uitsondering van artikel 44.1 en 44.2 van die *Kerkorde*, met 'n tweederdemeerderheidstem óf opskort óf daarvan vrystelling verleen.

#### **Artikel 46**

Die Algemene Sinode stel reglemente op met die oog op die uitvoering van sy werksaamhede.

#### **Artikel 47**

47.1 Die Algemene Sinodale Moderamen mag reglemente van taakspanne van die Algemene Sinodale Moderamen wysig indien dit noodsaaklik raak om die werksaamhede van die Algemene Sinode te optimaliseer.

47.2 Die Algemene Sinodale Moderamen mag huidige riglyne wysig en nuwe riglyne opstel vir die werksaamhede van die taakspanne van die Algemene Sinode.

## HOOFSTUK 4

### DIE ARBEID VAN DIE KERK

#### 4.1 Die openbare erediens

##### Artikel 48

- 48.1 Die erediens is, onder die genadige werking van die Heilige Gees, die amptelike openbare samekoms van die gemeente tot ontmoeting met God en onderlinge gemeenskap van die heiliges, onder leiding van die besondere ampte en deur die bediening van die Woord, die bediening van die heilige sakramente, die gebed, kerklid en dankoffers.
- 48.2 Die inrigting van die eredienste word deur die kerkraad vasgestel met gebruikmaking van die liturgiese grondlyne soos deur die Algemene Sinode vasgelê.
- 48.3 Die leiding van eredienste berus by een van die volgende persone:
- 48.3.1 die predikant van die plaaslike gemeente, of in die persoon se afwesigheid:
- 48.3.2 die konsulent;
- 48.3.3 'n ander bevoegde predikant<sup>22</sup> (vergelyk Reglement 11, *Reglement vir die Bevoegdheid van Predikante, Proponente en Emeriti*) van gereformeerde belydenis wat deur die kerkraad daartoe uitgenooi is;
- 48.3.4 'n student van 'n teologiese fakulteit van die Nederduitse Gereformeerde Kerk (vergelyk artikel 6.2 van die *Kerkorde*) wat, óf in ooreenstemming met die vereistes van die betrokke kuratorium en met toestemming van die kerkraad, deel van die praktiese opleiding in die gemeente ontvang, óf na voltooiing van die praktiese werk deur 'n kerkraad uitgenooi is;
- 48.3.5 'n ouderling/diaken wat preekvergunning van die kerkraad en die ring ontvang het (vergelyk Artikel 4, 10 en 16.1.8, 17.1.5 en Besluit 13 van die *Kerkorde*)<sup>23</sup>.
- 48.4 Prediking:
- 48.4.1 met die oog op die verkondiging van die volle raad van God moet die prediking deurgaans volle reg aan die kerklike jaar en die belydenisskrifte laat geskied; en
- 48.4.2 die inhoud van die prediking moet steeds 'n verklaring en toepassing van die Heilige Skrif wees.
- 48.5 Die Heidelbergse Kategismus, Nederlandse Geloofsbelydenis en Dordtse Leerreëls moet deurentyd sistematies in die prediking aan die orde gestel word.

---

<sup>22</sup> Onder 'n bevoegde predikant wat eredienste kan lei, word verstaan 'n persoon met ampsbevoegdheid in die NG Kerk of 'n ander kerk van gereformeerde belydenis. Wanneer 'n kerkraad aan 'n persoon wat nie sodanig bevoeg geag word nie 'n uitnodiging rig om 'n erediens te lei, word daar strydig met die *Kerkorde* gehandel (Handelinge Algemene Sinode 1998, bl 409, 1.19.2.2). Vergelyk *Reglement 26 vir die Verhouding tot ander Kerke en Groepe*.

<sup>23</sup> Vergelyk Riglyne 4 vir bedienaars (ouderlinge en diakens met bevoegdheid).

## 4.2 Die sakramente

### Artikel 49

#### 49.1 Die doop<sup>24</sup>

Die heilige doop word deur 'n predikant<sup>25</sup> bedien met gebruikmaking van water en 'n goedgekeurde liturgiese formulier. Dit word, behalwe by hoë uitsondering<sup>26</sup>, in die amptelike openbare samekoms van die gemeente bedien.

#### 49.2 Die nagmaal

49.2.1 Die heilige nagmaal word minstens vier maal per jaar in elke gemeente gevier<sup>27</sup>.

49.2.2 Tot die heilige nagmaal word toegelaat:

49.2.2.1 lidmate van die gemeente;

49.2.2.2 besoekers uit ander Nederduitse Gereformeerde gemeentes;

49.2.2.3 besoekers uit ander kerke<sup>28</sup>.

## 4.3 Die jeugbediening

### Artikel 50

50.1 Die jeug as wesenlike deel van die gemeente is die verantwoordelikheid van die kerkraad en breër kerkverband.

50.2 Die bediening aan die jeug as verbondsjeug is 'n geïntegreerde deel van die omvattende gemeentelike bediening waarin God deur sy Woord tot die jeug kom deur verkondiging, onderrig, toerusting, herderlike sorg en dienswerk. Hierdie gemeentelike bediening geskied onder die leiding van die ampte aan en deur die jeug.

50.3 Die kinders van die gemeente, asook alle buitekerklikes wat belydende lidmate van die gemeente wil word, moet onderrig word in die Woord van God en die leer van die kerk. Hierdie onderrig geskied met die oog op belydenisaflegging waardeur hulle deel in die volle regte en verantwoordelikhede van belydende lidmate.

50.4 Waar die omvang en ander omstandighede van die werk dit vereis, word dit in kerkverband onderneem.

#### **Besluite by Artikel 50:**

50.1 *Katkisante wat nie bewys van hulle doop kan lewer nie, word gedoop met gebruikmaking van die Formulier vir die Openbare Belydenis van geloof en die bediening van die doop aan volwassenes*

50.2 *Die openbare aflê van belydenis van geloof mag met die skriftelike verlof van die bedienaar van die Woord of betrokke kerkraad in 'n ander gemeente plaasvind waar die registrasie dan ook geskied.*

<sup>24</sup> Vergelyk Riglyn 6 vir die doop van 'n kind ouer as sewe.

<sup>25</sup> Vergelyk Artikel 48.3.1 tot 48.3.3 van die Kerkorde met voetnota.

<sup>26</sup> Die meriete van so 'n versoek word deur die kerkraad beoordeel.

<sup>27</sup> Vergelyk Riglyn 7 vir die bediening van die nagmaal buite die erediens.

<sup>28</sup> Vergelyk Reglement 26 vir die Verhouding tot ander Kerke en Groepe, 3.2.2.1 en 3.2.2.2.

#### **4.4 Die herderlike sorg**

##### **Artikel 51**

- 51.1 Die predikante, diensleraars, standplaasleraars, ouderlinge en diakens moet herderlike sorg verleen aan alle lidmate van die gemeente, in besonder behoeftiges, siekes en oues van dae. Hulle moet besoek, bemoedig, vertroos en ondersteun word. Voorts moet lidmate voortdurend gewaarsku word teen valse leringe en dwalinge, teen wêreldsgesindheid en goddelose lewenspraktyke.
- 51.2 Die Christelike huwelik as 'n instelling van God moet heilig gehou word en kerkrade moet hieroor die nodige herderlike toesig hou.
- 51.3 Kerkrade sien toe dat afgestorwe lede van die gemeente op 'n Christelike wyse begrawe/veras word.

#### **4.5 Gemeentebediening**

##### **Artikel 52**

- 52.1 Die kerk rig hom deur middel van gemeentebediening tot die lidmate ten einde die gemeente op te bou tot vervulling van sy dienswerk.
- 52.2 Die kerk rig hom deur intensiewe gespesialiseerde gemeentebediening tot kerkvervreemdes wat formeel nog lidmate is ten einde hulle daadwerklik te bereik en hulle tot gemeenskap met Christus te bring.
- 52.3 Waar die omvang en ander omstandighede van die werk dit vereis, word dit in kerkverband onderneem.

#### **4.6 Gestuurdheid (*Missio Dei*)**

##### **Artikel 53**

- 53.1 Die missie van die Drie-enige God, Vader, Seun en Heilige Gees is om lewe en volheid aan die wêreld te gee, en die kerk is in diens van God se missie.
- 53.2 Deur die Woord en Gees vergader God vir Hom 'n gemeente. Deur dié gemeente:
- laat God sy Woord verkondig,
  - bring Hy die gemeenskap van heiliges uit alle nasies tot stand,
  - laat Hy diens aan die wêreld in nood lewer,
  - laat Hy sy opdrag om die skepping en lewe te bewaar sigbaar tot uitdrukking bring, en
  - word sy geregtigheid en versoening verkondig.
- Só laat Hy sy koninkryk kom.
- 53.3 Die gestuurde kerk bedien die evangelie in al sy dimensies aan mense wat die evangelie nie ken nie of daarvan vervreemd is.
- 53.4 Elke gemeente is 'n gestuurde gemeente en so elke lidmaat van die gemeente.

**Besluite by Artikel 53:**

- 53.1 *Die Drie-enige God versamel, bou, roep en stuur die hele kerk, in al haar gestaltes (lidmate, gemeentes, kerklike verbande en bedieninge), as getuies van God se sending (Missio Dei) na die wêreld. In dié getuienis word die omvattende heil (vrede/sjaloom) met woord en daad bedien (Kolossense 1:20, 2 Korintiërs 5:18, Filippense 1:10-11).*
- 53.2 *Elke gemeente is geroep tot missionêre gemeente-wees in eie konteks, maar ook om onder leiding van en in die krag van die Heilige Gees betrokke te raak by diens- en getuienisprojekte in “Jerusalem, Judea, Samaria en tot aan die uithoeke van die wêreld” (Handelinge 1:8). Dit sluit die uitstuur en ondersteuning van sendelinge en uitreik-groepe in.*
- 53.3 *Om te onderskei wat hierdie roeping tot gestuur-wees vir elke spesifieke konteks behels, behoort daar biddend saam geluister te word na die Woord en Gees, na mekaar en ander en na die nood in die wêreld.*
- 53.4 *Eenheid, versoening en geregtigheid is onontbeerlik vir die kerk se geloofwaardige getuienis in die wêreld (Efesiërs 4:3-6).*
- 53.5 *Getuienis word sover moontlik gedoen in vennootskap met ander, maar op weg na groter sigbare eenheid veral ook met susterkerke in die NG Kerkfamilie. Getuienis in vennootskap behels:*
- *Wedersydse erkenning en respek van die vennote se selfstandigheid.*
  - *’n Fokus op die vennote se gedeelde roeping tot getuienis in die betrokke konteks.*
  - *Die uitbou van standhoudende verhoudinge, wat ook in geskrewe ooreenkomste vervat kan word.*
  - *Wedersydse ondersteuning, inspraak, verantwoording, openheid en vertroue.*
  - *Doelbewuste wegbeweeg van afhanklikheid en voorskriftelikheid.*
  - *Vennootskappe is ’n doelbewuste stap nader aan die eenwording binne die NG Kerkfamilie.*
- 53.6 *Die Bediening vir Vennote in Getuienis staan in diens van gemeentes, ringe, sinodes en ander kerklike verbande se roeping tot diens en getuienis.*

**4.7 Diens van barmhartigheid****Artikel 54**

- 54.1 Vanuit God se liefde en betrokkenheid by die wêreld vervul die gemeente sy diakonale roeping in die gemeenskap en die wêreld deur die voorkoming, verligting en bestryding van maatskaplike nood, lyding en onreg.
- 54.2 Die gemeente gee uitvoering aan hierdie roeping in samewerking met die kerklike strukture van die ring, sinode, Algemene Sinode en diakonale diensorganisasies, asook ander geloofsgemeenskappe, organisasies en strukture wat deel is van die werksaamhede in die gemeenskap en die gemeente.

**4.8 Die dienswerk van die gelowiges****Artikel 55**

- 55.1 Die roeping van die kerk in sy gestuurdheid na die wêreld (*Missio Dei*) impliseer die toegewyde dienswerk van elke gelowige.
- 55.2 Elke gelowige ontvang van die Here die gawes, die geleenthede en die krag van sy Gees om in hulle daaglikse lewe gestalte te gee aan God se liefde vir hierdie wêreld.

- 55.3 Met die oog hierop behoort die kerk gelowiges toe te rus, te inspireer en te ondersteun.
- 55.4 Die kerk skep geleenthede waar gelowiges betrek word by die uitbou van die kerk en die uitbreiding van God se koninkryk.
- 55.5 Dit staan gelowiges ook vry om ter wille van hulle dienswerk in die wêreld self aksies te begin en netwerke of vennootskappe te vorm om die koninkryk te bevorder.
- 55.6 Die kerk gee met gesonde oordeel sy seën en samewerking aan hierdie aksies, netwerke of vennootskappe wat ook in diens staan van die *Missio Dei*.

#### **4.9 Leer en aktuele sake**

##### **Artikel 56**

Die kerk beywer hom vir Skrifgefundeerde beskouinge ten opsigte van aktuele, leerstellige en etiese aangeleenthede en die bevordering van 'n sedelik gesonde openbare lewe.

##### **4.10 Rentmeesterskap**

##### **Artikel 57<sup>29</sup>**

Elke kerkvergadering maak die nodige voorsiening vir die sorgvuldige beheer van die stoflike aangeleenthede van die kerk en doen jaarliks verslag van sy rentmeesterskap aan die gemeente, ring, sinode of Algemene Sinode, soos die geval mag wees.

***Besluit by Artikel 57:***

*Rentmeesterskap word uitgeoefen volgens Reglement 24: Reglement vir Kerklike goedere*

##### **4.11 Diensverhoudinge**

##### **Artikel 58**

Werknemers in diens van 'n gemeente of die kerkverband, se diensverhouding word per diensooreenkoms gereël.

---

<sup>29</sup> Hierdie *Artikel* moet saam geles word met *Reglement 24 Kerkorde vir Kerklike goedere*.

## HOOFSTUK 5

### KERKLIKE OPSIG, TUG EN DISSIPLINE

#### Artikel 59

##### Doel en voorskrifte

- 59.1 Kerklike opsig word gehou en kerklike tug en dissipline uitgeoefen
  - 59.1.1 tot eer van God;
  - 59.1.2 tot heil van die Kerk;
  - 59.1.3 tot behoud van die sondaar;
- 59.2 volgens voorskrifte van
  - 59.2.1 die Woord van God;
  - 59.2.2 die belydenisskrifte;
  - 59.2.3 die *Kerkorde* en ander bepalings<sup>30</sup> van die kerk;
  - 59.2.4 die diensooreenkoms.

#### Artikel 60

##### Kerklike opsig en tug

- 60.1 Die kerklike opsig en tug dra 'n geestelike karakter en pas by die kerk as 'n geloofs- en 'n liefdesgemeenskap. Opsig en tug word dus op 'n kerklike wyse en met geestelike middele uitgeoefen.
- 60.2 Die amptelike uitoefening van die tug deur kerkvergaderinge of hulle gevolmagtigdes vervang nie die roeping van die gelowiges tot onderlinge vermaning nie, maar vul dit aan.
- 60.3 Amptelike kerklike opsig en tug is pastoraal-kerkregtelik van aard en moet uit 'n Bybelse en geestelike oogpunt billik en regverdig toegepas word.
- 60.4 Die kerklike opsig gaan oor die hele lewenswandel (leer en lewe) van al die lidmate (doop en belydend) van die gemeente, ampsdraers ingesluit.

#### Artikel 61

##### Tugwaardige sondes

- 61.1 Sondes wat tot tug lei, is sondes wat indruis teen die Woord van God en die belydenis van die kerk.
- 61.2 Sondes wat openbare aanstoot gee of wat na aanleiding van die voorskrifte van Matteus 18:15 - 17 onder die aandag van die kerk kom, stel die persoon bloot aan 'n amptelike tugondersoek.
- 61.3 Wangedrag deur werknemers van die kerk in terme van diensverhoudinge kan ook tugwaardige sondes wees.

---

<sup>30</sup> Vergelyk *Reglement 22 vir Tug en Vermaning*.

## **Artikel 62**

### **Lidmate, ampsdraers, gelegitimeerdes en werknemers**

- 62.1 Alle doop- en belydende lidmate van die gemeente val onder die opsig en tug van die kerkraad.
- 62.2 Alle ouderlinge, diakens, predikante, diens- en standplaasleraars, emeriti en proponente staan onder die opsig en tug van die ring, sonder om die opsig van die kerkraad oor sy ampsdraers uit te sluit (vergelyk artikel 31.7 van die *Kerkorde*).
- 62.3 Lidmate van die kerk, wat as werknemers in diens van 'n gemeente of die kerkverband is, kan weens wangedrag getug word.

## **Artikel 63**

### **Kerklike dissipline**

- 63.1 Werknemers in diens van 'n gemeente of die kerkverband, kan in terme van hulle diensverhouding kerklik gedissiplineer word.
- 63.2 Kerklike dissiplinêre optrede is die gevolg van oortredings by die werkplek en geskied teen die agtergrond van die personeelbeleid en die diensooreenkoms.
- 63.3 Werknemers in diens van die kerkverband, staan onder die kerklike dissipline van die werkgewer.
- 63.4 Predikante, diens- en standplaasleraars, emeriti en proponente in diens van 'n gemeente staan onder die kerklike dissipline van die ring.

## **Artikel 64**

### **Tug- en dissiplinêre maatreëls**

- 64.1 Die onderstaande tug- en/of dissiplinêre maatreëls kan deur ondersoekliggame toegepas word:

#### **64.2 Dooplidmate**

- 64.2.1 'n bestraffing in 'n privaatgesprek of ter vergadering van die ondersoekliggaam;
- 64.2.2 sensuur wat bestaan uit onthouding van die nagmaal en/of weerhouding van die aflegging van belydenis van geloof;
- 64.2.3 afsnyding van die gemeente deur die gebruik van die betrokke formulier.

#### **64.3 Belydende lidmate**

- 64.3.1 'n bestraffing in 'n privaatgesprek of ter vergadering van die ondersoekliggaam;
- 64.3.2 sensuur wat bestaan uit die onthouding van die sakramente en die opskorting van ander lidmaatregte;
- 64.3.3 afsnyding van die gemeente, nadat sensuur en voortgesette herderlike sorg nie tot berou gelei het nie, deur die gebruik van die betrokke formulier.

#### **64.4 Ouderlinge en diakens**

- 64.4.1 'n bestraffing in 'n privaatgesprek of ter vergadering van die ondersoekliggaam;

64.4.2 skorsing met of sonder onthouding van die sakramente en met of sonder opskorting van lidmaatregte totdat daar bewys van grondige berou is;

64.4.3 afsetting uit die diens met opskorting van lidmaatregte en onthouding van die sakramente

#### **64.5 Predikante, diensleraars, standplaasleraars, emeriti, proponente en werknemers met verslag aan die Algemene Taakspan Predikantesake in die geval van gelegitimeerdes**

64.5.1 'n bestraffing in 'n privaatgesprek of ter vergadering van die ondersoekliggaam, of 'n skriftelike waarskuwing deur die werkgewer;

64.5.2 skorsing vir 'n vasgestelde tydperk met een of meer van die volgende maatreëls:

64.5.2.1 opskorting van lidmaatregte;

64.5.2.2 onthouding van die sakramente;

64.5.2.3 gedeeltelike of volle weerhouding van lewensonderhoud en toelaes deur die werkgewer.

64.5.3 Indien die ondersoekliggaam nie oortuig is van die egtheid van die berou nie, kan hierdie skorsing verleng word.

64.5.4 Ontslag uit diens van die gemeente of uit diens van die kerkverband met een of meer van die volgende maatreëls:

64.5.4.1 opskorting van lidmaatregte vir 'n vasgestelde tydperk en/of totdat daar berou is;

64.5.4.2 onthouding van die sakramente vir 'n vasgestelde tydperk en/of totdat daar berou is;

64.5.4.3 kennisgewing aan die Algemene Taakspan Predikantesake dat die betrokke persoon se legitimasië vir 'n vasgestelde tydperk opgeskort word;

64.5.4.4 kennisgewing aan die Algemene Taakspan Predikantesake dat die betrokke persoon se legitimasië met onmiddellike effek beëindig word, wat die nietigverklaring van die *Akte van Legitimasie* beteken.

### **Artikel 65**

#### **Appèl<sup>31</sup>**

65.1 Ooreenkomstig Artikel 23 van die *Kerkorde* kan daar teen die bevindinge en tug en/of dissiplinêre maatreëls van ondersoekliggame geappelleer word.

65.2 Oor leerstellige sake (vergelyk artikel 44.4 van die *Kerkorde*) en oor die beëindiging van bevoegdheid (vergelyk Artikel 7 van die *Kerkorde*) kan tot by die Algemene Sinode geappelleer word.

---

<sup>31</sup> Vergelyk *Reglement 23 vir Hersiening (Revisie), Appèl, Gravamen (Beswaarskrif) en Prosedurele beswaar*.

- 65.3 Oor ander sake wat met die tug en/of dissipline verband hou, kan daar nie verder as die sinode geappelleer word nie.

## **Artikel 66**

### **Opheffing van tug- en/of dissiplinêre maatreëls**

- 66.1 Tugmaatreëls het berou en inkeer ten doel en word, met inagneming van artikel 59.1 van die *Kerkorde*, opgehef in die geval van:

#### **66.2 Lidmate**

- 66.2.1 Wanneer 'n belydende lidmaat berou betoon nadat die persoon onder sensuur geplaas is, hef 'n ondersoekliggaam of kerkraad wat oortuig is van die egtheid van berou, die sensuur op.
- 66.2.2 Wanneer belydenis van geloof weerhou is, laat die kerkraad die dooplidmaat toe tot belydenisaflegging wanneer die ondersoekliggaam oortuig is van die egtheid van berou.
- 66.2.3 Wanneer 'n lidmaat wat van die gemeente afgesny is, berou betoon en verlang om weer in die gemeente opgeneem te word, neem die kerkraad, indien oortuig van die egtheid van berou, die persoon weer in die gemeente op met die gebruik van die betrokke formulier.
- 66.2.4 By dooplidmate kan hierdie stap gepaard gaan met belydenisaflegging.

#### **66.3 Ouderlinge en diakens**

- 66.3.1 As die ring of sy gevolmagtigde kommissie as ondersoekliggaam oortuig is van die egtheid van berou, kan die skorsing opgehef word.
- 66.3.2 Ouderlinge en diakens wat geskors is, kan dan weer verkies word tot die kerkraad.

#### **66.4 Predikante, emeriti en proponente**

- 66.4.1 As die ring of sy gevolmagtigde kommissie as ondersoekliggaam/kerkverband as werkgewer oortuig is van die egtheid van berou, word die sensuur en skorsing as tug en/of dissiplinêre maatreël opgehef met verslag aan die Algemene Taakspan Predikantesake.
- 66.4.2 In geval van ontslag van 'n werknemer volgens artikel 64.5.4 van die *Kerkorde*, moet die ring die opskorting van lidmaatreëte en die onthouding van die sakramente ophef voor die Algemene Taakspan Predikantesake die legitimasië kan herstel.
- 66.4.3 Herstel in diens van die gemeente/kerkverband kan alleen geskied na geslaagde appèl en indien die appèl liggaam so beslis.
- 66.4.4 'n Gelegitimeerde wie se legitimasië deur tug- en/of dissiplinêre optrede beëindig is, kan slegs na *colloquium doctum* by 'n proponentskommissie en na aanbeveling van 'n kuratorium deur die Algemene Taakspan Predikantesake opnuut gelegitimeer word<sup>32</sup>.

---

<sup>32</sup> Vergelyk *Reglement 11 vir die Bevoegdheid van Predikante, Diensleraars, Standplaasleraars, Proponente en Emeriti*.

66.4.5 In die geval van beëindiging van legitimasie deur tug- en/of dissiplinêre handeling as gevolg van ergerlike sondes/wangedrag soos owerspel, onsedelikheid, egskeiding, moord, meined, diefstal of na beëindiging van legitimasie as gevolg van leerdwaling, mag toestemming tot legitimasie alleen by hoë uitsondering, nadat gunstige aanbevelings van alle betrokke kerkvergaderinge ontvang is, deur die Algemene Sinodale Moderamen op aanbeveling van die Algemene Taakspan Predikantesake, verleen word.

## HOOFSTUK 6

### BETREKKINGE VAN DIE KERK NA BUITE

#### 6.1 Kerk en staat

##### Artikel 67

- 67.1 In die lig van Romeine 13 erken die kerk die staat as 'n dienaar van God tot ons beswil. Dit is God wat aan die staat die opdrag gegee het om die reg te handhaaf en die kwaaddoeners te straf.
- 67.2 Die kerk erken dat die staatsowerheid wat deur sy fisiese swaardmag in beheer van 'n bepaalde staatsgebied is, deur God beskik is en as sodanig eerbiedig moet word. Die norm vir die kerk se deelname aan die publieke regsverkeer en uitoefening van burgerlike regte is die Woord van God.
- 67.3 Christus is die hoof van die kerk. Daarom beskou die kerk sy reg op vryheid van godsdiens, wat sy Bybels-profetiese getuienis teenoor die staatsowerheid en die wêreld waarin hy staan, insluit, as onvervreembaar. In die uitoefening hiervan maak hy aanspraak op die regsbeaalde beskerming van die owerheid.
- 67.4 Die kerk nader staatsowerhede op alle vlakke op 'n ordelike wyse. Hierdie skakeling word gedoen deur sy erkende kerkvergaderinge of die kommissies wat hulle daarvoor aanwys. Skakeling oor sake wat die kerk in sy algemene sinodale verband raak, geskied deur die Algemene Sinode se gevolmagtigde. Skakeling sonder 'n opdrag van die Algemene Sinode geskied deur die Algemene Sinodale Moderamen met verslag aan die Algemene Sinode (vergelyk artikel 43.1.3 van die *Kerkorde* en die voetnota).

#### 6.2 Kerk, maatskappy en vrye vereniging

##### Artikel 68

Waar moontlik, verleen die kerk steun aan maatskaplike, nie-kerklike organisasies wat op 'n positiewe Christelike basis georganiseer is en daarop gemik is om die koninkryk van God te bevorder. Hierdie steun geskied vanuit 'n kerklike perspektief en op 'n kerklike wyse. Die vraag of 'n bepaalde organisasie kan aanspraak maak op die steun van die kerk, hang af van sy grondslag en doelstellings en die uitlewing daarvan in die praktyk.

#### 6.3 Kerk en onderwys

##### Artikel 69

- 69.1 Die kerk beywer hom daarvoor dat die Woord van God en Protestants-Christelike norme en waardes rigtinggewend sal wees in onderwys- en opvoedkundige instellings, asook vir die kultuuridoom waarin die onderwys plaasvind.
- 69.2 Die kerk erken die interne bevoegdheid van onderwysinstellings om tipiese onderwysaangeleenthede (standaarde, leerinhoude, ensovoorts) te finaliseer.
- 69.3 Die kerk beywer hom vir Christelike opvoeding en onderwys vir sy kinders en jongmense. Hierdie onderwys moet verantwoorde standaarde en leerinhoude insluit.

## 6.4 Kerk en ekumeniese betrekking

### Artikel 70<sup>33</sup>

- 70.1 Die Kerk streef daarna om deur middel van sy vergaderinge op 'n verantwoorde wyse met ander Christelike kerke en kerkgemeenskappe saam te werk of te assosieer, 'n gemeenskaplike boodskap uit te dra en saam te stry vir die behoud van Christelike lewensbeginsels.
- 70.2 Die Algemene Sinode bepaal die aard en graad van die samewerking met ander kerke of kerkgemeenskappe deur middel van 'n gewone meerderheidstem. Wanneer 'n kerk of kerkgemeenskap by die Algemene Sinode aansoek doen om in assosiasie met die kerk te tree, word goedkeuring verleen wanneer met 'n tweederdemeerderheidstem ten gunste daarvan beslis is. Die aard en omvang van die assosiasie word deur die assosiasie-ooreenkoms gereël.
- 70.3 Die graad en wyse van samewerking of assosiasie word in elke geval bepaal deur die graad van ooreenstemming ten opsigte van belydenis, kerkregering, erediens en die siening van die Christelike lewenswandel van die betrokke kerk of kerkgemeenskap.
- 70.4 Die besluit oor 'n aansoek of beëindiging van lidmaatskap van 'n ekumeniese organisasie word geneem met 'n tweederdemeerderheid van die Algemene Sinode.

## 6.5 Tussen-orde

### Artikel 71

- 71.1 Met die oog op enige proses van kerkhereniging van die Nederduitse Gereformeerde Kerkfamilie onderling, of kerkvereniging met ander gereformeerde kerke, stel die Algemene Sinode vir sodanige samewerking en/of samevoeging van werksaamhede reëlins vas.
- 71.2 Sodanige reëlins word in 'n *Tussen-orde* omskryf, wat na die goedkeuring van die Algemene Sinode in die kerkordeboek opgeneem word.
- 71.3 Waar 'n *Tussen-orde* in stryd is met die *Kerkorde* of waar 'n *Tussen-orde* nie vir 'n bepaalde saak voorsiening maak nie, geld die *Kerkorde*.
- 71.4 Waar 'n *Tussen-orde* in stryd is met die bepalings en reglemente van die samestellende sinodes of waar 'n *Tussen-orde* nie vir 'n bepaalde saak voorsiening maak nie, kan 'n *Tussen-orde* eers in 'n sinode gebruik word nadat die goedkeuring van die betrokke sinode verkry is.
- 71.5 'n *Tussen-orde* is nie bepalend of bindend vir die vorm en inhoud van 'n nuwe *Kerkorde* wat later in 'n verenigde kerk saamgestel mag word nie.
- 71.6 'n *Tussen-orde* word gesamentlik opgestel en moet die goedkeuring dra van die gevolmagtigde verteenwoordigers van al die betrokke kerke wat in die proses van vereniging of hereniging met die Nederduitse Gereformeerde Kerk is.

---


<sup>33</sup> Vergelyk *Reglement 26 vir die Verhouding tot ander Kerke en Groepe*.

71.7 'n *Tussen-orde* sal alleen van toepassing wees waar twee of meer regspersone van verskillende kerkverbande daartoe ooreenkom.

## **Artikel 72**

- 72.1 Met die oog op enige proses van kerklike samewerking en/of kerkvereniging met ander gereformeerde kerke, stel die Algemene Sinode vir sodanige samewerking en/of samevoeging van werksaamhede reëlins vas.
- 72.2 Sodanige reëlins word in 'n *Samewerking-orde* omskryf, wat na die goedkeuring van die Algemene Sinode in die kerkordeboek opgeneem word.
- 72.3 Waar 'n *Samewerking-orde* in stryd is met die *Kerkorde* of waar 'n *Samewerking-orde* nie vir 'n bepaalde saak voorsiening maak nie, geld die *Kerkorde*.

# 1. NG KERK VRYSTAAT | VLOEIDIAGRAM



## 2. REGLEMENT VAN ORDE: NG KERK VRYSTAAT

### 1. OPENING EN KONSTITUERING

Die afgevaardigdes kom byeen op die plek en tyd soos vooraf bepaal.

- 1.1 Die afgevaardigde leraar met die langste diens, wat die oudste in jare is, soos vooraf deur die betrokke skriba aangewys, gaan by rings- en sinodale vergaderings voor in Skriflesing, gebed en konstituering, en tree as waarnemende voorsitter op tot en met al die administratiewe sake afgehandel is. Die huidige voorsitter van die Moderamen neem dan oor om die agenda van die vergadering te begin, asook die verkiesing van die nuwe voorsitter te begelei. Die huidige voorsitter en die nuwe voorsitter kom onderling ooreen wanneer die nuwe voorsitter die vergadering verder sal lei.
- 1.2 By meerdere vergaderings neem die afgevaardigdes hulle plekke in soos aangedui deur die Ontwerpspan.
- 1.3 Die geloofsbriewe<sup>34</sup> van afgevaardigdes moet in die geval van 'n gewone vergadering van die sinode minstens drie maande voor die aanvang van die vergadering in die hande van die skriba wees. Die geloofsbriewe word voor die aanvang van die vergadering deur die Diens Regte (SDR) of sy gevolmagtigde verteenwoordigers nagegaan, goedgekeur en met die konstituering voorgehou, waarna die voorsitter die vergadering as wettig gekonstitueer verklaar met uitsluiting van die afgevaardigdes oor wie se geloofsbriewe daar twyfel bestaan of wat nie in orde is nie.
- 1.4 By meerdere vergaderings word, nadat die vergadering gekonstitueer is, ooreenkomstig die Reglement van Orde en onder leiding van die huidige voorsitter soos genoem in 1.1 hierbo, eers 'n voorsitter verkies (wat die leiding van die vergadering soos onderling ooreengekom met die huidige voorsitter oorneem), daarna 'n ondervoorsitter in die geval van 'n sinode (wat as voorsitter optree wanneer die voorsitter afwesig is, hom daartoe versoek of in die vergadering 'n spreekbeurt waarneem) en 'n skriba. Die voorsitter, ondervoorsitter en skriba is ook in dieselfde hoedanigheid lid van die moderamen.
- 1.5 By elke gewone vergadering van die sinode word twee lede van die vergadering onderskeidelik tot voorsitter en ondervoorsitter verkies. Die persoon wat deur die sinode in die posisie van voorsitter of ondervoorsitter van die sinode en moderamen verkies is, kan nie weer in die daaropvolgende termyn deur die sinode in dieselfde posisie verkies word nie, ongeag of die persoon sy/haar termyn in daardie posisie voltooi het of nie.
- 1.6 Op 'n buitengewone vergadering van die sinode of ring neem die voorsitter van die Moderamen of Ringskommissie die leiding in die konstituering van die vergadering, waarna die vergadering sy eie voorsitter kies vir die afhandeling van die geslote agenda.

---

<sup>34</sup> Geloofsbriewe moet oorspronklik wees (geen fotostate) en mag slegs op een bladsy wees (voor en agter op dieselfde bladsy)

- 1.7 'n Vergadering van die ring en die sinode word met oop deure gehou, tensy die betrokke vergadering anders besluit.
- 1.8 'n Vergadering van die kerkraad is 'n geslote en vertroulike vergadering.
- 1.9 Elke sittingsdag word, soos vooraf gereël, met gebed geopen en gesluit.
- 1.10 'n Kerkvergadering is slegs wettig wanneer meer as die helfte van die lede teenwoordig is. ('n kworum is 50% plus 1)
  - 1.10.1 Die lede van 'n kerkvergadering is verplig om die vergadering by te woon en, indien hulle verhinder word, daarvan kennis te gee.
  - 1.10.2 Geen lid mag sonder verlof van die voorsitter 'n vergadering verlaat nie.

## **2. BEHANDELING VAN SAKE**

- 2.1 By die voorbring van sake neem die voorsitter die orde in ag wat vir hom die geskikste voorkom. Hy stel die sake wat behandel moet word aan die orde, gee by die behandeling, indien nodig, geleentheid vir toeligting en kan, as die saak dit vereis, wenke aan die hand doen om die vergadering te help om tot 'n beslissing te kom, en bring sy stem gelyktydig uit saam met die ander lede.
- 2.2 As die stemme staak, beslis die voorsitter wat naas sy gewone ook 'n beslissende stem het. Die voorsitter mag die lot gebruik in plaas van sy beslissende stem te gee. In 'n saak van kerklike opsig en tug word by staking van stemme uitspraak in die guns van die aangeklaagde gegee.
- 2.3 In gevalle wat op die orde van die vergadering betrekking het en waarvoor geen voorsiening in die reglement gemaak word nie, handel die voorsitter volgens gebruik en eie oordeel. As enige lid teen hierdie handelswyse beswaar het, word dit aan die oordeel van die vergadering onderwerp.
- 2.4 Elke lid van 'n vergadering moet by deelname aan die bespreking die voorsitter aanspreek.
- 2.5 Elkeen moet hom, sowel by skriftelike as mondelike voordrag van alle beledigende, haatlike of onbehoorlike uitdrukkings, asook van alles wat in stryd is met die agting van 'n kerkvergadering, weerhou.

## **3. AGENDA**

- 3.1 Die agenda van die Sinode word slegs elektronies aan afgevaardigdes beskikbaar gestel, minstens twee weke voor die aanvang van die Sinode.
- 3.2 Gemeentes is self verantwoordelik vir die uitdruk van die agenda van die Sinode vir hulle afgevaardigdes.
- 3.3 Kragpunte vir laaiers van skootrekenaars en tablette en ander elektroniese toestelle word nie op so 'n manier beskikbaar gemaak dat elke afgevaardigde 'n punt beskikbaar het nie.

## **4. BESKRYWINGSPUNTE, LAATSTUKKE EN VERSLAE**

- 4.1 'n Beskrywingspunt vir behandeling deur die ring kan deur die kerkraad of 'n ongesensureerde lidmaat met goedkeuring van die kerkraad ingestuur word.

- Hierdie beskrywingspunt moet drie weke voor die aanvang van die ringsitting in die hande van die skriba van die ringskommissie wees.
- 4.2 'n Beskrywingspunt vir behandeling deur die sinode mag ingedien word deur 'n permanente kommissie, bediening of taakspan van die sinode, 'n ring en 'n kerkraad. Onderhewig aan hierdie bepalings het 'n ongesensureerde lidmaat die reg om 'n beskrywingspunt by die kerkraad in te dien vir deursending na die sinode.
  - 4.3 Beskrywingspunte vir behandeling deur die Sinode moet minstens twee maande voor die aanvang van die Sinode in die hande van die Skriba van die Moderamen wees.
  - 4.4 Alle beskrywingspunte wat teen hierdie sperdatum ontvang is, word na die verantwoordelike Bediening/Taakspan verwys. Indien dit onseker is op watter Bediening/Taakspan se tafel die beskrywingspunt hoort, besluit die Dagbestuur na wie dit verwys word.
  - 4.5 Beskrywingspunte wat minder as twee maande voor die aanvang van die Sinode ingedien word, word steeds na die verantwoordelike Bediening/Taakspan verwys, maar met die voorbehoud dat dit nie noodwendig in die Bediening/Taakspan se verslag aan die Sinode opgeneem sal word nie, maar in 'n laat verslag opgeneem kan word. Bediening/Taakspanne wat laatverslae oor beskrywingspunte indien, het die diskresie om 'n aanbeveling te maak dat die beskrywingspunte wat dit behandel, direk deur die Sinode behandel word, of dat dit verwys word na 'n tydelike Taakspan van die Sinode. Laatverslae van Bediening/Taakspanne oor beskrywingspunte wat laat ontvang is, word elektronies aan afgevaardigdes versprei indien dit minstens 'n week voor die aanvang van die Sinode in die hande van die Skriba van die Moderamen is, andersins word dit in hardekopie tydens die Sinode aan afgevaardigdes uitgedeel.
  - 4.6 Op elke gewone vergadering van die sinode moet verslae ingedien word deur al die permanente kommissies, bediening en taakspanne van die sinode sowel as die verteenwoordigers van die sinode in verskillende rade en liggame. Bediening/Taakspanne se verslae moet minstens vier weke voor die aanvang van die Sinode in die voorgeskrewe formaat in die hande van die Skriba van die Moderamen wees. Laatverslae van Bediening/Taakspanne wat ander sake as laat beskrywingspunte behandel, word na die Tydelike Taakspan Regte (TTR) verwys wat aanbevelings aan die Sinode maak oor die ontvanklikheid en hantering daarvan.

## **5. MOSIE VAN ORDE**

- 5.1 Nadat 'n saak grondig bespreek is, het 'n lid van die vergadering die reg om by wyse van 'n mosie van orde, wat nie die wese van die saak onder bespreking raak nie, maar slegs die reëling van die werksaamhede van die vergadering, voor te stel dat die bespreking beëindig en oor die saak gestem word, of dat daar van die saak afgestap, of dat die vergadering verdaag of dat die orde waarin sake behandel moet word, verander word. Oor hierdie mosie, indien gesekondeer, moet sonder enige verdere bespreking dadelik gestem word, maar die voorsitter het die reg om die mosie tydelik terug te hou indien die saak na sy oordeel nie genoegsaam bespreek is nie.

## 6. SPREEKBEURT

- 6.1 By die behandeling van 'n saak voor 'n vergadering het elke lid die reg om sy mening uit te spreek tensy die vergadering anders besluit.
  - 6.1.1 Niemand mag buite sy beurt of anders as met verlof van die voorsitter praat nie.
  - 6.1.2 Indien twee of meer lede gelyktydig opstaan, beslis die voorsitter wie die eerste aan die beurt kom.
  - 6.1.3 Waar 'n lid van die kerkvergadering hom volgens die oordeel van die voorsitter of volgens die besluit van die vergadering onordelik gedra, moet die voorsitter hom tot orde roep en as die vergadering so besluit, 'n apologie weens sy woorde of gedrag binne 'n vasgestelde tyd van hom eis. Weier hy om hom hieraan te onderwerp, word daar aantekening van sy woorde en dae gemaak en word hy as 'n wederstrewer van die *Kerkorde* deur die bevoegde kerkvergadering behandel.
- 6.2 'n Lid van die vergadering mag nie meer as een maal oor dieselfde saak praat nie, behalwe wanneer hy die aandag van die voorsitter wil vestig op 'n afwyking van die reglement van orde, of wanneer hy as voorsteller van sy reg tot repliek gebruik maak.
  - 6.2.1 Die voorsitter het die reg om, wanneer na sy oordeel die saak onder behandeling genoegsaam bespreek is, dit aan die vergadering te stel of laasgenoemde nie tot stemming wil oorgaan nie.

## 7. VOORSTEL

- 7.1 Elke lid van die vergadering het die reg om oor enige saak wat onder behandeling is 'n voorstel in te dien wat dadelik gesekondeer moet word voordat hy dit toelig, anders verval die voorstel. In 'n vergadering van die ring of die sinode moet die voorstel en die amendement(e) skriftelik ingedien en deur die voorsteller en die sekondant geteken word voordat die voorsteller dit toelig.
- 7.2 Geen spreekbeurt mag aangevra word, of voorstel of amendement deur die voorsitter ontvang word, voordat hy die saak aan die orde stel nie.
- 7.3 Die voorsteller of sekondant van 'n voorstel wat reeds ter tafel gelê is, mag dit nie sonder verlof van die vergadering terugtrek nie.
- 7.4 'n Aanbeveling in die verslag van 'n sinode of tydelike kommissie word onmiddellik as 'n voorstel in behandeling geneem en het nie weer 'n voorsteller of sekondant nodig nie. Dit geld nie waar die aanbeveling oor 'n beskrywingspunt gaan nie.
- 7.5 By afwesigheid van die insender van 'n voorstel of 'n beskrywingspunt mag die vergadering die voorstel tog in behandeling neem indien hy dit as gewens beskou.
- 7.6 In die geval van voorstelle en amendemente, word die amendemente eers tot stemming gebring in opgaande orde vanaf die laaste wat ingedien is, en daarna die voorstel soos deur die aanvaarde amendemente gewysig. Na elke stemming kondig die voorsitter die uitslag aan.

## 8. STEMMING

- 8.1 Elke lid van 'n vergadering moet stem. Niemand mag buite stemming bly nie behalwe om gewigtige redes wat deur die vergadering beoordeel moet word.
- 8.2 Wanneer daar vir persone gestem word, geskied dit met geslote stemming (kyk pt 10.1 hieronder). Oor omstrede sake kan daar ook met 'n geslote stemming beslis word. Persone wat die vergadering in adviserende hoedanigheid bywoon, mag aan die bespreking deelneem, maar nie stem nie.
- 8.3 In 'n vergadering word oor 'n saak met 'n volstreekte meerderheid van stemme besluit, dit wil sê meer as die helfte van die lede wat teenwoordig is, behalwe in die gevalle waar die *Kerkorde* 'n tweederde meerderheid vereis (Artikel 44.1 en 44.2 en 68.4) en waar die bepalings van hierdie sinode by die artikels van die *Kerkorde* gewysig, geskrap of aangevul word.
- 8.4 Dit staan 'n lid vry om met of sonder opgaaf van redes te laat aanteken dat hy met 'n besluit wat geneem is nie instem of dat hy nie teenwoordig was toe die besluit geneem is nie.

## 9. REVISIE

- 9.1 'n Besluit wat in 'n meerdere vergadering geneem is, mag alleen na voorafgaande kennisgewing tydens die vergadering en met toestemming van die vergadering aan die einde van die vergadering in hersiening geneem word indien die insteller oortuigend kan aanvoer dat:
  - 9.1.1 in die bespreking van die saak waarom dit gaan in die vergadering, aan sekere aspekte daarvan glad nie of nie voldoende aandag gegee is nie; of wanneer
  - 9.1.2 daar later inligting na vore gekom het wat hersiening van die besluit noodsaaklik maak.
- 9.2 'n Besluit van die kerkraad mag met 'n gewone meerderheidstem aan die einde van die vergadering of tydens 'n latere vergadering (met vooraf kennisgewing) in hersiening geneem word.
- 9.3 Die prosedure vir revisie is soos volg:
  - 9.3.1 Kennis word volgens 9.1 en 9.2 hierbo gegee dat revisie aangevra sal word.
  - 9.3.2 Wanneer die aansoek vir revisie aan die orde gestel word, moet die lid van die vergadering wat dit aanvra, saaklik aantoon waarom 'n herbespreking van die betrokke besluit nodig is.
  - 9.3.3 Nadat die lid van die vergadering wat revisie aanvra, saaklik die noodsaaklikheid vir die revisie aangetoon het, besluit die vergadering sonder verdere bespreking met opsteek van hande of hy die betrokke saak weer wil bespreek of nie.
  - 9.3.4 As die vergadering besluit dat hy wel die betrokke saak weer oopstel vir bespreking moet die persoon wat revisie vra die vergadering onmiddellik met 'n voorstel dien wat soos gewoonlik sekondeer moet word. Indien die voorstel aanvaar word, vervang dit die vorige besluit van die vergadering.

- 9.3.5 Verslae van kommissies/taakspanne en beskrywingspunte waar nuwe aanbevelings oor vorige besluite gemaak word, word geag genoegsame skriftelike kennisgewing van hersiening (revisie) te wees.

## **10. VERKIESING VAN AMPSDRAERS**

- 10.1 Die verkiesing van die voorsitter, ondervoorsitter, skriba van die sinode, die voorsitter en skriba van die ring, die primarii en sekundi van die Moderamen, die primarii en sekundi van die ringskommissie, die afgevaardigdes na die ring en die sinode, kerkraadslede en ook die beroeping van bedienaars van die Woord moet deur volstreekte meerderheid van stemme van die aanwesige stemgeregtigdes en per geslote stemming geskied. In die geval van kerkraadslede kan kerkrade egter, indien hulle dit verkies, sonder geslote stemming kerkraadslede kies.
- 10.2 By die verkiesing/beroeping geld die volgende:
- 10.2.1 Vir die beroeping van 'n bedenaar van die Woord: (Sien ook Regl 12 van die AS Kerkorde 2023)
- 10.2.1.1 Die groslys word deur die kerkraad saamgestel volgens 10.3.1 hieronder.
- 10.2.1.2 'n Lidmaat van die gemeente het die reg om by die skriba van die kerkraad 'n naam in te gee vir plasing op die groslys.
- 10.2.1.3 Die kerkraad mag van 'n pre-advieskommissie gebruik maak vir die insameling van inligting oor genomineerdes volgens die riglyne van die Algemene Sinode.
- 10.2.1.4 Beroeping geskied volgens die prosedure soos vervat in reglement 12 van die AS Kerkorde 2023.
- 10.3 Vir die verkiesing van kerkraadslede:
- 10.3.1 Die groslys word deur die kerkraad saamgestel met dien verstande dat elke stemgeregtigde nie meer persone per stembriefie mag nomineer as die getal poste waarvoor gestem moet word nie.
- 10.3.2 Nadat die groslys saamgestel is, word dit aan die hand van die volgende riglyne gesuiwer:
- 10.3.2.1 Genomineerdes moet godvrugtige, kundige en ongesensureerde lidmate van die Ned. Geref. Kerk wees, en hulle name moet voor bevestiging in die Lidmateregister van die gemeente ingeskryf wees.
- 10.3.2.2 By die verkiesing van ampsdraers mag daar hoegenaamd geen vorm van stemwerwery wees nie.
- 10.3.3 Uit die groslys, nadat dit gesuiwer is, plaas elke stemgeregtigde net soveel name op die stembriefie as die getal persone wat verkies moet word. Alle stemgeregtigdes moet aan die stemming deelneem.
- 10.3.4 Die persoon wat by hierdie eerste stemming die hoogste getal stemme en daarby die volstreekte meerderheid verkry het, is wettig verkies.
- 10.3.5 As een of meer van die benodigde getal persone nie 'n volstreekte meerderheid verkry het nie, word daar weer 'n stemming gehou uit die name wat die meeste

stemme verkry het en wat gesamentlik 'n volstreckte meerderheid uitmaak. Wie by hierdie stemming 'n volstreckte meerderheid verkry het, is verkies.

- 10.3.6 As die stemme by die eindstemming staak, moet die lot tussen die twee name beslis.
- 10.3.7 Die kerkraad mag van 'n pre-advieskommissie gebruik maak vir die insameling van inligting oor genomineerdes.

## **11. KOMMISSIES/TAAKSPANNE**

- 11.1 Tydelike kommissies/taakspanne, soos deur die Ontwerpspan aangewys, mag voor die aanvang van die meerdere vergaderings met hulle werksaamhede begin.
- 11.2 Lede van 'n tydelike kommissie/taakspan/bediening word vooraf deur die Ontwerpspan of tydens die vergadering deur die voorsitter benoem. Ingeval die benoeming nie die goedkeuring van die meerderheid van die vergadering wegdra nie, vind die verkiesing deur die vergadering op die voorgeskrewe manier plaas.
- 11.3 Die samestelling van alle permanente taakspanne/bedieninge/kommissies word tydens die gewone sitting van die sinode gedoen.  

Ringe wys ook tydens die gewone sitting van die Sinode hulle verteenwoordigers ('n leraar en kerkraadslid met sekundi lede) aan wat op die moderamen dien vir die tyd tussen die gewone Sinode sittings (sien ook Reglement 4: Reglement vir Ringe)

In die geval van die sinode vergader die Kommissie vir kommissies onder voorsitterskap van die ondervoorsitter van die sinode. Enige lidmaat mag in kommissies/taakspanne/ bedieninge van die ring of die sinode benoem word.
- 11.4 Tydelike kommissies/taakspanne/bedieninge maak nie aanbevelings oor die verslae van permanente kommissies/taakspanne/bedieninge nie, tensy daar 'n beskrywingspunt oor dieselfde saak is wat nuwe aspekte na vore bring, of wanneer die saak deur die vergadering na hulle verwys is.
- 11.5 'n Tydelike kommissie/taakspan/bediening tree af nadat sy verslag deur die vergadering aangehoor en afgehandel is. 'n Permanente kommissie/ taakspan/bediening tree af op die volgende byeenkoms van die vergadering wat hom benoem het en nadat sy verslag afgehandel is. In albei gevalle is die lede herkiesbaar.
- 11.6 'n Persoon wat op 'n kommissie/taakspan/bediening benoem is, kan alleen om gewigtige redes, wat die vergadering moet beoordeel, van sy pligte onthef word. Vakatures in sinodale kommissies/taakspanne/bedieninge wat tussen sinodes ontstaan, word aangevul deur die betrokke sinodale kommissie/taakspan/bediening of instansie waaruit die verteenwoordiger moet kom.
- 11.7 Elke sinodale kommissie/taakspan/bediening stel sy eie huishoudelike reglement op in ooreenstemming met die *Kerkorde*, waarin die werkwyse van die kommissie/taakspan/bediening duidelik omlyn word. Huishoudelike reglemente word deur die sinode goedgekeur en is altyd ter insae by die PSD: Ondersteuning, NG Kerk Vrystaat Kantore en by die skriba van die bepaalde raad/bediening/diensgroep.

- 11.8 Die Sinodale Bediening Vrouelidmate (SBV) het die reg van verteenwoordiging op die ooreenstemmende kommissies van die kerkraad, ring en sinode.

## **12. NOTULE**

- 12.1 Die skriba is verplig om, onder deurlopende desimaal genumereerde paragrawe met aanduidende opskrifte, aan te teken wat in die vergadering behandel word, die besluite woordeliks oor te neem, die notule vervolgens uit te brei en nadat dit goedgekeur en onderteken is, die opdragte wat daaruit voortvloei, uit te voer en die stukke te onderteken.
- 12.2.1 In die geval van kerkraadsvergadering is die besluite - hoewel die notule eers op die volgende vergadering goedgekeur en onderteken word - dadelik van krag en mag die besluite onmiddellik uitgevoer word.
- 12.2.2 Besluite van die ring is ook dadelik van krag en die besluite mag onmiddellik uitgevoer word.
- 12.2.3 Die besluite van die Sinode van die Vrystaat is van krag sodra die notule beskikbaar gestel is. (Kerkordelike reglemente en besluite is van krag sodra die Kerkorde op die webtuiste gepubliseer word – sien AS 2023, regl 3.12.5)
- 12.3 Indien die sinode dit nodig ag om vir die skriba tydens die vergadering hulp te verleen, kan hy een of meer persone deur aanwysing daartoe aanwys.
- 12.4 In 'n meerdere kerkvergadering word met die notule gehandel soos besluit deur die vergadering. Die notule van die laaste dag van die sinodesitting word tydens die eerste vergadering van die moderamen goedgekeur. Daarna word die finale notule voorberei vir beskikbaarstelling (12.2.3). Die notule word amptelik op die kerk se webbladsy gepubliseer en die datum van publikasie is die datum van inwerkingtreding van besluite.
- 12.5 Dit notule van 'n kerkraadsvergadering word op die volgende vergadering goedgekeur en deur die voorsitter en die skriba van die kerkraad onderteken en op elke bladsy gearafeer. Die notule van 'n kerkraadsvergadering kan aan die lede vooraf gestuur word. Sake van vertroulike aard wat persone raak en hulle in die verleentheid kan stel, moet nie in die notule gedeelte wat uitgestuur word, opgeneem word nie, maar moet in 'n vertroulike notule op die kerkraadsvergadering gelees en goedgekeur word.
- 12.6 'n Verbetering van geringe aard word in dieselfde notule aangebring, maar 'n ingrypende of materiële verbetering word in die notule van die volgende vergadering opgeneem met verwysing na die bladsy waarop die besluit voorkom en met aantekening van die bladsy waarop die verbetering in die jongste notule aangebring is.

## **13. SLUITING**

- 13.1 Elke vergadering word ten minste met gebed afgesluit deur die voorsitter of iemand deur hom/haar daartoe versoek.

### **3. REGLEMENT VIR DIE MODERAMEN EN SUB-TAAKSPANNE**

#### **1. NAAM**

Die Moderamen van die NG Kerk Vrystaat.

#### **2. SAMESTELLING**

Die Moderamen word saamgestel uit

- 2.1 Die lede van die Dagbestuur (5); een leraar uit elke ring van die NG Kerk Vrystaat (16); agt kerkraadslede (nie-gelegitimeerdes) soos tydens die sinodesitting aangewys; een verteenwoordiger van die Sinodale Diens Navorsing (SDN); een verteenwoordiger van Vrouebediening; die voorsitters van die vyf sinodale bedieninge (Bedieningsbegeleiding, Teologiese Opleiding, Ondersteuning, Diens van Barmhartigheid, Vennote in Getuienis); asook die Predikant/Persoon in Sinodale Diens van elk van die vyf bedieningsrade.
- 2.2 Die Moderamen soos saamgestel (gegewe die aantal Ringe) bestaan dus uit 36 verkose lede (aangewys deur die Sinode en die onderskeie bedieninge), en die vyf (5) PSD's, wat met adviserende stem in die Moderamen dien. 'n Korum van stemgeregtigde lede is 19.
- 2.3 Die Dagbestuur van die Moderamen bestaan uit vyf (5) lede en word soos volg saamgestel:
  - a) Vier lede van die Moderatuur verkies tydens 'n gewone Sinode, wat dienooreenkomstig hul verkiesing dien as voorsitter (die Moderator van die Sinode), ondervoorsitter (die Assessor van die Sinode) en skriba (ook die skriba van die Sinode) van die Dagbestuur én Moderamen; plus een (1) addisionele lid verkies deur die Sinode in sitting uit sy lede;
  - b) Die Aktuaris, soos tydens die Sinodesitting op aanbeveling van die Sinodale Diens Regte (SDR), sien Reglement 5).
- 2.4 Die Moderamen wys tydens sy eerste vergadering drie sekundi uit sy eie geledere aan vir die vier verkose lede van die Dagbestuur wat in volgorde van verkiesing tydelik opgeroep word wanneer 'n lid of lede van die Dagbestuur vanweë verlof, siekte of enige ander geldige rede nie beskikbaar is wanneer 'n saak hanteer moet word nie, en hierdie sekundi word deur die Moderamen aangevul soos nodig.
- 2.5 Indien die Aktuaris vanweë verlof, siekte of enige ander geldige rede nie beskikbaar is wanneer 'n saak deur die Dagbestuur hanteer moet word nie, word die sekundus soos aangewys deur die SDR uit sy lede, tydelik opgeroep.
- 2.6 Indien die posisie van voorsitter, ondervoorsitter of skriba van die Moderamen vakant raak, wys die Moderamen uit sy lede iemand in die betrokke posisie aan by wyse van 'n stemproses tydens 'n amptelike in persoon vergadering van die Moderamen. Indien die nuutverkose ampsdraer een van die verteenwoordigers van 'n Bediening, of Diensgroep is, besluit die Moderamen in oorleg met daardie betrokke Bediening/Diensgroep of sy/haar sekundus hom/haar as verteenwoordiger sal vervang.

- 2.7 Indien die posisie van Aktuaris op die Moderamen permanent vakant raak, neem die sekundus wat deur die SDR aangewys is, sy/ haar plek in.
- 2.8 Die Ringsverteenwoordigers in die Moderamen, word tydens die Sinode deur elke ring self aangewys (16), en wel so dat daar 'n primarius en sekunduslid uit elke ring is – verkieslik die voorsitter en/of ondervoorsitter van die Ringskommissie, en verkieslik een 'n leraar en die ander 'n kerkraadslid, en dit vir die duur van die volle termyn tussen twee gewone vergaderings van die Sinode.
- 2.9 Die verkose Ringsverteenwoordigers (16) en kerkraadslede (8) in die Moderamen en hulle sekundi, word aangewys tot en met die volgende gewone vergadering van die Sinode, ongeag of hulle vir die volle duur van die tydperk steeds in 'n besondere amp is of nie. Indien so 'n lid op die Moderamen te sterwe kom, uit daardie Ring verhuis, 'n beroep na elders aanvaar of emeriteer of amptelik bedank as lid van die Moderamen, word die sekunduslid soos deur die Ring aangewys, opgeroep.
- 2.10 Wanneer 'n verteenwoordiger van 'n Ring nie 'n Moderamenvergadering kan bywoon vanweë verlof, siekte of enige ander rede nie, word die sekundus tydelik opgeroep; wanneer 'n permanente vakature ontstaan in die verteenwoordiging van 'n Ring, neem die sekundus sy/haar plek permanent in; Ringe kan 'n nuwe verteenwoordiger en/of sekundus tussen twee sinodesittings aanwys wanneer 'n verteenwoordiger of sekundus nie langer beskikbaar is nie;
- 2.11 Die verteenwoordiger vir die Sinodale Diens Navorsing (SDN) kan tydens die Sinode aangewys word, op grond van voorstelle deur die huidige Moderamen of die SDN, òf dan by die konstituering van die eerste moderamenvergadering ná die Sinode;
- 2.12 Die verteenwoordiger vir Vrouebediening kan tydens die Sinode aangewys word, op grond van voorstelle deur die huidige bestuur van Vrouebediening aan die Moderamen en Sinode voorgelê, òf by konstituering van die eerste moderamenvergadering ná afloop van die Sinode;
- 2.13 Bedieninge en die Sinodale Dienste Navorsing (SDN) en Regte (SDR) vul vakatures aan wat ontstaan by hulle verteenwoordigers.
- 2.14 Indien die voorsitter van 'n Bediening of die Aktuaris nie 'n Moderamenvergadering kan bywoon vanweë verlof, siekte of enige ander rede nie, word die ondervoorsitter van die Bediening of die sekundus van die SDR soos verkies of aangewys, tydelik opgeroep.

### **3. OPDRAG**

#### Die Moderamen

- 3.1 funksioneer as 'n verkose kommissie van die Sinode, dit is, hy ontvang sy opdragte van en lewer verslag aan die Sinode;
- 3.2 hanteer namens die Sinode van die NG Kerk Vrystaat aangeleenthede wat verband hou met die belydenisvorming van die kerk, visionering, publieke getuienis, die soeke na 'n herstel van kerklike eenheid, en eksterne kommunikasie (na sowel die kerklike publiek, as in openbare- en sosiale media);

- 3.3.1 neem leiding in die interim tussen sinodesittings, op 'n verteenwoordigende, geloofsonderskeidende en deursigtige wyse en in oorleg met al die ander sinodale bedieninge, die vordering met die uitvoering van besluite wat deur die Sinode geneem is ten opsigte van die welsyn en breë roeping van die kerkverband in geheel;
- 3.3.2 bied 'n verteenwoordigende ruimte vir verdere oorlegpleging tussen gemeentes, ringe, sinodale dienste en bedieninge soos wat in die verloop van 'n termyn rakende sinodale besluite en opdragte nodig mag wees; en
- 3.3.3 bied ondersteuning aan sinodale bedieninge soos wat van tyd tot tyd op hul versoek, vereis mag word in die uitvoering van hul verantwoordelikhede;
- 3.3.4 vir hierdie doel verteenwoordig die skriba die Moderamen in die Raad vir Ondersteuning; die ondervoorsitter die Moderamen in twee van die ander bedieningsrade; en die addisionele lid, die Moderamen in die ander twee bedieningsrade;
- 3.4 hanteer alle spoedeisende sake wat op die terrein van die Sinode lê en nie by ander kommissies/bedieninge/taakspanne van die Sinode tuishoort nie, met verslag aan die Sinode;
- 3.5 bemiddel spoedeisende sake wat op die terrein van die Sinode lê en wat wel by kommissies/bedieninge/sinodale dienste tuishoort, maar waar daar meningsverskil ontstaan en die kommissies met mekaar in botsing kom en nie self die saak kan oplos nie;
- 3.6 beskik oor twee permanente dienste, naamlik die Sinodale Diens Regte (SDR) en die Sinodale Diens Navorsing (SDN), wat naas hulle deurlopende opdragte deur die Sinode gegee, ook die Moderamen in sy besluitneming en ander sinodale bedieninge in hul werksaamhede, bystaan met advies;
- 3.7 bepaal deur geloofsonderskeiding wanneer gebeure of omstandighede in die lewe van die NG Kerk Vrystaat, haar gemeentes of die provinsie Vrystaat dit sou noodsaak dat daar 'n sinodale bid- en/of dankdag uitgeroep moet word;
- 3.8 wys verteenwoordigers aan om amptelik by bepaalde geleenthede namens die NG Kerk Vrystaat op te tree;
- 3.9 hanteer ekumeniese sake namens die NG Kerk Vrystaat, en wat nie reeds volgens die bestaande ordening van ekumeniese verhoudinge, aan 'n ander kommissie van die sinode toegewys is nie;
- 3.10 hanteer appèlle soos omskryf in die *Kerkorde* (Die AS *Kerkorde* 2023, Artikel 23 en die *Reglement vir Appèl of Beswaar*);
- 3.11 word deur die Sinodale Diens Regte (SDR) ingelig oor regshandelinge waarby die NG Kerk Vrystaat geïmpliseer word of moet handel, neem indien nodig daarvoor toepaslike resolusies, en bemagtig daarmee die aktuaris om in sulke aangeleenthede *ex officio* namens die NG Kerk Vrystaat op te tree;

- 3.12 roep volgens die bepalinge in die Kerkorde en die Reglement van Orde, op die aangewese tyd ná vier jaar, 'n gewone Sinode vir die NG Kerk Vrystaat byeen, en neem leiding in die voorbereiding van die agenda vir so 'n sinodesitting, deur
- 3.13.1 'n Ontwerpspan vir die Sinode aan te wys wat:
- 3.13.2 bestaan uit 'n verteenwoordigende aantal kundige lede uit die geledere van die Moderamen self, die sinodale kerkkantoor, sinodale bedieninge en ook uit enkele ander lede uit die kerkverband ter wille van 'n gesonde diversiteit van stemme;
- 3.13.3 wat in samewerking met die skriba van die Moderamen as taakspan van die Moderamen werk;
- 3.13.4 wat die tema en geskikte prediker vir die openingserediens van die Sinode bepaal, sowel as vir 'n pastorale gesprek en/of ander spiritualiteitsgeleenthede tydens die sinode;
- 3.13.5 en wat toesien dat alle sake wat deur die sinode behartig moet word in die Agenda vervat is en toesien dat dit betyds aan die afgevaardigdes besorg word (Sien regl 2.3.2)
- 3.14 roep 'n buitengewone sinode byeen na aanleiding van besluit 34.2 by Artikel 34 van die *Kerkorde*, en handel in die voorbereiding daarvoor, in ooreenstemming met die prosedures hierbo in 3.11 beskryf, met dien verstande dat die Dagbestuur (met gekoöpteerde lede) dan as Ontwerpspan handel;
- 3.15 ontvang en oorweeg, naas die Sinode, beskrywingspunte en ander sake vir behandeling deur die Algemene Sinode (*Die Kerkorde AS 2023, die Reglement van Orde punt 7.1*);
- 3.16 maak gebruik van sy Dagbestuur om in die interim tussen geskeduleerde vergaderings, die uitvoering van besluite van die Moderamen te ondersteun, asook om spoedeisende sake, wat nie kan oorstaan na 'n gewone of buitengewone vergadering van die Moderamen nie, af te handel met verslag aan die Moderamen, met dien verstande dat die Dagbestuur in die geval van kontensieuse en/of sensitiewe sake, die ander lede van die Moderamen sal raadpleeg voordat hulle dit afhandel.

#### **4. KONSTITUERING EN VERGADERINGS**

- 4.1 Die Moderamen konstitueer so spoedig moontlik na die aanwysing van alle verkose verteenwoordigers, verkieslik tydens die Sinode of so spoedig moontlik net daarná;
- 4.2 Die Moderamen vergader ten minste drie (3) keer per jaar, waarvan ten minste twee (2) keer in persoon sal wees, en soveel kere as wat nodig mag wees, verder aanlyn;
- 4.3 Die agenda vir 'n vergadering van die Moderamen, word saamgestel uit sake wat deur die Sinode na die Moderamen verwys is, daarna soos telkens uit die notule van 'n moderamenvergadering mag voortspruit en enige nuwe sake wat uit verskillende vergaderings van bedieninge en Ringe na die Moderamen verwys word; en word hierdie agenda deur die Dagbestuur van die Moderamen voorberei;
- 4.4 Die Moderamen keur sy eie notules in 'n eersvolgende vergadering goed;

- 4.5 Die Dagbestuur van die Moderamen vergader soos nodig met verslag (volledige notules) aan die Moderamen;
- 4.6 Die Dagbestuur keur sy eie notules so gou moontlik elektronies goed en sirkuleer dit dadelik onder die ander lede van die Moderamen;
- 4.7 Die Skriba van die Dagbestuur stuur enige dokumente wat ontvang word dadelik deur na die bediening waar dit vir hantering tuishoort.

***Besluit van die Vrystaatse Sinode 2026:***

*Die totaal afgevaardigdes wat na die Algemene Sinode gestuur kan word, is minstens 'n totaal van 37 persone.*

*Na aanleiding hiervan word die afvaardiging vir die Algemene Sinode soos volg uiteengesit:*

1. *Die 5 lede van die Dagbestuur van die Moderamen.*
2. *Twee lede uit elke ring. Elke ring vaardig vier lede af: twee primarii lede en twee sekundi wat bestaan uit twee leraars en twee kerkraadslede.*
3. *Indien daar nog persone afgevaardig kan word, wys die Moderamen die lede uit leraars en kerkraadslede aan.*

#### **4. REGLEMENT VIR DIE RING**

Hierdie reglement is aanvullend tot *Kerkorde Artikel 29-31*, met die spesifieke doel om die kerkordelike artikels in die ringe van die NG Kerk in die Vrystaat toe te pas.

##### **1. DIE RING**

Die ring is 'n uitdrukking van die kerkverband wat gemeentes onderling groepeer met die oog op onderlinge samewerking en ondersteuning, asook behoorlike kerklike dissipline.

##### **2. SAMESTELLING VAN DIE RING**

- 2.1 Die ring word saamgestel uit gemeentes wat hoofsaaklik geografies gegroepeer is. Die Teologies kategoriale Ring word kategoriaal saamgestel nadat gemeentes wat daarby wil inskakel deur die moderamen goedgekeur is<sup>35</sup>.

<sup>35</sup> **Die proses van inskakeling by die teologies-kategoriale ring soos goedgekeur deur die Moderamen op 10 Maart 2025**

1. dat gemeentes wat by so 'n teologies-kategoriale ring (wil) inskakel en die ring self, hulself teologies sal identifiseer of definieer, ten einde duidelik te stel waarom en hoe hulle van ander geografies-saamgestelde ringe onderskei wil word;
2. dat die inskakeling van 'n gemeente by so 'n nuwe teologies-kategoriale ring, volledig is (dus kan 'n gemeente nie tegelykertyd met amptelike verteenwoordiging aan twee ringe behoort nie) en dat die gemeente dus in hul nuwe ring in die amptelike werksaamhede van 'n ring soos in Artikel 31 beskryf (31.1, 2, 3, 5, 8, 9, 10 en 11) deel, maar dat sake van 'n meer "gemeenskaplike roeping en gesamentlike werksaamhede" (31.4, 6 en 7) nog in oorleg met die oorspronklike geografiese ring bespreek en onderneem/voortgesit kan word;
3. dat dieselfde riglyne wat geld vir die hantering van 'n gemeente wat by 'n ander sinode as hul eie wil inskakel (Kerkorde Artikel 32 ens.), ook in die geval van gemeentes wat by so 'n teologies-kategoriale ring wil inskakel, gevolg sal word, naamlik:
  - 3.1 dat die kerkraad van daardie gemeente hul standpunt beredeneer en dit met die gemeente bespreek ('n afkondiging vooraf, uitnodiging na 'n inligtingsgeleentheid, hantering van vrae of terugvoer uit die gemeente), sodat daar verkieslik

Die groepering van gemeentes word van tyd tot tyd deur die sinode/moderamen gedoen.

### **3. WERKSAAMHEDE EN VERANTWOORDELIKHEDE VAN DIE RING (Sien ook *Artikel 31* van die *Kerkorde*.)**

Die ring is verantwoordelik vir:

#### **3.1 Amptelike ringsbesoek (visitasie)**

3.1.1 Die ring verseker dat daar minstens twee keer in die termyn tussen gewone sinodesittings 'n amptelike ringsbesoek (visitasie) aan elke gemeente gebring word

3.1.2 Die Ring besluit self deur wie van die Ring en hoe hierdie besoeke gedoen moet word.

#### **3.2 Pastorale Ondersteuning**

Tot die pastorale taak van die ring behoort:

3.2.1 Geestelike en materiële ondersteuning aan elke gemeente.

3.2.2 Advies en hulp om elke gemeente in staat te stel om sy roeping uit te leef.

#### **3.3 Toerusting**

Tot die toerustingstaak van die ring behoort:

3.3.1 Die ontwikkeling van 'n gesamentlike missionale roeping vir die ringsgebied.

3.3.2 Die ondersteuning aan gemeentes met die aktiewe uitleef van hierdie roeping.

#### **3.4 Begeleiding**

Tot die begeleidingstaak van die ring behoort die ontwikkeling en begeleiding van ampsdraers met die oog op diensbaarheid, leierskap en verantwoordbaarheid.

---

geen besware daarteen en/of volledige instemming met die voorstel en die implikasies daarvan, by die gemeente sal wees;

3.2 dat hierdie bespreking van die kwessie met die gemeente, die kerkraad sal lei in hul besluitneming hieroor, wat a) met 'n gewone volstreekte meerderheid van stemme in 'n kerkraadsvergadering geneem word, en b) vir approbasie weer aan die gemeente deurgegee word;

3.3 dat die kerkraad daarna 'n skrywe aan hul huidige ring rig om dié in te lig oor hul versoek, die motivering daarvoor en hul voorneme om alle praktiese implikasies hiervan, met die ring uit te klaar;

3.4 dat die kerkraad dieselfde skrywe aan die nuwe teologies-kategoriale ring deurstuur, sowel as na die moderamen vir kennisname van die versoek en die proses;

3.5 dat die kerkraad en die huidige ring of sy gevolmagtigde mekaar ontmoet om die besluit van die kerkraad te bespreek, hul motivering aan te hoor en om oor praktiese kwessies soos gesamentlike projekte, ringsfondse en samewerking in plaaslike verband uitklaring te kry (sien Art. 31.4, 6 en 7);

3.6 dat na afloop van sodanige ontmoeting tussen die kerkraad en hul huidige ring, en indien instemming oor alle aspekte verkry is, die ringskommissie dan 'n skrywe aan die moderamen rig waarin kennis gegee word dat aan alle vereistes voldoen is en die ring instem dat die betrokke gemeente oorgaan na die teologies-kategoriale ring;

3.7 dat die ringskommissie van die huidige ring, 'n soortgelyke skrywe aan die teologies-kategoriale ring rig met die mededeling dat die betrokke gemeente se aansoek deur die ring goedgekeur is, en 'n versoek dat die teologies-kategoriale ring die gemeente onder hul sorg sal neem;

3.8 dat die moderamen by 'n eersvolgende vergadering ná die aansoek ontvang is en alle prosesse afgehandel, die gemeente se oorgang na 'n nuwe teologies-kategoriale ring goedkeur, en daarvan in die kerkverband kennis gee; en

3.9 dat eers hierná, die gemeente volledig deel is van die nuwe teologies-kategoriale ring.

### 3.5 Opsig en tug

Opsig en tug deur die ring behels die volgende:

- 3.5.1 Om toe te sien dat alles in die ringsgemeentes volgens kerklike reëlings geskied (*Kerkorde Artikel 31*).
- 3.5.2 Die opsig, tug en dissipline oor alle ouderlinge, diakens, en alle gelegitimeerdes (dit word onder andere gedoen volgens *Kerkorde artikel 31.7; Reglement 21 en 22*, asook punt 6 van hierdie reglement).
- 3.5.3 Die bevoegdheid om 'n saak wat 'n mindere vergadering moes afhandel, onder die volgende omstandighede te hanteer:
  - 3.5.3.1 Waar 'n mindere vergadering nie bestaan nie.
  - 3.5.3.2 In geval van onvermoë of wanbestuur by die mindere vergadering. (*Kerkorde artikel 22.2; 22.3*)

### 3.6 Vakature vir predikant in 'n ringsgemeente

(*Kerkorde artikel 31.3, asook Reglement 12 vir Beroeping, Bevestiging, Demissie en Emeritaat van Predikante*).

Die ring/ringskommissie het 'n verantwoordelikheid om in samewerking met 'n kerkraad toe te sien dat 'n vakature so spoedig moontlik gevul word (*Kerkorde Artikel 7; Reglement 13 vir Voltydse Predikantsposte*).

### 3.7 Beroeping en bevestiging van 'n predikant

*Aan die einde van Reglement 12 is 'n kontrolelys aangebring wat die stappe in die beroepingsproses van predikante vervat.*

(*Kerkorde artikel 31.2*)

- 3.7.1 By die beroeping en bevestiging van 'n predikant, sien die ring toe dat daar aan al die kerkordelike vereistes voldoen word (*Kerkorde Artikel 7 en 8, Reglement 11 vir Bevoegdheid van Predikante, Proponente en Emeriti, asook Reglement 12 vir Beroeping, Bevestiging, Demissie en Emeritaat van Predikante*).
- 3.7.2 Verantwoordelikhede van die ring tydens die beroepingsproses van 'n predikant.
  - Konsulent
    - 3.7.2.1 Die konsulent het die volgende verantwoordelikhede in die beroepingsproses van 'n predikant na 'n ringsgemeente:
      - 3.7.2.1.1 Adviseer en ondersteun die kerkraad om toestemming van die ring te verkry dat voortgegaan kan word met die beroepingsproses. (*Die ring verleen toestemming dat 'n beroep uitgebring mag word nadat hy oortuig is van die finansiële volhoubaarheid van die pos.*)
      - 3.7.2.1.2 'n Verteenwoordiger van die ring (verkieslik die konsulent) woon die beroepingsvergadering by.
      - 3.7.2.1.3 'n Verteenwoordiger van die ring (verkieslik die konsulent), adviseer die kerkraad in die opstel van die beroepsbrief.

### 3.7.2.2 Ringskriba

*Aan die einde van hierdie reglement is 'n samevatting aangebring wat die ringskriba se pligte in die beroepingsproses opsom.*

3.7.2.2.1 Wanneer 'n beroep uitgebring is, moet die ringskriba die ondergenoemde dokumente wat deur die beroepende kerkraad aan hom/haar voorgelê word, kontroleer en dan skriftelik bevestig dat daar aan al die kerkordelike vereistes vir die uitbring van die beroep voldoen is.

Hierdie dokumente (kerklike vereiste) behels die volgende:

- i. 'n Skriftelike bevestiging van die Algemene Taakspan Predikantesake dat die beroepene beroepbaar is.
- ii. Skriftelike bevestiging van die beroepene se huidige gemeente dat die persoon lidmaat is;
- iii. 'n Skriftelike bevestiging van die ring onder wie se opsig die beroepene tans staan, dat daar geen tug en/of dissiplinêre ondersoek teen die persoon hangende is nie en dat die persoon beroepbaar is.
- iv. 'n Skriftelike bevestiging van die konsulent of ander verteenwoordiger van die ring (wat die beroepingsvergadering bygewoon het) dat die korrekte kerkordelike prosedures gevolg is met die uitbring van die beroep.
- v. 'n Skriftelike bevestiging deur die beroepende kerkraad dat approbasie verleen is, dit wil sê dat daar geen wettige beswaar teen die beroep ontvang is nie.
- vi. Die voltooide beroepsbrief wat behoorlik onderteken is deur die gevolmagtigdes van die kerkraad.

3.7.3.3 Voordat die bevestiging van die beroepene plaasvind, moet die ringskriba die volgende ontvang, kontroleer en die RK moet dit goedkeur.

3.7.3.3.1 'n Afskrif van getekende dienskontrak, wat ook deur die RK goedgekeur is.

3.7.3.3.2 'n Afskrif van die beroepene se *Akte van Demissie* of *Akte van Legitimasie* en attestaat in geval van 'n proponent.

3.7.3.3.3 'n Afskrif van die beroepene se attestaat.

3.7.3.3.4 'n Skriftelike bevestiging van die pensioenkantoor dat die beroepene se pensioen in orde is.

3.7.3.4 Hierna bevestig die ring/ringskriba skriftelik dat aan al die kerkordelike vereistes voldoen is en dat daar met die bevestiging van die predikant voortgegaan kan word.

3.7.3.5 Die ringskriba stel die ringspredikante in kennis van die bevestigingsgeleentheid en nooi hulle daarheen.

3.7.3.6 Die ringskriba kontroleer dat die skriba van die kerkraad die ABR en die Kerkbode in kennis gestel het van die bevestigingsdatum en van die naam van die predikant wat die bevestiging behartig het.

### **3.8 Uitdienstreding van 'n predikant**

*(Kerkorde Artikel 11, 12 en 31 asook Reglement 11 vir Bevoegdheid van Predikante, Proponente en Emeriti)*

3.8.1 By uitdienstreding sien die ringskommissie toe dat daar aan al die kerkordelike vereistes voldoen is (*Kerkorde Artikel 11 en 12*).

3.8.2 Die ringskommissie sien toe dat kerkrade die reëling nakom dat predikante met die bereiking van die amptelike aftree-ouderdom (65) emeriteer.

'n Bedienaar van die Woord wat die ouderdom van 65 jaar bereik, mag vir hoogstens ses (6) maande na die bereiking van sy 65ste verjaarsdag op versoek van die betrokke kerkvergadering/kommissie in sy diens aanbly. (Vergelyk die besluit Algemene Sinode 1986, Acta p 712)

### **3.9 Herstel van bevoegdheid van 'n predikant of proponent**

*(Kerkorde Artikel 12 asook Reglement 11 vir die Bevoegdheid van Predikante, Proponente en Emeriti)*

Die ring se rol in die hantering van 'n aansoek om herstel van bevoegdheid van predikante en proponente word uiteengesit in

*Reglement 11 vir die Bevoegdheid van Predikante, Proponente en Emeriti.*

### **3.10 Nuwe geloofsgemeenskapsontwikkeling, samesmelting van gemeentes, stigting van nuwe gemeentes, verandering van gemeentegrense, asook naamsverandering van gemeentes**

*(Kerkorde artikel 31.4)*

3.10.1 Die ontwikkeling van 'n nuwe gemeente in die ringsgebied word deur die ring begelei. Die stigting van 'n nuwe gemeente in die ringsgebied kan ook deur die ring geïnisieer word.

3.10.2 Die ring het 'n verantwoordelikheid ten opsigte van die stigting, kombinerings, eenwording en samesmelting van gemeentes in die ring. (*Reglement 27 vir die Vermeerdering, Kombinerings, Eenwording en Samesmelting van Gemeentes*)

3.10.3 Die verandering van grenslyne van bestaande gemeentes is die verantwoordelikheid van die ring. Koste hieraan verbonde word deur die betrokke gemeentes gedra.

3.10.4 Die naamsverandering van 'n bestaande gemeente geskied met goedkeuring van die ring, waarna dit deur die moderamen goedgekeur moet word en in die Kerkbode bekend gemaak word. Alle koste in dié verband is vir die rekening van die betrokke gemeente.

3.10.5 By 'n naamsverandering moet *Reglement 24 vir Kerklike Goedere*, punt 4 steeds nagekom word. 'n Gemeente mag 'n noemnaam hê, maar die amptelike naam (by die Suid Afrikaanse Inkomstediens, finansiële instellings en die akteskantoor) moet aan *Reglement 24 vir Kerklike Goedere*, punt 4 voldoen.

3.10.6 Die Ring sien toe dat by vervreemding van gemeentelike eiendomme, Reglement

#### 24.4.4.3 nagekom word:

*Vervreemding van gemeentelike eiendom sal geskied, met approbasie van die gemeente en in oorleg met die ring, wat sal toesien dat dit teen 'n markverwante prys vervreem word en dat die inkomste wat daardeur gegenereer word, steeds aangewend word vir die beoefening van die aktiwiteite (openbare weldaad) van die gemeente (Artikel 31.2).*

#### **3.11 Verskillende kerkverbande – kombinasie van werksaamhede** *(Kerkorde artikel 31.4)*

Die rol van die ring in die kombinasie van werksaamhede van gemeentes en ringe uit verskillende kerkverbande, word volledig uiteengesit in *Reglement 27 vir die Vermeerdering, Kombinering, Eenwording en Samesmelting van Gemeentes*.

#### **3.12 Kerklike geskille, dissiplinêre- en tugsake**

*(Kerkorde artikel 31.7, Reglement 21 vir die Bestuur van Diensverhoudinge vir Predikante by Ongeskiktheid en Onvermoë, asook Reglement 22 vir Tug en Vermaning.)*

3.12.1 Kerklike geskille, dissiplinêre en tugsake word deur die ring volgens kerkordelike riglyne hanteer *(Kerkorde Artikel 59-66, Reglement 22 vir Tug en Vermaning, asook Riglyne vir die beslegting van geskille)*

3.12.2 Kerklike geskille, dissiplinêre en tugsake word deur die ringstugliggaam as gevolmagtigde ondersoekliggaam van die ring volgens kerkordelike riglyne hanteer (sien punt 6 van hierdie reglement).

3.12.3 Kerklike geskille, dissiplinêre- en tugsake kan ook deur die ring/ringskommissie, in oorleg met die aktuaris, verwys word na 'n ander ring vir hantering.

#### **3.13 Kerklike appèlle** *(Kerkorde artikel 23.1 en 31.5, Reglement 23)*

Die ringstugliggaam tree as gevolmagtigde appèlliggaam van die ring op om appèlle volgens kerkordelike riglyne te hanteer (sien punt 7.1 en 7.2 van hierdie reglement).

#### **3.14 Beperkte bevoegdheid op versoek van kerkrade**

*(Kerkorde artikel 16.1.8, 31.9, 48.3.5, Riglyn 4)*

3.14.1 Die ring kan, op versoek van kerkrade, beperkte bevoegdheid toeken, byvoorbeeld aan ouderlinge vir die lei van eredienste. (Sien die riglyne hieronder soos deur Algemene Sinode 2015 goedgekeur.)

#### 3.14.2 Riglyne vir die lei van eredienste deur ouderlinge

*(Vergelyk artikel 48.3.5 en Artikel 4, 10 en 16.1.8, Riglyn 4)*

3.14.2.1 Indien die ring die behoefte, om op grond van plaaslike omstandighede aan 'n ouderling(e) preekvergunning te gee met die oog op die leiding van openbare eredienste, goedkeur, nomineer kerkrade dienende ouderling(e) wat oor die gewes beskik om 'n openbare erediens te lei en sien die ring toe dat hulle die opleidingsprogram van die sinode suksesvol voltooi.

- 3.14.2.2 Ná goedkeuring deur die ring of sy gevolmagtigde, skryf die kerkraad die ouderling in vir opleiding en toerusting van die goedgekeurde opleidingsprogram. Die kerkraad/ring behoort in te staan vir die aansoeker se opleidingskoste.
- 3.14.2.3 Ná die suksesvolle voltooiing van die opleiding word die ouderling se taakoms krywing uitgebrei om die lei van openbare eredienste in die ringsgebied ooreenkomstig *Kerkorde artikel 16.1.8* in te sluit.
- 3.14.2.4 Die ring/ringskommissie wys 'n predikant uit eie geledere aan om deurlopend aan sodanige ouderling(e) begeleiding te gee. Die begeleier doen jaarliks skriftelik verslag aan die ring ten opsigte van die geskiktheid van die ouderling.
- 3.14.2.5 Die ouderling word aangewend soos en waar die bedieningsnood deur die ring geïdentifiseer is. By elke erediens wat die ouderling lei, tree hy/sy op onder die toesig van die betrokke kerkraad.
- 3.14.2.6 'n Ouderling behou die preekvergunning vir solank hy/sy in die amp staan en op voorwaarde dat die ring dit jaarliks goedkeur.
- 3.14.2.7 Daar word van ouderlinge met preekvergunning verwag om voortgesette opleidingsprogramme by te woon.

#### **4. VERGADERING VAN DIE RING (RINGSITTING)**

Die ring vergader een maal per jaar of soos deur die sinode bepaal. 'n Buitengewone vergadering van die ring kan deur die voorsitter van die ringskommissie belê word in opdrag van die ringskommissie of op skriftelike versoek van minstens twee kerkrade binne ringsverband, met opgaaf van redes.

Oor die samestelling, konstituering en ordereëlings van die ringsvergadering, besluit die Ring self (sien aantekeninge by Artikel 29)

##### **4.1 Samestelling van die ringsvergadering**

- 4.1.1 Die ringsvergadering word saamgestel uit afgevaardigdes van die ringsgemeentes.
- 4.1.2 Die samestelling van die afvaardiging geskied soos volg:
  - 4.1.2.1 Al die predikante van 'n gemeente. Waar 'n predikantspos vakant is, kan 'n ouderling of diaken vir die pos afgevaardig word.
  - 4.1.2.2 Een ouderling of diaken vir elke bestaande predikantspos. 'n Afgevaardigde of sekundus kan uit alle ouderlinge en diakens in die gemeente gekies word.
- 4.1.3 Vir elke afgevaardigde (predikant sowel as kerkradslid) word 'n ouderling of diaken as sekundus aangewys.
- 4.1.4 Die primarius en die sekundus kerkradslid kan mekaar tydens die ringsitting vervang, behalwe wanneer 'n amptelike ondersoek aan die gang is. Waar vervanging plaasvind, moet die afvaardigende kerkraad self vir die addisionele koste instaan.

## **4.2 Geloofsbriewe vir ringsvergadering**

- 4.2.1 Kerkrade voorsien die ringsvergadering by alle gewone vergaderings van die geloofsbriewe van die afvaardiging met hul sekundi.
- 4.2.2 Geloofsbriewe van afgevaardigdes moet voor die aanvang van die vergadering by die skriba van die ringskommissie ingelewer word.
- 4.2.3 Met ringsittings tydens die sinodesitting is dieselfde geloofsbrief wat vir sinode gebruik word ook vir die ringsitting geldig (sien 4.5 van hierdie reglement).

## **4.3 Konstituering van die ringsvergadering**

- 4.3.1 Om te konstitueer moet meer as die helfte van die vereiste aantal afgevaardigdes (sien punt 4.1 van hierdie reglement) teenwoordig wees.

## **4.4 Die werksaamhede van die jaarlikse ringsvergadering**

- 4.4.1 Elke ringsvergadering kies 'n voorsitter wat, vir die duur van die vergadering, saam met die skriba leiding van die vergadering neem.
- 4.4.2 Ringsvergaderings se werksaamhede is die volgende:
  - 4.4.2.1 Soek na die wil van die Here met betrekking tot roeping en gesamentlike werksaamhede van die ring.
  - 4.4.2.2 Neem verslae oor die werksaamhede van gemeentes wat tydens ringsvisitatie besoek is, in behandeling.
  - 4.4.2.3 Neem sake wat van belang is vir die ringsgemeentes in behandeling.

## **4.5 Konstituering van ringsvergadering tydens 'n sinodesitting**

- 4.5.1 Afgevaardigdes na die sinode dien as personeel van die ringsvergadering wat tydens die sinode konstitueer om sake af te handel.
- 4.5.2 Indien 'n nuwe ring deur die sinode saamgestel word, konstitueer hierdie ring met die afgevaardigdes van die betrokke gemeentes tydens die sinode.

## **5. RINGSKOMMISSIE**

Die ringskommissie word op die gewone ringsvergadering verkies vir die tydperk soos die Ring besluit en neem leiding om toe te sien dat die onderskeie take en verantwoordelikhede van die ring (punt 3 van hierdie reglement) na behore nagekom word. 'n Leraar en kerkraadslid word tydens die gewone sitting van die Sinode verkies om as verteenwoordigers op die Moderamen te dien vir die tyd tussen gewone Sinodesittings. (sien Regl 2 en 3)

### **5.1 Samestelling**

- 5.1.1 Die ringskommissie bestaan uit ten minste **drie** permanente lede.  
Die ringskommissie word soos volg saamgestel:
  - 5.1.1.1 'n Voorsitter ('n gemeentepredikant) wat verkieslik ook namens die ring op die moderamen vir die termyn tussen sinodes dien.
  - 5.1.1.2 'n Ondervoorsitter ('n gemeentepredikant/emeritus) wat ook as sekondus

optree vir die voorsitter van die ringskommissie.

- 5.1.1.3 'n Skriba wat as skriba van die ring, sowel as skriba van die ringskommissie dien.
- 5.1.1.4 Bykomend kan addisionele lede ook op die Ringskommissie dien en kan hulle leraars of kerkraadslede wees.
- 5.1.2 'n Sekunduslid vir elke lid van die ringskommissie word op die gewone ringsvergadering verkies.
- 5.1.3 Die ringskommissie kan in geval van vakatures, sekundi in volgorde oproep.
- 5.1.4 Die ringskommissie word per geslote stemwyse verkies.
- 5.1.5 Lede van die ringskommissie verdien jaarliks 20 VBO-punte.

## **5.2 Ringskommissie - pligte en verantwoordelikhede**

Die ringskommissie

- 5.2.1 verskaf kontinuïteit aan die werksaamhede van die ring wanneer die ring nie in sitting is nie en vergader so dikwels as wat nodig mag wees;
- 5.2.2 gee uitvoering aan alle opdragte, take en funksies soos deur die *Kerkorde* en reglemente voorgeskryf en soos dit tydens die Ringsitting deur die Ring aan die Ringskommissie opgedra is.
- 5.2.3 neem alle spoedeisende sake in behandeling;
- 5.2.4 sien toe dat kerklike geskille, opsig en tug volgens kerkordelike riglyne hanteer word;
- 5.2.5 dra sorg dat die werksaamhede en verantwoordelikhede van die ring (sien punt 3 van hierdie reglement) uitgevoer word;
- 5.2.6 sien toe dat daar namens die ring, minstens twee keer (verkieslik jaarliks) in die termyn tussen sinodes, 'n amptelike ringsbesoek (ringsvisitasie) aan elke ringsgemeente gebring word (sien 3.1 van hierdie reglement);
- 5.2.7. hou noukeurig notule van die vergaderings en lewer tydens 'n ringsvergadering verslag van alle werksaamhede;
- 5.2.8 het die bevoegdheid en verantwoordelikheid om ringsvergaderings byeen te roep;
- 5.2.9 stel die agenda van 'n ringsvergadering saam en tref alle reëlins met die oog op die vergadering; en
- 5.2.10 sien toe dat die notules van die ringsvergadering deur die voorsitter van die ringskommissie en skriba onderteken word nadat die ring of die ringskommissie dit goedgekeur het.
- 5.2.11 kontroleer jaarliks die VBO punte van leraars en sien toe dat leraars (en diensleraars en bedienaars) hulle punte op datum hou.

### **5.3 Voorsitter van die ringskommissie - pligte en verantwoordelik-hede**

Die voorsitter van die ring/ringskommissie

- 5.3.1 neem verantwoordelikheid vir alle take wat normaalweg aan 'n voorsitter toegedeel word;
- 5.3.2 neem leiding en verantwoordelikheid om toe te sien dat die werksaamhede en verantwoordelikhede van die ring (sien punt 3 van hierdie reglement) na behore nagekom word; en
- 5.3.3 verteenwoordig die ring op die moderamen.

### **5.4 Skriba van die ring - pligte en verantwoordelikhede**

*Aan die einde van hierdie reglement is 'n samevatting aangebring wat al die pligte en verantwoordelikhede van die ringskriba vervat.*

Die skriba van die ring/ringskommissie is verantwoordelik vir

- 5.4.1 die getroue nakoming van wat in die *Kerkorde Artikel 7, 8 en 25* aan hom/haar opgedra word;
- 5.4.2 die hou en bewaring van notules van die vergaderinge van die ring en die ringskommissie;
- 5.4.3 die voorsiening van die ringstatistieke aan die Jaarboek van die NG Kerk;
- 5.4.4 die opstel van 'n] besluiteregister van elke ringsvergadering en die spoedige stuur daarvan aan alle betrokke kerkrade en taakspanne;
- 5.4.5 die stuur van die volledige ringsagenda met bylaes asook die notules van die rings- en ringskommissievergaderings, binne een maand na afloop van die ringsitting, aan die kerkargief;
- 5.4.6 die opstel en instuur van die beskrywingspunte van die ring aan die skriba van die sinode;
- 5.4.7 die administrasie van alle fondse van die ring en die voorlegging van 'n gekontroleerde staat van die ringsfonds by elke gewone vergadering van die ring (die ringskommissie kontroleer die staat); en
- 5.4.8 die indiening van 'n skriftelike verslag van alle werksaamhede by elke gewone vergadering van die ring.

## **6. RINGSTUGLIGGAAM**

- 6.1 In geval van die hantering van amptelike tugsake, hanteer die ringsvergadering dit nie self nie, maar maak die ring van 'n gevolmagtigde ringstugliggaam gebruik met afhandelings-bevoegdheid. Die Ring wys tydens sy normale sitting uit sy geledere drie (3) lede en drie (3) sekundi lede wat op die RTL kan dien, Hierdie lede moet beskikbaar en bereid wees om die nodige opleiding te deurloop wat jaarliks deur die Sinode aangebied word.

### **6.2 Samestelling**

- 6.2.1 Die gevolmagtigde ringstugliggaam (RTL) word dan saamgestel uit lede van die

ring, soos in 6.1 beskryf, sowel as lede wat deur die Aktuaris/Sinodale Diens Regte aangewys is.

6.2.2 Die ringstugliggaam bestaan uit minstens van vyf lede (*Reglement 22 vir Tug en Vermaning, punt 1.4*), en word soos volg saamgestel:

6.2.2.1 Eerstens: die drie lede van die ring. Indien 'n vakature bestaan of 'n lid nie beskikbaar is nie, word die vakante plek ingeneem deur 'n sekonduslid.

6.2.2.2 Tweedens: minstens twee kundige lede van die sinode (kerkverband) word deur die Aktuaris op die ringstugliggaam benoem.

6.2.2.3 Ander kundige lidmate van binne of buite die ring kan ook gekoöpteer word as volwaardige lede van die ringstugliggaam. Al die lede moet die goedkeuring van die betrokke partye wegdra.

6.2.2.4 Die ringskommissie keur die uitgebreide gevolmagtigde ringstugliggaam goed.

### **6.3 Pligte en verantwoordelikhede**

Die ringstugliggaam

6.3.1 is 'n gevolmagtigde kommissie wat tugsake namens die ring behartig en beskik oor afhandelings-bevoegdheid;

6.3.2 moet die Aktuaris van alle tug- en dissiplinêre sake of appèlsake in kennis stel en wel binne een week na die afhandeling daarvan;

6.3.3 doen verslag aan die ring;

6.3.4 het toestemming van die ring/ringskommissie nodig, in samewerking met die Aktuaris van die Sinode indien hulle regsadvies met koste-implikasies wil inwin.

## **7. RINGSAPPÈLLIGGAAM**

[*Reglement 23 vir Hersiening (Revisie), Appèl, Beswaarskrif (Gravamen) en Prosedurele Beswaar*]

7.1 In geval van die hantering van amptelike appèlsake, hanteer die ringsvergadering dit nie self nie, maar maak die ring van 'n gevolmagtigde appèlliggaam met afhandelings-bevoegdheid gebruik.

7.2 Die ringsappèlliggaam hanteer alle appèlle teen kerkrade of hulle gevolmagtigde taakspanne.

7.3 Die ringskommissie tree as gevolmagtigde appèlliggaam op (sien 6.2.2 van hierdie reglement). Indien nodig, kan twee deskundige lede, op aanbeveling van die Aktuaris, met volle stemreg deur die ringsappèlliggaam gekoöpteer word.

7.4 Indien die ringsappèlliggaam regsadvies met koste-implikasies wil inwin, is toestemming van die ring of ringskommissie nodig, in samewerking met die Aktuaris van die Sinode.

## **8. RINGSFONDS**

8.1 'n Ring kan 'n ringsfonds skep deur bydraes van elke ringsgemeente te vorder.

- 8.2 Die ring begroot tydens die ringsitting vir die onkoste en vorder dit van gemeentes in.
- 8.3 Die ringsfonds word aangewend vir die koste van administrasie of enige onderneming in ringsbelang.
- 8.4 Slegs koste wat vooraf deur die ring of ringskommissie vir taakspanne van die ring goedgekeur is, sal betaal word uit die ringsfonds.
- 8.5 Die skriba van die ring/voorsitter van Finansies van die Ring beheer en administreer die fonds volgens opdrag van en met verslag aan die ringsvergadering.
- 8.6 Die skriba/voorsitter van Finansies van die ring moet jaarliks 'n finansiële staat van die fonds opstel en dit deur die ringskommissie laat nagaan, met verslag aan die ring.
- 8.7 Die ring betaal jaarliks na goeddunke aan die kassiere, skriba (en ander persone) 'n realistiese honorarium.

## **9. KONSULENT**

- 9.1 Die ring benoem vir elke gemeente 'n konsulent ('n ringspredikant) om tydens vakatures of langdurige afwesigheid van predikante toe te sien dat die noodsaaklike ampspligte (sien *Kerkorde Artikel 9*) in oorleg met die kerkraad gedoen word en/of dit self waar te neem.
- 9.2 Die benoeming van konsulente geskied op die ringsvergadering tydens die gewone sinodesitting vir die termyn tussen sinodes. Wanneer die konsulent die ring verlaat, wys die ringskommissie 'n plaasvervanger aan.
- 9.3 Kerkrade word van die benoeming in kennis gestel.
- 9.4 Die ampspligte van die konsulent behels
  - 9.4.1 die bywoon van kerkraadsvergaderings (indien so versoek kan hy/sy ook as voorsitter optree) waar die plaaslike leraar afwesig/vakant is;
  - 9.4.2 die verkondiging van die Woord (waar nodig);
  - 9.4.3 die bevestiging van ampsdraers;
  - 9.4.4 die bediening van die sakramente;
  - 9.4.5 die bevestiging van lidmate;
  - 9.4.6 die bywoning of leiding van beroepingsvergaderings; en
  - 9.4.7 ander geleenthede waar 'n predikant se teenwoordigheid noodsaaklik is.
- 9.5 Die reis- en verblyfkoste van die konsulent word deur die vakante gemeente gedra.
- 9.6 Die konsulent doen aan die ring verslag van sy/haar werksaamhede in 'n gemeente.
- 9.7 'n Predikant mag nie 'n konsulent wees van die gemeente waar hy/sy in diens staan nie.
- 9.8 Die konsulent het nie stemreg op die kerkraadsvergadering waarvan hy/sy 'n konsulent is nie.

## 10. VERTEENWOORDIGING OP DIE MODERAMEN

- 10.1 'n Leraar en 'n kerkraadslid wat op die ringsvergadering tydens die sinodesitting aangewys is, dien op die moderamen vir die termyn tussen sinodes.
- 10.2 Indien so 'n verteenwoordiger op die moderamen nie teenwoordig kan wees nie, word die persoon vervang deur die sekonduslid wat op die ringsvergadering tydens die sinode aangewys is.

## 11. DIE RING AS REGSPERSOON

- 11.1 Elke ring is as outonome regspersoon onafhanklik van die gemeentes waaruit die ring saamgestel is.
- 11.2 Sien *Reglement 24 vir Kerklike Goedere* vir meer besonderhede oor die ring as regspersoon.

- o0o -

### 'n Samestelling van die pligte en verantwoordelikhede van die ringskriba

Die pligte en verantwoordelikhede van die ringskriba kom in verskeie reglemente voor. Hierdie samestelling is bedoel om vir ringskribas te help om dit met een oogopslag te vind. Die reglement- verwysing word aangedui om meer detail oor die bepaalde aspek na te gaan.

#### RINGSKOMMISSIE

1. Neem verantwoordelikheid vir die administrasie van die ring en die ringskommissie.
2. Behartig reëlins vir vergaderings.
3. Sorg vir die opstel van agendas en die hou van notules.
4. Sien toe dat notules goedgekeur en onderteken word.

#### RINGSITTING

1. Gee minstens vier weke voor die tyd kennis van gewone ringsitting.
2. Sorg vir die logistieke reëlins van die vergadering.
3. Tref reëlins vir vooraf ontvangs van geloofsbriewe en kontroleer dit.
4. Versamel verslae en voorleggings van diensgroepe en taakspanne.
5. Sorg vir opstel van agenda.
6. Versprei agenda met bylaes twee weke voor die vergadering aan afgevaardigdes.
7. Hou volledige notule en stel besluiteregister op.
8. Besorg notules en besluiteregister na twee weke aan afgevaardigdes.
9. Besorg agenda, bylaes, notules aan argief binne een maand na vergadering.

## BEROEPINGSPROSES

1. Sien toe dat alle vereistes vir beroep en bevestiging van predikante nagekom word.
2. Sien toe dat 'n ringsverteenvoordiger (konsulent) die beroepingsvergadering bywoon.
3. Adviseer die kerkraad oor die opstel van die beroepsbrief.
4. Alvorens die beroepsbrief gestuur word moet ringskriba kontroleer en skriftelik bevestig dat aan die volgende kerkordelike vereistes vir die uitbring van die beroep voldoen is:
  - skriftelike bevestiging van die Algemene Taakspan Predikantesake dat die beroepene na 'n gemeente van die kerk beroepbaar is;
  - skriftelike bevestiging van die beroepene se huidige gemeente dat die persoon lidmaat is;
  - skriftelike bevestiging van konsulent dat die korrekte kerkordelike prosedures gevolg is met die uitbring van die beroep;
  - die voltooide beroepsbrief behoorlik onderteken is deur die gevolmagtigdes van die kerkraad;
  - skriftelike bevestiging van die huidige ring onder wie se opsig die beroepene staan, dat daar geen tug en/of dissiplinêre ondersoek teen die beroepene hangende is nie en/of dat die persoon beroepbaar is; en
  - bevestiging deur die beroepende vergadering dat geen wettige beswaar teen die beroep uitgebring is nie.
5. Kontroleer die volgende stukke van die kerkraad alvorens skriftelike bevestiging kan geskied dat bevestiging van predikant kan voortgaan:
  - 'n afskrif van die getekende dienskontrak;
  - 'n afskrif van die beroepene se Akte van Demissie uit die vorige werkkring óf 'n getuigskrif van eervolle ontslag in die geval van diens aan 'n instansie buite die kerkverband óf die Akte van Legitimasie in die geval van 'n proponent wat beroep is;
  - 'n afskrif van die beroepene se attestaat van die vorige gemeente wat by die beroepende gemeente ingedien is; en
  - 'n skriftelike bevestiging van die pensioenkantoor dat die beroepene se pensioen in orde is.
6. Stel ringspredikante in kennis van bevestigingsgeleentheid en nooi hulle daarheen. Verseker dat minstens een predikant van die ring die bevestiging bywoon
7. Kontroleer dat die gemeente die vereistes van reglement 13.10.8 nagekom het.
8. Versoek aktuaris om Akte van Bevestiging uit te reik in geval van proponent.
9. Sien toe dat behoorlike induksie van die predikant in die gemeente gedoen word.
10. Verskaf skriftelike bevestiging dat alle uitstaande verpligtinge teenoor die predikant met betrekking tot vergoeding, verlof en ander diensvoordele nagekom is, alvorens demissie verleen kan word

## **EMERITAAT**

1. Reik 'n ondertekende akte van emeritaat uit wanneer 'n ringspredikant emeriteer.
2. Stel die sinodale kantoor, die pensioenkantoor, die Algemene Taakspan Predikantesake én Kerkbode in kennis van die emeritering.

## **GEMEENTES**

1. Ondersteun gemeenteskribas ten opsigte van navrae en skakeling met sinode.
2. Koördineer in oorleg met ringskommissie sinodale werksaamhede in gemeentes.
3. Besorg in oorleg met die ringskommissie sinodale kommunikasie aan gemeentes.
4. Kontroleer die indiening van statistiek, finansiële state en geloofsbriewe.
5. Reël in oorleg met ringskommissie ringsvisitasie.

## **PREDIKANTE**

1. Koördineer in oorleg met ringskommissie ringsbyeenkomste vir predikante.
2. Koördineer in oorleg met ringskommissie pastorale versorging van ringspredikante.
3. Koördineer in oorleg met ringskommissie ringsprojekte en ondersteuning.
4. Kontroleer ringspredikante se ABR-fooie en status.
5. Stel ringsleraars in kennis van demissie/emerytaat/bevestiging.
6. Stel die betrokke sinodale kantoor, die pensioenkantoor, ATP én Kerkbode in kennis van die demissie/emerytering/bedanking.
7. Sien riglyne vir demissie/emerytaat/uitdienstreding/herstel van bevoegdheid.

## **ALGEMEEN**

1. Bewaring van notules en ander relevante dokument van die ring
2. Verskaf jaarliks ringstatistiek aan Jaarboek
3. Versorg en stuur beskrywingspunte aan die skriba van die sinode
4. Administreer die ringsfonds
5. Behartig kommunikasie met ringsgemeentes en ringspredikante
6. Sirkuleer lys van konsulente aan gemeentes en kanselruilings
7. Doen jaarliks verslag aan die ring oor werksaamhede

## 5. REGLEMENT VIR DIE SINODALE DIENS REGTE (SDR)

### 1. NAAM

Sinodale Diens Regte (SDR)

### 2. SAMESTELLING

Die diensgroep

- 2.1 word deur die Sinode saamgestel; en
- 2.2 kan kundige lede koöpteer wanneer nodig.

### 3. OPDRAG

Die Diensgroep

- 3.1 gee advies aan kerkvergaderings, kerklike kommissies/taakspanne en lidmate in verband met die uitleg en toepassing van die *Kerkorde*, reglemente van die Algemene Sinode en algemene sinodale besluite, asook die *Kerkorde* van die Vrystaat Sinode en sinodale besluite wat direk of na voorlegging van die Aktuarius voor die Taakspan dien (navrae moet skriftelik gerig word en adviese moet ook sover moontlik op skrif gestel word);
- 3.2 bewaar die korrespondensie en adviese en besorg dit aan die kerkargief;
- 3.3 maak 'n studie van sake wat deur die Sinode/Moderamen na die Diensgroep verwys is en dien die Sinode/Moderamen met 'n verslag en aanbevelings in dié verband;
- 3.4 sien toe dat alle besluite van die Algemene Sinode en die Vrystaat Sinode wat wysigings aan die *besluite*, *aantekeninge*, *reglemente* van die *Kerkorde Vrystaat* meebring, op die juiste plekke ingevoeg, redaksioneel versorg en so spoedig moontlik gepubliseer word;
- 3.5 bring kerkregtelike ongerymdhede in sinodale verband, wat onder sy aandag kom, onder aandag van die Moderamen/die betrokke kerkvergadering met 'n aanduiding van die moontlike weg tot herstel;
- 3.6 win, in opdrag van die Sinode of sy gevolmagtigde(s), regsadvies in en indien nodig, verteenwoordig die Aktuarius die Sinode in alle regsangeleenthede.
- 3.7 hersien die *Kerkorde* en die reglemente van die Vrystaat Sinode en bedien die sinode met voorstelle;
- 3.8 doen verslag aan die sinode; en
- 3.9 nomineer van sy lede (normaalweg die Aktuarius as primarius en die ondervoorsitter as sekundus) as verteenwoordigers van die NG Kerk Vrystaat in die Algemene Taakspan Regte (ATR), wat deur die Algemene Sinode/Moderamen van die Algemene Sinode (ASM) saamgestel word.

### 4. KONSTITUERING EN VERGADERINGS

Die Diensgroep

- 4.1 konstitueer so spoedig moontlik na aanwysing en vergader soos nodig; en

- 4.2 wys 'n dagbestuur aan, bestaande uit 'n voorsitter, 'n ondervoorsitter en 'n skriba. Die Dagbestuur vergader wanneer nodig.

## **6. REGLEMENT VIR DIE KANTOORHOOFDE**

### **1. NAAM**

**Kantoorhoofde**

### **2. BENADERING**

- 2.1 Elke sinodale bediening behou sy selfstandigheid en beheerfunksies, met sy eie opdrag en verantwoording aan die Sinode, soos ingebed binne 'n sinodaal-presbiteriale kerkregering;
- 2.2 Die Kantoorhoofde funksioneer deur die uitvoerende bestuursfunksies binne die sinodale werksaamheid met die doel om te koördineer, koste-effektiwiteit te bevorder, die uitvoering van sinodale werksaamhede te belyn en samewerking te bevorder.

### **3. OPDRAG EN BEVOEGDHEDE**

- 3.1 Sinodale bedieninge plaas werksaamhede wat ander bedieninge wesentlik beïnvloed of raak by die Kantoorhoofde op die sakelys vir bespreking en koördinerings.
- 3.2 Die Kantoorhoofde het die spesifieke opdrag om konsensus te probeer verkry oor die toedeling van die sinodale begroting en dit in die vorm van 'n beleidsdokument aan Raad vir Ondersteuning beskikbaar te stel vir goedkeuring.
- 3.3 Die Kantoorhoofde het geen besluitnemingsbevoegdheid nie en funksioneer op 'n konsensus basis. Waar konsensus nie bereik word nie en die sinodale werksaamhede as geheel wesentlik daardeur benadeel word, word die saak na die Moderamen verwys.

### **4. FUNKSIONERING**

- 4.1 Die Kantoorhoofde:
- 4.1.1 word saamgestel uit die PSD's van elk van die sinodale bedieninge en die skriba van die Moderamen; asook
- 4.1.2 die bestuurders van die departemente van die Sinodale Kantoor.
- 4.2 Die Kantoorhoofde mag sy geledere aanvul op 'n ad hoc-basis na die eis van omstandighede, deur kundiges te koöpteer. Die Kantoorhoofde kan ad hoc-taakspanne aanstel soos nodig.
- 4.3 Die PSD: Ondersteuning is die voorsitter van die vergadering.
- 4.4 Die skriba word deur die Kerkkantoor hanteer.
- 4.5 Die Kantoorhoofde vergader twee (2) weekliks soos nodig.
- 4.6 Die kantoorhoofde gee terugvoer aan die Moderamen by elke Moderamen-vergadering oor sake wat nie deur die onderskeie sinodale bedieninge na die moderamen geneem word nie.

## 5. KOSTES

Elke bediening betaal sy eie kostes uit eie fondse. Gesamentlike projekte se koste word op 'n billike wyse verdeel soos ooreengekom.

## 6. ONTBINDING

Alleen die Sinode kan die Kantoorhoofde-vergadering ontbind.

## 7. REGLEMENT VIR ONDERSTEUNING

Ondersteuning is verantwoordelik vir die Sinodale Kerkkantoor, Argief- en Inligtingsdienste, asook Kommunikasie. Vanweë die unieke aard van Ondersteuning se samestelling, word aanvaar dat die funksionering van hierdie bediening sal verskil van dié van ander Bedieninge. Die Sinodale Kerkkantoor, onder bestuur van 'n lidmaat van die NG Kerk Vrystaat, genoem die PSD: Ondersteuning, is verantwoordelik vir die doelmatige behartiging van die administrasie van die sinodale fondse en eiendomme, sowel as aanverwante werksaamhede van die Kerk, aan die hand van 'n bestuurshandleiding.

### 1.1 WOORDOMSKRYWING

Tensy uit die samehang anders blyk, sluit woorde en uitdrukkings in hierdie reglement wat die manlike geslag aandui, ook die vroulike geslag in, het woorde in die enkelvoud ook op die meervoud betrekking en omgekeerd en beteken:

#### 1.1.1 "ADMINISTRASIE VAN 'N FONDS"

een of meer van die volgende handeling wat deur die Sinodale Kerkkantoor verrig word met betrekking tot 'n fonds:

- invordering en ontvangs van geld;
- belegging en opvraging van geld;
- boekhoukundige verantwoording van geld;
- uitbetaling van geld ingevolge 'n besluit van 'n sinodale instelling wat beheer het oor die betrokke fonds;
- regshandeling met betrekking tot roerende en onroerende eiendom kragtens 'n besluit met 'n sinodale instelling wat beheer het oor die betrokke fonds.

#### 1.1.2 "BEHEER VAN 'N FONDS"

die bevoegdheid aan 'n bepaalde sinodale instelling verleen deur die Kerkorde of deur besluit van 'n ander sinodale instelling om te beslis oor die aanwending van 'n fonds;

#### 1.1.3 "'N FONDS"

geld en onroerende eiendom wat deur 'n sinodale instelling, gemeente of ring vir 'n bepaalde omskrewe doel beheer word en wat kragtens sinodale besluit aan die betrokke sinodale instelling, gemeente of ring toegeken word, of wat op enige ander wyse deur die betrokke sinodale instelling, gemeente of ring verkry word;

#### **1.1.4 “SINODALE INSTELLING”**

’n Sinodevergadering, ’n bediening, ’n taakspan, ’n kommissie, ’n ampsdraer of ander persoon of groep persone wat handelinge verrig wat handelinge van die NG Kerk Vrystaat is, maar sluit in hierdie Reglement nie ’n gemeente of ’n ring, of kommissies en ampsdraers van ’n gemeente of ’n ring, in nie;

#### **1.1.5 “SINODALE KERKKANTOOR”**

die kantoor in klousule 1.1 bedoel;

#### **1.1.6 PSD: ONDERSTEUNING**

die persoon bedoel in Klousule 9 van hierdie Reglement.

### **2. OPDRAG**

- 2.1 Ondersteuning is hoofsaaklik verantwoordelik vir die koördinerende van werksaamhede sowel as dispuutbeslegting,
- 2.2 ’n Uitvoerende pos is vir die bediening goedgekeur (PSD: Ondersteuning). Hierdie pos, ander voltydse sowel as deeltydse poste, asook kundigheid wat ingekoop word, moet uit die bediening se sinodale toewysing asook die FN Trustfonds befonds word.
- 2.3 Ondersteuning funksioneer onder oorsig van ’n Ouditkomitee.
- 2.4 Ondersteuning is verantwoordelik vir doeltreffende en betroubare administrasie en beheer oor alle fondse wat aan Ondersteuning toevertrou is en vir alle ander funksies wat in verband staan met sodanige administrasie en beheer asook die bestuur van alle fondse insluitend die Sinode se begroting sowel as studiefondse, personeel en eiendomme wat aan hom toevertrou word en die administrasie van die ander bediening se soos met hulle ooreengekom, asook alle Argief funksies van die Sinode, en Kommunikasie.
- 2.5 Ondersteuning is verder verantwoordelik vir onder andere die insameling van gemeentelike bydraes (proratas en kollekte).
- 2.6 Ondersteuning beheer, ten einde sy verantwoordelikhede ingevolge klousule 1.1 en 1.2 bedoel na te kom, die Sinodale Kerkkantoor en die Argiefkantoor. Bevoegde handelinge van die drie genoemde kantore word geag handelinge van Ondersteuning te wees.
- 2.7 Een van die fokusareas van is die rentmeesterskap van die Sinode kragtens Kerkorde Artikel 57.
- 2.8 Die PSD: Ondersteuning koördineer in oorleg met die Aktuaris van die Sinode alle regsaksies waarin die sinode betrek mag word. Hierdie koördinasie vind plaas in oorleg met die Dagbestuur van die Moderamen, die Sinodale Diens Regte en betrokke bediening met verslag aan die Dagbestuur van die Moderamen.
- 2.9 Die lede van die Raad van Ondersteuning tree uit nadat Ondersteuning se verslag afgehandel is op die eersvolgende Sinodesitting, met dien verstande dat die uittredende Raad van Ondersteuning se lede dan weer in die diskresie van die betrokke Sinode, benoem kan word.

- 2.10 Tussentydse vakatures van lede deur die Sinode aangewys in die Raad van Ondersteuning word gevul deur die Raad van Ondersteuning.
- 2.11 Die Raad van Ondersteuning kan 'n dagbestuur van minstens drie lede verkies om werksaamhede in die interim tydperk, tussen vergaderings van die Raad van Ondersteuning, af te handel, met dien verstande dat die dagbestuur volledig en deurlopend verslag van sodanige werksaamhede aan die Raad van Ondersteuning doen.
- 2.12 Die fokusareas van die bediening is administrasie, finansies, argiefdienste en kommunikasie.

### **3. FUNKSIONERING**

Die Raad van Ondersteuning:

- 3.1 vergader ten minste drie maal per jaar, welke vergadering gehou word volgens die voorskrifte, mutatis mutandis, van die Reglement van Orde;
- 3.2 verrig sy werksaamhede ingevolge die bevoegdheid aan hom verleen deur die Kerkorde (insluitende hierdie Reglement) en deur die besluite van bevoegde sinodale instellings van die NG Kerk Vrystaat;
- 3.3 doen verslag aan die Sinode in die jaar waarin 'n Sinodesitting plaasvind;
- 3.4 verskaf finansiële advies aan sinodale instellings, gemeentes en ringe op versoek, of wanneer die Raad van Ondersteuning dit nodig ag;
- 3.5 is verantwoordelik vir die administrasie en beheer van fondse soos in klousule 1.1 en 1.2 bedoel;
- 3.6 beman die Sinodale Kerkkantoor ingevolge klousule 7 van hierdie Reglement;
- 3.7 is verantwoordelik vir die bestuur van die Sinodale Kerkkantoor deur voldoende reëlins te tref indien die PSD: Ondersteuning nie sy pligte kan behartig nie, of as sy pos vakant raak, tot die PSD: Ondersteuning weer sy pligte kan behartig, of totdat 'n ander PSD: Ondersteuning benoem is, na gelang van die geval;
- 3.8 ondersoek, in oorleg met die Ringsfinansiële Kommissie, in diepte die omstandighede van 'n gemeente wat agterstallig raak met oorbetalings van sinodale verpligtinge. Na bevind van sake hanteer hyself die situasie of neem dit op met die betrokke Ring, die Sinodale Kerkkantoor of Sinode;
- 3.9 is verantwoordelik vir die beheer en administrasie van alle studiefondse van die NG Kerk Vrystaat, soos deur die reglemente van die onderskeie fondse bepaal.

#### **3.10 ADMINISTRASIE VAN FONDSE**

Ondersteuning doen verslag:

- 3.10.1 aan elke bediening, op 'n maandelikse basis, oor die stand van alle fondse onder die betrokke bediening se beheer en wel in sodanige vorm as waarvoor ooreengekom is;
- 3.10.2 oor die administrasie van fondse op die wyse in Klousule 2.4 bedoel, met dien verstande dat die kommissie/taakspan/bediening wat beheer het oor 'n betrokke

fonds, indien nodig, tydens sodanige verslagdoening toeligting gee oor die wyse waarop die fondse aangewend word.

- 3.10.3 Geen uitbetalings uit of namens 'n bepaalde fonds word gedoen –
- 3.10.3.1 as die betrokke fonds uitgeput is nie, tensy vooraf reëlings tot bevrediging van die Raad van Ondersteuning getref is;
- 3.10.3.2 tensy die Skriba van die betrokke kommissie of sy gevolmagtigde verteenwoordiger skriftelike opdrag tot sodanige uitbetaling gegee het nie.
- 3.10.4 Die Raad van Ondersteuning het toegang tot alle boeke, notules, sakelyste, bewysstukke, titelbewyse, rekeninge en ander dokumente van welke aard ook al wat met die administrasie van fondse te doen het en wat nie in sy besit of onder sy beheer is nie.
- 3.10.5 Ondersteuning neem 'n waarborgpolis uit vir 'n bedrag soos van tyd tot tyd bepaal teen verliese as gevolg van bedrog of oneerlikheid van lede van die Raad van Ondersteuning, of personelede van die Sinodale Kerkkantoor wat geld van fondse ontvang of hanteer en die jaarlikse premie op sodanige waarborgpolis word uit die Kerkkantoorfonds betaal.

### **3.11 BELEGGINGS EN LENINGS**

- 3.11.1 Die Raad van Ondersteuning het die bevoegdheid om geld in klousule 1.1 bedoel na goeddunke te belê aan die hand van die Beleggingsbeleid. Beleggings in vaste eiendom geskied teen sekuriteit van 'n eerste of verdere verband oor vaste eiendom wat in die Vrystaat geleë is, met dien verstande dat daar op geen stadium sodanige belegging gemaak word teen sekuriteit van 'n verband wat in voorrang rangeer na 'n ander verband as 'n verband ten gunste van die NG Kerk Vrystaat nie.
- 3.11.2 Enige verbeterings op die eiendom in 5.1 bedoel moet omvattend verseker word deur die verbandgewer kragtens 'n toereikende versekeringspolis wat aan die NG Kerk Vrystaat sedeer is.
- 3.11.3 Alle verbande, lenings, beleggings soos in 5.1 bedoel word in die naam van die NG Kerk Vrystaat gedoen.
- 3.11.4 Toestemming tot kansellasië, sessie, ontheffing, substitusie, gedeeltelike afbetaling en enige ander dokumente waarvan die bepalinge op verbande en ander beleggings betrekking het, word, onderhewig aan Klousule 5.7, deur die PSD: Ondersteuning onderteken.
- 3.11.5 Alle onroerende eiendom wat deur die Raad van Ondersteuning administreer word, word in die naam van die NG Kerk Vrystaat geregistreer.
- 3.11.6 Behoudens Klousule 4 word alle dokumente wat ten doel het om die onroerende eiendom in 5.4, 5.5 bedoel te transporteer, te verbind, te vervreem, te verdeel, te bewaar of op enige ander wyse daarmee te handel, deur die PSD: Ondersteuning en deur twee lede van die Raad van Ondersteuning onderteken.

### **3.12 FINANSIERING VAN DIE SINODALE KERKKANTOOR**

- 3.12.1 Die Raad van Ondersteuning bepaal van tyd tot tyd 'n administrasiefooi vir die administrasie van 'n fonds en betaal sodanige fooi uit die betrokke fonds aan die Kerkkantoor oor.
- 3.12.2 Die lopende koste vir die instandhouding van die Sinodale Kerkkantoor word uit die Kerkkantoorfonds (Sien Reglement vir Kerklike Fondse 11.1) betaal, met dien verstande dat, indien die Kerkkantoorfonds nie in staat is om die gemelde lopende koste voldoende te dek nie, aanvullende bedrae vir sodanige doel uit die Fanie Naudé Trustfonds vir Kerkkantoor Administrasie beskikbaar gestel word.

### **3.13 PERSONEEL VAN DIE SINODALE KERKKANTOOR**

- 3.13.1 Die Raad van Ondersteuning stel die volgende personeellede aan en bepaal hul salarisse en diensvoorwaardes:
  - 3.13.1.1 PSD: Ondersteuning, in ooreenstemming met die Aanstellingsbeleid vir PSD's.
  - 3.13.1.2 'n Hoofrekenmeester, op aanbeveling van die PSD: Ondersteuning;
  - 3.13.1.3 addisionele personeellede, op aanbeveling van die PSD: Ondersteuning.
- 3.13.2 Die Raad van Ondersteuning het die bevoegdheid om enige lid, amptenaar of personeellid wat onder sy toesig werk, in sy diens te stuit, terwyl 'n ondersoek na gemelde persoon se werk gedoen word.
- 3.13.3 Personeellede se vergoeding en diensvoorwaardes word vasgestel ooreenkomstig die menslike hulpbronbeleid en soos van tyd tot tyd kontraktueel ooreengekom in hul dienskontrakte.
- 3.13.4 Die NG Kerk Vrystaat is 'n deelhebber soos bedoel in die Reglement vir die Predikante Pensioenfonds en het die bevoegdheid om sy verpligtinge met betrekking tot werknemers wat begunstigdes van die Predikante Pensioenfonds is, ingevolge gemelde Reglement na te kom.

### **3.14 OUDIT**

- 3.14.1 Die Raad van Ondersteuning stel 'n geoktrooieerde ouditeur of ouditeure aan om fondse wat hy administreer te oudit en elke sodanige aanstelling duur vir 'n tydperk soos deur die Raad van Ondersteuning bepaal.
- 3.14.2 Die opdrag aan die ouditeure in 8.1 bedoel is om gereeld en deurlopend die boeke, rekenings en alle tersaaklike dokumente in verband met fondse wat deur Ondersteuning administreer word, na te sien en om jaarliks 'n volledige geouditeerde verslag oor die administrasie van gemelde fondse aan die Raad van Ondersteuning te oorhandig.

### **3.15 PREDIKANT/PERSOON IN SINODALE DIENS: ONDERSTEUNING**

- 3.15.1 Die Raad van Ondersteuning stel 'n PSD: Ondersteuning aan.
- 3.15.2 Die PSD: Ondersteuning moet 'n toegewyde lidmaat van die NG Kerk wees.
- 3.15.3 Die PSD: Ondersteuning verrig sy werksaamhede ingevolge die bevoegdheid aan hom verleen deur die Kerkorde (insluitende hierdie Reglement) en deur besluite

van bevoegde Sinodale instellings van die NG Kerk Vrystaat, asook soos uiteengesit in die bestuurshandleiding.

- 3.15.4 Die PSD: Ondersteuning tree op as Skriba van die Raad van Ondersteuning en is verantwoordelik vir die doeltreffende en betroubare vergadering-administrasie met betrekking tot die werksaamhede van die Raad van Ondersteuning.
- 3.15.5 Die PSD: Ondersteuning hou noukeurig boek van alle gelde wat deur hom ontvang word, deponer dit onmiddellik tot krediet van die betrokke fonds by 'n goedgekeurde finansiële instelling soos deur die Raad van Ondersteuning bepaal.
- 3.15.6 Die PSD: Ondersteuning is verantwoordelik vir die doeltreffende invordering van alle sinodale verpligtinge wat deur gemeentes, ringe en ander sinodale instellings verskuldig is.
- 3.15.7 Die PSD: Ondersteuning sien toe dat die nodige registers en vorms vir die administratiewe werksaamhede van die Kerk op datum is en by die Sinodale Kerkkantoor verkrygbaar is.
- 3.15.8 Die PSD: Ondersteuning se besoldiging en diens-voorwaardes word kontraktueel ooreengekom in 'n dienskontrak.
- 3.15.9 Die PSD: Ondersteuning reël die werksaamhede in die Sinodale Kerkkantoor en stel pligtstate vir elke personeellid op.
- 3.15.10 Die PSD: Ondersteuning verleen, sover moontlik, op versoek, hulp aan bedienaars van die Woord, kerkrade en ringe.
- 3.15.11 Die PSD: Ondersteuning tree in oorleg met die Aktuaris van Sinode as gevolmagtigde van die Sinode en het die bevoegdheid om enige regsding aanhangig te maak en gepaste regstappe te neem in verband met die fondse wat deur die Raad van Ondersteuning administreer word.
- 3.15.12 Die PSD: Ondersteuning koördineer alle regsaksies waarin die sinode betrek mag word, in oorleg met die Dagbestuur van die Moderamen, die SDR en betrokke bediening.
- 3.15.13 Die PSD: Ondersteuning stuur jaarliks aan Ringskribas die betrokke ringstukke en ontvang dit terug, sien die ringstukke wat op finansiële aangeleenthede betrekking het na en sien toe dat die nodige formele regstellings daaraan gemaak word.
- 3.15.14 Die PSD: Ondersteuning is Hoofbeampte van beide die Sinodale Pensioenfonds en die Amptenare Pensioenfonds van die NG Kerk Vrystaat.

#### **4. SAMESTELLING**

- 4.1 Die Sinode benoem op sy gewone vergadering, ingevolge Kerkorde Artikel 35, die Raad van Ondersteuning.
- 4.2 Die benoeming in 4.1 bedoel, vind plaas onderhewig daaraan dat die Raad van Ondersteuning saamgestel word uit:
  - 4.2.1 Ses (6) lede deur die Sinode aangewys, waaruit die voorsitter verkies word;

- 4.2.2 Een (1) verteenwoordiger uit elk van die ander vier bedieninge (Bedieningsbegeleiding, Vennote in Getuienis en Diens van Barmhartigheid, Teologiese Opleiding en die skriba van die moderamen) in adviserende hoedanigheid.
- 4.2.3 Ander kundige persone
- 4.2.4 PSD: Ondersteuning in adviserende hoedanigheid.
- 4.2.5 Die Hoofrekenmeester in adviserende hoedanigheid.

## **8. REGLEMENT VIR BEDIENINGSBEGELEIDING**

### **1. NAAM**

Bedieningsbegeleiding

### **2. BENADERING**

Ter wille van volhoubare Woordbediening in elke uithoek van die Vrystaat lewer Bedieningsbegeleiding dienste aan die NG Kerk Vrystaat se predikante, gemeentes en ringe vanuit die Sinodale Kantoor te Bloemfontein.

Die dringendste behoeftes en ontwikkelingsareas van predikante, gemeentes en ringe word geïdentifiseer en aangespreek deur spesifieke kort- en langtermyn doelwitte op te stel, en strategieë te ontwikkel om dit te hanteer.

### **3. OPDRAG EN BEVOEGDHEDE**

Die bediening

- 3.1 voer opdragte van die Sinode en ander werksaamhede uit met verslag van al sy werksaamhede aan die Raad en die Sinode;
- 3.2 adviseer die Sinode in verband met die roeping en beleid wat gevolg moet word ten opsigte van bedieningsbegeleiding;
- 3.3 lewer diens aan leraars, gemeentes en ringe deur direkte en indirekte betrokkenheid, asook die gebruikmaking van die Gemeente Ondersteuning en Uitbreiding Fonds (GOUF)
- 3.4 dra sorg vir elkeen van die genoemde KPA's en wil daardeur inisiatief neem en leiding gee ten opsigte van die hulpverlening, versorging en begeleiding/bemagtiging van gemeentes en predikante (en gesinne) deur die werksaamhede van Bedieningsbegeleiding;
- 3.5 hanteer skakeling soos nodig en kan in die uitvoering van sy funksie en ter ondersteuning van ringe, gemeentes en leraars spesifieke projekte deur taakspanne loods wat ten doel het om die werksaamhede van ringe en gemeentes te stimuleer;
- 3.6 bepaal die behoeftes van ringe, gemeentes en leraars en ontwikkel 'n netwerk van dienste en praktiese bedieningshulp en nuwe produkte om die behoeftes effektief aan te spreek;

- 3.7 behartig die toekenning van finansiële hulp aan gemeentes uit die Gemeente Ondersteuning en Uitbreiding Fonds (GOUF);
- 3.8 kontrakteer met diensverskaffers om die nodige VBO-geleentheid vir gemeenteleraars daar te stel;
- 3.9 beheer en verantwoord die fondse deur die Sinode aan die Bediening toevertrou; en
- 3.10 verteenwoordig die NG Kerk in die Vrystaat in die Algemene Sinode soos en wanneer nodig.

#### **4. FUNKSIONERING**

##### **4.1 Raad**

- 4.1.1 Die Bediening word bestuur deur 'n Raad van Bedieningsbegeleiding (RB).
- 4.1.2 Die RB word deur die Sinode saamgestel op advies van die RB.
- 4.1.3 Tussentydse vakatures word deur die RB gevul.
- 4.1.4 Die lede van die RB word bepaal deur die kritiese prestasie areas (KPA's) binne die Bediening.
- 4.1.5 Die PSD in die kantoor van Bedieningsbegeleiding dien ampshalwe in die RB.
- 4.1.6 Kundiges kan van tyd tot tyd vir die onderskeie KPA's gekoöpteer word, en ter wille van groter verteenwoordiging.
- 4.1.7 Die RB wys 'n dagbestuur aan wat bestaan uit die voorsitter, ondervoorsitter, twee addisionele lede en die PSD (laasgenoemde met adviserende stem).

##### **4.2 Netwerke**

- 4.2.1 Bedieningsbegeleiding maak gebruik van netwerke van kundige persone. Hierdie netwerke is dinamiese en aanpasbare strukture wat diens lewer om spesifieke behoeftes van leraars, gemeentes en ringe aan te spreek.
- 4.2.2 Netwerke word na behoefte aangevul (waar daar behoefte ontstaan) en kan verval (waar behoefte taan). Netwerksameroepers gee inhoud aan die netwerk se dienswerk en verrig hulle werk in oorleg met die PSD.

##### **4.3 Predikant in Sinodale Diens (PSD)**

Die PSD van Bedieningsbegeleiding is 'n gelegitimeerde leraar van die NG Kerk wat uitvoering gee aan al die opdragte van die Raad van Bedieningsbegeleiding en die werksaamhede van die Bediening koördineer. Hy/sy lewer deurlopend verslag aan die Raad oor alle werksaamhede.

#### **5. KONSTITUERING EN VERGADERINGS**

- 5.1 Die RB konstitueer na elke gewone vergadering van die Sinode;
- 5.2 Die RB kies sy eie voorsitter en ondervoorsitter;
- 5.3 Die RB se skribaats, asook dié van die dagbestuur en GOUF word intern gereël volgens die beskikbare kapasiteit binne die Departement Administrasie en Inligting;

- 5.4 Die RB vul vakatures aan na behoefte;
- 5.5 Die RB kan netwerke en taakspanne na behoefte benoem;
- 5.6 Die RB bepaal die frekwensie van vergaderings, maar vergader ten minste twee (2) keer per jaar.
- 5.7 Die Dagbestuur vergader ten minste twee (2) keer per jaar of na behoefte.
- 5.8 Netwerke en ander taakspanne vergader na behoefte en soos die begroting dit toelaat.

## 9. REGLEMENT VAN VENNOTE IN GETUIENIS

### 1. NAAM

Vennote in Getuienis

### 2. BENADERING

Getuienis is die wesenlike roeping van die kerk in al haar gestaltes en in haar gerigtheid op die wêreld. As omvattende Woordbediening vloei getuienis voort uit die sending van God Drie-enig (missio Dei) en geskied langs die kanale van verkondiging, gemeenskap, diens en aanbidding. Dit is die getuienis van die heil in Christus en staan in diens van die herstel van die omvattende vrede (sjaloom) in en tussen mense, in gemeenskappe en in die skepping.

Getuienis word meestal in vennootskap met gemeentes, kerke en ander instansies gedoen. Met vennootskap word veral 'n formele, standhoudende verhouding tussen samewerkende partye bedoel en dit word gekenmerk deur wedersydse respek en ondersteuning, medeseggenskap en 'n gedeelde roeping. Vennootskappe sluit egter ook netwerke, ekumeniese- en ander vorme van samewerking in. Vennootskapsverhoudinge met susterkerke is 'n doelbewuste stap na groter eenwording.

### 3. OPDRAG EN BEVOEGDHEDE

- 3.1 Die vestiging en uitbou van Vennootskappe, binne en buite ons landsgrense, wat ten doel het om die getuienis taak van die kerk te ondersteun;
- 3.2 Die instandhouding en vestiging van ekumeniese verhoudinge met ander kerke en profetiese dialoog met ander godsdienste;
- 3.3 Die koördinering, ondersteuning en begeleiding van gesamentlike werksaamhede binne die Sinodale verband dmv bewusmaking, mobilisering en aktivering van gemeentes in hulle roeping tot diens en getuienis binne hulle onderskeie gemeenskappe en buite of verder as hulle onmiddellike gemeenskappe;
- 3.4 Bevorder publieke getuienis (bv. geregtigheid, versoening en eenheid, ekologie en Bybelse waardes in die gemeenskap);
- 3.5 Teologiese navorsing, besinning en die fasilitering van luisterende gesprekke binne die raamwerk van missionale teologie en ekklesiologie.

## **4. FUNKSIONERING**

### **4.1 Raad**

4.1.1. Vennote in Getuienis word bestuur deur 'n Raad wat deur die Sinode saamgestel word op advies van die Raad van Vennote in Getuienis en bestaan uit:

- Een verteenwoordiger van elke bediening dien in die Raad
- Tussentydse vakatures word deur die Raad gevul
- Kundiges kan van tyd tot tyd gekoöpteer word om op die Raad te dien
- Die PSD's van elk van die ander sinodale bedieninge met adviserende stem
- Die PSD: Vennote in Getuienis met adviserende stem

4.1.2 Die Raad van Vennote in Getuienis wys 'n dagbestuur aan wat bestaan uit 'n voorsitter, ondervoorsitter, twee addisionele lede en die PSD (laasgenoemde met adviserende stem).

4.1.3 Die Raad wys ook lede van taakspanne, vennootskappe en erdeenwoordigers van Vennote in Getuienisbediening op ander instansies aan soos nodig.

4.1.4 Die Raad tree op as beherende instansie vir Vennote in Getuienis. Dit gee visioenêre leiding, beplan strategies, prioriseer werksaamhede, keur die interne begroting goed, koördineer die werksaamhede van die taakspanne en vennootskappe, neem verantwoordelikheid vir die diensverhoudinge van personeel in diens van Vennote in Getuienis en lewer verslag aan die sinode.

4.1.5 Ringe in die sinodale gebied wys 'n verteenwoordiger vir Vennote in Getuienis aan tydens die sinode sitting. Die Raad van Vennote in Getuienis vergader jaarliks met hierdie verteenwoordigers met die oog op terugvoer vanaf die ringe aan die Raad asook die Raad aan die Ringe rakende uitreik/getuienis aksies, gemeenskapsprojekte en ekumeniese skakeling.

### **4.2 Taakspanne, Projekspanne en Vennootskappe**

'n Verskeidenheid van Taakspanne (staande komitees), Projekspanne en Vennootskappe neem verantwoordelikheid vir die verskillende arbeidsterreine, programme of projekte, met verslag aan die Raad. Elk van die strukture word gevorm na die eis van die praktiese omstandighede en sluit doelbewus verteenwoordigers van die susterkerke of meewerkende partye in.

### **4.3 Predikant in Sinodale Diens**

Die Predikant in Sinodale Diens (PSD) van die Vennote in Getuienis is 'n gelegitimeerde leraar van die NG Kerk wat uitvoering gee aan al die opdragte van die Raad van die Vennote in Getuienis en die werksaamhede van die bediening koördineer. Hy/sy lewer verslag van werksaamhede aan die Raad.

## **5. KONSTITUERING EN VERGADERINGS**

5.1 Die Raad van Vennote in Getuienis konstitueer na elke gewone sinodesitting.

- 5.2 Die Raad vergader ten minste twee (2) keer per jaar waarvan een vergadering met Ringsvertegenwoordigers is.
- 5.3 Die Dagbestuur vergader ten minste drie (3) keer per jaar.
- 5.4 Die Taakspanne, Projekspanne en Vennootskappe vergader soos nodig.

## **10 REGLEMENT VIR DIENS VAN BARMHARTIGHEID**

### **1. NAAM**

Diens van Barmhartigheid

### **2. BENADERING**

Diens van Barmhartigheid fokus op die nood van mense in al sy vorme, 'n menswaardige bestaan vir almal, die volhoubare aanwending en bevordering van hulpbronne wat vir menslike voortbestaan en 'n menswaardige lewe nodig is en geregtigheid teenoor almal.

Die gemeente is die instrument van die drie-enige God in sy bediening van barmhartigheid aan die wêreld. Hierdie bediening vind gestalte in die gemeente se eie kring en omgewing, en van daaruit saam met ander gemeentes in rings- en sinodale verband.

In gemeente, rings en sinodale verband vind die barmhartighedsbediening ook plaas in vennootskap met ander gemeentes, kerke, organisasies en die staatsdepartemente wat op die terrein van diens van barmhartigheid/diakonaat diens lewer en aktief is.

### **3. OPDRAG EN BEVOEGDHEDE**

- 3.1 Multidissiplinêre navorsing en besinning oor gemeentelike (in rings en sinodale verband ingeslote) Diens van Barmhartigheid ('n diakonale ekklesiologie), en die bepaling van strategie en beleid vir die uitvoering hiervan.
- 3.2 Inspirasie, ondersteuning en advies aan gemeentes, ringe en die sinode in alle aspekte van Diens van Barmhartigheid, ingesluit hulle verhoudings en formele samewerking met ENGO, ander kerke en ander organisasies.
- 3.3 Identifisering en daarstelling van aspekte van barmhartighedswerk wat gemeentes in sinodale verband saam beter kan doen;
- 3.4 Die vestiging en instandhouding van 'n verhoudingsgebaseerde samewerkings-ooreenkoms met ENGO en NG Welsyn en ander soortgelyke organisasies deur toepaslike ooreenkomste en 'n gedeelde visie ten opsigte van ENGO, NG Welsyn en ander soortgelyke organisasies se spesialisasiegebiede;
- 3.5 Die vestiging en uitbou van verhoudings met ander kerke in nouer en wyer ekumeniese verband met die oog op samewerking in alle aspekte van Diens van Barmhartigheid;
- 3.6 Die identifisering van organisasies wat betrokke is by Diens van Barmhartigheid (in die breë sin van die woord - vergelyk punt 2 hierbo) in die Vrystaat en die sluit van

- toepaslike ooreenkomste waar, vanuit 'n gedeelde waardesisteem, wedersyds waarde toegevoeg kan word tot dienslewering en/of gesamentlike aksies;
- 3.7 Die bestuur van die Hoopfonds gesetel onder Diens van Barmhartigheid;
- 3.8 Die aanwys, bestuur en koördinerings van permanente en tydelike taakspanne, asook ander strukture wat vir die uitvoering van die werksaamhede van Diens van Barmhartigheid nodig sal wees;
- 3.9 Identifisering van terreine waar formele samewerking met ander bedienings en taakspanne van die sinode sinvol sal wees, en die aktiewe deelname daaraan;
- 3.10 Stel 'n begroting vir die bediening op in oorleg met Raad van Ondersteuning;
- 3.11 Doen verslag aan die Moderamen en die Sinode.

#### **4. FUNKSIONERING**

##### **4.1 Raad**

- 4.1.1. Diens van Barmhartigheid word bestuur deur 'n Raad wat deur die Sinode saamgestel word op advies van die Raad van Diens van Barmhartigheid en bestaan uit:
- 'n verteenwoordiger met sekondus van elke ring aangewys tydens die sinode, 'n verteenwoordiger uit elkeen van die ander bedienings, 'n verteenwoordiger van Torings van Hoop gemeente, 'n verteenwoordiger van die Reformed Initiative for Community Development, en die PSD van Diens van Barmhartigheid met adviserende stem;
  - 'n verteenwoordiger van elke taakspan.
  - Kundiges kan van tyd tot tyd gekoöpteer word om op die Raad te dien
  - Die voorsitter en ondervoorsitter word deur die Raad verkies tydens sy eerste vergadering na die Sinode.
  - Die skribaat word behartig deur die toegewysde amptenaar.
- 4.1.2 Die Raad tree op as beherende instansie vir Diens van Barmhartigheid as bediening en gee visioenêre leiding in en uitvoering aan die opdragte en bevoegdhede van die bediening (punt 3 hierbo). Hierbenewens neem hy verantwoordelikheid vir die diensverhoudings van personeel in diens van Diens van Barmhartigheid.
- 4.13 Die Raad stel die PSD vir die bediening in ooreenstemming met die Aanstellingsbeleid vir PSD's aan.
- 4.1.4 Die kworum vir beide die Raad en die Dagbestuur is 'n volstreekte meerderheid.

##### **4.2 Dagbestuur**

- 4.2.1 Die Raad vir Diens van Barmhartigheid wys tydens sy eerste vergadering na die Sinode 'n Dagbestuur aan wat bestaan uit vyf lede, insluitend die verkose voorsitter en ondervoorsitter, wat dieselfde amp vervul in die Dagbestuur. Die

PSD is ampshalwe lid van die Dagbestuur met adviserende stem. Die skribaat word behartig deur die toegewysde amptenaar.

4.2.2 Die Dagbestuur is 'n permanente taakspan van die Raad en sien toe dat die strategie, beleid, besluite en opdragte van die Raad uitgevoer word.

4.2.3 Die Dagbestuur doen verslag aan die Raad, en waar toepaslik aan die Moderamen namens en in oorleg met die Raad.

#### **4.3 Taakspanne, Projekspanne en Vennootskappe**

Permanente en tydelike taakspanne soos aangewys deur die Raad neem verantwoordelikheid vir die verskillende programme, projekte of vennootskappe met verslag aan die Raad.

#### **4.4 PSD: Diens van Barmhartigheid**

Die PSD: Diens van Barmhartigheid is 'n gelegitimeerde leraar van die NG Kerk wat uitvoering gee aan al die opdragte van die Raad vir Diens van Barmhartigheid en die werksaamhede van die bediening koördineer. Hy/sy lewer verslag van werksaamhede aan die Raad en die Dagbestuur.

### **5. KONSTITUERING EN VERGADERINGS**

5.1 Die Raad vir Diens van Barmhartigheid konstitueer na elke gewone sinodesitting.

5.2 Die Raad vergader ten minste twee (2) keer per jaar.

5.3 Dagbestuur vergader ten minste vier (4) keer per jaar.

5.4 Die ander taakspanne vergader soos nodig.

### **6. ONTBINDING**

Diens van Barmhartigheid ontbind as bediening indien die Vrystaatse Sinode in sitting so besluit.

## **11. REGLEMENT VIR KERKLIKE FONDSE**

### **1. WOORDOMSKRYWING**

Tensy uit die samehang anders blyk, sluit woorde en uitdrukkings in hierdie Reglement wat die manlike geslag aandui, ook die vroulike geslag in, het woorde in die enkelvoud ook op die meervoud betrekking en omgekeerd, en beteken:

#### **1.1 "ADMINISTRASIE VAN "N FONDS"**

een of meer van die volgende handeling wat deur die Sinodale Kerkkantoor verrig word met betrekking tot 'n fonds:

- Invordering en ontvangs van geld;
- Belegging en opvraging van geld;
- Boekhoukundige verantwoording van geld;

- Uitbetaling van geld ingevolge 'n besluit van 'n sinodale instelling wat beheer het oor die betrokke fonds; en
- Regshandelings met betrekking tot onroerende eiendom kragtens 'n besluit van 'n sinodale instelling wat beheer het oor die betrokke fonds;

## **1.2 “BEHEER VAN “N FONDS”**

die bevoegdheid aan 'n bepaalde sinodale instelling verleen deur die Kerkorde of deur 'n besluit van 'n ander sinodale instelling om te beslis oor die aanwending van 'n fonds;

## **1.3 ““N FONDS”**

geld en onroerende eiendom wat deur 'n sinodale instelling, gemeente of ring vir 'n bepaalde omskrewe doel beheer word en wat kragtens sinodale besluit aan die betrokke sinodale instelling, gemeente of ring toegeken word of wat op enige ander wyse deur die betrokke sinodale instelling, gemeente of ring verkry word;

## **1.4 “SINODALE INSTELLING”**

'n Sinodevergadering, 'n taakspan, 'n ampsdraer of ander persoon of groep persone wat handelinge verrig wat handelinge van die NG Kerk Vrystaat is, maar sluit in hierdie Reglement nie 'n gemeente of 'n ring, of taakspan en ampsdraers van 'n gemeente of 'n ring, in nie;

## **1.5 “SINODALE KERKKANTOOR”**

die kantoor in Reglement van Ondersteuning bedoel;

## **1.6 “REGLEMENT VIR DIE RAAD VAN ONDERSTEUNING**

die Reglement van Ondersteuning.

## **1.7 “PSD: ONDERSTEUNING”**

die persoon bedoel in Klousule 9 van die Reglement vir die Raad van Ondersteuning.

## **2. OOGMERK MET EN ONDERSKEIDING TUSSEN KERKLIKE FONDSE**

2.1 Die doel van kerklike fondse is om aan lidmate van die Kerk geleentheid te gee om op georganiseerde en verantwoordelike wyse voorsiening te maak vir finansiële ondersteuning vir die instandhouding van die openbare erediens, vir die hulp aan hulpbehoewendes en vir kerklike werksaamhede in gemeente-, rings- en sinodale verband.

2.2 onderskeid word in hierdie Reglement getref tussen:

2.2.1 gemeentelike fondse soos in Klousule 3 beskryf;

2.2.2 ringsfondse soos in Klousule 4 beskryf;

2.2.3 sinodale fondse soos in Klousule 5 tot 38 beskryf.

## **3. VERPLIGTINGE VAN GEMEENTES MET BETREKKING TOT FONDSE**

3.1 Elke kerkraad handel met gemeentelike fondse volgens die voorskrifte van Vrystaat Kerkorde 2022 Afd D.

- 3.2 Elke kerkraad bepaal self die bedrag wat gehef word ten opsigte van huweliksgelde en ander fooie.
- 3.3 Reiskoste soos in 5.5 bedoel van afgevaardigdes na 'n ringsvergadering, word deur die betrokke kerkraad betaal na goedkeuring en ondertekening van eise vir sodanige reiskoste deur die Ringskriba.
- 3.4 Kerkrade betaal alle kollektes, bydraes en ander geldelike verpligtinge maandeliks ingevolge hierdie Reglement sonder versuim aan die PSD: Ondersteuning oor, in alle gevalle voor 20 Januarie.
- 3.5 Gemeentes hou spesiale kollektes, benewens kollektes soos in hierdie Reglement bedoel, soos van tyd tot tyd deur die Sinode bepaal en betaal gemelde spesiale kollektes sonder versuim aan die PSD: Ondersteuning.

#### **4. RINGSFONDSE**

Die Ringskriba en Ringskommissie handel met die ringsfondse volgens die voorskrifte van die Kerkorde en onroerende eiendom van die ring word geregistreer volgens die voorskrifte van die Algemene Sinode Reglement vir Kerklike Goedere.

#### **5. DIE SINODALE FONDS**

- 5.1 In die jaar waarin die Sinode van die NG Kerk Vrystaat vergader, maak elke gemeente 'n bydrae tot die Sinodale Fonds vir 'n bedrag per afgevaardigde van die gemeente na die Sinode, soos van tyd tot tyd deur die Raad van Ondersteuning bepaal.
- 5.2 Die doel van die Sinodale Fonds is om administrasiekoste, koste vir gewone en buitengewone samekomste van meerdere kerkvergaderings, koste verbonde aan die werksaamhede van die Moderamen, sinodale verteenwoordigers op kerkraads- en ringsondersoekliggame en sinodale instellings te betaal, met dien verstande dat Sinodale taakspanne wat beheer oor eie fondse het, se koste uit sodanige eie fondse betaal word.
- 5.3 Die koste in 5.1 bedoel sluit in reiskoste, daggeld van lede, bodes en tydelike werkers, honoraria, reis- en verblyfkoste van getuies indien die betrokke kerkvergaderings so besluit en enige ander koste waartoe die Sinode of die Moderamen van tyd tot tyd mag besluit.
- 5.4 Reiskoste word betaal teen 'n vasgestelde tarief (motortarief), soos van tyd tot tyd deur die Raad van Ondersteuning bepaal.
- 5.5 Indien afgevaardigdes kerklike vergaderings buite die sinodale gebied bywoon, word reiskoste in die diskresie van die Raad van Ondersteuning, met inagneming van die meriete van die omstandighede betaal.
- 5.6 Indien 'n taakspan van die Sinode noodsaak is om 'n gesamentlike vergadering buite die grense van die sinodale gebied met 'n soortgelyke taakspan van 'n ander Sinode te hou, word die betrokke taakspan van die Sinode deur nie meer as twee lede verteenwoordig nie.

- 5.7 'n Lid van 'n meerdere kerkvergadering ontvang nie betaling vir die koste van sy terugreis wanneer hy die betrokke vergadering voor die sluiting daarvan sonder verlof verlaat, of wanneer hy reeds voor sy vertrek na die vergadering bewus is dat hy nie teenwoordig sal wees by ten minste die helfte van die tydsduur van die betrokke vergadering nie, met dien verstande dat hierdie Klousule 5.8 nie van toepassing is in gevalle waar verlof tot afwesigheid deur die vergadering gegee word weens siekte of ander dringende omstandighede nie.
- 5.8 Die daggeld van lede van die Sinode (verblyfkoste), die Moderamen en ander Taakspanne deur die Sinode benoem, word betaal soos van tyd tot tyd deur die Raad van Ondersteuning bepaal, met dien verstande dat daggeld met lede van die Sinode per sittingsdag telkens deur die Sinode volgens heersende omstandighede bepaal word.
- 5.9 'n Jaarlikse honorarium word aan die Moderator en die Skriba van die Moderamen betaal.
- 5.10 Tydens Sinodesittings word 'n honorarium vir die tydperk van die betrokke vergadering aan een of meer tydelike assistent-skribas betaal (Notulekommissie).
- 5.11 Die honoraria soos in 5.10 en 5.11 bedoel word van tyd tot tyd deur die Raad van Ondersteuning volgens die eis van omstandighede bepaal en word uit die Sinodale Fonds betaal.

## **6. SINODALE GROEPEWENSVERSEKERINGSKEMA**

- 6.1 Die Raad van Ondersteuning behartig administratiewe en koördinerende funksies met betrekking tot die groeplewensversekeringskema waarvan werknemers van gemeentes en van die NG Kerk Vrystaat lid is. 63
- 6.2 Die voorgeskrewe premie, soos van tyd tot tyd namens die lede beding, is maandeliks aan die PSD: Ondersteuning betaalbaar, met dien verstande dat die PSD: Ondersteuning alternatiewe wyses van betaling mag voorskryf.
- 6.3 Die Raad van Ondersteuning is nie aanspreeklik teenoor lede van die groeplewensversekeringskema vir enige versuim van die onderskrywer van die groeplewensversekeringskema om sy verpligtinge teenoor lede na te kom nie.

## **7. MEDIESE SKEMA**

- 7.1 Die Raad van Ondersteuning is verantwoordelik vir administratiewe en koördinerende funksies met betrekking tot die mediese skema waarvan werknemers van gemeentes en van die NG Kerk Vrystaat lid is.
- 7.2 Die voorgeskrewe premie van elke lid is maandeliks aan die begin van elke maand direk aan die Raad van Ondersteuning betaalbaar, met dien verstande dat die Raad van Ondersteuning alternatiewe wyses van betaling mag voorskryf.
- 7.3 Die Raad van Ondersteuning is nie aanspreeklik teenoor lede van die mediese skema vir enige versuim van die onderskrywer van die mediese skema om sy verpligtinge teenoor lede na te kom nie.

- 7.4 Die Raad van Ondersteuning bepaal van tyd tot tyd, indien dit na sy oordeel tot voordeel van die lede is, dat van mediese fonds verwissel word.
- 7.5 Alle predikante van die NG Kerk Vrystaat word volgens sinodebesluit, versoek om aan die skema deel te neem.

## **8. ANDER STUDIEFONDSE**

- 8.1 Benewens die fondse in Klousules 15,17, 18, en 28 bedoel, beheer en administreer die Raad van Ondersteuning ook ander Studiefondse wat ten doel het om beurse aan studente beskikbaar te stel.
- 8.2 Die Reglemente, soos van tyd tot tyd gewysig (waar nodig), van die Studiefondse soos in 8.1 bedoel, word deur die Raad van Ondersteuning bepaal en is ter insae by die PSD: Ondersteuning beskikbaar.

## **9. KERKKANTOORFONDS**

- 9.1 Die Kerkkantoorfonds word beheer en geadministreer deur die Raad van Ondersteuning. Kragtens Klousule 6.1 van die Reglement vir die Raad van Ondersteuning het die Raad die bevoegdheid om na sy diskresie, 'n administrasiefooi te hef met betrekking tot enige fonds waarvan hy die administrasie behartig en om sodanige administrasiefooi aan die Kerkkantoorfonds te betaal.
- 9.2 Die doel van die Kerkkantoorfonds is om die koste van die Sinodale Kerkkantoor te boek te stel.

## **10. DIE FANIE NAUDÉ TRUSTFONDS VIR KERKKANTOOR- ADMINISTRASIE**

- 10.1 Die Fanie Naudé Trustfonds vir Kerkkantoor-administrasie word beheer en geadministreer deur die Raad van Ondersteuning.
- 10.2 Die doel van die Fanie Naudé Trustfonds vir Kerkkantoor-administrasie, is om by te dra tot die lopende koste van die Sinodale Kerkkantoor, ten einde die Sinode en gemeentes 'n bydrae tot die Kerkkantoorfonds te spaar.

## **11. FONDS VIR DIENS VAN BARMHARTIGHEID**

- 11.1 Die Fonds vir Diens van Barmhartigheid word beheer deur die Bediening vir Diens van Barmhartigheid geadministreer deur die Raad van Ondersteuning.
- 11.2 Elke gemeente maak jaarliks 'n sinodale bydrae tot die Sinodale Fonds vir Diens van Barmhartigheid.
- 11.3 Die Sinodale Fonds vir Diens van Barmhartigheid kan aangevul word deur skenkings en erflatings.

## **12. FONDS VIR KOMMUNIKASIE – VRYPOS**

- 12.1 Elke gemeente is verplig om jaarliks vir hierdie fonds 'n kollekte op te neem.
- 12.2 Die Fonds vir Kommunikasie word deur die Raad van Ondersteuning geadministreer.

- 12.3 'n Kollekte word in die Fonds vir Kommunikasie gestort om sodoende voorsiening te maak vir koste vir kommunikasie wat in belang van gemeentes aangegaan moet word.

### **13. VENNOOTSKAPPE: RICD (BINNELANDSE EKUMENIESE VENNOOTSKAPPE)**

- 13.1 Die Fonds vir Reformed Initiative for Community Development (RICD) word beheer deur Vennote in Getuienis en geadministreer deur die Raad van Ondersteuning.
- 13.2 Elke gemeente is verplig om jaarliks 'n kollekte vir hierdie Fonds op te neem en maak ook 'n proratabydrae tot gemelde Fonds.
- 13.3 Die Fonds bevorder gemeenskapsontwikkeling binne die NG Kerk-familie deur gesamentlike gemeenskapsontwikkelingsprojekte.

### **14. FONDS VIR DIE BYBELGENOOTSKAP VAN SA**

- 14.1 Elke gemeente is verplig om jaarliks, tydens die herdenking van die kerkhervorming, 'n kollekte vir hierdie fonds vir die Bybelgenootskap van Suid- Afrika, op te neem.
- 14.2 Om die Bybel binne die bereik van selfs die armste te kan bring, word die Bybel gesubsidieer nie met behulp van toelae van die staat, of bydrae van gemeentes nie, maar deur vrywillige offers van gemeentes, gereelde donasies van gelowiges en organisasies, asook testamentêre bemakings van diegene wat dit gewil het dat die verspreiding van God se lewende Woord, sy loop moet neem.
- 14.3 Die PSD: Ondersteuning betaal geld aan die fonds in 16.1 bedoel, gereeld aan die Bybelgenootskap van Suid-Afrika oor.

### **15. FONDS VIR TEOLOGIESE OPLEIDING**

- 15.1 Die Fonds vir Teologiese Opleiding word beheer en geadministreer deur die Raad vir Ondersteuning.
- 15.2 Elke gemeente is verplig om jaarliks, tydens 'n nagmaalsviering, 'n kollekte vir hierdie fonds op te neem.
- 15.3 Die opbrengs van hierdie fonds word aangewend vir die Kuratorium van die Vrystaat en programme van die Teologiese Seminarium.

### **16. FONDS VIR DOWES EN BLINDES (ook genoem TOIBO)**

- 16.1 Die Fonds vir Dowes en Blindes word beheer en geadministreer deur die Raad van Ondersteuning.
- 16.2 Elke gemeente is verplig om jaarliks 'n kollekte vir hierdie fonds vir Dowes en Blindes op te neem soos deur die Sinode bepaal, asook vrywillige jaarlikse bydraes.
- 16.3 Uit hierdie fonds word jaarliks bydraes, wat deur die Sinode bewillig word, gemaak aan sowel die Instituut vir Dowes en Blindes te Worcester, 'n werksaamheid van die Ned Geref Kerk in Kaapland, asook vir die Transoranje- Instituut vir Buitengewone Onderwys (TOIBO), wat 'n gesamentlike onderneming is van die Ned Geref Kerk in die Oranje-Vrystaat, Transvaal en Natal, die Hervormde Kerk in Afrika en die Gereformeerde Kerk. Laasgenoemde Instituut bestaan uit vyf skole waarvan vier in die Transvaal is, naamlik die Transoranje skool vir Dowes, die Prinshofskool vir

Swaksiendes en Voorbereidende Skool vir Blindes, die Transvalia Skool vir Epilepsie en die Sonitus Skool vir Hardhorendes, asook een in die Vrystaat, naamlik die Martie du Plessis Hoërskool te Bloemfontein.

## **17. DIE HELPMEKAR VRYSTAAT BEURSFONDS**

- 17.1 Die Helpmekeer studiefonds word beheer en geadministreer deur die Raad van Ondersteuning volgens die voorskrifte van die Helpmekeer studiefonds se Reglement wat ter insae by die PSD: Ondersteuning beskikbaar is. Elke gemeente is verplig om jaarliks 'n kollekte vir hierdie fonds op te neem.
- 17.2 Die hoofsaak van hierdie fonds is om in terme van die Reglement van die fonds, beurse aan Vrystaatse studente te verleen.

## **18. BEURSFONDS VIR TEOLOGIESE OPLEIDING: GEMEENTE- LERAARS**

- 18.1 Die Fonds word beheer en geadministreer deur die Raad van Ondersteuning volgens die voorskrifte van die Reglement vir die Beursfonds vir Teologiese Opleiding: Gemeenteleraars.
- 18.2 Elke gemeente is verplig om jaarliks 'n kollekte vir hierdie fonds op te neem.
- 18.3 Die doel van hierdie fonds is om teologiese studente wat hulle voorberei vir die evangeliebediening, finansiell te ondersteun deur middel van 'n studiebeurs.

## **19. GEMEENTE ONDERSTEUNING (GOUF)**

- 19.1 Die Gemeente Ondersteuning word beheer deur Bedieningsbegeleiding en geadministreer deur die Raad van Ondersteuning.
- 19.2 Elke gemeente is verplig om jaarliks twee kollektes vir hierdie fonds op te neem en ook vrywillige bydraes tot die fonds te maak.
- 19.3 Die fonds word gebruik om gemeentes wat finansiell nie die mas kan opkom nie, finansiell te ondersteun.

## **20. MEDIATEEK**

- 20.1 Die Fonds Bedieningsmateriaal word beheer deur Bedieningsbegeleiding en geadministreer deur die Raad van Ondersteuning.
- 20.2 Elke gemeente is verplig om jaarliks 'n kollekte vir hierdie fonds op te neem.
- 20.3 Boeke en leesmateriaal word op versoek beskikbaar gestel. Die Bedieningsbegeleiding bedryf 'n Mediateek wat deur leraars en gemeentes benut word.

## **21. GEMEENTE UITBREIDING (GOUF)**

- 21.1 Die Fonds Gemeente Uitbreiding word beheer deur die Bedieningsbegeleiding en geadministreer deur die Raad van Ondersteuning.
- 21.2 Elke gemeente is verplig om jaarliks 'n kollekte vir die Gemeente Ondersteuning- en Uitbreidingsfonds op te neem.

## **22. VENNOOTSKAPPE: NGKA VRYSTAAT (BOTSHABELO) (BINNELANDSE EKUMENIESE VENNOOTSKAPPE)**

- 22.1 Die Fonds vir Vennootskappe: NGKA Vrystaat, word beheer deur Vennote in Getuienis en geadministreer deur die Raad van Ondersteuning.
- 22.2 Elke gemeente is verplig om jaarliks 'n kollekte vir hierdie fonds op te neem.
- 22.3 Die fonds word aangevul met skenkings en erflatings.
- 22.4 Hierdie fonds dien die belange van die binnelandse getuienis aktiwiteite van die Kerk binne die Vrystaat. In hoofsaak dra die fonds die werksaamhede te Witsieshoek en Thaba Nchu.
- 22.5 Thaba Nchu en Botshabelo: Die salarisse van die leraars en evangeliste wat in Thaba Nchu en Botshabelo werksaam is, word deur hierdie fonds betaal. Nagenoeg 20 000 lidmate word bearbei.

**23. VENNOOTSKAPPE: LESOTHO (BUITELANDSE EKUMENIESE VENNOOTSKAPPE)**

- 23.1 Die Fonds vir Vennootskappe: Lesotho word beheer deur die Vennote in Getuienis en geadministreer deur die Raad van die Bediening vir Ondersteuning.
- 23.2 Elke gemeente is verplig om jaarliks 'n kollekte vir hierdie fonds op te neem en ook jaarliks 'n proratabydrae tot gemelde fonds te maak.
- 23.3 Die Vennootskap in Lesotho word saam met die NG Kerk in Afrika en die VGK bedryf. Die salaris van 'n leraars asook 'n subsidie aan NGKA- en VGK gemeentes, word uit hierdie fonds betaal. 'n Aantal gemeentes met nagenoeg 3 000 lidmate word gesubsidieer.

**24. VENNOOTSKAPPE: MIDDESTAD- EN ARBEIDSBEDIENING (BINNELANDSE EKUMENIESE VENNOOTSKAPPE)**

- 24.1 Die Fonds vir Middestad- en Arbeidsbediening word deur die Vennote in Getuienis beheer en geadministreer deur die Raad vir Ondersteuning.
- 24.2 Elke gemeente is verplig om jaarliks 'n kollekte vir hierdie fonds op te neem.
- 24.3 Hierdie fonds word aangewend om die salaris van die leraar van die Torings van Hoop in Bloemfontein-middestad te betaal.

**25. VENNOOTSKAPPE: REFORMED CHURCH IN ZAMBIA (RCZ) (BUITELANDSE EKUMENIESE VENNOOTSKAPPE)**

- 25.1 Die Fonds Vennootskappe: RCZ word beheer deur die Vennote in Getuienis en geadministreer deur die Raad van Ondersteuning.
- 25.2 Elke gemeente is verplig om jaarliks, 'n kollekte vir hierdie fonds op te neem.
- 25.3 Die Fonds word aangevul met skenkings en erflatings.
- 25.4 Nadat die inheemse kerk in Zambië deur die Sending van die OVS gevestig is, word die teologiese skool, Justo Mwale Theological College in Zambië, onder leiding van die Vrystaat se Raad van die Vennote in Getuienis bedryf. Leraars van die NG Kerk tree as dosente op en word deur hierdie fonds vergoed. Verder word 'n toelae vir boeke en lopende uitgawes aan die teologiese skool gegee.

## **26. TEOLOGIESE STUDENTE BYSTANDSFONDS**

- 26.1 Die Teologiese Studente Bystandsfonds word beheer deur die Vennote in Getuienis en geadministreer deur die Raad van Ondersteuning.
- 26.2 Elke gemeente is verplig om jaarliks 'n kollekte vir hierdie fonds op te neem.
- 26.3 Die Fonds ondersteun studente van die NG Kerk-familie wat by die Fakulteit Teologie en Religie van die Universiteit Vrystaat studeer deur noodsaaklike lewensonderhoud en middele te voorsien. Die studente doen aansoek deur die onderskeie Kuratoria.

## **27. VENNOOTSKAPPE: SENDING IN ASIË (BUITELANDSE EKUMENIESE VENNOOTSKAPPE)**

- 27.1 Die Wêreldsendingfonds word beheer deur die Vennote in Getuienis en geadministreer deur die Raad van Ondersteuning.
- 27.2 Elke gemeente is verplig om jaarliks 'n kollekte vir hierdie fonds op te neem en ook jaarliks 'n proratabydrae tot gemelde fonds te maak.
- 27.3 Die Fonds word aangewend vir bydraes aan onder andere Biblia Hawesending, Missie Japan en ander verdienstelike Sending-aksies.

## **28. VENNOOTSKAPPE: STUDENTEBEARBEIDING (BINNELANDSE EKUMENIESE VENNOOTSKAPPE EN GETUIENIS AKSIES)**

- 28.1 Die Fonds vir Bediening Kerkjeug word beheer deur die Vennote in Getuienis en geadministreer deur die Raad van Ondersteuning.
- 28.2 Elke gemeente is verplig om jaarliks 'n kollekte vir hierdie fonds op te neem.
- 28.3 Die studentebediening bedien nie slegs NG Kerk studente nie. 'n Groot aantal naskoolse jongmense in die stad kies ook om by hulle in te skakel. Die fonds word aangewend as bydrae tot die organisering en bediening vir naskoolse jongmense.

## **29. FONDS VIR EREDIENS**

- 29.1 Die Fonds vir die Eredienskommissie word beheer deur Bedieningsbegeleiding en geadministreer deur die Raad van Ondersteuning.
- 29.2 Elke gemeente is verplig om jaarliks 'n bydrae van R350.00 aan die fonds te maak.
- 29.3 Die fonds word onder andere aangewend vir die bevordering van die kerklied. Sake soos kerksang en -musiek, formuliere en die sinvolle inkleding van die liturgie, word deur die Erediens Netwerk hanteer.

## **30. FONDS VIR VROUELIDMATE**

- 30.1 Die Fonds vir Vrouelidmate word beheer deur Visionering en geadministreer deur die Raad van Ondersteuning.
- 30.2 Elke gemeente is verplig om verkieslik op Moedersdag 'n kollekte vir hierdie fonds op te neem. Fondse word aangewend om vrouelidmate toe te rus en te bemagtig. Hierdie Fonds is opgeneem in Beursfonds vir Teologiese Opleiding: Gemeenteleraars.

### **31. ENGO**

- 31.1 Die Sinodale Kerkkantoor neem vier kollektes op vir Engo soos ooreengekom in die ooreenkoms tussen die NG Kerk Vrystaat en Engo.

### **32. FONDS VIR BEDIENINGSBEGELEIDING**

- 32.1 Die Fonds vir Gemeentebediening word beheer deur Bedieningsbegeleiding en geadministreer deur die Raad van Ondersteuning.
- 32.2 Elke gemeente is verplig om jaarliks 'n bydrae vir hierdie fonds oor te betaal.
- 32.3 Die opbrengs van die fonds word aangewend om die werksaamhede van Bedieningsbegeleiding te help befonds.

### **33. PREDIKANTEBEGELEIDING**

- 33.1 Die Fonds vir Predikantebegeleiding word beheer deur Bedieningsbegeleiding en geadministreer deur die Raad van Ondersteuning.
- 33.2 Elke gemeente is verplig om jaarliks óf 'n kollekte vir hierdie fonds op te neem óf jaarliks 'n bydrae uit gemeentefondse tot gemelde fonds te maak.
- 33.3 Die Fonds word deur Bedieningsbegeleiding gebruik om predikante te versorg en toe te rus.

### **34. JONK VRYSTAAT: KATEGESE**

- 34.1 Die Fonds vir JONK Vrystaat word beheer deur Bedieningsbegeleiding en geadministreer deur die Raad van Ondersteuning.
- 34.2 Elke gemeente is verplig om jaarliks 'n kollekte tydens die biddag vir dooplidmate gedurende Junie, vir die fonds van JONK op te neem.
- 34.3 'n Bydrae tot gemelde fonds soos van tyd tot tyd deur JONK Vrystaat bepaal op grond van die aantal kinders in die betrokke gemeentes se kategeseskool, moet ook gemaak word (tans R25 per jaar per 100 kinders).
- 34.4 Fondse ontvang, word aangewend vir die organisering en stimulering van alle jeugaksies van die kerk, studerende jeug, werkende jongmense en kategeseskole. Die aanbieding van geestelike leierskursusse, skoolverlaterskampe, hoërskoolkampe en #Imagine, word ondersteun.

### **35. VERDERE FONDSE**

- 35.1 Die Sinode bring van tyd tot tyd verdere fondse tot stand soos benodig vir kerklike werksaamhede, welke fondse beheer en geadministreer word soos deur die Sinode bepaal.

## **12. REGLEMENT VIR DIE HELPMEKAAR VRYSTAAT BEURSFONDS**

1. 'n Aansoek om 'n studiebeurs en die meegaande korrespondensie moet gerig word aan die PSD: Ondersteuning en moet die Sinodale Kerkkantoor bereik voor 31 Januarie van die betrokke studiejaar.

2. Slegs studente –
  - van wie die ouers of voogde in die Vrystaat woon;
  - wat self 'n lidmaat is van 'n gemeente in die NG Kerk-familie;
  - wat ingeskryf is vir studie op 'n tersiêre vlak tot en met die verwerwing van 'n eerste graad (NQF 5 – 7) en vir 'n kursus wat SAQA (South African Qualifications Authority) geakkrediteer is;
  - wat voltyds studeer; en
  - wat by voorkeur aan 'n Vrystaatse instansie vir tersiêre opleiding studeer
3. sal in aanmerking kom vir 'n toekenning uit hierdie fonds.
4. Indien fondse dit toelaat, kan studente wat tot die breër familie van Gereformeerde kerke in Suid-Afrika behoort, ook uit hierdie fonds gehelp word.
5. Studente moet elke jaar opnuut aansoek doen vir 'n beurs.
6. Met die opneem van die beurs onderteken die student 'n toekenningsooreenkoms waarin ook die voorwaardes van die beurstoekenning aanvaar word, en wat op die volgende neerkom:
  - bevredigende akademiese vordering in die betrokke kursus soos bevestig in die jongste eksamenuitslae of deurlopende assessering;
  - goeie getuienis rakende algemene optrede; en
  - gunstige bewys van deelname aan die Helpmekaar Uitreik-Aksie.
7. Van beurshouers word verwag om deel te neem aan die Helpmekaar Uitreikaksie deur in 'n tuis- of studentegemeente diens te lewer byvoorbeeld as kerkraadslid, kategeet, lid van 'n begeleidings/sanggroep, sopkombuis ens. of ten minste twee keer in die eerste semester deel te wees van 'n diensleweringprojek deur 'n gemeenskapsorganisasie van sy/haar keuse – en om van hierdie dienslewering deur sy/haar gemeenteleraar 'n kort skriftelike verslag aan die Sinodale Kerkkantoor te laat toekom. Hierdie deelname moet deur 'n predikant of die hoof van die instansie wat die uitreik organiseer, bevestig word.
8. Uitbetaling geskied halfjaarliks vooruit met ontvangs van bewys van voldoening aan die bogenoemde voorwaardes.
9. Ingeval dit mag gebeur dat 'n student nie bevredigend aan bogenoemde voorwaardes voldoen of onder normale omstandighede bevredigend vorder nie, sal die uitbetaling van toegestane beursgelde in daardie betrokke jaar gestaak word.
10. Ingeval dit mag gebeur dat 'n beurshouer van kursus/studierigting verander, is dit nie vanselfsprekend dat die beurs aan hom/haar toegeken, vir 'n volgende jaar voortgesit sal word sonder behoorlike motivering deur die student waarom 'n kursusverandering nodig was of gebeur het en die Beurskomitee dit goedkeur nie.
11. Ingeval dit gebeur dat 'n student nie sy/haar finale eksamens in 'n studiejaar slaag nie, sal hy/sy die toekenning vir die volgende studiejaar verbeur.

## 13. REGLEMENT VIR BEURSFONDS

### 13.1 Reglement vir die Beursfonds vir Teologiese Opleiding: Gemeenteleraars

1. 'n Aansoek om 'n studiebeurs en die meegaande korrespondensie moet gerig word aan die PSD: Ondersteuning en moet die Sinodale Kerkkantoor bereik voor 31 Januarie van die betrokke studiejaar.
2. Sodanige aansoek moet vergesel wees van die volgende dokumentasie:
  - 'n Bewys van lidmaatskap van 'n gemeente in die NG Kerk-familie (NGK, VGKSA, NGKA of RCA);
  - getuigskrif van die leraar van die aansoeker se tuisgemeente waarin daar onder andere vermelding is van die aansoeker se roeping en voorneme tot teologiese opleiding; en
  - bewys van die nodige akademiese kwalifikasies wat as minimum-vereiste vir toelating tot die betrokke opleidingsbaan geld (bv matrieksertifikaat ens.)
3. By oorweging van 'n aansoek vir 'n studiebeurs word die volgende kriteria in ag geneem:
  - Lidmaatskap van 'n gemeente in die familie van NG Kerke;
  - Inskrywing vir akademiese opleiding in die teologie aan die Universiteit van die Vrystaat (Fakulteit Teologie en Religie);
  - Inskrywing vir kerklike vorming en -begeleiding in en deur die Seminarium van die NG Kerk Vrystaat;
  - In die geval van inskrywing vir die gebruikelike B- en M-graad in Teologie of die Nagraadse Diploma in Teologie met die oog daarop om gelegitimeer te word as 'n gemeenteleraar gaan dit eerstens om voltijdse studente;
  - In alle gevalle word die verdienstelikheid van 'n beursaansoek en die finansiële ondersteuning waarvoor 'n student mag beskik, in ag geneem en kom studente wat oor beperkte middele beskik, eerstens in aanmerking vir hulp.
4. Studente moet elke jaar opnuut aansoek doen vir 'n beurs.
5. Met die opneem van die beurs onderteken die student 'n toekennings ooreenkoms waarin ook die voorwaardes van die beurstoekening aanvaar word, en wat op die volgende neerkom:
  - bevredigende akademiese vordering in die betrokke kursus soos bevestig in die jongste eksamenuitslae of deurlopende assessering;
  - bevredigende vordering in die programme vir kerklike vorming en -begeleiding soos aangebied deur die Seminarium en skriftelik bevestig deur die betrokke Kuratorium;
  - goeie getuienis rakende algemene optrede; en
  - gunstige bewys van inskakeling en meeleving by 'n gemeente in die NG Kerk-familie soos skriftelik bevestig deur sy/haar mentorpredikant.

6. Uitbetaling geskied halfjaarliks vooruit met ontvangs van bewys van voldoening aan die bogenoemde voorwaardes.
7. Ingeval dit mag gebeur dat 'n student nie bevredigend aan bogenoemde voorwaardes voldoen of onder normale omstandighede bevredigend vorder nie, sal die uitbetaling van toegestane beursgelde in daardie betrokke jaar gestaak word.
8. Ingeval dit gebeur dat 'n student nie sy/haar finale eksamens onder normale omstandighede in 'n studiejaar slaag nie, sal hy/ sy die toekenning vir die volgende studiejaar verbeur.

### **13.2 Reglement vir die Beursfonds vir Nagraadse Teologiese Studie**

1. 'n Aansoek om 'n studiebeurs vir nagraadse studie in die Teologie, en die meegaande korrespondensie moet gerig word aan die PSD: Ondersteuning en moet die Sinodale Kerkkantoor bereik voor 31 Januarie van die betrokke studiejaar.
2. Beurse word beskikbaar gestel met die doel om navorsing te bevorder in 'n spesifieke teologiese dissipline of 'n keuse wat verband hou met of fokus op die wese, ontwikkeling en volhoubaarheid van gemeentes. In sommige gevalle, en op die diskresie van die beurskomitee, kan 'n beurs aangebied word aan kandidate om navorsing te doen binne 'n spesifieke veld wat tot belang is van die kerk.
3. Die beurse sal beskikbaar wees vir leraars binne die NG Kerk-familie en wat dien binne 'n gemeente, of 'n sinodale posisie beklee, en met die oog op nagraadse studies by voorkeur aan die Fakulteit Teologie en Religie aan die UV, of aan 'n ander fakulteit van teologie of kollege binne die grense van Suid-Afrika.
4. Die beurse sal beskikbaar wees vir nagraadse studie soos 'n M.Th., Ph.D. (Teologie), D.Th. of DPhil en kan dit vir 'n gestruktureerde program of verhandeling oorweeg word. Kandidate moet bewys lewer van:
  - met die oog op 'n Meestersgraad: 'n Honneursgraad in dieselfde- of nou verwante veld van ondersoek;
  - met die oog op 'n Doktorsgraad: 'n Magister in dieselfde- of nou verwante veld van ondersoek.
5. By oorweging van 'n aansoek vir 'n studiebeurs word – in alle gevalle – die meriete van die navorsing in ag geneem, asook die verdienstelikheid of dan finansiële behoefte en beskikbare middele van die student.
6. Beurse word vir 'n maksimum van 5 jaar aan 'n student toegeken – 2 jaar vir M-studies en 3 jaar vir D-studies.
7. Studente moet elke jaar opnuut aansoek doen vir 'n beurs;
8. Uitbetaling geskied eenmalig vooruit met ontvangs van bewys van registrasie en voldoening aan die bogenoemde voorwaardes.

### **13.3 Reglement vir die Beursfonds vir Diverse Teologiese Opleiding**

1. Beurse word beskikbaar gestel aan persone wat hulself wil bekwaam as diensleraars, bedienaars of tweede loopbaan studente, en die seminarium opleiding vir kerklike vorming wil deurloop aan die Seminarium van die NG Kerk Vrystaat.
2. Die aansoekproses verloop as volg:
  - Indien 'n student nie die koste van hierdie kursus uit eie fondse kan dek nie kan die student aansoek doen by sy/haar sturende gemeente om finansiële hulp vir hierdie studie en moet bewys lewer dat dit nie uit eie fondse gedek kan word nie
  - indien die gemeente nie in staat is om die student finansiël by te staan nie kan 'n skrywe aan die Ring gerig word om aansoek te doen om die student uit Ringsfondse by te staan met bewys dat die gemeente nie daartoe in staat is nie (die bewyse soos deurgegee aan die gemeente word ook hierby aangeheg)
  - indien die Ring nie in staat is om die student te help nie word 'n skrywe aan die Kuratorium van die student gerig om aansoek te doen vir hulp uit hierdie fonds met bewys dat die Ring nie daartoe in staat is nie (die bewyse soos deurgegee aan die Ring word ook hierby aangeheg); en
  - die Kuratorium rig dan 'n skrywe aan die Beurskomitee om aansoek te doen vir 'n toekenning uit hierdie fonds met bogenoemde bewyse aangeheg. Die Beurskomitee sal dan elke aansoek op meriete hanteer.
3. Toekennings uit hierdie beursfonds word gemaak binne die beskikbaarheid van fondse in hierdie spesifieke Beursfonds, en met inagneming van finansiële ondersteuning waaroor die betrokke aansoeker uit eie- en/of gemeentelike- en/of ringsfondse beskik.
4. 'n Student kan slegs eenmalig uit hierdie fonds gehelp word.

### **13.4 Reglement vir die Teologiese Studente Bystandsfonds**

1. Die opbrengs van hierdie fonds word beskikbaar gestel aan hulpbehoewende studente wat teologie studeer met die doel om hulle te bekwaam vir die bediening en wat in die proses addisionele kostes moes aangaan en/of weens buitengewone omstandighede nood beleef ten opsigte van lewensonderhoud tydens hul studiejaar.
2. Bystand word beskikbaar gestel aan teologie studente uit die familie van gereformeerde kerke wat ingeskryf is vir voltydse, voorgraadse studies (bv BTh, BDiv) of nagraadse kwalifikasies soos 'n B- en M-graad in Teologie of die BDiv-, MDiv- en Nagraadse Diploma in Teologie met die oog daarop om gelegitimeer te word as 'n gemeenteleraar.
3. Bystand uit hierdie fonds is ook beskikbaar aan buitelandse studente uit kerke van gereformeerde belydenis en wat ingeskryf is vir doktorsale studies, maar indien dit gaan om kontakssessies met studieleiers word slegs vir 'n tydperk van 14 dae voorsiening gemaak.
4. Bystand uit hierdie fonds kan, sou daar wel nog van die opbrengs beskikbaar wees, aangewend word om studente wat finansiële nood beleef weens uitstaande akademiese- en verblyfsrekeninge teweeggebring is, te hulp te kom.

5. Studente wat hiervoor wil aansoek doen moet met die kantoor van Vennote in Getuienis in verbinding tree en die volgende sal oorweeg word:
  - Is die student 'n aktiewe lid van sy/haar gemeente?
  - Watter ondersteuningsnetwerk is beskikbaar vir die student?
  - Is die nood maandeliks, jaarliks of interim van aard?
6. Die betrokke Kuratorium moet 'n skrywe aan die kantoor van Vennote in Getuienis rig met 'n versoek vir hulp uit hierdie fonds.
7. Verslag van uitbetalings moet aan die Beurskomitee gelewer word.

## **14. REGLEMENTE VIR DIE SINODALE ARGIEF- EN INLIGTINGSDIENS**

### **1. BELEID**

- 1.1 In ooreenstemming met die karakter van die kerk het haar Argief- en Inligtingsdiens primêr 'n kerklike doelstelling en grondslag. Dit is verder op 'n teologies- en 'n sekulêr-wetenskaplike diens ingestel.
- 1.2 Hierdie arbeid bou die geheue van die kerk uit en stel die kerk in staat om haar funksies op 'n kerklik-verantwoordelike wyse voort te sit.
- 1.3 Die versameling, bewaring en gebruik van argiefmateriaal beteken die hantering van getuienisse oor die handeling van God Drie-enig in en deur sy kerk in 'n bepaalde gebied.
- 1.4 In hierdie verband beteken argiefmateriaal: dié dokumente of alle ander materiaal wat inligting oor gemeentes, ringe, sinodes en hulle kommissies, sowel as kerklike inligtings wat binne hulle grense val, bevat. Dit behels alle skriftelike inligting van die NG Kerk Vrystaat.
- 1.5 As sodanig staan die Argief- en Inligtingsdiens as 'n gesistematiseerde inligtingsbron in diens van die Kerk en haar verskillende kennisvelde, met besondere klem op die teologie en meer bepaald die geskiedenis van die NG Kerk Vrystaat en haar werksaamhede.
- 1.6 In hierdie verband kan die waarde van museummateriaal nie onderskat word nie. Hierdie materiaal (kulturele aspekte, mondelinge oorleweringe, ens) kan bydra tot 'n meer volledige verstaan en beskrywing van die kerk.
- 1.7 Derhalwe beywer die Argief- en Inligtingsdiens hom daarvoor om gemeentes op te skerp om:
  - 1.7.1 sodanige materiaal vir die plaaslike kerk te bewaar en uit te stal; en
  - 1.7.2 hierdie materiaal aan die Argief te skenk vir veilige bewaring.

## **2. IMPLEMENTERING VAN DIE ARGIEF- EN INLIGTINGSBELEID IN DIE NG KERK VRYSTAAT**

### **2.1 Algemeen**

- 2.1.1 Vir die doelmatige argiefwerkzaamheid het kerkrade, ringe, sinodes en ander argief-lewerende instansies die volgende verantwoordelikhede:
  - 2.1.2 die voorsiening van goedversorgde en gedokumenteerde inligting met gebruikmaking van die voorgeskrewe riglyne vir liassering soos deur die Argief opgestel;
  - 2.1.3 die gebruikmaking van netjiese en leesbare skrif in 'n ink wat nie maklik verbleik of uitgewis kan word nie;
  - 2.1.4 rekenaaruitdrukke van 'n goeie letterkwaliteit (nie ligte of vinnige druk "draft" nie) of laserdruk;
  - 2.1.5 die gebruik van duursame papier, verkieslik A4-formaat van 120 gram of meer;
  - 2.1.6 skryf- of drukwerk verkieslik op albei kante van die papier met 'n oop ruimte van ongeveer 3 cm aan weerskante van die teks;
  - 2.1.7 die volledige datering, ondertekening en/of parafering en stempel van alle dokumente soos die Argief dit vereis;
  - 2.1.8 die inagneming van die noodsaaklikheid van ruimtebesparing in die Argief deur die stelselmatige vernietiging van efemere materiaal soos deur die Argivaris/Argiefkommissie bepaal;
  - 2.1.9 die inlewering van argiefmateriaal by die Sinodale Argief onder die dekking van 'n behoorlike oorplasingslys en waar nodig, met vermelding van wat ontbreek;
  - 2.1.10 duidelike aanduiding en opdrag te gee ten opsigte van dokumente wat geslote moet bly en waartoe toestemming deur die Sinode of Sinodale Kommissie of Ring of Kerkrade of Argiefskeppende Instansie verkry moet word voordat dokumente verskaf of geopen kan word.
- 2.2 Die diens vir Argief- en Inligtingsdiens het reg van koöpsie en is belas met:
- 2.2.1 die nodige advies aan die Sinode vir die voorsiening van 'n doelmatige argiefbewaarplek en kundige personeel;
  - 2.2.2 die nodige leiding aan die Sinode insake die versameling, versorging, bewaring en gebruik van argiefmateriaal en implementering en benutting van die rekenaar in dié verband;
  - 2.2.3 reëlins om argiefmateriaal van kerkrade, ringe, sinodes, kerklike kommissies en -inrigtings in die sinodale argiefbewaarplek te versamel vir bewaring;
  - 2.2.4 die verkryging van belangrike publikasies vir die Argief;
  - 2.2.5 die toesig oor die werk van die Argief- en Inligtingsbeampte, as uitvoerende beampte, én die argiefpersoneel;

2.2.6 die opstel van 'n verslag oor die werk in die Argief- en Inligtingskantoor aan elke vergadering van die Sinode, plus 'n begroting van inkomstes en uitgawes aan die betrokke bediening en Sinode; en

2.2.7 die finale beslissing oor die moontlike vernietiging van efemere stukke.

### **3. ARGIEF- EN INLIGTINGSBEAMPTTE**

Die Sinode of Raad van Ondersteuning benoem 'n Argief- en Inligtingsbeampte wat:

3.1 alle dienste op sy/haar terrein op 'n deeglike en wetenskaplike wyse uitbou;

3.2 alle take in verband met die versameling, bewaring, ontsluiting, navorsing en publikasies vervul, met die verantwoordelikheid om:

3.2.1 kerkrade, ringe, die Sinode en kerklike bedieninge argiefbewus te maak en op die inlewering van die betrokke materiaal by die betrokke sinodale argiefbewaarplek aan te dring;

3.2.2 aan te dring op die vervanging en/of verbetering van argiefmateriaal wat nie aan die voorskrifte van hierdie handleiding en/of aan die algemeen aanvaarde argiefvereistes voldoen nie;

3.2.3 aanwinste skriftelik te erken;

3.2.4 sover moontlik alle beskadigde stukke vakkundig te laat herstel;

3.2.5 mettertyd alle argiefmateriaal volgens 'n aanvaarde beginsel te laat inbind;

3.2.6 toesien dat alle bande, bundels, lêers en ander argiefstukke stelselmatig genumereer en op inventaris geplaas word;

3.2.7 toesien dat die nodige vindmiddels vir argiefstukke opgestel word;

3.2.8 teen navorsingsfooie uittreksels uit argiefstukke te voorsien;

3.2.9 die noodsaaklikheid van die versigtige hantering van argiefstukke by navorsers tuis te bring;

3.2.10 toesien dat argiefmateriaal nie uit die Argief gaan nie;

3.2.11 toesien dat geslote stukke slegs met toestemming van die Argieflewerende instansie (Sinode of Moderamen of Ring of Kerkraad) geopen of beskikbaar gestel kan word.

3.3 'n Vakkundige op die terrein van die argiefwetenskap moet wees en 'n grondige kennis van die kerk moet hê, maar nie 'n leraar hoef te wees nie;

3.4 by die Sinode se pensioen- en mediese fonds ingeskakel word;

3.5 aan elke gewone vergadering van die Raad van Ondersteuning oor sy/haar werk verslag doen;

3.6 sinodale vergadering met 'n adviserende stem bywoon;

3.7 'n student op sy/haar arbeidsterrein moet bly en die nodige in-diens-opleiding in sy/haar departement behartig;

- 3.8 rekordbeheer binne die sinodale gebied toepas wat behels die leiding met betrekking tot:
  - 3.8.1 argiefwaardige- en efemere stukke;
  - 3.8.2 'n liasseerstelsel;
  - 3.8.3 die besorg van argiefmateriaal aan die sinodale argiefbewaarplek; en
  - 3.8.4 deur sporadiese besoeke of werksinkels in die argiefbewaarplek aan predikante, die betrokke gemeentelike amptenare en kerkraadskommissies leiding gee met betrekking tot kerklike argiefwese.
- 3.9 Sorg vir die indiening van "In Memoriam"-verslag.
  - 3.9.1 Elke Sinodale Argief- en Inligtingskantoor skakel aan die begin van elke kalenderjaar met die betrokke pensioenfondse van die sinode/s wat hulle bedien met die sterfte-kennisgewings van die voorafgaande jaar.
  - 3.9.2 Die kantoor maak dan 'n lys van die sinodes waarin die oorledene gedien het.
  - 3.9.3 'n Kopie van dié lys word voor 31 Januarie van elke jaar aan al die betrokke sinodes se skribas (of persoon verantwoordelik vir die In Memoriamverslag) gestuur waar die persoon in diens was.

#### **4. DIE MODERAMEN, SINODALE BEDIENINGE EN ANDER KERKLIKE INSTANSIES**

- 4.1 Die lede van die Moderamen (skriba), skribas van alle sinodale bedieninge, sinodale amptenare wat verantwoordelikheid beklee by diensaksies, verenigings, inrigtings, institute, byeenkomste, maatskappye, trusts, pensioenfondse, skemas, kerkkantore, rade en dies meer moet van tyd tot tyd soos in hierdie reglement gestel, alle argivalia by die Argief inlewer of daarmee handel soos onderling met die Argief- en Inligtingsbeampte ooreengekom. Dit behels behoorlike ondertekende, geparafeerde, gedateerde en genumereerde agendas, notules en bylaes, sistematies en argivalies korrek geliasseerde korrespondensie, aktes, registers, finansiële stukke, alle stukke wat betrekking het op die interne funksionering en kronologie van werksaamhede, statistiek en gegewens, manuskripte, aantekeninge en dies meer.
- 4.2 Die Skriba van die Sinode het die verantwoordelikheid om so gou moontlik ná elke sinodesitting die gepubliseerde Agenda, Handeling en Kerkorde aan die Argief vir bewaring te besorg.

#### **5. DIE RING**

Die ring benoem 'n Argief- en Inligtingskommissie wat moet toesien dat:

- 5.1 die ring oor 'n doeltreffende argiefstelsel beskik waarby ingesluit is afskrifte van die ring en ringskommissies se behoorlik ondertekende notules, stukke in verband met die ring se administrasiefonds en 'n doelmatige liasseersisteem (en korrespondensie indien nodig), asook die nodige geriewe daarvoor;
- 5.2 binne twee maande na elke ringsitting die oorspronklike notules van die vergadering, asook alle korrespondensie vir die betrokke ringsjaar (indien moontlik)

- onder dekking van die voorgeskrewe inventarisvorm (met vermelding van wat ontbreek), aan die Argief gestuur word;
- 5.3 alle stukke wat vir verbetering/aanvulling/vervanging terugverwys is, so gou moontlik na ontvangs en noukeurige kontrolering deur die ringskommissie aan die Argief- en Inligtingskantoor gestuur word;
  - 5.4 die argief van die gasheergemeente tydens ringsittings nagegaan word; en daar moet aandag gegee word aan die volgende materiaal by die Gemeentekantoor: Notules (Kerkraad, Kommissies, Gemeentelike Aksies), Verslae van Kerkraadskommissies, Dooplidmaat- en Belydende Lidmaat Registers, Attestate en Lidmatebewyse, Teenblaai van Attestate / Lidmatebewyse en Doopseëls uitgereik, Huweliksregisters, Konsistorieboeke, Kerkraadsregisters, Aankondigingsboeke, Verlofregister, Korrespondensie, Liassering, Foto's, Plakboeke, Foto-albums en Museumuitstalling;
  - 5.5 in samewerking met die sinodale Argief- en Inligtingsbeampte aan kerkraadsargief-kommissies leiding gegee word met betrekking tot die ordening, bewaring en uitbouing van die gemeente-argief, die vernietiging van efemere stukke, die inlewering van gemeentelike argivalia by die sinodale argiefbewaarplek en alle ander verpligtinge;
  - 5.6 die Ringskriba behoorlik ingelig is oor sy verpligtinge soos beliggaam in die argiefreglement;
  - 5.7 handtekening onder aan notules en verslae volledig is en 'n duidelike eenheid met die notule en verslae vorm;
  - 5.8 volledige verduidelikings verstrek word waar verslae en ander dokumente nie volledig onderteken kon word nie;
  - 5.9 alle oorspronklike stukke, onder meer notules, verslae en korrespondensie by die Ringskriba vir ordening en versending na die Argief ingelewer word;
  - 5.10 alle verslae en notules duidelike en volledige opskrifte het met vermelding van die naam van die betrokke sinodale gebied, ring, gemeente, kommissie, diensaksies en dies meer, asook die datum van die vergadering en/of verslag;
  - 5.11 ringsnotules en verslae korrek en deurlopend genumereer word;
  - 5.12 ringstukke in die volgorde van die inventaris georden word en daarop afgemerk word (met vermelding van wat ontbreek), voordat dit aan die Argief- en Inligtingskantoor versend word;
  - 5.13 die nodige besonderhede oor die ring jaarliks aan die samesteller van die Jaarboek gestuur word;
  - 5.14 'n besluiteregister tydens die ringsvergadering opgestel word;
  - 5.15 'n indeks op ringsbesluite bygehou word;
  - 5.16 wanneer 'n nuwe Ringskriba benoem word, alle materiaal insake die ring deur die uittredende Ringskriba aan die nuwe Ringskriba oorhandig word;

- 5.17 stukke in verband met buitengewone vergaderings/ringsittings óók aan die Argief- en Inligtingskantoor oorgedra word;
- 5.18 geslote dokumente duidelik gemerk word en opdrag gegee is aan Argief- en Inligtingskantoor vir sluiting van dokumente en slegs geopen mag word met toestemming van die spesifieke Ring.

## **6. DIE KERKRAAD**

Elke kerkraad benoem 'n Argiefkommissie waarvan die skriba/kassier, skriba of saakgelastigde ampshalwe lid is en wat moet toesien dat:

- 6.1 die gemeente oor 'n doeltreffende argiefstelsel beskik, waarby ingesluit is 'n doelmatige, geordende liasseersisteen en inventaris, asook die nodige geriewe daarvoor;
- 6.2 dat daar aan al die kerklike en argivaliese vereistes vir die betrokke materiaal en dienste voldoen word deurdat:
- 6.3 Die handeling van die kerkraad, sy kommissies, diensaksies en ander gemeentelike vergaderings in 'n behoorlike, goed versorgde en argivalies aanvaarbare notuleboek, of notulelêer aangeteken en die betrokke bylaes daarby gevoeg word;
- 6.4 museummateriaal versamel en versorg word;
- 6.5 dooplidmaat-, lidmaat- en huweliksregisters op datum gehou en versorg word;
- 6.6 alle ander belangrike argiewe, byvoorbeeld konsistorieboeke, aankondigingsboeke en korrespondensie behoorlik versorg en bewaar word;
- 6.7 regstellings, wysigings of versuimde inskrywings in die registers korrek aangebring word nadat die aansoeke met die nodige bewysstukke, deur die kerkraad en Argief- en Inligtingskantoor goedgekeur is;
- 6.8 gemeentelike verslae volgens die kerklike bepalings opgestel en op die bestemde tyd aan die Argief- en Inligtingskantoor besorg word;
- 6.9 sorgvuldig gekontroleerde, gekorrigeerde, geparafeerde en ondertekende afskrifte van die dooplidmaat- en lidmaatregisters en ook die huweliksregister en fotostate uit die predikant se BI-30 huweliksboek op bepaalde tye op voorgeskrewe blaaie aangebring en na die Argief- en Inligtingskantoor gestuur word;
- 6.10 al bogenoemde argiefmateriaal, asook enige ander waartoe ooreengekom is, vir veilige bewaring, versorging en oordeelkundige gebruik deur navorsers aan die Argief- en Inligtingskantoor toevertrou word;
- 6.11 alle stukke wat deur die Argief- en Inligtingskantoor vir verbetering/aanvulling/vervanging na gemeentes terugverwys is, binne vier weke na die vergadering in die verlangde toestand aan die Argief- en Inligtingskantoor besorg word;
- 6.12 skriftelike en mondelinge oorkondes wat 'n bydrae kan lewer tot die getuienis van die handeling van God met sy kerk, bewaar en aan die Argief- en Inligtingskantoor besorg word; en

- 6.13 geslote dokumente duidelik gemerk word en opdrag gegee is aan Argief- en Inligtingskantoor vir sluiting van dokumente en slegs geopen mag word met toestemming van die spesifieke kerkraad.
- 6.14 'n inventaris van Inligtingsbronne wat voldoen aan die vereistes van die Wet op die Bevordering van Toegang tot Inligting (Wet 2 van 2000) opgestel en jaarliks bygehou word vir deursending aan die Argief- en Inligtingskantoor.
- 6.15 voldoen word aan die vereistes gestel in die Nasionale Erfeniswet (Wet 215 25 van 1999 en aangevul in Goewermentskennisgewing Nr. 1313 van 25.10.2002); wat alle strukture – of gedeelte daarvan – wat ouer is as 60 jaar, beheer en wat bepaal dat geen “erfenisobjek” (boeke, manuskripte, dokumente, argivalia, kaarte, afdrucke, foto’s, films, klankmateriaal en enige materiaal wat uniek is en wat die mondelinge geskiedenis van Suid-Afrika aanvul) sonder toestemming of ’n permit vervreem, vernietig, beskadig, bekrap, verander, gerestoureer of herstel mag word nie;
- 6.16 in samewerking met die kerkraad leiding gegee word met betrekking tot die ordening, instandhouding, bewaring en uitbouing van die gemeente-argief, die vernietiging van wegdoenbare stukke, die inlewering van gemeentelike argivalia by die argief en alle ander verpligtinge ten einde te voldoen aan die vereistes gestel in die Ned Geref Kerk se beleid ten opsigte van rekordbeheer.

## **7. REGISTERS**

### **7.1 Algemeen**

- 7.1.1 Gegewens moet deeglik nagegaan word voordat ’n inskrywing in enige register gemaak word.
- 7.1.2 Die name en vanne van persone en die name van gemeentes moet volledig en korrek verstrek word. Afkortings soos BFN vir Bloemfontein en PE vir Port Elizabeth, en populêr-gebruikte maar nie-amptelike name soos "Groote Kerk" vir Kaapstad en "Bosmanstraatkerk" vir Pretoria is ontoelaatbaar. Die korrekte name verskyn in die Kerk se Jaarboek.
- 7.1.3 Ten einde die juiste geboortedatum en die spelling van die name vir inskrywing in die register te verseker, moet die ouer(s) by die aanmelding vir die doop die dokument toon wat by die registrasie van die kind se geboorte uitgereik is. Dooplidmate moet voor belydenisaflegging ’n doopseël inlewer.
- 7.1.4 Datums word volgens die agtsyferstelsel en in die orde van die dag, maand, jaar geskryf, bv 3 April 1978 as 03.04.1978 en 15 November 1977 as 15.11.1977.
- 7.1.5 Geen herhalingstekens soos "do" of "ditto" is toelaatbaar nie.
- 7.1.6 Inskrywings in dooplidmate- en lidmateregister geskied in alfabetiese orde (dit wil sê alle vanne wat met dieselfde letter begin, moet saam gegroepeer word). Vanne soos Van der Merwe en Van Rensburg kom onder die letter V, maar ’n van soos Janse(n) van Rensburg, waar die Janse(n) ’n deel van die van uitmaak en die betrokke persoon dit self so gebruik, kom onder J.
- 7.1.7 Inskrywings moet genommer word.

- 7.1.8 Ter wille van ruimtebesparing word daar normaalweg geen reël tussen twee inskrywings in die dooplidmate- of lidmateregister ooggelaat nie. Hoogstens mag daar tussen registrasies wat met verskillende letters van die alfabet begin, 'n reël ooggelaat word.
- 7.1.9 Om dieselfde rede begin die inskrywings van elke volgende nuwe jaar of termyn nie telkens op 'n nuwe bladsy nie, maar hulle word hoogstens deur die ooplaai van 'n reël, met of sonder die toevoeging van die jaartal, aangedui of geskei. Dit is van toepassing op die oorspronklike handgeskrewe- en afskrifregisters.
- 7.1.10 Inligting wat in die opmerkingskolom van die dooplidmateregister verstrek word, moet verklarend wees ten opsigte van buitengewone omstandighede wat die kerkregtelike posisie van die doopouers, dopeling of bedienaar van die doop raak, of wat op die wese en implikasie van die sakrament betrekking het.
- 7.1.11 Waar die vader of moeder bv nie 'n belydende lidmaat van 'n gemeente is nie, of om 'n ander rede nie by die doop teenwoordig is nie, moet die dooplidmateregister aandui dat die betrokke ouer nie die doopbelofte afgelê het nie. In so 'n geval word met die opmerking "vader/moeder lê alleen belofte af" volstaan. Dit geld ook waar 'n ouer oorlede is of die ouers geskei is. Die name moet ingeskryf word met die nodige opmerking in die opmerkingskolom.
- 7.1.12 Waar by 'n registerinskrywing addisionele inligting van nut kan wees, mag dit in die opmerkingskolom aangeteken word, selfs al maak die handleiding nie spesifiek daarvoor voorsiening nie, hoewel die gestelde riglyn hierbo en in 7.1.13 eerbiedig moet word.
- 7.1.13 As algemene reël geld dat niks vermeld mag word wat lasterlik is of 'n stigma dra nie. Opmerkings soos "buite-egtelik", "vader onbekend" of "enkelouer" is heeltemal ontoelaatbaar.
- 7.1.14 Rektifikasie beteken om 'n fout in die register bv JOHANNIS tot JOHANNES of 20 April tot 21 April reg te stel. Naamsverandering beteken om 'n bepaalde voornaam of van bv PETRUS deur HERMANUS of CONRADIE deur NIENABER, soos dikwels by aanneming gebeur, te vervang. Versuimde registrasie beteken dat iemand se naam nie in die register ingeskryf is nie. Dit moet reggestel word deur die aanbring van versuimde inligting in die betrokke registers.
- 7.1.15 Aansoeke in verband met rektifikasie word per hardekopie (/per epos in PDF-formaat/ op die voorgeskrewe vorms (Bylae 3, vorm 12 of Bylae 3-vorm 13) en met die nodige bewysstukke/stawende dokumente ingedien by die kerkraad van die gemeente waar versuim plaasgevind het of in die geval van foutiewe inskrywing by die kerkraad waar lidmaat tans geregistreer is.
- 7.1.16 Ten opsigte van 'n regstelling en naamsverandering is die vereiste bewysstukke/stawende dokumente onder andere 'n identiteitsdokument. Vir 'n versuimde inskrywing moet skriftelike verklarings verkry word van twee betroubare en ongesensureerde lidmate, doopouers uitgesluit, dat die betrokke persoon wel gedoop is of belydenis afgelê het, plus 'n doop- of lidmaatskapkaart/ boekie.

- 7.1.17 'n Skriftelike verklaring deur die leraar wat die doop waargeneem het, vergesel van 'n afdruk van die betrokke bladsy in die doopkladboekie, kan in die geval van 'n versuimde doopinskrywing in plaas van bogenoemde verklaring ingelewer word. In die geval van versuimde lidmaatinskrywing is 'n verklaring deur die betrokke leraar plus die lidmaatkaart, in plaas van die verklarings, aanvaarbaar.
- 7.1.18 Nadat die kerkraad die aansoek op 'n wettig gekonstitueerde vergadering nagegaan en goedgekeur het, word dit én die bewysstukke met 'n aanbeveling na die Sinodale Argief- en Inligtingskantoor verwys vir goedkeuring.
- 7.1.19 Die skriba van die kerkraad bring die goedgekeurde wysiging in die oorspronklike register aan en die Sinodale Argief- en Inligtingskantoor sien toe dat dit op die afskrifte aangebring word.
- 7.1.20 Geen skrappinge in die register is toelaatbaar nie, maar die juiste besonderhede word met rooi bo die foutiewe gegewens, wat in alle gevalle met rooi onderstreep word, ingeskryf.
- 7.1.21 In die opmerkingskolom word daar, ook met rooi aangeteken:  
"Argief goedg. ....(datum)". Die amptenaar wat die wysiging aanbring, parafeer dit.
- 7.1.22 By versuimde registrasie word ná goedkeuring deur die Argief, die inskrywing in die register van die lopende jaar en in die gemeente waar die versuim plaasgevind het, gedoen. 'n Verduidelikende opmerking in die opmerkingskolom (vers. reg. Arg goedg. en die datum) word aangebring, tesame met 'n verwysingsnota in die register by die jaar waar die inskrywing moes plaasvind.
- 7.1.23 'n Skryffout wat in die lopende jaar begaan is of enige ander geval waar rektifikasie nodig is, moet direk reggestel en deur die registerhouer geparafeer word. In die afskrifte word die korrekte besonderhede dan sonder meer oorgeskrif.
- 7.1.24 Alle wysiginge en/of aanvullings word in die huidige gemeente gedoen, BEHALWE IN DIE GEVAL VAN VERSUIMDE REGISTRASIE. Dit word by die gemeente gedoen waar die versuimde registrasie plaasgevind het en nadat die naam in die register ingeskryf is, word 'n oorplasing gedoen na die huidige gemeente.

## **7.2 Die Dooplidmateregister**

### **7.2.1 Voornaam en Van**

- 7.2.1.1 Die dooplidmaat word geregistreer onder die van soos dit op sy/haar identiteitsdokument verskyn.
- 7.2.1.2 Die dooplidmaat se van word eerste ingeskryf en daarna die volledige voorname.
- 7.2.1.3 Slegs die moeder se nooiensvan word saam met haar volle voorname ingeskryf en nie haar getroude van nie, maar as haar nooiensvan en haar getroude van dieselfde is, word "geb" duidelikheidshalwe na haar van geskryf, bv "Dippenaar (geb Dippenaar)".

7.2.1.4 Alle voorname van ouers en dooplidmate word voluit geskryf.

## **7.2.2 Buite-egtelike Kind**

7.2.2.1 Die dooplidmaat word langs die gewone weg geregistreer.

7.2.2.2 Die nooiensvan en voornaam van die moeder of die van en voorname van die vader (na gelang van die situasie) word ingeskryf. Indien dit 'n weduwee of geskeide vrou is, word haar getroude van in hakies langsaan aangebring, bv (nou Nel). Die reël vir die vader of moeder se naam word oopgelaat en in die opmerkingskolom word aangebring: Moeder of Vader lê alleen belofte af.

7.2.2.3 Indien die biologiese ouers ná die doop trou, word die dooplidmaat se van by die Departement van Binnelandse Sake verander. Daarna word daar aansoek om rektifikasie gedoen, sodat die dooplidmaat se van verander kan word om met die van van die biologiese vader ooreen te stem. Die vader se naam en van word ook ingeskryf.

## **7.2.3 Aangenome Kind**

7.2.3.1 Waar 'n dooplidmaat voor die doopbediening aangeneem is, word die dooplidmaat onder die van van die aannemende ouers ingeskryf. Die name van die aannemende ouers word voluit in die ouerkolom aangeteken.

7.2.3.2 Indien die kind na die doopbediening aangeneem word en hy/sy dus 'n ander van kry, word aansoek om rektifikasie by die Argief gedoen, met die nodige bewyse van aanneming en vans-verandering. Na goedkeuring word in die opmerkingskolom aangedui "Arg. goedg. en die datum". Die name van die aannemende ouers word aangeteken, maar die name van die oorspronklike ouer(s)/biologiese ouer(s), mag onder geen omstandighede geskrap word nie. Met die aanbring van die nodige veranderings word die ou van, van die kind in rooi onderstreep, en die nuwe van word in rooi net bokant die ou van aangeteken. Die skriba parafeer daarnaas. Ter wille van die alfabetiese orde in die registers moet 'n verwysings in rooi van die nuwe van, na die ou van in die betrokke registers gemaak word, bv VAN DER MERWE, JOHANNES kyk JOOSTE, JOHANNES. By die uitreik van 'n doopseël word die name van die aannemende ouers ingevul.

## **7.2.4 Volwasse Doop**

7.2.4.1 In die geval van 'n volwassene wat by belydenisaflegging gedoop word, word die inskrywing in beide die Doop- en Lidmateregister gedoen. Die name van die ouers word steeds voluit in die Dooplidmateregister geskryf. Indien die name van die ouers onbekend is, word in die Ouerkolom aangeteken: "Name nie beskikbaar".

7.2.4.2 In die opmerkingskolom van die register vir belydende lidmate word aangeteken: "Na belydenis gedoop", KR en datum.

7.2.4.3 Die inskrywing van 'n getroude vrou geskied onder haar nooiensvan met die huidige van tussen hakies, byvoorbeeld (nou Nel).

## **7.2.5 By Hertroue**

- 7.2.5.1 In die geval waar 'n weduwee of geskeide vrou weer trou en die kinders uit die vorige huwelik nog gedoop moet word, word die kinders geregistreer onder naam van die natuurlike (biologiese) vader, met die opmerking "oorlede op....." of "geskei op....." wat die geval mag wees, en die moeder se naam en nooiensvan.
- 7.2.5.2 Alleen indien die huidige vader langs geregtelike weë die kind(ers) op sy naam laat oorplaas het, met ander woorde wettiglik aangeneem het, kan die kinders by die doop onder sy naam geregistreer word. In so 'n geval moet die dokumentêre bewys (aannemingsdokument) aan die betrokke kerkraad voorgelê word.
- 7.2.5.3 Indien so 'n aanneming eers ná die doop plaasvind, moet langs die voorgeskrewe weg aansoek om naamsverandering in die dooplidmateregister gedoen word (kyk pt 16.3.2).

## **7.2.6 Doopgetuies**

- 7.2.6.1 Die inskrywing van die name van doopgetuies word ontmoedig omdat dit geen kerklike doel dien nie.
- 7.2.6.2 Minstens die eerste naam van die doopgetuie word voluit geskryf. Die nooiensvan van die vrou word ingeskryf met haar getroude van in hakies.

## **7.2.7 Doop in 'n ander gemeente**

In die geval waar met toestemming van die plaaslike kerkraad die doop in 'n ander gemeente bedien word, registreer die registerhouer van die gemeente waar die doop plaasgevind het, die doop in die dooplidmateregister, maar reik gelyktydig 'n bewys van dooplidmaatskap uit wat aan die gemeente waar die dopeling woonagtig is, gestuur word vir registrasie in dié gemeente se dooplidmateregister. Die registerhouer wat die dooplidmaatskap oorplaas, skryf in die VERTREKKOLOM die naam van die gemeente en die datum. In die Opmerkingskolom word ingevoeg: Toest + naam van gemeente wat toestemming gegee het vir die doop.

## **7.2.8 Vertrek na 'n ander gemeente (oorplasing)**

Wanneer 'n dooplidmaat met of sonder sy/haar ouers na 'n ander gemeente vertrek, reik die registerhouer 'n bewys van dooplidmaatskap uit wat in die nuwe gemeente ontvang, afgelees en in die dooplidmateregister ingeskryf word. Die geboortedatum en datum van doop en die naam van die leraar wat die doop waargeneem het, moet ook op die uitgereikte dooplidmaatskap verskyn.

## **7.2.9 Doop aan Kinderhuiskind**

- 7.2.9.1 Name van ouers: In alle gevalle word die name van die biologiese ouers ingevul.
- 7.2.9.2 In die opmerkingskolom word die kerkraadsbesluit en datum aangedui.
- 7.2.9.3 Die name van die lidmate van die gemeente wat bereid is om verantwoordelikheid te neem vir die verbondsoopvoeding en deur die kerkraad

aangewys is om as doopgetuies of geestelike voogde op die formulier te antwoord by die bediening van die doop aan 'n kinderhuiskind ouer as sewe jaar, moet in die kerkraadsbesluit genoem word.

7.2.9.4 Die name van die geestelike voogde kan in die volgende twee reëls, direk onder die name van die biologiese ouers ingevul word.

### **7.2.10 Doop van kinders uit die Buiteland**

7.2.10.1 As lidmate wat net tydelik in die buiteland woon, hul kind in 'n ander gemeente as hul tuisgemeente in Suid-Afrika wil laat doop, moet hulle die skriftelike toestemming van hul tuisgemeente verkry.

7.2.10.2 As lidmate wat permanent in die buiteland woon en daar by 'n gemeente inskakel, hul kind hier wil laat doop, is die prosedure soos volg:

- hulle moet toestemming van hul gemeente in die buiteland kry;
- daar word met hulle 'n doopgesprek gevoer deur die leraar van die gemeente waar die kind gedoop word.
- Na die doop registreer die skriba die doop in die Dooplidmateregister, en reik gelyktydig 'n bewys van Dooplidmaatskap uit, wat aan die gemeente waar die dooplidmaat woonagtig is, gestuur word vir registrasie. In die opmerkingskolom word aangeteken: Toest. + gemeentenaam;

7.2.10.3 As lidmate wat permanent in die buiteland woon nie daar by 'n gemeente kan inskakel nie, maar hier wil laat doop, word die volgende prosedure gevolg:

- die kerkraad van die gemeente waar hulle wil laat doop, vra hulle attestaat aan van die gemeente waar hulle lidmate was totdat hulle geëmigreer het;
- daar word met hulle 'n doopgesprek gevoer.
- hulle word tydens die gesprek gevra na die redes waarom hulle nie by 'n gemeente kan inskakel nie en hulle word aangespoor om wel by 'n gemeente in die buiteland in te skakel.

### **7.2.11 Doop van kinders in pleegsorg**

7.2.11.1 Waar die kind ná die doopbediening wettig aangeneem word, word aansoek om rektifikasie met die voorlê van die nodige bewyse gedoen.

7.2.11.2 Waar die dopeling voor die doopbediening in pleegsorg geneem is, word die dopeling onder sy/haar eie van ingeskryf, terwyl die name en van, van die pleegouers voluit in die ouer kolom verskyn. Die kerkraadsbesluit, datum en opmerking: "Doopouers is Pleegouers", word in die opmerkingskolom aangedui.

### **7.2.12 Doop van kinders ouer as 7 jaar**

Rekenskap word gegee ten opsigte van die doop van kinders ouer as sewe jaar deur die kerkraadsbesluit en datum in die opmerkingskolom aan te dui. Sien ook Kerkorde AS 2023, Artikel 49.1, Riglyne 6: Riglyne vir die doop van 'n kind ouer as sewe.

### **7.2.13 Doop van kinders uit ander kerke**

In die opmerkingskolom moet van die doop van kinders uit ander kerke rekenskap gegee word. Die kerkraadsbesluit en datum word in die opmerkingskolom aangedui. Sien ook Kerkorde AS 2023, Reglement 26.3.3.

## **7.3 Die Belydende Lidmateregister**

### **7.3.1 Aflegging van geloofsbelydenis**

7.3.1.1 Die datum van belydenisaflegging en die geboortedatum van die lidmaat word in die onderskeie kolomme ingeskryf. Wanneer die lidmaat na 'n ander gemeente vertrek, moet die geboortedatum op die uitgereikte attestaat/lidmaatbewys verskyn.

7.3.1.2 Wanneer 'n vrou belydenis aflê, word dit onder haar nooiensvan in die register aangeteken en dié van behou sy deurgaans in die lidmateregisters van al die gemeentes waaraan sy mag behoort en hoeveel male sy ook al mag trou. Dit kan alleen verander word as sy haar nooiensvan wettig laat verander en dan ook aansoek doen om rektifikasie in die belydende lidmateregister. Waar 'n vrou uit 'n ander gemeente of kerk kom en haar getroude van verskyn op die lidmaatbewys/attestaat/verklaring, moet sy nogtans onder haar nooiensvan aangeteken word. Telkens word haar geldende getroude van in hakies bygevoeg, bv "(nou Odendaal)".

### **7.3.2 Oorgekom/Vertrek**

7.3.2.1 In die geval van 'n lidmaat wat by wyse van attestaat of lidmaatbewys uit 'n ander Ned Geref gemeente oorkom, word die naam van die betrokke gemeente in die regte kolom ingeskryf. Die datum waarop die naam van die lidmaat in die erediens afgelees word/op aankondigings verskyn, word in die register as datum van aankoms aangeteken.

7.3.2.2 In die geval van 'n vertrekkende lidmaat word die datum wanneer en die gemeente waarheen hy vertrek, in die onderskeie kolomme ingeskryf op die plek waar die naam oorspronklik in die register ingeskryf is.

7.3.2.3 Waar 'n persoon uit 'n ander kerk, gereformeerde of 'n nie-gereformeerde kerk of 'n sekte oorkom, vorm 11 voltooi het, en na die voorgeskrewe prosedure (sien Kerkorde AS 2019 2023, Reglement 26.3.4) lidmaat van die gemeente word, word die korrekte naam van die vorige kerk of sekte in die kolom VAN WAAR geskryf, en in die opmerkingskolom word die Kerkraadsbesluit en datum aangeteken.

7.3.2.4 Waar 'n getroude vrou by wyse van attestaat of bewys van lidmaatskap oorkom, word haar name en nooiensvan soos dit op die attestaat/bewys van lidmaatskap voorkom, in die register geskryf. Waar 'n getroude vrou uit een van die susterskerke na 'n NG gemeente oorkom, word haar nooiensvan en name aangeteken soos dit op die ingelewerde sertifikaat verskyn. Die huidige van word tussen hakies geskryf.

7.3.2.5 Aangesien 'n predikant se akte van demissie ook sy attestaat is, word sy bevestigingsdatum as die datum van sy oorkoms aangeteken.

### **7.3.3 Verlies van Lidmaatskap en Herregistrasie**

7.3.3.1 Aangesien die NG Kerk geen interkerklike attestaat of bewys van lidmaatskap het nie en die oorgaan van lidmate by wyse van 'n "Verklaring insake lidmaatskap" (Vorm 8) moet geskied, moet verlies van lidmaatskap (byvoorbeeld: oorgaan na 'n nie-erkende kerk of afsnyding) en oorgaan na 'n erkende kerk (byvoorbeeld: om huweliksredes na 'n kerk met 'n gereformeerde belydenis) op presies dieselfde wyse hanteer word deur die uitreiking van 'n Vorm 8 ná besluit deur die kerkraad.

7.3.3.2 Indien verlies van lidmaatskap gedurende die jaar van oorspronklike registrasie geskied, word dit in die opmerkingskolom aangeteken dat die lidmaatskap verval het. Die datum van die kerkraadsbesluit word ook vermeld (voorbeeld: Lm verval. KR 10.02.2012).

7.3.3.3 Indien verlies van lidmaatskap buite die jaar van oorspronklike registrasie geskied, word dit by die oorspronklike inskrywing in die opmerkingskolom, met verwysing na die datum van die kerkraadsbesluit, aangeteken. Met vermelding van die naam, jaar van inskrywing en datum van die kerkraadsbesluit, word die saak per brief aan die argief oorgedra vir aantekening in die betrokke registerafskrif.

7.3.3.4 Indien die naam van die kerk waarheen die persoon oorgegaan het, bekend is, moet dit ook in die opmerkingskolom aangeteken word (voorbeeld: Lm verval. Oor na RKK. KR 10.02.2012).

7.3.3.5 Wanneer 'n persoon by wyse van belydenisaflegging of oorkoms weer lidmaat word, word dit so in die register aangeteken met verwysing na die kerk en die datum van die kerkraadsbesluit in die opmerkingskolom.

7.3.3.6 Waar 'n persoon 'n gemeente verlaat sonder om by 'n ander kerk aan te sluit en dan weer na berou na die kerk terugkeer, moet hy/sy weer belydenis van geloof aflê en dit moet so in die register aangeteken word. By verlating word in die opmerkingskolom aangeteken dat die lidmaatskap verval het.

### **7.3.4 Lidmaatskap onopspoorbaar**

Waar die kerkraad tevrede is dat 'n lidmaatsertifikaat onopspoorbaar is en die lidmaat 'n verklaring ingedien het, word in die opmerkingskolom ingeskryf:

"K'raadbesl. of KR .....(datum)". Vorm 14

## **7.4 Die Huweliksregister**

7.4.1 In elke gemeente word die huwelike wat daar bevestig word in 'n huweliksregister aangeteken.

7.4.2 Hierdie register word deur die kerkraad se argiefkommissie gekontroleer. Aan die einde van die register, net na die laaste inskrywing, word twee handtekeninge van die argiefkommissie aangebring.

- 7.4.3 In die kolom "Geboorteplek" moet die plek van geboorte ingevul word en nie RSA nie.
- 7.4.4 Die inskrywing van 'n weduwee/geskeide dame word soos volg gedoen: "Huidige getroude van en in hakies daarna die nooiensvan. bv Botha Amelia (geb. Verster)". (Inligting hier ingevoeg volgens SKAI besluit 11/05/2007.)
- 7.4.5 Rekenaaruitdrukke word aanvaar, mits dit op papier van 120 gram of meer uitgedruk is, die vereiste kolomme bevat met die nodige parafering en handtekening soos vereis deur die Argief- en Inligtingskantoor.

## 7.5 Sterfte

Wanneer 'n lidmaat te sterwe kom, word oorlede en die datum in die opmerkingskolom, teenoor die lidmaat se naam in die lidmateregister aangeteken. Dit geld ook ten opsigte van dooplidmate.

## 7.6 Registerafskrifte

7.6.1 Alle afskrifte moet 'n korrekte en getroue weergawe van die oorspronklike register-inskrywings wees. As 'n register egter gebrekkig aangelê is, beteken dit nie dat die gebreke in die afskrifte herhaal moet word nie. Die gegewens in die register moet met ander woorde in hulle korrekte vorm oorgeskrif of getik word. Die Argiefkommissie van die kerkraad moet die afskrifte nagaan:

- deur al die besonderhede in die dooplidmateregister met dié in die doopkladboek te vergelyk;
- deur die name in die belydende lidmateregister met die attestate/bewyse van lidmaatskap en die lys van name van persone wat belydenis afgelê het, te vergelyk;
- deur die teenblaai van die lidmaatsertifikaatboek en attestaat-boek met die lidmateregister te vergelyk;
- deur die besonderhede in die afskrifte noukeurig met dié in die registers te vergelyk.

Die parafering en handtekening van die kommissie beteken dat die afskrifte nagegaan, waar nodig gekorrigeer en uiteindelik as korrek gesertifiseer is. Alle wysigings moet ook gearafeer word.

- 7.6.2 Op die voorblad verskyn slegs die naam van die gemeente en die tydperk waaroor die afskrifte strek. Die naam van die gemeente en die jaartal word verder op elke bladsy aangedui.
- 7.6.3 Lê die binneblaai soos 'n boek oop. Begin met die inskrywings op die agterkant van die eerste blad en gaan dan voort soos dit in die register voorkom. Nommer die bladsy sodat wanneer die "boek" ooplê, die twee bladsye dieselfde nommer kry.
- 7.6.4 Daar mag geen bladsy tussenin oopgelaat word nie. Moet dus nie elke letter van die alfabet op 'n nuwe bladsy begin nie. Hoogstens mag daar tussen die name wat met verskillende letters van die alfabet begin, 'n reël oopgelaat word.

- 7.6.5 Geen gewone regstelling mag bo-oor 'n skryffout van die registerhouer aangebring word nie. Die fout moet met rooi onderstreep en die regstelling in rooi daarbo ingeskryf word. Alle regstellings word geparafeer. LW: 'n Gewone regstelling of korreksie is geen wysiging of rektifikasie nie.
- 7.6.6 Op die laaste bladsy van die afskrifte en net onder die laaste inskrywing sertifiseer die argiefkommissie van die kerkraad dat die afskrifte 'n korrekte en getroue weergawe van die oorspronklike register is. Elke binnebladsy word ook regs onder deur die kommissie klein en netjies geparafeer.
- 7.6.7 Voltooide afskrifte moet nie opgerol of gevou word nie en word in 'n groot koevert aan die ring se argiefkommissie besorg.
- 7.6.8 Die kerkraadsargiefkommissie moet toesien dat alle stukke wat deur die meerdere vergaderings vir verbetering/aanvulling/vervanging na hulle kerkraad terugverwys is, binne vier weke na afloop van die betrokke ringsvergadering in die verlangde toestand aan die Argief- en Inligtingskantoor terugbesorg word.

## **7.7 Rekenarisering van Registers**

Gemeentes is vry om te rekenariseer met dien verstande dat die Argief- en Inligtingskantoor se aanwysings en voorskrifte gevolg word.

## **7.8 Elektroniese oorplasing van Lidmaatskap**

Elektroniese oorplasing van lidmaatskap mag elektronies per e-pos aangevra en oorgeplaas word, mits dit op 'n amptelike vorm/briefhoof is.

## **7.9 Elektroniese bewaring**

- 7.9.1 Die praktyk om dokumente wat elektronies geskep is slegs elektronies te bewaar, word nie aanbeveel nie.
- 7.9.2 Kommissies van die Algemene Sinode, sinodes, ringe, kerkrade, inrigtings en alle argiefskeppende instansies word versoek om, naas die elektroniese bewaring van dokumente alle dokumentasie - notules en ander argivalia - in gedrukte vorm te bewaar en volgens die goedgekeurde riglyne vir bewaring (Agenda Algemene Sinode 1998, bl 142) na die Sinodale Argiefbewaarplesse oor te plaas.

## **7.10 Indiening van Registerafskrifte**

Registerafskrifte kan op die volgende wyse ingedien word:

- 7.10.1 Afskrifte (handgeskrewe) op die voorgeskrewe registerblaaie.
- 7.10.2 Rekenaaruitdrukke van lidmateregisters vir doop- en belydende lidmate, en huwelike volgens voorskrif en op 120 gram papier.
- 7.10.3 Voltooide afskrifte moet nie opgerol of gevou word nie.
- 7.10.4 Afskrifte word waar nodig vir korreksies aan die kerkraad teruggestuur vir regstelling voor die Ringsvergadering.
- 7.10.5 Die kerkraad moet toesien dat alle stukke wat deur die Argief- en Inligtingskantoor vir verbetering/aanvulling/ vervanging na die kerkraad

terugverwys is, binne vier weke in die verlangde toestand aan die Argief- en Inligtingskantoor terugbesorg word.

### 7.11 Standaardkortings vir gebruik in registers

Met die oog op die beperkte ruimte in registers beskikbaar is die volgende lys deur die Algemene Sinode (1998) goedgekeur:

AGS	Apostoliese Geloofsending van Suid-Afrika
Afr	Afrikaans(e)
AP Kerk	Afrikaanse Protestantse Kerk
Arg	Argivaris/Argief
Art	Artikel
Assem of God	Assembly of God
Bapt Kerk	Baptistekerk
Bel	Belydenis van Geloof
Bep	Bepaling
Bl	Bladsy
Ch of Eng SA	Church of England in Southern Africa
Cong Church	Congregational Church
CPSA	Church of the Province of South Africa (Anglikane)
Dupl	Duplikaat/Inskrywing
Ev Geref Kerk	Evangeliese Gereformeerde Kerk
Fout	Foutiewe Inskrywing
Gel	Gelofte
Gem	Gemeente
GKSA	Gereformeerde Kerke in Suid-Afrika
Ingel	Ingelewer
Inskr	Inskrywing
KO	Kerkorde
KR	Kerkraad/Kerkraadsbesluit/ Kerkraadsgoedkeuring/ kerkraadsnotule
Kaap	Wes- en Suid-Kaapland
Lm/Lid	Lidmaat/Lidmaatsertifikaat/Lidmaatskap
Luth Kerk	Lutherse Kerke
Meth Kerk	Methodist Church
Nasar Kerk	Kerk van die Nasarener in Afrika
Nam	Namibië
NGKA	Nederduitse Gereformeerde Kerk in Afrika
N Kaap	Noord-Kaapland
N Tvl	Noord-Transvaal
NG Kerk	Nederduitse Gereformeerde Kerk
NH Kerk	Nederduitsch Hervormde Kerk van Afrika
Oos-Kaap	Oos-Kaapland
Oos O Kerk	Oosterse Ortodokse Kerk
O Tvl	Oos-Transvaal
OVS	Oranje-Vrystaat

Oorl	Oorlede
P	Pagina (bladsy)
PPK	Pinkster Protestantse Kerk
Presb Kerk	Presbiteriaanse Kerk
RCA	Reformed Church in Africa
RKK	Roomse Katolieke Kerk
Reg	Registrasie/Register
SD Adven	Sewende Dag Adventiste Kerk
Skr	Skriba
Skrift	Skriflelik
Toest	Toestemming
VGKSA	Verenigende Gereformeerde Kerk in Suid-Afrika
V	Van
Ver	Verander
Verl	Verloor(e)
Vers	Versuim(de)
Vers reg	Versuimde registrasie
Vol Ev Kerk	Volle Evangelie Kerk
W Tvl	Wes-Transvaal

Die Algemene Sinode aanvaar dat as standaardafkorting vir die Nederduitse Gereformeerde Kerk "NG Kerk" (in plaas van NG kerk) gebruik word.

Die Algemene Sinode het op die volgende riglyne in dié verband besluit:

- erkende afkortings word gebruik;
- amptelike afkortings van die name van kerke en instansies word gebruik;
- indien daar nie 'n afkorting vir 'n bepaalde woord of naam is nie, stel die kommissie sy eie lys afkortings vir hulle gebruik saam.

## **7.12 Lidmaatskap oor gemeentegrense**

7.12.1 In die geval waar 'n Kerkraad 'n besluit moes neem, moet die datum van die Kerkraadsbesluit in die Opmerkingskolom aangeteken word. (KR + datum). Sien besluite 3.5 by Artikel 3 van hierdie Kerkorde.

## **7.13 Minimum vereistes vir bewaring van rekords asook die wetlike voorskrifte vir die bewaring van rekords**

(Soos goedgekeur by die Algemene Sinode 2015), is by die Argief en Inligtingskantoor beskikbaar. Die reglement bevat die vereistes waarmee gehandel moet word met alle dokumente in elke gemeente-, rings-, sinodale en ander kerklike instansies, se kantore.)

(Hierdie dokument is verkrygbaar by [www.kerkargief.co.za/doks/Tydperke.pdf](http://www.kerkargief.co.za/doks/Tydperke.pdf) )

## **15. REGLEMENT VIR KOMMUNIKASIE**

### **1. NAAM**

Kommunikasie

### **2. BENADERING**

- 2.1 Die Sinode van die NG Kerk Vrystaat stel 'n Kommunikasie span aan ten einde die verantwoordelike, ordelike en Woordgetroue kommunikasie van die Sinode, Moderamen, bedieninge, ringe en gemeentes te bevorder.
- 2.2 Hierdie Reglement reël die samestelling, bevoegdheids, werksaamhede en funksionering van Kommunikasie en die Kommunikasie departement van die Sinodale Kantoor.

### **3. OPDRAG EN BEVOEGDHEDE**

- 3.1 Kommunikasie ontvang van die Sinode die opdrag om toesig te hou oor en leiding te gee in alle sinodale kommunikasie.
- 3.2 Kommunikasie is in besonder verantwoordelik vir:
  - 3.2.1 die redigering, koördinerings en bekendstelling van inligting rakende die werksaamhede van die Sinode, Moderamen, bedieninge, ringe en gemeentes;
  - 3.2.2 die verantwoordelike formulering en verspreiding van ter sake verklarings, standpunte en inligting oor aktuele, leerstellige en etiese aangeleenthede binne die kerk en na die breër gemeenskap;
  - 3.2.3 die vestiging en instandhouding van funksionele en professionele betrekkinge met die media;
  - 3.2.4 die handhawing van Bybels-gefundeerde integriteit in alle kommunikasie handelinge (intern en ekstern), gekenmerk deur eerlikheid, ewewigtigheid, respek vir menswaardigheid en getrouheid aan die Woord.

### **4. FUNKSIONERING**

- 4.1 Die Kommunikasiedepartement staan onder leiding van 'n kommunikasie bestuurder.
- 4.2 Die Kommunikasiedepartement funksioneer onder toesig van Kommunikasie en voer alle opdragte uit ooreenkomstig hierdie Reglement en die besluite van die Sinode.
- 4.3 Die kommunikasiebestuurder:
  - 4.3.1 is verantwoordelik vir die operasionele uitvoering van die Kommunikasie departement se werksaamhede;
  - 4.3.2 voer die besluite van die Taakspan uit;
  - 4.3.3 bestuur die daaglikse kommunikasie-aktiwiteite van die Sinodale Kantoor;
  - 4.3.4 verseker dat alle publikasies en mediaskakeling voldoen aan professionele en etiese standaarde;

- 4.3.5 rapporteer gereeld aan Kommunikasie;  
4.3.6 vorm ook deel van die vergadering van kantoorhoofde.

#### **4.4 Middele van kommunikasie**

Die Sinode beskik oor die volgende middele vir die uitvoering van sy kommunikasie-opdrag:

- 4.4.1 'n Elektroniese nuusbrief, bekend as **VRYPOS**, wat:
- a) tweeweekliks gedurende skoolkwartale verskyn;
  - b) dien as inligtingskanaal vir sake soos omskryf in artikel 3;
  - c) as spreekbuis vir die Moderamen en sinodale bedieninge/taakspanne funksioneer;
  - d) nie reageer op berigte of menings in ander media nie; en
  - e) nie as advertensieplatform vir nie-kerklike of kommersiële doeleindes dien nie.
- 4.4.2 'n Amptelike webwerf van die NG Kerk Vrystaat ([www.ngkerkvrystaat.co.za](http://www.ngkerkvrystaat.co.za)), wat die kommunikasie-opdrag soos vervat in artikel 3 ondersteun.
- 4.4.3 Sinodale databasisse en kommunikasieplatforms, insluitend maar nie beperk nie tot:
- a) die Jaarboek van die NG Kerk;
  - b) kassiers- en kontaklyste;
  - c) e-poslyste;
  - d) 'n personeelinligtingstelsel; en
  - e) amptelike sosiale mediaplatforms.
- 4.5 Kommunikasie kan, met inagneming van die Sinode se besluite, hierdie middele aanpas of uitbrei soos wat omstandighede dit vereis.

#### **4.6 Interne kommunikasie**

- 4.6.1 Die Sinode streef na ordelike en effektiewe interne kommunikasie binne die Sinodale Kantoor.
- 4.6.2 Interne kantoor kommunikasie word gekoördineer deur die PSD: Ondersteuning, in oorleg met Kommunikasie.
- 4.6.3 Alle interne kommunikasie geskied in ooreenstemming met die waardes soos vervat in artikel 3.2.4.

### **5. KONSTITUERING EN VERGADERINGS**

- 5.1 Kommunikasie bestaan uit:
- die skriba van die Moderamen, wat as sameroeper optree;
  - een verteenwoordiger, met 'n sekundus, van elke sinodale bediening;
  - en die kommunikasiebestuurder (*ex officio*).

- 5.2 Kommunikasie kan kundige persone koöpteer indien die uitvoering van sy opdrag dit vereis.
- 5.3 Die administratiewe versorging van Kommunikasie word deur die kommunikasie-bestuurder behartig.
- 5.4 Die Taakspan vergader minstens vier maal per jaar, of soos nodig is.
- 5.5 Hierdie Reglement word goedgekeur en gewysig deur die Sinode.

## **16. REGLEMENT VIR KLANK- EN BEELDOPNAMES VAN VERGADERINGS**

1. Hierdie Reglement is van toepassing op alle vergaderings van die kerk. Dit sluit in vergaderings wat in persoon bygewoon word sowel as aanlynvergaderings/virtuele vergaderings deur middel van digitale platforms, bv. Microsoft Teams, Skype, Zoom en Google Meet.
2. In die geval van 'n tugondersoek is dit verpligtend om 'n klankopname van die ondersoek te maak as deel van die rekord van verrigtinge wat dan beskikbaar sal wees in die geval van appèl teen die bevinding van die tugliggaam.
3. In die geval van alle ander vergaderings mag klank- en beeldopnames van vergaderings slegs gemaak word wanneer spesifieke redes of behoeftes daarvoor bestaan, naamlik:
  - 3.1. in die geval van klankopnames, indien die skriba weens die aard of verwagte duur van die vergadering die opname benodig om 'n behoorlike skriftelike notule van die vergadering op te stel; of
  - 3.2. in die geval van beeldopnames, indien dit gebruik gaan word vir televisieuitsendings van spesiale gebeurtenisse of vir video-opnames met die oog op opleiding of ander kerklike aktiwiteite; of
  - 3.3. in die geval van sowel klank- as beeldopnames, wanneer daar enige ander sinvolle of strategiese of doelmatige rede daarvoor bestaan.
4. Die kennisgewing van die vergadering moet vermeld dat 'n klank- en/of beeldopname van die vergadering gemaak gaan word. Die voorsitter moet aan die begin van die vergadering die aanwesiges weer daaraan herinner dat die vergadering opgeneem gaan word.
5. Alle persone wat die vergadering bywoon, moet vooraf ingelig word indien die vergadering, of enige gedeelte daarvan, opgeneem gaan word, asook wat die doel van die opname is en hoe dit hanteer sal word. By 'n formele kerkvergadering, insluitend 'n sinodesitting, mag 'n interne opname gemaak word vir notulering, rekordhouding, appèl- tug- of kerkregeringsdoeleindes. Sodanige opname berus op die kerkvergadering se regmatige administratiewe belang en nie noodwendig op afsonderlike toestemming van elke bywoner nie.

Enige beswaar teen die opname moet aan die voorsitter gestel word, wat dit billik oorweeg en 'n beslissing maak. Die beswaar en beslissing moet in die notule aangeteken word.

6. Persone wat later by die vergadering aansluit moet ingelig word dat die vergadering opgeneem word.
7. So gou as moontlik na afloop van die vergadering moet die skriba die skriftelike notule opstel en dit aan die persone wat die vergadering bygewoon het sirkuleer vir goedkeuring. Alternatiewelik word die notule op die volgende vergadering goedgekeur. Indien daar enige onsekerheid of beswaar is oor die korrektheid van die skriftelike notule, moet die opname gebruik word om die onsekerheid of beswaar uit die weg te ruim.
8. Tesame met die goedkeuring van die skriftelike notule, moet die vergadering besluit of daar enige rede bestaan waarom die opname van die vorige vergadering behou moet word. Indien geen sodanige besluit geneem word nie, moet die opname van die betrokke vorige vergadering onmiddellik na afloop van die vergadering waarop die notule goedgekeur is, volledig en permanent vernietig word.
9. Gedurende die bestaan van die opname van 'n vergadering moet dit deur die skriba veilig en vertroulik bewaar word. Die bepalings van die Wet op Beskerming van Persoonlike Inligting nr 4 van 2013 en die Wet op Bevordering van Toegang tot Inligting nr 2 van 2000 moet deurgaans in gedagte gehou en toegepas word, met spesifieke verwysing na die persoonlike inligting van bywoners van vergaderings.
10. Insae in die opname van 'n vergadering mag vir goeie rede en met streng toepassing van sekuriteit en vertroulikheid aan persone wat die vergadering bygewoon het, verleen word.
11. 'n Opname van 'n vergadering is 'n vertroulike amptelike rekord en mag slegs gebruik word vir die doel waarvoor dit gemaak is, of vir 'n verdere doel wat regtens toelaatbaar en daarmee versoenbaar is. Geen opname, afskrif, transkripsie of uittreksel mag ongemagtig versprei, gepubliseer of aan ander beskikbaar gestel word nie.

Insae deur persone wat nie die vergadering bygewoon het nie, mag slegs plaasvind met skriftelike magtiging van die voorsitter, skriba of bevoegde kerklike liggaam, en slegs vir 'n behoorlike rede, soos notuleverifiëring, appèl-, tug- of regsprosesse, regsadvies, 'n PAIA-versoek, hofbevel, versoek van die Inligtingsreguleerder, of 'n ander regtens geregverdigde kerklike doel.

Waar sensitiewe inligting betrokke is, moet toegang beperk word tot persone wat dit werklik nodig het, en moet vertroulikheid streng gehandhaaf word.

## VORM 1



### BEROEPSBRIEF VIR 'N BEDIENAAR VAN DIE WOORD

#### Beroep uitgebring deur die

---

(naam en adres van gemeente)

**en gerig aan**

---

(naam en adres van beroepene)

#### **AANHEF:**

Genade, barmhartigheid en vrede vir u van God die Vader en van die Here Jesus Christus! Die Kerkraad van die Nederduitse Gereformeerde Gemeente \_\_\_\_\_ het genoë om u in kennis te stel dat u tot herder en leraar van hierdie gemeente beroep is, sodat u hier alles kan kom doen wat van 'n herder en leraar volgens die Woord van God, die Kerkorde en ander bepalinge van die Nederduitse Gereformeerde Kerk verwag kan word.

#### **DIENSAANBOD:**

Dit is vir die Kerkraad van ..... (naam van gemeente) 'n voorreg en 'n vreugde om met vrymoedigheid vir u 'n voltydse pos / tentmakerpos / vaste termynpos\* as bedienaar van die Woord van die gemeente aan te bied, terwyl ons terselfdertyd ook biddend die vertroude uitspreek dat u hierdie diensaanbod (beroep) gunstig sal oorweeg. Die kerkraad onderneem namens die gemeente dat aan u die nodige agting en liefde bewys sal word en lojale samewerking en ondersteuning verleen sal word sodat u in die vervulling van u taak aangemoedig kan word en ook daarin vreugde kan ervaar.

#### **POSBESKRYWING:**

U sal die verantwoordelikheid aanvaar om binne die gemeente die ampspligte soos omskryf in Artikel 9 van die Kerkorde uit te voer. Die volgende spesifieke pligte sal deur u nagekom word:

---

---

### **LEWENSONDERHOUD:**

Die Kerkraad onderneem om met betrekking tot u lewensonderhoud uitvoering te gee aan die bepaling van Artikel 13 van die Kerkorde. Die volgende is in hierdie opsig van belang:

- (a) U totale vergoedingspakket beloop R ..... per jaar. Hierdie pakket sal jaarliks met inagneming van die aanbevole skale van die Algemene Taakspan Predikantesake (ATP), Algemene Steunspan Fondse en Bates (ASFB) en die Raad van die Bediening: Ondersteuning aangepas word. Die pakket kan na u behoefte binne die raamwerk van en onderworpe aan tersaaklike wetgewing en sinodale besluite, gestruktureer word.
- (b) U verlof word gereël volgens die *Reglement vir die Verlof van Bedienaars van die Woord* van die Algemene Sinode en met inagneming van die gemeente se personeelbeleid.
- (c) Die staande besluite van die Algemene Sinode en die Sinode van die NG Kerk Vrystaat is van toepassing met betrekking tot u deelname aan die pensioenfonds, mediese skema en ander sinodale skemas en fondse.
- (d) Huisvesting: 'n Vry woning word u aangebied / U kan ook 'n keuse uitoefen om u eie huisvesting te bekom in welke geval die kerkraad 'n spesifieke ooreenkoms met u sal aangaan\*.

### **DIENSBEËINDIGING:**

Diensbeëindiging, anders as deur aanvaarding van 'n beroep, word gereël deur Artikels 11, 12 en 14 van die Kerkorde en met inagneming van die spesifieke besluite van die Algemene Sinode en die Sinode van die NG Kerk Vrystaat oor 65 jaar as verpligte aftree-ouderdom.

### **FINALISERING VAN OOREENKOMS:**

Indien u hierdie aanbod positief oorweeg, is die Kerkraad bereid om deur middel van onderhandeling 'n diensooreenkoms ingevolge hierdie aanbod met u te finaliseer, voordat u die beroep aanvaar. Finale reëlings oor die datum van bevestiging sal getref word tydens hierdie onderhandelinge.

### **WYSIGINGS:**

Hierdie diensooreenkoms kan van tyd tot tyd gewysig word met instemming van beide partye en skriftelike goedkeuring van die ring of sy gevolmagtigde kommissie.

### **VERBINTENIS TOT ONDERWERPING AAN DIE GESAG VAN DIE KERKVERBAND:**

Met die ondertekening van hierdie aanbod of ander ooreenkoms wat hieruit voortvloei verklaar ons ..... (naam van gemeente) as werkgewer dat ons ons neerlê by bepalings van die Kerkorde en besluite van die Algemene Sinode en die Sinode van die NG Kerk Vrystaat soos van tyd tot tyd gewysig, asook toepaslike wetgewing en personeelbeleid van die betrokke kerkvergadering.

Geteken te \_\_\_\_\_ op hierdie \_\_\_\_\_ dag van \_\_\_\_\_

GETUIES:

VOORSITTER : KERKRAAD

1. \_\_\_\_\_

\_\_\_\_\_

2. \_\_\_\_\_

(NAMENS WERKGEWER)

**VERBINTENIS TOT ONDERWERPING AAN DIE GESAG VAN DIE KERKVERBAND:**

Met die ondertekening van hierdie aanbod of ander ooreenkoms wat hieruit voortvloei verklaar ek ..... (naam van beroepene) as werknemer dat ek my neerlê by bepalinge van die Kerkorde en besluite van die Algemene Sinode en die Sinode van die NG Kerk Vrystaat soos van tyd tot tyd gewysig, asook toepaslike wetgewing en personeelbeleid van die betrokke kerkvergadering.

**VERKLARING DEUR BEROEPENE/BENOEMDE:**

Ek ..... (volle name) verklaar hiermee dat daar geen hangende of dreigende tughandeling teen my is nie en bevestig by hernuwing dat ek getrou sal bly aan die legitimasieverklaring wat ek onderteken het en wat ek aanvaar as kode vir optrede deur 'n predikant van die Nederduitse Gereformeerde Kerk. Ek neem kennis van die diensaanbod van \_\_\_\_\_ (naam van die gemeente) en versoek hiermee dat verdere onderhandelinge gevoer sal word met die oog op die finalisering van 'n diensooreenkoms.

Geteken te \_\_\_\_\_ op hierdie \_\_\_\_\_ dag van \_\_\_\_\_

GETUIES:

1. \_\_\_\_\_

2. \_\_\_\_\_

\_\_\_\_\_  
BEROEPENE

\* Skrap dit wat nie van toepassing is nie



**BENOEMINGSBRIEF VIR PREDIKANTE IN SINODALE DIENS**

**Beroep uitgebring deur die**

---

(naam van die betrokke sinodale bediening/raad/moderamen  
**en gerig aan**

---

(naam en adres van beroepene)

**AANHEF:**

Genade, barmhartigheid en vrede vir u van God die Vader en van die Here Jesus Christus!  
Die Sinode/Moderamen/van die Nederduitse Gereformeerde Kerk Vrystaat het genoë om u in kennis te stel dat u tot predikant in sinodale diens met opdrag..... benoem is met al die verantwoordelikhede wat die gemelde arbeid volgens die Woord van God, die Kerkorde en ander bepalinge van die Nederduitse Gereformeerde Kerk van u verwag\*.

**DIENSAANBOD:**

Dit is vir die Sinode/Moderamen/Bediening 'n voorreg en 'n vreugde om met vrymoedigheid die pos van predikant in sinodale diens met opdrag ..... vir u aan te bied, terwyl ons terselfdertyd ook biddend die vertroude uitspreek dat u hierdie diensaanbod (beroep) gunstig sal oorweeg\*.

**POSBESKRYWING:**

U arbeid word verrig onder toesig van die Bediening \_\_\_\_\_ (naam van Bediening) ooreenkomstig die voormelde Kerkorde, en ook ooreenkomstig ander besluite van die Sinode of die betrokke eenheid in verband met u dienswerk.

**LEWENSONDERHOUD:**

Die Sinode/Moderamen/Bediening onderneem om met betrekking tot u lewensonderhoud uitvoering te gee aan die bepaling van Artikel 13 van die Kerkorde. Die volgende is in hierdie opsig van belang\*:

- (a) U totale vergoedingspakket beloop R..... per jaar. Hierdie pakket sal jaarliks met inagneming van die aanbevole skale van die Algemene Taakspan Predikantesake (ATP), Algemene Steunspan Fondse en Bates (ASFB) en die Raad van Ondersteuning

Die pakket kan na u behoefte binne die raamwerk van en onderworpe aan tersaaklike wetgewing en sinodale besluite, gestruktureer word.

- (b) U verlof word gereël volgens die *Reglement vir die Verlof van Bedienaars van die Woord* van die Algemene Sinode en met inagneming van die Sinode se personeelbeleid.
- (c) Die staande besluite van die Algemene Sinode en die Sinode van die NG Kerk Vrystaat is van toepassing met betrekking tot u deelname aan die pensioenfonds, mediese skema en ander sinodale skemas en fondse.
- (d) Huisvesting: 'n Vry woning word u aangebied / U kan ook 'n keuse uitoefen om u eie huisvesting te bekom in welke geval die Sinode/Moderamen 'n spesifieke ooreenkoms met u sal aangaan\*.

**DIENSBEËINDIGING:**

Diensbeëindiging anders as deur aanvaarding van 'n beroep, word gereël deur Artikels 11, 12 en 14 van die Kerkorde en met in agneming van die spesifieke besluite van die Algemene Sinode en die Sinode van die NG Kerk Vrystaat oor 65 jaar as verpligte aftree-ouderdom.

**FINALISERING VAN OOREENKOMS:**

Indien u hierdie aanbod positief oorweeg, is die Sinode/Moderamen bereid om deur middel van onderhandeling 'n diensooreenkoms ingevolge hierdie aanbod met u te finaliseer, voordat u die beroep aanvaar\*. Finale reëlings oor die datum van bevestiging sal getref word tydens hierdie onderhandelinge.

**WYSIGINGS:**

Hierdie diensooreenkoms kan van tyd tot tyd gewysig word met instemming van beide partye en skriftelike goedkeuring van die Sinodale Diens Regte of sy gevolmagtigde.

**VERBINTENIS TOT ONDERWERPING AAN DIE GESAG VAN DIE KERKVERBAND:**

Met die ondertekening van hierdie aanbod of ander ooreenkoms wat hieruit voortvloei verklaar ons die ..... (naam van die Bediening/Moderamen) as werkgewer dat ons ons neerlê by bepalings van die Kerkorde en besluite van die Algemene Sinode en die Sinode van die NG Kerk Vrystaat soos van tyd tot tyd gewysig, asook toepaslike wetgewing en personeelbeleid van die betrokke kerkvergadering.

Geteken te \_\_\_\_\_ op hierdie \_\_\_\_\_ dag van \_\_\_\_\_

GETUIES:

\_\_\_\_\_  
\_\_\_\_\_

\_\_\_\_\_  
(NAMENS WERKGEWER)

**VERBINTENIS TOT ONDERWERPING AAN DIE GESAG VAN DIE KERKVERBAND:**

Met die ondertekening van hierdie aanbod of ander ooreenkoms wat hieruit voortvloei verklaar ek ..... (naam van beroepene) as werknemer dat ek my neerlê by bepalings van die Kerkorde en besluite van die Algemene Sinode en die Sinode van die NG Kerk Vrystaat soos van tyd tot tyd gewysig, asook toepaslike wetgewing en personeelbeleid van die betrokke kerkvergadering.

**VERKLARING DEUR BEROEPENE/BENOEMDE:**

Ek ..... (volle name) verklaar hiermee dat daar geen hangende of dreigende tughandeling teen my is nie en bevestig by hernuwing dat ek getrou sal bly aan die legitimasierklaring wat ek onderteken het en wat ek aanvaar as kode vir optrede deur 'n predikant van die Nederduitse Gereformeerde Kerk. Ek neem kennis van die diensaanbod van die ..... (naam van die Bediening/Moderamen) en versoek hiermee dat verdere onderhandelinge gevoer sal word met die oog op die finalisering van 'n diensooreenkoms.

Geteken te \_\_\_\_\_ op hierdie \_\_\_\_\_ dag van \_\_\_\_\_

GETUIES:

\_\_\_\_\_  
\_\_\_\_\_

\_\_\_\_\_  
BEROEPENE

\* Skrap dit wat nie van toepassing is nie



**AKTE VAN BEVESTIGING**

Aangesien \_\_\_\_\_ op  
\_\_\_\_\_ in ooreenstemming met al die betrokke bepalings deur  
\_\_\_\_\_ met oplegging van hande bevestig is tot herder en leraar  
van die gemeente \_\_\_\_\_ binne die gebied van die Ring van  
\_\_\_\_\_, word hiermee verklaar dat die bevestigde die bevoegdheid van  
bedienaar van die Woord in die Nederduitse Gereformeerde Kerk het en deel in al die voorregte en  
verpligtinge aan die amp verbonde.

Die Sinode bid die bevestigde die rykste seën van God toe in die uitoefening van hierdie heilige en  
heerlike amp ooreenkomstig die Woord, Belydenis en Kerkorde van die Nederduitse  
Gereformeerde Kerk.

Gegee te \_\_\_\_\_ op \_\_\_\_\_

\_\_\_\_\_  
AKTUARIUS VAN DIE SINODE



### AKTE VAN BEVESTIGING: DIENSLERAAR

Aangesien \_\_\_\_\_ op  
 \_\_\_\_\_ in ooreenstemming met al die betrokke bepalings deur  
 \_\_\_\_\_ met oplegging van hande bevestig is tot Diensleraar van die  
 gemeente \_\_\_\_\_ binne die gebied van die Ring van  
 \_\_\_\_\_, word hiermee verklaar dat die bevestigde die bevoegdheid van  
 Diensleraar in die Nederduitse Gereformeerde Kerk het en deel in al die voorregte en verpligtinge,  
 ooreenkomstig sy/haar legitimasië sertifikaat.

Die Sinode bid die bevestigde die rykste seën van God toe in die uitoefening van hierdie heilige en  
 heerlike amp ooreenkomstig die Woord, Belydenis en Kerkorde van die Nederduitse Gereformeerde  
 Kerk.

Gegee te \_\_\_\_\_ op \_\_\_\_\_

\_\_\_\_\_  
 AKTUARIUS VAN DIE SINODE



**AKTE VAN DEMISSIE**

Die Kerkraad van die Nederduitse Gereformeerde Gemeente \_\_\_\_\_ het die stukke in verband met die beroep van die broer \_\_\_\_\_ na die gemeente \_\_\_\_\_ gesien, en getuig hiermee in waarheid dat hy hom gedurende sy verblyf in ons midde onberispelik in leer en wandel op 'n wyse wat 'n bedienaar van die Woord waardig is, gedra het. Op sy versoek demitteer die Kerkraad hom op eervolle wyse van sy band met die Kerkraad en gemeente van \_\_\_\_\_ en oorhandig aan hom hierdie Akte van Demissie wat ook dien as sy attestaat, en wens hom daarby van harte toe dat hy in sy nuwe werkkring met veel vrug mag arbei en steeds die ryke seën van die Here mag geniet.

Die broer word vergesel deur sy eggenote \_\_\_\_\_ en die volgende belydende lidmate

\_\_\_\_\_ en die volgende dooplidmate: \_\_\_\_\_

Gegee op \_\_\_\_\_ deur die Kerkraad van die Nederduitse Gereformeerde Gemeente \_\_\_\_\_ en hiermee onderteken deur die lede van die Kerkraad.

**Ouderlinge:**

\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_

**Diakens:**

\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_



**AKTE VAN DEMISSIE**

Die Kerkraad van die Nederduitse Gereformeerde Gemeente \_\_\_\_\_ het die stukke in verband met die beroep van die suster \_\_\_\_\_ na die gemeente \_\_\_\_\_ gesien, en getuig hiermee in waarheid dat sy haar gedurende haar verblyf in ons midde onberispelik in leer en wandel op 'n wyse wat 'n bedienaar van die Woord waardig is, gedra het. Op haar versoek demitteer die Kerkraad haar op eervolle wyse van haar band met die Kerkraad en gemeente van \_\_\_\_\_ en oorhandig aan haar hierdie Akte van Demissie wat ook dien as haar attestaat, en wens haar daarby van harte toe dat sy in haar nuwe werkkring met veel vrug mag arbei en steeds die ryke seën van die Here mag geniet.

Die suster word vergesel deur haar eggenoot \_\_\_\_\_ en die volgende dooplidmate: \_\_\_\_\_

Gegee op \_\_\_\_\_ deur die Kerkraad van die Nederduitse Gereformeerde Gemeente \_\_\_\_\_ en hiermee onderteken deur die lede van die Kerkraad.

<p style="text-align: center;">_____ <b>Voorsitter</b></p> <p style="text-align: center;"><b>Ouderlinge:</b></p> <p>_____</p> <p>_____</p> <p>_____</p> <p>_____</p> <p>_____</p> <p>_____</p> <p>_____</p> <p>_____</p> <p>_____</p> <p>_____</p>	<p style="text-align: center;">_____ <b>Skriba</b></p> <p style="text-align: center;"><b>Diakens:</b></p> <p>_____</p> <p>_____</p> <p>_____</p> <p>_____</p> <p>_____</p> <p>_____</p> <p>_____</p> <p>_____</p> <p>_____</p> <p>_____</p>
--	---



**AKTE VAN DEMISSIE BY EMERITERING**

Die Ring van \_\_\_\_\_ het die vereiste stukke wat  
betrekking het op die emeritering van broer

\_\_\_\_\_  
as herder en leraar van die gemeente

\_\_\_\_\_  
in orde gevind, en demitteer hom op sy versoek en met die goedkeuring van die  
Kerkraad van \_\_\_\_\_

ooreenkomstig die bepalings van die Kerkorde van die Nederduitse Gereformeerde Kerk  
Vrystaat op eervolle wyse van sy diens in die gemeente.

Hy word van harte toegewens dat die rus na sy jarelange dienswerk in die kerk van die Here  
vir hom nuttig en genoeglik sal wees, en dat hy steeds die rykste seëninge van die Here in die  
toekoms sal ondervind.

Gegee deur die Ring op hierdie \_\_\_\_\_ dag van die maand \_\_\_\_\_  
in die jaar \_\_\_\_\_.

\_\_\_\_\_  
Voorsitter van die Ring/Ringskommissie

\_\_\_\_\_  
Skriba van die Ring/Ringskommissie



**AKTE VAN DEMISSIE BY EMERITERING**

Die Ring van \_\_\_\_\_ het die vereiste stukke wat  
betrekking het op die emeritering van suster

\_\_\_\_\_  
as herder en leraar van die gemeente

\_\_\_\_\_  
in orde gevind, en demitteer haar op haar versoek en met die goedkeuring van  
die Kerkraad van \_\_\_\_\_

ooreenkomstig die bepalings van die Kerkorde van die Nederduitse Gereformeerde Kerk  
Vrystaat op eervolle wyse van haar diens in die gemeente.

Sy word van harte toegewens dat die rus na haar jarelange dienswerk in die kerk van die Here  
vir haar nuttig en genoeglik sal wees, en dat sy steeds die rykste seëninge van die Here in die  
toekoms sal ondervind.

Gegee deur die Ring op hierdie \_\_\_\_\_ dag van die maand \_\_\_\_\_  
in die jaar \_\_\_\_\_.

\_\_\_\_\_  
Voorsitter van die Ring/Ringskommissie

\_\_\_\_\_  
Skriba van die Ring/Ringskommissie







**AKTE VAN DEMISSIE BY AANVAARDING VAN 'N ANDER WERK MET  
BEHOUD VAN BEDIENINGSBEVOEGDHEID**

Die Kerkraad van die Nederduitse Gereformeerde gemeente \_\_\_\_\_ het in oorleg met die Ringskommissie van die Ring van \_\_\_\_\_ die vereiste stukke wat betrekking het op die emeritering van broer \_\_\_\_\_ (volle name) as herder en leraar van die gemeente in orde gevind, en demitteer hom op sy versoek hiermee ooreenkomstig die bepalings van die Kerkorde van die Nederduitse Gereformeerde Kerk Vrystaat op eervolle wyse van sy diens in die gemeente, met behoud van sy bedieningsbevoegdheid as bedienaar van die Woord in die Nederduitse Gereformeerde Kerk.

Die rykste seëninge van die Here word hom in sy nuwe werk van harte toegebied. Gegee deur die Kerkraad op hierdie \_\_\_\_\_ dag van die maand \_\_\_\_\_ in die jaar \_\_\_\_\_ en geteken deur die lede van die Kerkraad.

**Ouderlinge:**

---

---

---

---

---

---

---

---

---

---

---

---

---

---

---

---

---

---

---

---

---

---

---

---

**Diakens:**

---

---

---

---

---

---

---

---

---

---

---

---

---

---

---

---

---

---

---

---

---

---

---

---



**AKTE VAN DEMISSIE BY AANVAARDING VAN 'N ANDER WERK MET  
BEHOUD VAN BEDIENINGSBEVOEGDHEID**

Die Kerkraad van die Nederduitse Gereformeerde gemeente \_\_\_\_\_ het in oorleg met die Ringskommissie van die Ring van \_\_\_\_\_ die vereiste stukke wat betrekking het op die emeritering van suster \_\_\_\_\_ (volle name) as herder en leraar van die gemeente in orde gevind, en demitteer haar op haar versoek hiermee ooreenkomstig die bepalings van die Kerkorde van die Nederduitse Gereformeerde Kerk Vrystaat op eervolle wyse van haar diens in die gemeente, met behoud van haar bedieningsbevoegdheid as bedienaar van die Woord in die Nederduitse Gereformeerde Kerk.

Die rykste seëninge van die Here word haar in haar nuwe werk van harte toegebid. Gegee deur die Kerkraad op hierdie \_\_\_\_\_ dag van die maand \_\_\_\_\_ in die jaar \_\_\_\_\_ en geteken deur die lede van die Kerkraad.

**Ouderlinge:**

---

---

---

---

---

---

---

---

---

---

---

---

---

---

---

---

---

---

---

---

---

---

---

---

**Diakens:**

---

---

---

---

---

---

---

---

---

---

---

---

---

---

---

---

---

---

---

---

---

---

---

---



**AKTE VAN DEMISSIE BY AANVAARDING VAN EMERITAAT WEENS SWAK GESONDHEID**

Die Kerkraad van die Nederduitse Gereformeerde gemeente \_\_\_\_\_ het in oorleg met die Ringskommissie van die Ring van \_\_\_\_\_ die vereiste stukke wat betrekking het op die emeritering van broer \_\_\_\_\_ weens swak gesondheid as herder en leraar van die gemeente in orde gevind. Hiermee word hy op sy versoek, ooreenkomstig die bepalings van die Kerkorde van die Nederduitse Gereformeerde Kerk Vrystaat, op eervolle wyse van sy diens in die gemeente gedemitteer.

Hy word verbetering van sy gesondheid en die seën van die Here toegebied.

Gegee op hierdie \_\_\_\_\_ dag van die maand \_\_\_\_\_ in die jaar \_\_\_\_\_ en geteken deur die lede van die Kerkraad.

**Ouderlinge:**

**Diakens:**

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_



**AKTE VAN DEMISSIE BY AANVAARDING VAN EMERITAAT WEENS SWAK GESONDHEID**

Die Kerkraad van die Nederduitse Gereformeerde gemeente \_\_\_\_\_ het in oorleg met die Ringskommissie van die Ring van \_\_\_\_\_ die vereiste stukke wat betrekking het op die emeritering van suster \_\_\_\_\_ weens swak gesondheid as herder en leraar van die gemeente in orde gevind. Hiermee word sy op haar versoek, ooreenkomstig die bepalings van die Kerkorde van die Nederduitse Gereformeerde Kerk Vrystaat, op eervolle wyse van haar diens in die gemeente gedemitteer.

Sy word verbetering van haar gesondheid en die seën van die Here toegebid.

Gegee op hierdie \_\_\_\_\_ dag van die maand \_\_\_\_\_ in die jaar \_\_\_\_\_ en geteken deur die lede van die Kerkraad.

**Ouderlinge:**

**Diakens:**

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_



**AKTE VAN DEMISSIE (BRUGBEDIENING)**

Die Kerkraad van die Nederduitse Gereformeerde Gemeente \_\_\_\_\_ het die stukke in verband met die verstryking van die termyn van die broer \_\_\_\_\_ as brugpredikant in die gemeente gesien, en getuig hiermee in waarheid dat hy hom gedurende sy verblyf in ons midde onberispelik in leer en wandel op 'n wyse wat 'n bedienaar van die Woord waardig is, gedra het. Die Kerkraad demitteer hom op eervolle wyse van sy band met die Kerkraad en gemeente van \_\_\_\_\_ en oorhandig aan hom hierdie Akte van Demissie wat ook dien as sy attestaat, en wens hom daarby van harte toe dat hy die ryke seën van die Here vir nog lank mag geniet.

*(indien van toepassing, anders skrap gewoon)*

Die broer word vergesel deur sy eggenote \_\_\_\_\_ en die volgende belydende lidmate

\_\_\_\_\_ en die volgende dooplidmate: \_\_\_\_\_

Gegee op \_\_\_\_\_ deur die Kerkraad van die Nederduitse Gereformeerde Gemeente \_\_\_\_\_ en hiermee onderteken deur die lede van die Kerkraad.

**Ouderlinge:**

\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_

**Diakens:**

\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_  
\_\_\_\_\_



**AKTE VAN DEMISSIE BY UITDIENSTREDING INGEVOLGE ARTIKEL 12.7  
EN REGLEMENT 21 MET BEHOUD VAN BEDIENINGSBEVOEGDHEID**

Die Kerkraad van die Nederduitse Gereformeerde gemeente \_\_\_\_\_ het in oorleg met die Ringskommissie van die Ring van \_\_\_\_\_ die vereiste stukke wat betrekking het op die uitdienstreding van broer \_\_\_\_\_ (volle name) as herder en leraar van die gemeente in orde gevind, en demitteer hom hiermee ooreenkomstig die bepalinge van die Kerkorde van die Nederduitse Gereformeerde Kerk Vrystaat op eervolle wyse van sy diens in die gemeente, met behoud van sy bedieningsbevoegdheid as bedienaar van die Woord in die Nederduitse Gereformeerde Kerk.

Die rykste seëninge van die Here word hom van harte toegebied vir die toekoms. Gegee deur die Kerkraad op hierdie \_\_\_\_\_ dag van die maand \_\_\_\_\_ in die jaar \_\_\_\_\_ en geteken deur die lede van die Kerkraad.

**Ouderlinge:**

---

---

---

---

---

---

---

---

---

---

---

---

---

---

---

---

---

---

---

---

---

---

---

---

**Diakens:**

---

---

---

---

---

---

---

---

---

---

---

---

---

---

---

---

---

---

---

---

---

---

---

---

Voorsitter/Konsulent \_\_\_\_\_

Skriba \_\_\_\_\_



**AKTE VAN DEMISSIE (VASTETERMYNPOS)**

Die Kerkraad van die Nederduitse Gereformeerde Gemeente \_\_\_\_\_ het die stukke in verband met die verstryking van die termyn van die broer \_\_\_\_\_ as predikant in 'n vastestermynpos in die gemeente gesien, en getuig hiermee in waarheid dat hy hom gedurende sy verblyf in ons midde onberispelik in leer en wandel op 'n wyse wat 'n bedienaar van die Woord waardig is, gedra het. Die Kerkraad demitteer hom op eervolle wyse van sy band met die Kerkraad en gemeente van \_\_\_\_\_ en oorhandig aan hom hierdie Akte van Demissie wat ook dien as sy attestaat, en wens hom daarby van harte toe dat hy die ryke seën van die Here vir nog lank mag geniet.

Die broer word vergesel deur sy eggenote \_\_\_\_\_ en die volgende belydende lidmate

\_\_\_\_\_ en die volgende dooplidmate: \_\_\_\_\_

Gegee op \_\_\_\_\_ deur die Kerkraad van die Nederduitse Gereformeerde Gemeente \_\_\_\_\_ en hiermee onderteken deur die lede van die Kerkraad.

**Ouderlinge:**

\_\_\_\_\_  
 \_\_\_\_\_  
 \_\_\_\_\_  
 \_\_\_\_\_  
 \_\_\_\_\_  
 \_\_\_\_\_  
 \_\_\_\_\_  
 \_\_\_\_\_  
 \_\_\_\_\_  
 \_\_\_\_\_

**Diakens:**

\_\_\_\_\_  
 \_\_\_\_\_  
 \_\_\_\_\_  
 \_\_\_\_\_  
 \_\_\_\_\_  
 \_\_\_\_\_  
 \_\_\_\_\_  
 \_\_\_\_\_  
 \_\_\_\_\_  
 \_\_\_\_\_



**DIE NEDERDUITSE GEREFORMEERDE KERK VRYSTAAT**  
**GELOOFSBRIEF VIR 'N VERGADERING VAN DIE SINODE**

Die Kerkraad van die Nederduitse Gereformeerde gemeente \_\_\_\_\_  
verklaar hiermee dat hy op sy wettig gekonstitueerde vergadering, gehou op  
\_\_\_\_\_ die volgende persone verkies het as sy afgevaardigdes na die  
vergadering van die Sinode wat in \_\_\_\_\_ (plek)  
op \_\_\_\_\_ (datum) sitting neem.

**DIE LERAAR/S** (name voluit):

1. \_\_\_\_\_
2. \_\_\_\_\_
3. \_\_\_\_\_
4. \_\_\_\_\_

**DIE OUDERLING(E)/DIAKEN(S)** (name voluit en dui amp(te) aan asseblief)

1. \_\_\_\_\_
2. \_\_\_\_\_
3. \_\_\_\_\_
4. \_\_\_\_\_

**SEKUNDI** (name voluit en dui amp(te) aan asseblief)

1. \_\_\_\_\_
2. \_\_\_\_\_
3. \_\_\_\_\_
4. \_\_\_\_\_
5. \_\_\_\_\_
6. \_\_\_\_\_
7. \_\_\_\_\_
8. \_\_\_\_\_

**Geloofsbrief moet op voor en agterkant van een bladsy gedruk word**

**Besluite by Art 33:**

1. *Elke kerkraad binne die sinodale gebied vaardig ten minste een bedienaar van die Woord en een kerkraadslid af na die Sinode. Gemeentes met meer as een pos vir die bedienaar van die Woord kan na goeddunke soveel addisionele bedienaars van die Woord en 'n kerkraadslid vir elke bedienaar van die Woord afvaardig, tot die totaal van die aantal poste vir die bedienaar van die Woord van die gemeente, met dien verstande dat hulle proporsioneel bykomend sal bydra tot die koste van die Sinode. 'n Gelyke aantal sekundi word aangewys wat, indien nodig, in volgorde opgeroep word.*
2. *'n Primarius en sekundus afgevaardigde mag mekaar tydens die sinode vervang, met dien verstande dat die afvaardigende kerkraad self vir die ekstra koste instaan.*

**GETEKEN DEUR:**

1. Die Voorsitter van die Kerkraad: \_\_\_\_\_

2. Lede van die vergadering:

Ouderlinge:

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

Diakens:

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

\_\_\_\_\_

**VOLTOOI ASSEBLIEF:**

**DIE KWORUM VIR HIERDIE VERGADERING VAN DIE KERKRAAD OF SENTRALE KERKRAAD IS:**

.....



**DIE NEDERDUITSE GEREFORMEERDE KERK VRYSTAAT  
GELOOFSBRIEF VIR 'N VERGADERING VAN DIE RING**

Die Kerkraad van die Nederduitse Gereformeerde gemeente \_\_\_\_\_  
verklaar hiermee dat hy op sy wettig gekonstitueerde vergadering gehou op  
\_\_\_\_\_ die volgende persone verkies het as sy afgevaardigdes na die  
vergadering van die Ring van \_\_\_\_\_ wat te  
\_\_\_\_\_ op \_\_\_\_\_ en volgende dae gehou word.

**DIE LERAAR/S** (name voluit):

1. \_\_\_\_\_
2. \_\_\_\_\_
3. \_\_\_\_\_
4. \_\_\_\_\_

**DIE OUDERLING(E)/DIAKEN(S)** (name voluit en dui amp(te) aan asseblief)

1. \_\_\_\_\_
2. \_\_\_\_\_
3. \_\_\_\_\_
4. \_\_\_\_\_

**SEKUNDI** (name voluit en dui amp(te) aan asseblief)

1. \_\_\_\_\_
2. \_\_\_\_\_
3. \_\_\_\_\_
4. \_\_\_\_\_
5. \_\_\_\_\_
6. \_\_\_\_\_
7. \_\_\_\_\_
8. \_\_\_\_\_

**Besluite by Art 30:**

1. *Elke kerkraad binne die ringsgebied vaardig sy bedienaar(s) van die Woord en een ouderling/diaken vir elke pos vir die bedienaar van die Woord af na die ringsvergadering. Waar 'n gemeente nie 'n bedienaar van die Woord het nie of die pos vir die bedienaar van die Woord vakant is, word 2 ouderlinge/diakens afgevaardig. 'n Gelyke aantal sekundi word aangewys wat, indien nodig, in volgorde opgeroep word.*
2. *'n Primarius en sekundus ouderling/diaken mag mekaar tydens die ringsitting vervang, behalwe tydens 'n tugondersoek.*

**GETEKEN DEUR:**

1. Die Voorsitter van die Kerkraad: \_\_\_\_\_

2. Lede van die vergadering:

Ouderlinge:

---

---

---

---

---

---

---

---

---

---

---

---

---

---

---

---

---

---

---

---

---

---

---

---

---

---

Diakens:

---

---

---

---

---

---

---

---

---

---

---

---

---

---

---

---

---

---

---

---

---

---

---

---

---

---

**VOLTOOI ASSEBLIEF:**

**DIE KWORUM VIR HIERDIE VERGADERING VAN DIE KERKRAAD OF SENTRALE KERKRAAD IS:**

.....



**VERKLARING VAN DOOP**  
(indien attestasie al verval het)

Die Kerkraad van die Nederduitse Gereformeerde Gemeente \_\_\_\_\_  
verklaar hiermee dat dit uit die Dooplidmaatregister van die gemeente blyk dat  
\_\_\_\_\_ op \_\_\_\_\_ die  
sakrament van die doop ontvang het.

\_\_\_\_\_  
Voorsitter/Skriba van die kerkraad

Uitgereik te \_\_\_\_\_

Datum \_\_\_\_\_



VERKLARING VAN LIDMAATSKAP

(indien attestasie al verval het)

Die Kerkraad van die Nederduitse Gereformeerde Gemeente \_\_\_\_\_ verklaar hiermee dat die volgende persone tot op \_\_\_\_\_ lidmate van die gemeente was:

BELYDENDE LIDMAAT(E):

Table with 2 columns: Volle name, Geboortedatum. Rows 1-5 with dotted lines for input.

DOOPLIDMAAT(E):

Table with 2 columns: Volle name, Geboortedatum. Rows 1-5 with dotted lines for input.

Die kerkraad van die Nederduitse Gereformeerde Gemeente \_\_\_\_\_ word hiermee versoek om die bogenoemde persone onder sy herderlike sorg en opsig op te neem.

Die adres van bogenoemde(s) in u gemeente: \_\_\_\_\_

Namens die Kerkraad uitgereik op \_\_\_\_\_

\_\_\_\_\_  
Voorsitter/Skriba van die kerkraad

VORM 9



ATTESTAAT

HEIL DIE LESER

Die Kerkraad van die Nederduitse Gereformeerde Gemeente \_\_\_\_\_ getuig hiermee dat die volgende persone belydende lidmate van die bogenoemde kerk is, en sover dit aan die Kerkraad bekend is, suiwer in leer en onberispelik in lewenswandel is:

Table with 2 columns: Volle name, Geboortedatum. Rows 1-5.

Die Kerkraad van die Nederduitse Gereformeerde Gemeente \_\_\_\_\_ word versoek om die genoemde lidmate as sodanig te erken, onder u herderlike sorg en opsig op te neem en tot die gebruik van die sakramente toe te laat.

Genoemde lidmaat(e) word vergesel van die volgende dooplidmate wat ook aan u herderlike opsig toevertrou word:

Table with 3 columns: Volle name, Geboortedatum, Doopdatum. Rows 1-5.

Na die beste van ons wete is die adres van bogenoemde in u gemeente: \_\_\_\_\_

Namens die Kerkraad uitgereik op \_\_\_\_\_

Voorsitter/Skriba van die kerkraad



**BEËINDIGING VAN LIDMAATSKAP**

Die Kerkraad van die Nederduitse Gereformeerde Gemeente \_\_\_\_\_  
verklaar hiermee dat \_\_\_\_\_ tot op  
(datum) \_\_\_\_\_ lidmaat van hierdie gemeente was en dat sy/haar  
band met die Nederduitse Gereformeerde Kerk hiermee verbreek is.

Namens die Kerkraad uitgereik op \_\_\_\_\_

\_\_\_\_\_  
Voorsitter/Skriba van die kerkraad



**VERKLARING VIR ONDERTEKENING DEUR LIDMATE VAN  
ANDER KERKGENOOTSAPPE**

[Voltooi 'n afsonderlike vorm vir elke lidmaat.]  
[Sien VS KO 2026, Regl 14.7.3.2.3]

Ek, die ondergetekende

<b>Volle name:</b>	
<b>Van:</b>	
<b>Nooiensvan:</b>	
<b>Geboortedatum:</b>	

verklaar hiermee dat ek die leer soos in die Ou en Nuwe Testament en in die belydenisskrifte van die Ned Geref Kerk vervat is, onderskryf en verstaan dat ek deur God tot diens in die gemeente en wêreld geroep word. Ek beloof om as lidmaat van die gemeente van Christus deur Sy genade in die belydenis van die leer tot die einde van my lewe te volhard, en alle leringe wat daarvan afwyk, te verwerp. Ek bely dat Jesus Christus my Verlosser is en dat ek Hom liefhet. Ek aanvaar ook dat medegelowiges die verantwoordelikheid het om my te help om op die regte pad te bly.

<b>Leraar:</b> Handtekening	
<b>Leraar:</b> Titel, naam en van	

<b>Gemeente:</b>	
------------------	--

<b>Datum:</b>	
---------------	--

\_\_\_\_\_  
**Lidmaat se handtekening**



**REKTIFIKASIE IN DIE DOOPLIDMAATREGISTER**

**LET WEL:**

- 1. Hierdie aansoek moet in duplikaat by die betrokke kerkraad ingelewer word.
- 2. Dit moet vergesel wees van behoorlike bewysstukke.
- 3. Na goedkeuring en voltooiing deur die kerkraad, word die vorms tesame met die voorgeskrewe bedrag na die Argief gestuur.
- 4. Na goedkeuring deur die Argief, word een vorm na die kerkraad teruggestuur.

**Adres applikant:**

---

---

---

Voorsitter van die Kerkraad NG Gemeente \_\_\_\_\_

Ondergetekende doen hiermee aansoek vir die volgende verandering/laatinskrywing in u dooplidmaatregister:

VOLLE NAAM VAN DOOPLIDMAAT (soos tans in register) \_\_\_\_\_

---

GEBOORTEDATUM: \_\_\_\_\_ DOOPDATUM: \_\_\_\_\_

DATUM OORGEKOM:

---

VADER: \_\_\_\_\_

MOEDER: \_\_\_\_\_

DIE VOLGENDE VERANDERING(E) MOET AANGEBRING WORD  
(volledig en duidelik in hoofletters):

---

---

---

OM DIE VOLGENDE REDES:

---

---

---

\_\_\_\_\_  
Handtekening van applikant

\_\_\_\_\_  
Datum

### GOEDKEURING VAN KERKRAAD

Die Kerkraad het op sy vergadering van \_\_\_\_\_ die aansoek oorweeg en beveel aan dat die Argief die verandering goedkeur.

Die Kerkraad het die volgende bewysstukke voor hom gehad:

---

---

---

\_\_\_\_\_  
Datum

\_\_\_\_\_  
Skriba van Kerkraad

**NB: Bewysstukke moet ook aan die Argief voorsien word.**

### BESLUIT VAN DIE ARGIEF

Die Argief het soos volg besluit:

---

---

---

\_\_\_\_\_  
Datum

\_\_\_\_\_  
Argief of verteenwoordiger



**REKTIFIKASIE IN DIE BELYDENDE LIDMAATREGISTER**

**LET WEL:**

- 1. Hierdie aansoek moet in duplikaat by die betrokke kerkraad ingelewer word.
- 2. Dit moet vergesel wees van behoorlike bewysstukke.
- 3. Na goedkeuring en voltooiing deur die kerkraad, word die vorms tesame met die voorgeskrewe bedrag na die Argief gestuur.
- 4. Na goedkeuring deur die Argief, word een vorm na die kerkraad teruggestuur.

**Adres applikant:**

---



---

Voorsitter van die Kerkraad

NG Gemeente \_\_\_\_\_

Ondergetekende doen hiermee aansoek vir die volgende verandering/laatinskrywing in u lidmaatregister:

VOLLE NAAM VAN LIDMAAT (soos tans in register) \_\_\_\_\_

DATUM BELYDENIS AFGELÊ: \_\_\_\_\_

DATUM OORGEKOM: \_\_\_\_\_

DIE VOLGENDE VERANDERING(E) MOET AANGEBRING WORD:  
(volledig en duidelik in hoofletters):

---



---



---



---



---



---



---

OM DIE VOLGENDE REDES:

---

---

---

---

---

\_\_\_\_\_  
Handtekening van applikant

\_\_\_\_\_  
Datum

### GOEDKEURING VAN KERKRAAD

Die Kerkraad het op sy vergadering van \_\_\_\_\_ die aansoek oorweeg en beveel aan dat die Argief die verandering goedkeur.

Die Kerkraad het die volgende bewysstukke voor hom gehad:

---

---

---

\_\_\_\_\_  
Datum

\_\_\_\_\_  
Skriba van Kerkraad

**NB: Bewysstukke moet ook aan die Argief voorsien word.**

### BESLUIT VAN DIE ARGIEF

Die Argief het soos volg besluit:

---

---

---

---

\_\_\_\_\_  
Datum

\_\_\_\_\_  
Argief of verteenwoordiger

**VORM 14**



**ONOPSPORBARE LIDMAATSKAP**

(indien geen bewyse van doop of belydenis gekry word nie) Reglement 14.7.3.4 KO OVS

Hiermee verklaar ek, \_\_\_\_\_ (volle name en van), gebore op \_\_\_\_\_ dat ek belydenis van geloof afgelê het in 'n NG gemeente.

\_\_\_\_\_  
Handtekening Lidmaat

\_\_\_\_\_  
Datum

\_\_\_\_\_  
Die kerkraad van die Nederduitse Gereformeerde Gemeente \_\_\_\_\_ het op sy vergadering van \_\_\_\_\_ (datum) toestemming verleen die bogenoemde persoon onder sy herderlike sorg en opsig geneem word. Die adres van bogenoemde in die gemeente is:  
\_\_\_\_\_

\_\_\_\_\_  
Voorsitter/Skriba van die Kerkraad



### GEMEENTESERTIFIKAAT

Hiermee word verklaar dat die Nederduitse Gereformeerde Gemeente \_\_\_\_\_  
op \_\_\_\_\_ (datum) tot stand gekom het.

Die gemeente vorm deel van die Vrystaat Sinode, ingevolge Artikel 32 wat lui:

*Die sinode word saamgestel uit afgevaardigdes van gemeentes wat geografies 'n eenheid vorm en maklik vergader. Die groepering kan deur die Algemene Sinode/Algemene Sinodale Moderamen gewysig word op versoek en met goedkeuring van die betrokke sinode(s)/sinodale kommissie(s).*

Verder word verklaar dat al die gemeentes dieselfde grondwet (Kerkorde) gebruik, maar steeds as 'n entiteit op sy eie funksioneer (byvoorbeeld om hul eie besluite rakende hul finansies te neem - kan skenkings kry en gemagtig is om betalings te maak en ander finansiële transaksies te hanteer).

Die gemeente se fisiese adres is: \_\_\_\_\_

Hierdie sertifikaat dien as bewys dat die NG Gemeente \_\_\_\_\_ op datum van skrywe aktief as gemeente van die NG Kerk funksioneer.

\_\_\_\_\_  
DATUM UITGEREIK

\_\_\_\_\_  
PSD: ONDERSTEUNING

*Plak gemeente-logo hier, of sit op amptelike briefhoof*

**KONSTITUSIE VAN DIE NEDERDUITSE GEREFORMEERDE GEMEENTE [VOEG  
GEMEENTENAAM HIER IN]**

**Nota:** Waar in hierdie dokument na die Kerkraad verwys word, is die veronderstelling dat dit 'n wettig verkose kerkraad is.

1. Benewens die normale wette, bepalinge en regulasies van Suid-Afrika, word hierdie gemeente bestuur deur die regulasies, reëls en beginsels vervat in die Kerkorde van die NG Kerk soos goedgekeur die Algemene Sinode in Oktober 2023.
2. Die Nederduitse Gereformeerde Gemeente \_\_\_\_\_ is 'n regs persoon en die Kerkraad, of ander gevolmagtigde(s) wat deur die Kerkraad benoem is, is die agent/orgaan of verteenwoordiger daarvan.
3. Die gemeente het op \_\_\_\_\_ ontstaan nadat die gemeente amptelik van NG Gemeente \_\_\_\_\_ afgestig het.
4. Hierdie gemeente vorm deel van die Vrystaat Sinode van die NG Kerk.
5. Die gemeente is die eienaar van alle roerende en vaste eiendom wat deur die kerkraad beheer en verkry word, en vaste eiendom word in die naam van hierdie gemeente van die NG Kerk geregistreer.
6. Gemeentelike kerklike goedere word geadminestreer ingevolge besluite van die kerkraad in die lig van die Kerkorde van die Nederduitse Gereformeerde Kerk (2023) Reglement 24.
7. Die kerkraad of sy gevolmagtigde is bevoeg om enige regshandeling te verrig en om tussentydse beleggings te maak wat verband hou met die beskikking, verkryging, ontvangs van testamentêre bemakings, vervreemding, beswaring (hetsy deur die aangaan van 'n lening en/of registrasie van 'n verband oor 'n eiendom) of versekering van die betrokke bates, onderhewig daaraan, en:
  - 7.1 dat die inkomste en eiendom van die gemeente, met inbegrip van eiendom of inkomste wat deur enige gevolmagtigde van die Kerkraad bestuur word, nie aan enige persoon of instansie uitgekeer mag word nie, maar uitsluitlik aangewend mag word vir die beoefening van die aktiwiteite van die gemeente; en

- 7.2 dat niks wat hierin bepaal is, die betaling te goeder trou belet van redelike besoldiging (synde vergoeding wat nie oormatig is nie, inaggenome die aanbevole skale van die ATFB) aan enige werknemer of beampte van die gemeente vir dienste wat sodanige persoon werklik aan die gemeente gelewer het nie.
8. Die kerkraad of sy gevolmagtigde is bevoeg om eiendomme en bates, roerend of onroerend te verkoop, uit te ruil, te verhuur, te skenk of op enige ander manier te vervreem, te verpand, te pand, as onderpand te bied, of op enige ander manier daarmee te handel, gedagtig dat:
- 8.1 skenkings mag slegs gemaak word ter bevordering van die doelstellings van die gemeente of aan teologiese studente, predikante, werknemers en amptenare in diens van die kerkraad, asook aan godsdienstige, liefdadigheids- en / of onderwysinstellings wat vrygestel is van belasting volgens die regulasies van die Inkomstebelastingwet;
- 8.2 kollaterale mag slegs aangebied word vir die verpligtinge van die gemeente.
9. Die kerkraad of sy gevolmagtigde is bevoeg om fondse onder hul beheer te belê en om geld te belê, herroep, kanselleer, sedeer, verander of andersins met sodanige beleggings te handel:
- 9.1 by geregistreerde finansiële instellings, soos omskryf in Artikel 1 van die Wet op Finansiële Instellings (Belegging van fondse), 1984 (Wet nr. 39 van 1984);
- 9.2 in aandele genoteer op 'n aandelebeurs soos omskryf in Artikel 1 van die Wet op Beheer van Beurse, 1985 (Wet nr. 1 van 1985);
- 9.3 'n belegging mag hou wat sy as geskenk ontvang het in die vorm waarin dit ontvang is.
10. In alle gedingvoering of geskille rakende eiendomme, bates en fondse tree die Kerkraad, sonder enige verdere spesifieke mandaat, op as eiser en verweerder namens die gemeente.
11. Die gemeente mag 'n besigheid of kommersiële onderneming bedryf met inagneming dat sodanige inkomste onderhewig is aan inkomstebelasting indien die bedrag of persentasie wat die Wet op Inkomstebelasting van tyd tot tyd mag toelaat, oorskry word.
12. In die geval van ontbinding word die oorblywende bates van die gemeente nadat alle verpligtinge nagekom is, toegestaan of oorgedra aan 'n ander gemeente of instelling met soortgelyke doelstellings as dié van die gemeente.
13. Volledige registers sal gehou word van alle vaste bates en eiendomme, skenkings en bemakings sowel as beleggings van die gemeente, en word ook as sodanig in die finansiële state van die gemeente getoon.
14. Hierdie gemeente sal nie deel hê aan, of willens en wetens toelaat dat dit gebruik word as deel van enige transaksie, handeling of skema waarvan die enigste of hoofdoel die vermindering, uitstel of vermyding van aanspreeklikheid vir enige belasting, reg of

heffing wat, behalwe vir sodanige transaksie, handeling of skema, betaalbaar sou wees of sou word deur enige persoon kragtens enige Wet wat deur die kommissaris geadministreer word nie.

15. Geen hulpbronne sal direk of indirek gebruik word om enige politieke party te ondersteun, te bevorder of teë te staan nie.

Geteken namens die Kerkraad te \_\_\_\_\_ op \_\_\_\_ / \_\_\_\_ / \_\_\_\_

\_\_\_\_\_  
*Handtekening*

\_\_\_\_\_  
*Handtekening*

\_\_\_\_\_  
*Volle name*

\_\_\_\_\_  
*Volle name*

\_\_\_\_\_  
*Hoedanigheid*

\_\_\_\_\_  
*Hoedanigheid*

Hierdie dokument is laas aangepas op 14 Mei 2025 en daarna goedgekeur deur die Kerkraad op \_\_\_\_ / \_\_\_\_ / \_\_\_\_.

<b>Titel</b>	Samevatting van die Konstitusie van die NG Kerk
<b>Outeurs</b>	Taakspan Regte van die Algemene Sinode
<b>Datum</b>	28 November 2023
<b>Laaste wysigings</b>	14 Mei 2025
<b>Ondersteunende dokument</b>	Kerkorde van die Nederduitse Gereformeerde Kerk (2023)

*Paste the congregation's logo here, or put on official letterhead*

## **CONSTITUTION OF THE DUTCH REFORMED CONGREGATION [INSERT CONGREGATION NAME HERE]**

**Note:** Where this document refers to the Church Council, it is assumed that it is a legally elected Church Council.

1. In addition to the normal laws, provisions and regulations of South Africa, this congregation is governed by the regulations, rules and principles contained in the Church Order of the Dutch Reformed Church as approved by the General Synod in October 2023.
2. The Dutch Reformed Congregation \_\_\_\_\_ is a legal entity and the Church Council, or other authorized person(s) appointed by the Church Council, is the agent/organ or representative thereof.
3. The congregation was founded on \_\_\_\_\_ after the congregation officially separated from the Dutch Reformed Church of \_\_\_\_\_.
4. This congregation forms part of the Free State Synod of the Dutch Reformed Church.
5. The congregation is the owner of all movable and immovable property controlled and acquired by the Church Council, and immovable property is registered in the name of this congregation of the Dutch Reformed Church.
6. Congregational church property is administered in terms of decisions of the Church Council considering the Church Order of the Dutch Reformed Church (2023) Rule 24.
7. The Church Council or its authorized representative is authorized to perform any legal act and to make interim investments related to the disposal, acquisition, receipt of testamentary bequests, alienation, encumbrance (whether by taking out a loan and/or registering a mortgage over a property) or insurance of the relevant assets, subject thereto, and:
  - 7.1 that the income and property of the congregation, including property or income managed by any proxy of the Church Council, may not be distributed to any person or institution, but may be used exclusively for the pursuit of the activities of the congregation; and
  - 7.2 that nothing herein provided shall prevent the payment in good faith of reasonable remuneration (being remuneration which is not excessive, considering the recommended scales of the General Synod's Task team for Funds and Assets – *ATFB* )

to any employee or official of the congregation for services which such person has actually rendered to the congregation.

8. The Church Council or its authorized representative is authorized to sell, exchange, lease, donate or otherwise dispose of, pledge, offer as collateral, or deal with properties and assets, movable or immovable, provided that:
  - 8.1 donations may only be made to further the objectives of the congregation or to theology students, ministers, employees and officials in the service of the Church Council, as well as to religious, charitable and/or educational institutions that are exempt from tax according to the regulations of the Income Tax Act;
  - 8.2 Collateral may only be offered for the obligations of the congregation.
9. The Church Council or its delegate is authorized to invest funds under their control and to invest, revoke, cancel, cede, alter or otherwise deal with such investments:
  - 9.1 at registered financial institutions, as defined in Section 1 of the Financial Institutions (Investment of Funds) Act, 1984 (Act No. 39 of 1984);
  - 9.2 in shares listed on a stock exchange as defined in Section 1 of the Stock Exchange Control Act, 1985 (Act No. 1 of 1985);
  - 9.3 may keep an investment that she received as a gift in the form in which it was received.
10. In all litigation or disputes regarding properties, assets and funds, the Church Council, without any further specific mandate, acts as plaintiff and defendant on behalf of the congregation.
11. The congregation may operate a business or commercial enterprise, considering that such income is subject to income tax if the amount or percentage that the Income Tax Act may allow from time to time is exceeded.
12. In the event of dissolution, the remaining assets of the congregation, after all obligations have been met, are granted or transferred to another congregation or institution with similar objectives to those of the congregation.
13. Complete registers will be kept of all fixed assets and properties, donations and bequests as well as investments of the congregation, and will also be shown as such in the financial statements of the congregation.
14. This congregation shall not participate in, or knowingly permit to be used as part of, any transaction, act or scheme the sole or principal purpose of which is the reduction, postponement or avoidance of liability for any tax, duty or levy which, but for such transaction, act or scheme, would be or would become payable by any person under any Act administered by the commissioner.

15. No resources will be used directly or indirectly to support, promote or oppose any political party.

Signed on behalf of the Church Council at \_\_\_\_\_ on \_\_\_\_ / \_\_\_\_ / \_\_\_\_

\_\_\_\_\_  
*Signature*

\_\_\_\_\_  
*Signature*

\_\_\_\_\_  
*Full names*

\_\_\_\_\_  
*Full names*

\_\_\_\_\_  
*Capacity*

\_\_\_\_\_  
*Capacity*

This document was last modified on May 14, 2025, and subsequently approved by the Church Council on \_\_\_\_ / \_\_\_\_ / \_\_\_\_.

<b>Title</b>	Summary of the Constitution of the Dutch Reformed Church
<b>Authors</b>	Task Team: Church Order of the General Synod
<b>Date</b>	November 28, 2023
<b>Last changes</b>	May 14, 2025
<b>Supporting document</b>	Church Order of the Dutch Reformed Church (2023)

## **AFDELING D: SINODALE REËLINGS VAN DIE VRYSTAAT SINODE**

Die Sinode van die NG Kerk Vrystaat het die volgende reëlings getref ter wille van 'n eenvormige en ordelike afhandeling van sake binne die sinodale gebied van die Vrystaat:

### **D1 PLIGTE VAN 'N KERKRAAD**

Die pligte van 'n kerkraad behels die volgende:

1. Die opsig oor die bediening van die Woord en die sakramente, die beslissing oor wie tot die kansel en die gebruik van die sakramente toegelaat word ingevolge die kerkorde, die handhawing van die liturgiese orde, die kategese, openbare aflê van belydenis van geloof, die huisbesoek, die uitoefening van tug en die behandeling van ingekome stukke. Die kerkraad doen hierdie take namens die gemeente wat hulle verteenwoordig.
2. Die toesig oor die gereelde en tydige indiening en uitreiking van attestate en bewyse van lidmaatskap.
3. Die reëling van die kerklike bevestiging van die huwelik as instelling van goddelike oorsprong en die handhawing van die besluit van die Algemene Sinode met betrekking tot die hertrou van geskeides.
4. Die reëling van dank- en biddae ingevolge die kerklike jaar en soos wat die behoefte mag ontstaan vir spesifieke en die herdenking van die kerkhervorming.
5. Die behartiging van die kategese, asook die bevordering van die werksaamhede van die Kerk.
6. Die behartiging van alimentasie.
7. Voorsiening vir die lewensonderhoud van die bedienaar van die Woord na onderhandeling volgens sinodale skaal, soos aanbeveel deur die Vrystaat sinode asook die voorsiening van 'n doelmatige woning en 'n geskikte vervoermiddel of 'n vervoertoelaag. Die sinode se aanbeveling(s) dien as riglyn, maar die totale vergoedingspakket word onderhandel volgens waartoe die gemeente finansiëel in staat is.

Elke gemeente moet 'n kommissie vir diensverhoudinge hê. Hierdie kommissie stel 'n diensooreenkoms op vir die leraar in terme van die riglyne van die Vrystaat sinode. Die diensooreenkoms moet bepalinge bevat vir salarisskaal waarop die leraar begin met bepalinge ingesluit rakende 'n 13<sup>de</sup> betaling (bonus) en jaarlikse verhoging; werkure verlang, verlofreëlings; behuising- en reisvoordele en ampspligte wat verwag word.

8. Die behartiging van die stoflike aangeleenthede van die gemeente onder die volgende bepalinge:

8.1 Alle fondse, eiendomme en kerkgoedere behoort aan die gemeente (wat 'n regspersoon is) en die kerkraad tree slegs op as bestuursorgaan van die gemeente (*vgl Regl 24, pt 4.1*). Gemelde goedere moet geregistreer wees op naam van “Die Nederduitse Gereformeerde gemeente .....

8.2 Stukke wat op die geldelike administrasie betrekking het, word geteken deur die voorsitter van die kerkraad, nadat hy deur die kerkraad daartoe gemagtig is of deur 'n ander persoon of persone wat deur die kerkraad daartoe volmag verkry het.

- 8.3 Die Kerkraad stel 'n kassier aan wat verkieslik 'n lidmaat van die Nederduitse Gereformeerde Kerk moet wees en wat hom/haar aan die voorskrifte van die pligte van die kassier en besluite van die kerkraad en Sinode moet hou.
- 8.4 Die gemeente se ouditeur mag nie op die kerkraad se Finansiële Kommissie dien nie.
9. Die waarneming van kollektes en insamelings wat deur die Vrystaat Sinode bepaal word.
10. Die hou van dooplidmaat- en lidmaatregisters.
11. Die opstel van huishoudelike reglemente, indien nodig, wat nie in stryd met die bestaande Kerkorde is nie.
12. Die hou van die volgende vergaderings:
- 12.1. Die hou van minstens vier gewone vergaderings elke jaar. In buitengewone omstandighede en met die goedkeuring van die ring kan die kerkraad minder vergader. Hierdie vergaderings moet tydens die ere diens op die Sondag voor die vergadering, aan die gemeente bekend gemaak word
- 12.2. Die hou van buitengewone vergaderings wat deur die voorsitter self, of op die skriftelike versoek van minstens twee lede met opgaaf van redes bepaal moet word. Die agenda van 'n buitengewone vergadering mag slegs die saak waarvoor hy byeengeroep is, bevat. 'n Buitengewone vergadering moet afgekondig word die Sondag voordat dit gehou word. Indien dit nie moontlik is nie, moet elke lid betyds skriftelik of mondelings daarvan verwittig word.
13. Die erkenning op sy vergaderings van die voorsitterskap van die verkose voorsitter volgens die besluit van die Sinode: Elke kerkraad kies jaarliks 'n voorsitter uit die leraar(s) of ouderlinge. *(In gemeentes met meer as een voltydse leraar mag die kerkraad besluit dat die leraars om die beurt optree as voorsitter van die kerkraad by vergaderings.)*
14. Die indeling van die gemeente in wyke/groepe met die oog op die uitvoering van die ampspligte van ouderlinge en diakens.
15. Die aanstelling van 'n skriba wat die notule hou, alle registers, kerkboeke en dokumente sorgvuldig in die argief van die gemeente in 'n brandvrye kluis bewaar, en bewyse van doop- en lidmaatskapsertifikate, namens die kerkraad uitreik. Indien die skriba nie 'n lid van die kerkraad is nie, maak sy/haar teenwoordigheid dit nie tot 'n oop vergadering nie.
16. Die verskaffing van alle gevraagde inligting aan die ring, die Sinode of hul kommissies/bedieninge.
17. Die kerkraad moet op 'n wettig gekonstitueerde vergadering vir elke vergadering van die ring en van die sinode die volgende opdragte nakom:
- 17.1. Die afvaardiging van die bedienaar(s) van die Woord en ('n) primarius ouderling(e)/diaken(s). Vir elke primarius word 'n sekundus aangewys. Die geloofsbrief van die afvaardiging moet deur al die lede van die vergadering onderteken word.
- 17.2. Die indiening by die ring van die vorms wat deur al die lede van die vergadering of deur 'n gevolmagtigde kommissie van die kerkraad onderteken word.
- 17.3. Die indiening van beskrywingspunte, gravamina asook versoekskrifte, indien enige.

## **D2 PLIGTE VAN DIE KASSIER**

Die Kassier voer opdragte van die kerkraad uit met betrekking tot die invordering van gelde en inkomste van die kerk en die betaling van die skulde van die kerkraad en gee by elke kerkraadsvergadering verslag van die stand van die kerklike fondse. Een keer per jaar, voor die einde van Februarie, moet 'n volledige finansiële staat van alle fondse asook 'n nasienersverslag deur 'n onafhanklike nasiener oor die voorafgaande boekjaar (Maart tot Februarie), aan die kerkraad voorgelê word (sien nota 1).

Die kassier moet vir elke gemagtigde uitbetaling 'n behoorlike bewysstuk of 'n kwitansie kry en vir alle gelde wat ontvang word, kwitansies in duplikaat uitreik. Alle dokumente moet deurlopend voorgelê word aan 'n onafhanklike komitee/persoon van die gemeente, vir nasiening (sien nota 2).

### **NOTA 1**

#### **A) Definisie van 'n onafhanklike nasiener**

'n Onafhanklike nasiener is 'n finansiële of rekeningkundige deskundige wat in terme van die Maatskappywet, die nasienfunksie van 'n privaat maatskappy mag doen. So 'n onafhanklike nasiener moet lid wees van 'n professionele instituut of instansie.

#### **B) Verantwoordelikhede van 'n onafhanklike nasiener**

i) Om jaarliks, waar die kerk nie self finansiële state opstel nie, finansiële state op te stel vanaf inligting verskaf deur die Kerkraad, in ooreenstemming met Sinodale voorskrifte vir finansiële state van gemeentes.

ii) Om 'n getekende verslag te verkry vanaf die onafhanklike komitee/persoon van die kerkraad wat bevestig dat al die pligte van so komitee/persoon nagekom is soos vereis deur die Sinodale kerkkantoor (sien nota 2)

iii) Die bates en die laste soos op die finansiële state te bevestig op jaareinde.

iv) 'n Oorsigverslag uit te reik aan die Kerkraad wat bogenoemde bevestig.

### **NOTA 2**

#### **PLIGTE EN VERANTWOORDELIKHEDE VAN ONAFHANKLIKE KOMITEE/PERSOON VAN 'N GEMEENTE**

1. So 'n komitee/persoon moet onafhanklik wees van die Kerkraad, asook van die finansiële komitee en die kassiere (soortgelyk aan ouditkomitee). Waar 'n gemeente nie oor sodanige kundige persoon beskik nie, kan die funksie uitgekonnekteer word, selfs ook aan die onafhanklike Nasiener. Die kerkraad kan egter self besluit of hulle eerder 'n oudit wil doen of nie.

2. Hierdie onafhanklike komitee/persoon moet deurlopend die volgende take uitvoer:

i) Bevestig dat alle uitgawes en betalings gestaaf word deur 'n geldige dokument.

ii) Bevestig dat 'n begroting vir die finansiële jaar gedoen word.

iii) Bevestig dat alle uitgawes en betalings binne die begroting is. Waar betalings en uitgawes meer as die begroting is, moet spesifieke goedkeuring by die Kerkraad verkry word.

- iv) Bevestig dat alle inkomstes en gelde ontvang deur 'n kwitansie of stawende bewys ondersteun word.
- v) Bevestig dat alle gelde wat ontvang is op 'n gereelde basis gebank word.
- vi) Bevestig dat alle sinodale kollektes oorbetaal word en 'n sertifikaat van die Kerkkantoor verkry word.
- vii) Bevestig dat proratas maandeliks aan die Vrystaat sinode oorbetaal word.
- viii) Bevestig dat finansiële rekords gehou word en boeke op 'n maandelikse basis opgeskryf en gebalanseer word tot en met proefbalans.
- ix) Bevestig dat alle inskrywings in die grootboek korrek geallokeer is.
- x) Bevestig dat bankrekonsiliasies maandeliks gedoen word.
- xi) Bevestig dat kleinkas op 'n maandelikse basis gebalanseer word.
- xii) Bevestig dat belasting en ander statutêre heffings maandeliks oorbetaal word.
- xiii) Bevestig dat alle finansiële besluite van kerkraadsvergaderings geïmplementeer is en korrek weergegee word in die finansiële rekords.
- xiv) Bevestig dat die toedeling van fondse en uitgawes by trustfondse korrek gehanteer word en in ooreenstemming is met die voorskrifte van die trust of trustfonds.
- xv) Bevestig dat 'n salarisregister gehou word en dat salarisse is soos goedgekeur deur die Kerkraad.
- xvi) Bevestig dat 'n verlofregister gehou word en dat dit in terme is met goedkeurings van die Kerkraad.
- xvii) Bevestig dat 'n bateregister gehou word en voldoende versekering bestaan.
- xviii) Bevestig dat 'n beleggingsregister gehou word en dat beleggings in ooreenstemming is met die finansiële rekords, kerkraadsbesluite en voorskrifte van trust en trustfondse.
- xix) Bevestig dat 'n volledige lêer wat al bogenoemde bevestig, tesame met 'n proefbalans en stawende dokumente en opsommings, na jaareinde aan die onafhanklike Nasiener voorgelê word.

### **D3 ADVIES OOR REIS- EN TREKONKOSTE**

Die Vrystaat Sinode het die volgende besluite geneem insake reis- en trekonkoste:

#### **Besluite by artikel 8**

*8.7 Die beroepende kerkraad dra die vervoerkoste van die beroepene en sy gesin, asook die verpakking en vervoer van sy meublement en boekery.*

Die Algemene Sinode adviseer dat kerkvergaderings eenmalig, soos by diensaanvaarding, die reis- en trekonkoste van leraars en kerkamptenare by uitdienstreding weens die bereiking van die ouderdomsgrens, of as gevolg van siekte - of van sy naasbestaandes in geval van sy afsterwe in sy diens tyd - vanaf sy standplaas of plek van dienslewering na sy plek van aftrede, waar hy of sy naasbestaandes hulle gaan vestig, sal dra (Notule Sinode, 1995 p 243, pt 2.9)

*Nota: Let daarop dat hierdie bepaling slegs advies is van die Algemene Sinode en daarom kan 'n kerkraad besluit of hulle dit gaan uitvoer al dan nie.*

# AFDELING E: REGLEMENTE AS 2023

## REGLEMENT 1

### REGLEMENT VIR DIE FUNKSIONERING VAN DIE ALGEMENE SINODE

Hierdie reglement moet in samehang met Artikel 43 van die *Kerkorde*, asook Reglement 2 vir die Algemene Sinodale Moderamen (ASM) gelees word.

#### 1. NAAM

Die Algemene Sinode van die Nederduitse Gereformeerde Kerk.

#### 2. AARD EN FUNKSIE VAN DIE VERGADERING VAN DIE ALGEMENE SINODE

- 2.1 Die vergadering van die Algemene Sinode is 'n viering van die eenheid en identiteit van die NG Kerk.
- 2.2 Die vergadering van die Algemene Sinode gaan geloofsonderskeidend om met die sake op die agenda.
- 2.3 Die Algemene Sinode is 'n sinode van sinodes en is nie 'n voorskriftelike sinode nie.
- 2.4 Die Algemene Sinode motiveer en ondersteun die sinodes in die uitvoering van hulle roeping.
- 2.5 Die Algemene Sinode hanteer alleenlik sake wat volgens Artikel 43 op die terrein van die Algemene Sinode val. Besluite wat in hierdie verband geneem word is bindend (Artikel 23.1).
- 2.6 In die termyn tussen gewone vergaderings van die Algemene Sinode funksioneer die Algemene Sinodale Moderamen (ASM) as 'n gevolmagtigde werksvergadering waar die operasionele- en bedryfsake van die Algemene Sinode volgens omskrewe mandate (sien Reglement vir die ASM) behartig word.
- 2.7 Die Algemene Sinode en sy taakspanne doen navorsing en beoefen inklusiewe konsulerende gesprek en gemeenskaplike denke wat sinodes en gemeentes help om eie beleid te vorm.
- 2.8 Die Algemene Sinode en sy taakspanne dien adviserend vir die samestellende sinodes ten opsigte van bepaalde beleidsake soos kerkordelike sake, predikantesake en arbeidsregtelike sake.

#### 3. SAMESTELLING EN FREKWENSIE VAN VERGADERINGS

- 3.1 Die Algemene Sinode vergader elke vier jaar.
- 3.2 Die vergadering van die Algemene Sinode bestaan uit 'n maksimum van 370 afgevaardigdes wat sover moontlik saamgestel word uit 'n gelyke aantal predikante en kerkraadslede.

- 3.2.1 Twee honderd afgevaardigdes wat uit twintig persone per samestellende sinode saamgestel word, waarvan die helfte verkieslik jonger as 40 jaar moet wees.
- 3.2.2 Honderd en sestig afgevaardigdes word proporsioneel volgens die aantal lidmate van elke samestellende sinode/kerk aangewys.
- 3.2.3 Die Algemene Kuratorium wys tien afgevaardigdes uit die vyf opleidingsentra aan naamlik die drie teologiese fakulteite by Stellenbosch, Bloemfontein en Pretoria; Hugenote Kollege, asook die Namibiese Evangeliese Teologiese Seminarium. Hierdie persone het volle sittingsreg. Hierdie persone word addisioneel bygevoeg by die getal afgevaardigdes by die betrokke samestellende sinodes/kerke.
- 3.2.4 Sinodes word aangemoedig om diversiteit ten opsigte van geslag en ouderdom in ag te neem met die saamstelling van hulle afvaardigings.

#### **4. AGENDAVORMING**

- 4.1 Die vorming van die agenda geskied vanuit die samestellende sinodes, die ASM en die permanente taakspanne van die Algemene Sinode.
- 4.2 Elke vergadering van die Algemene Sinode word voorafgegaan deur 'n konsultasieproses met die samestellende sinodes en taakspanne van die Algemene Sinode om voorstelle en insette vir die agenda te verkry.
- 4.3 Die ASM stel die agenda in 'n geloofsonderskeidende proses vas na aanleiding van die insette van die samestellende sinodes en taakspanne van die Algemene Sinode.
- 4.4 Die agenda handel slegs oor sake binne die raamwerk van Artikel 43 van die Kerkorde.

#### **5. FUNKSIONERING**

##### 5.1 Wyse van vergadering

- 5.1.1 Vergaderings word ingerig om maksimale deelname en interaksie van afgevaardigdes te verseker.
- 5.1.2 Vergaderings geskied in 'n geloofsonderskeidende modus op soek na konsensus. Hierdie proses kan soos volg verloop:
  - 5.1.2.1 Geloofsonderskeidende prosesse tydens die vergadering waarin die vergadering onder leiding van die Gees luister na die Woord, na mekaar en na ander stemme.
  - 5.1.2.2 Doelgerigte prosesse waar die insette óf formeel gelewer word, óf uit die vergadering gevra word.
  - 5.1.2.3 Besinning oor werksaamhede van taakspanne van die ASM.
- 5.1.3 Stemming vind slegs plaas as dit absoluut noodsaaklik is en die vergadering self daarvoor besluit het.

##### 5.2 Bepaling van fokusareas

- 5.2.1 Die vergadering onderskei roepingsprioriteite van die kerk wat in die reses deur die ASM en taakspanne tot uitvoering gebring moet word.
- 5.2.2 Die ASM gaan geloofsonderskeidend met die roepingsprioriteite om en bepaal die fokusareas vir die volgende termyn.
- 5.2.3 Die Algemene Sinode verwys slegs sake na die ASM wat binne die raamwerk van Artikel 43 van die Kerkorde val.
- 5.3 Besluitneming
- 5.3.1 Besluitneming geskied aan die hand van geloofsonderskeidende, inklusiewe en konsulerende prosesse met die oog op konsensus (vergelyk Reglement van Orde, Reglement 3, punt 5).
- 5.3.2 Die Algemene Sinode in sitting se besluitnemingsmandaat strek tot:
  - 5.3.2.1 sake van gemeenskaplike belang ten opsigte van roeping, belydenis, publieke getuienis, teologiese opleiding, ekumene, kerkorde. (vergelyk Artikel 43 van die Kerkorde); en
  - 5.3.2.2 eie bedryfsake wat nie na die ASM gedelegeer is nie.
- 5.3.3 Indien die Algemene Sinode goeie rede het om te vermoed dat 'n besluit of standpunt moontlik tot groot verdeeldheid kan lei, moet die sinode voor die finale besluitneming die advies van die mindere kerkvergaderings inwin ten einde konsensus oor die betrokke sake in die NG Kerkverband in geheel te probeer kry.
  - 5.3.3.1 Die saak word tydens die vergadering verwys na die tien samestellende sinodes se onderskeie afvaardigings vir besinning en konsultasie met terugvoer aan die vergadering.
  - 5.3.3.2 Die saak word verwys na die tien samestellende sinodes om in die termyn tussen sinodesittings daarmee te gaan werk in die gemeentes en sinodale strukture met verslag aan die toepaslike taakspan van die Algemene Sinode.
  - 5.3.3.3 Opsies 5.3.3.2 kan slegs uitgeoefen word indien opsie 5.3.3.1 nie tot konsensus gelei het nie.

## REGLEMENT 2

### REGLEMENT VIR DIE ALGEMENE SINODALE MODERAMEN (ASM)

#### 1. NAAM: ALGEMENE SINODALE MODERAMEN (ASM)

#### 2. SAMESTELLING

Die ASM word soos volg saamgestel:

##### 2.1 Stemgeregtigde lede:

Vyf verteenwoordigers van elke samestellende sinode wat die verkose moderatuur/dagbestuur insluit.

2.1.1 Sinodes besluit self oor die wyse waarop hulle afvaardiging saamgestel word.

2.1.2 Sinodes hoef nie hulle afvaardiging saam te stel slegs uit persone wat na die vergadering van die Algemene Sinode afgevaardig is/was nie.

2.1.3 Sinodes word sterk aangemoedig om diversiteit in ag te neem met die samestelling van die ASM. Dit sluit onder andere in dat nie-gelegitimeerde kerkraadslede, vroue en jong leiers oorweeg word.

##### 2.2 Adviserende lede

2.2.1 Voorsitters van die volgende taakspanne van die Algemene Sinode:

Algemene Taakspan Fondse en Bates, Algemene Taakspan Regte (ATR), Algemene Taakspan Leer en Aktuele Sake (ATLAS), Algemene Kuratorium, Missionale Roeping, Navorsing.

2.2.2 Funkisionarisse

Die Algemene Sekretaris en die Aktuaris van die Algemene Sinode.

2.2.3 Voorsitters van ander taakspanne van die Algemene Sinode wanneer die taakspanne se saak dien:

Algemene Taakspan Predikantesake (ATP), Argief, Ekumene, Publieke Getuienis, Bybelvertaling en andere...

2.2.4 Voorsitters of verteenwoordiger van direksies wanneer die kerklike maatskappy se saak dien.

2.2.5 Voorsitters van ad hoc-taakspanne wat die fokusse van die ASM dien.

#### 3. KONSTITUERING

3.1 Die nuut verkose voorsitter en ondervoorsitter vorm saam met die algemene sekretaris en die aktuaris die moderatuur en behartig sake van die ASM tot en met die eerste vergadering van die ASM na die Algemene Sinode.

3.2 Die ASM konstitueer binne een maand na die gewone vergadering van die Algemene Sinode en wys die dagbestuur en taakspanne van die ASM aan.

- 3.3 Die ASM konstitueer telkens met die lede wat deur sinodes aangewys is. Hierdie ledelys moet veertien dae voor die vergadering aan die algemene sekretaris besorg word.

#### **4. DAGBESTUUR**

- 4.1 Die dagbestuur van die ASM bestaan uit 'n maksimum van dertien lede, bestaande uit:
- 4.1.1 die voorsitter en ondervoorsitter (wat deur die Algemene Sinode verkies is).
  - 4.1.2 die algemene sekretaris en die aktuaris (*ex-officio* adviserende lede)
  - 4.1.3 een lid uit elk van die onderskeie samestellende sinodes se verteenwoordigers – uit eie geleedere aangewys – met inagneming van die voorsitter en ondervoorsitter wat reeds sinodes verteenwoordig.
- 4.2 Die dagbestuur wys uit eie geleedere 'n skriba vir die ASM aan.
- 4.3 Die notule van die ASM word deur die dagbestuur goedgekeur.

#### **5. DIE AARD EN FUNKSIE VAN DIE ASM**

- 5.1 Die ASM funksioneer in die termyn tussen gewone vergaderings van die Algemene Sinode as 'n gevolmagtigde werksvergadering waar die operasionele sake en bedryf sake van die Algemene Sinode behartig word.
- 5.2 Die ASM is 'n vergadering wat geloofsonderskeidend omgaan met die sake op die agenda.
- 5.3 Die ASM funksioneer as 'n luistervergadering waar geluister word na die stories van die deelnemende sinodes onderweg na hulle roepingsvervulling.
- 5.4 Die ASM funksioneer as 'n werksvergadering waar die leierskap van sinodes en voorsitters van taakspanne vergader om die werk wat op die terrein van die Algemene Sinode val, voort te sit.
- 5.5 Die ASM motiveer en ondersteun die sinodes en hulle leierskap om te volhard met hulle roeping soos wat elkeen dit onderskei het.
- 5.6 Die ASM bepaal strategiese fokusareas om die roepingsprioriteite van die Algemene Sinode te dien.
- 5.7 Taakspanne word deur die ASM aangewys om die hierdie fokusse te dien.
- 5.8 Die ASM kan nuwe fokusareas identifiseer na konsultasie met die leierskap (moderature/diensrade) van samestellende sinodes.
- 5.9 Die ASM dien as punt van koördinerings, sinkronisasie en verslagdoening ten opsigte van die voortgaande werk van die taakspanne.
- 5.10 Die ASM is verantwoordelik om die bedryfsake (personeel, fondse en bates, beleggings, infrastruktuur, kommunikasie) van die Algemene Sinode te behartig. Die ASM het bevoegdheid oor beleid ten opsigte van die bedryfsake van die Algemene Sinode.
- 5.11 Indien die ASM goeie rede het om te vermoed dat 'n besluit of standpunt moontlik tot groot verdeeldheid kan lei, moet die ASM voor die finale

besluitneming die advies van die mindere kerkvergaderings inwin ten einde konsensus oor die betrokke sake in die NG Kerkverband in geheel te probeer kry.

- 5.11.1 Die saak word tydens die vergadering verwys na die tien samestellende sinodes se onderskeie afvaardigings vir besinning en konsultasie met terugvoer aan die vergadering.
- 5.11.2 Die saak word verwys na die tien samestellende sinodes om in die termyn tussen ASM vergadering daarmee te gaan werk in die gemeentes en sinodale strukture met verslag aan die toepaslike taakspan van die ASM.
- 5.11.3 Opsies 5.11.2 kan slegs uitgeoefen word indien opsie 5.11.1 nie tot konsensus gelei het nie.
- 5.12 Die aangewese skriba behartig die skribaats van die ASM.
- 5.13 Die ASM besluit self oor die frekwensie van vergaderings maar vergader ten minste een maal per jaar.
- 5.14 Die ASM mag reglemente van taakspanne wysig indien dit noodsaaklik raak om die werksaamhede van die Algemene Sinode te optimaliseer. Hierdie wysigings is van krag nadat die ASM dit goedgekeur het.
- 5.15 Die ASM doen verslag aan die Algemene Sinode.

## **6. TAAKSPANNE VAN DIE ASM**

- 6.1 Taakspanne
  - 6.1.1 funksioneer aan die hand van hulle omskrewe mandate in hulle onderskeie reglemente en opdragte van die ASM;
  - 6.1.2 dien as ruimtes waar geloofsonderskeidend saam gedink word;
  - 6.1.3 ontwikkel kundigheid wat die kerk ten goede kan strek; en
  - 6.1.4 is nie voorskriftelik nie, maar adviserend en ondersteunend ten opsigte van samestellende sinodes en ander kerkvergaderings.
- 6.2 Die ASM prioritiseer en wys taakspanne aan om die opdrag van die Algemene Sinode soos vervat in Artikel 43 van die Kerkorde tot uitvoering te bring.
- 6.3 Die ASM wys ad-hoc taakspanne aan om die fokusareas soos bepaal deur die ASM en spesifieke opdragte van die Algemene Sinode te dien.
- 6.4 Die ASM beskryf die opdrag, lewensduur en wyse van verslaggewing van die taakspanne.
- 6.5 Taakspanne moet jaarliks 'n begroting in oorleg met die Algemene Taakspan Fondse en Bates opstel.
- 6.6 Taakspanne doen verslag aan die ASM.

## **7. SAMESTELLING VAN TAAKSPANNE**

- 7.1 Met die konstituering van die ASM word 'n tydelike taakspan vir taakspanne aangewys om die eerste vergadering van die ASM te dien met 'n verslag.

- 7.2. Taakspanne word deur die ASM saamgestel uit kundige persone wat in oorleg met die samestellende sinodes aangewys word.
- 7.3 Die ASM besluit of 'n taakspan sinodaal saamgestel moet word.
- 7.4 Taakspanne kan verdere kundiges koöpteer in oorleg met die ASM.
- 7.5 Die Algemene Sekretaris koördineer die werk van taakspanne met die oog op integrasie en strategiese belyning met die bedieningsprioriteite van die Algemene Sinode en fokusse van die ASM.
- 7.6 Vakatures in die taakspan word deur die ASM op aanbeveling van die taakspan aangevul.
- 7.7 Vanweë die moontlikheid van botsing van belange kan 'n PSD/sinodale amptenaar nie voorsitter wees van enige taakspan aan wie hy/sy verslag moet lewer nie.

## REGLEMENT 3

### REGLEMENT VAN ORDE

#### INLEIDING

Kerklike vergaderinge behandel sake vanuit kerklike perspektief, in die lig van die Woord van God en op kerklike wyse (artikel 22.1). Die Algemene Sinode (asook alle ander vergaderinge van die kerk) is vergaderings waar Christus die kerk deur die Woord en die Gees lei.

#### 1. OPENING EN KONSTITUERING

- 1.1 Die afgevaardigdes kom byeen op die plek en tyd soos vooraf deur die Algemene Sinodale Moderamen (ASM) bepaal. Die afgevaardigde predikant met die langste diens, wat die oudste in jare is open die vergadering en gaan voort totdat die moderator gekies is. Die algemene sekretaris help met die konstituering van die vergadering en die verkiesing van die moderator.
- 1.2 Die berekening van elke samestellende sinode se afvaardiging geskied deur die ASM aan die hand van Artikel 38 van die *Kerkorde*. Geloofsbriewe van afgevaardigdes moet die Algemene Sekretaris minstens drie maande voor die aanvang van die vergadering bereik. Gewysigde geloofsbriewe kan tot die aanvang van die vergadering ingedien word. Konstituering geskied aan die hand van die geloofsbriewe. By 'n buitengewone Algemene Sinode word geloofsbriewe en verslae ingedien soos deur die ASM bepaal.
- 1.3 Die vergadering, soos saamgestel deur die afgevaardigdes wie se geloofsbriewe ingedien is, word deur die waarnemende voorsitter (*vgl. punt 1.1 van hierdie reglement*) as wettig gekonstitueer verklaar. Die meerderheid van die afgevaardigdes na die vergadering ingevolge Artikel 38 van die *Kerkorde* vorm die kworum.
- 1.4 Die Moderatuur van die Algemene Sinode, bestaande uit 'n moderator, 'n assessor en die aktuaris, lei die sinode (vergelyk Artikel 25 van die *Kerkorde*). Die algemene sekretaris tree op as skriba van die vergadering, met adviserende stem. Die Moderatuur word tydens die sinodesitting deur die moderators/voorsitters van die onderskeie sinodes bygestaan. Die moderatuur en die voorsitters van die onderskeie sinodes vorm die tydelike taakspan algemene sake tydens die sinodesitting.
- 1.5 Die algemene sekretaris en die aktuaris is *ex-officio* adviserend lede van die dagbestuur (moderatuur), met adviserende stem.
- 1.6 Die vergadering van die Algemene Sinode is nie 'n geslote vergadering nie, tensy die vergadering anders besluit.
- 1.7 Elke sittingsdag word op 'n gepaste wyse geopen met Skriflesing en gebed en afgesluit met danksegging.
- 1.8 Lede van die vergadering moet vooraf verskoning maak indien hulle vir 'n deel van die vergadering afwesig gaan wees. 'n Sekundus kan in die plek van 'n afgevaardigde verskyn. Geen lid mag sonder verlof die vergadering verlaat nie.

## **2. BUITENGEWONE ALGEMENE SINODE**

- 2.1 Die ASM het 'n mandaat om 'n buitengewone vergadering van die Algemene Sinode byeen te roep. Dit geskied met skriftelike kennisgewing van vier weke aan al die samestellende sinodes.
- 2.2 'n Buitengewone vergadering van die Algemene Sinode konstitueer met dieselfde personeel as by verdaging van die vorige gewone vergadering van die Algemene Sinode. Dit staan samestellende sinodes egter vry om die afvaardiging aan te vul. In alle gevalle moet geloofsbriewe ingehandig word.
- 2.3 Die voorsitter van die ASM open die vergadering en lei die vergadering.
- 2.4 Die buitengewone Algemene Sinode kan net die sake hanteer waarvoor die vergadering byeen geroep is.

## **3. BEHANDELING VAN SAKE**

- 3.1 Die projekspan vir die agenda van die Algemene Sinode word deur die ASM aangewys. Die projekspan stel die agenda vir die vergadering saam en sorg dat die agenda, indien enigsins moontlik, ses weke voor die vergadering elektronies aan die afgevaardigdes beskikbaar gestel word. Harde kopieë van die agenda word ter vergadering beskikbaar gestel of kan vooraf deur samestellende sinodes aangevra word soos benodig. Vóór die vergadering word die agenda en ná die vergadering word die handeling aan alle dienende predikante van die kerk, sowel as gemeentes, amptenare en belanghebbende instansies, gestuur.
- 3.2 Die verslag van die projekspan vir die agenda word by die aanvang van die vergadering in behandeling geneem.
- 3.3 Die algemene sekretaris maak aantekeninge van sake wat op meer as een plek in die agenda voorkom en stel hierdie aantekeninge tot beskikking van die voorsitter.
- 3.4 By die behandeling van sake neem die voorsitter die orde in ag wat die geskikste voorkom. Die voorsitter dra die sake wat behandel moet word, duidelik voor, gee die nodige inligting en kan, as die saak dit vereis, wenke aan die hand doen om die vergadering te help om tot 'n beslissing te kom.
- 3.5 Die voorsitter kan, met instemming van die vergadering, 'n ordereëling tref om in die stemming oor die amendemente af te wyk van die volgorde waarin die amendement ingedien is. Die voorsitter kan ook versoek dat voorsteller van die aanbeveling en die voorstellers van amendemente die geleentheid kry om die amendemente te konsolideer.
- 3.6 Die voorsitter, in oorleg met die aktuaris en algemene sekretaris, neem 'n saak wat op meer as een plek in die agenda voorkom, op die mees sinvolle plek in behandeling en handel, indien enigsins moontlik, die saak daar af. Waar dieselfde saak elders voorkom en afgehandel is, word slegs die opskrif aangegee en deur middel van die betrokke bladsyverwysing aangedui waar dit reeds afgehandel is.
- 3.7 In gevalle wat op die orde van die vergadering betrekking het en waarvoor geen voorsiening in hierdie reglement gemaak word nie, handel die voorsitter volgens gebruik en in oorleg met die aktuaris en algemene sekretaris. As enige lid teen

hierdie handelswyse beswaar het, word dit aan die beslissing van die vergadering onderwerp.

- 3.8 Elke lid van 'n vergadering moet by deelname aan die bespreking die voorsitter aanspreek.
- 3.9 By die behandeling van sake is elke lid op een spreekbeurt geregtig, tensy die vergadering anders besluit. Niemand mag buite 'n toegekende spreekbeurt en/of sonder verlof van die voorsitter praat nie. As twee of meer lede gelyk opstaan, beslis die voorsitter wie die eerste aan die woord kom.
- 3.10 Geen lid van die vergadering is geregtig op meer as een spreekbeurt oor dieselfde saak nie, behalwe wanneer die persoon die aandag van die voorsitter wil vestig op 'n afwyking van die reglement van orde, óf met die verlof van die vergadering óf om as voorsteller of as indiener van 'n amendement, repliek te lewer.
- 3.11 Die voorsitter het die reg om, wanneer na eie oordeel die saak onder behandeling genoegsaam bespreek is, dit aan die vergadering te stel of daar nie tot stemming oorgegaan kan word nie.
- 3.12 Indien die Algemene Sinode goeie rede het om te vermoed dat 'n besluit of standpunt moontlik tot groot verdeeldheid kan lei, moet die sinode voor die finale besluitneming die advies van die mindere kerkvergaderings inwin ten einde konsensus oor die betrokke sake in die NG Kerkverband in geheel te probeer kry.
  - 3.12.1 Die saak word tydens die vergadering verwys na die tien samestellende sinodes se onderskeie afvaardigings vir besinning en konsultasie met terugvoer aan die vergadering.
  - 3.12.2 Die saak word verwys na die tien samestellende sinodes om in die termyn tussen sinodesittings daarmee te gaan werk in die gemeentes en sinodale strukture met verslag aan die toepaslike taakspan van die Algemene Sinode.
  - 3.12.3 Opsies 3.12.2 kan slegs uitgeoefen word indien opsie 3.12.1 nie tot konsensus gelei het nie.

#### **4. VOORSTEL EN AMENDEMENT(E)**

- 4.1 Die Algemene Sinode neem bindende besluite oor die sake wat in Artikel 43 van die Kerkorde beskryf word.
- 4.2 'n Substantiewe mosie of -voorstel kom by wyse van 'n beskrywingspunt van 'n sinode, of 'n skriftelike verslag van 'n taakspan van die Algemene Sinode voor die vergadering. 'n Sinode se beskrywingspunt word voor die verslag van die taakspan behandel (indien van toepassing).
- 4.3 'n Substantiewe mosie of -voorstel kan by wyse van 'n amendement gewysig word.
- 4.4 'n Amendement kan slegs een keer deur 'n verdere amendement gewysig word.
- 4.5 Amendemente word by wyse van 'n gewone meerderheid goedgekeur. Indien die voorstel 'n twee-derdemeerderheid vereis, word die twee-derdemeerderheid by die finale stemming oor die gewysigde voorstel vereis.

- 4.6 Die voorstel en die amendement(e) moet skriftelik ingedien en deur die voorsteller en die sekondant geteken word. Onderhewig aan 4.2 word aanbevelings van 'n projekspan en 'n algemene of 'n tydelike taakspan as substantiewe voorstelle aan die vergadering voorgehou. Indien 'n tydelike taakspan 'n aanbeveling doen wat 'n aanbeveling van 'n projekspan of algemene taakspan raak, het die projekspan of die algemene taakspan die voorstel en moet die tydelike taakspan amendeer. Indien meer as een projek- of algemene taakspan 'n voorstel oor dieselfde saak voor die vergadering het, reël die voorsitter watter een die voorstel is.
- 4.7 Geen spreekbeurt mag aangevra word, of geen voorstel of amendement(e) mag dien, voordat die voorsitter die saak aan die orde stel nie.
- 4.8 'n Voorstel of amendement wat reeds ter tafel is, mag nie sonder die verlov van die vergadering teruggetrek word nie.
- 4.9 Die indiener van 'n voorstel word beperk tot 'n spreekbeurt van agt minute, met vyf minute vir repliek. Ander sprekers in die debat word beperk tot vyf minute. Die voorsitter mag in uitsonderlike gevalle van hierdie tydsbeperking afwyk met die toestemming van die vergadering.
- 4.10 Wanneer 'n amendement tot stemming gebring word, het die persoon/taakspan wat die oorspronklike voorstel ingedien het, reg op repliek alvorens daar oor die amendement gestem word.
- 4.11 Wanneer die vergadering 'n voorstel by wyse van 'n amendement gewysig het, is die gewysigde voorstel die voorstel voor die vergadering. Voordat die gewysigde voorstel tot stemming gebring word, het die voorsteller van die amendement die reg op repliek.
- 4.12 Wanneer enige voorstel, beskrywingspunt of amendement regsimplikasies en/of kerkordelike implikasies het, word die voorstel/ aanbeveling/ beskrywingspunt na die ATR of TTR verwys vir kerkordelike advies voordat 'n finale besluit geneem word.
- 4.13 Indien sodanige advies en aanbevelings nie ter vergadering gelewer kan word nie, staan die voorstel/aanbeveling/beskrywingspunt oor tot die volgende sitting van die Algemene Sinode om die ATR in staat te stel om die implikasies deeglik, indien nodig met regsadvies, te oorweeg met verslag aan die Algemene Sinode.

## 5. STEMMING

Die Algemene Sinode neem so ver moontlik besluite by wyse van 'n gespreksmatige proses waartydens konsensus gesoek word. Stemming vind slegs plaas as dit absoluut noodsaaklik is en die vergadering self daarvoor besluit het. (Sien reglement 1.5.1.3)

- 5.1 Die opneem en tel van die stemme word deur 'n tydelike taakspan vir stemming, wat vooraf deur die ontwerpspan aangewys is, behartig.
- 5.2 Elke lid van die vergadering moet stem. Vir 'n beslissing word 'n volstreekte meerderheid (helfte plus een) van stemme van die aanwesige lede vereis, behalwe in die gevalle waar die *Kerkorde* 'n tweederdemeerderheid vereis (Artikel 44 en 70). Die voorsitter het 'n gewone maar nie 'n beslissende stem

nie. Persone wat die vergadering in adviserende hoedanigheid bywoon, mag aan die bespreking deelneem, maar nie stem nie.

- 5.3 Die stemming oor persone geskied op geslote wyse en soos volg:
- 5.3.1 Eers word 'n nominasielys saamgestel. Elke stemgeregtigde lid mag persone nomineer, maar nie meer as die getal persone wat gekies moet word nie.
- 5.3.2 Uit die name op die nominasielys stem elke stemgeregtigde vir soveel name as die getal persone wat gekies moet word.
- 5.3.3 Die persoon op wie die meeste stemme verenig word, is verkies indien die getal stemme op die persoon uitgebring die volstrekte meerderheid van die aanwesige stemgeregtigdes uitmaak. ('n Volstrekte meerderheid is die helfte plus een van al die stemme wat uitgebring is.)
- 5.3.4 Indien 'n persoon nie 'n volstrekte meerderheid van stemme kry nie, vind daar 'n verdere stemming plaas uit die name wat die hoogste getal stemme gekry het en saam 'n volstrekte meerderheid vorm.
- 5.3.5 Indien daar 'n staking van stemme is wat nie deur verdere stemming opgelos kan word nie, geskied die beslissing deur die lot.
- 5.4 Die stemming oor sake verloop soos volg:
- 5.4.1 Oor alle sake, waaroor daar nie konsensus verkry kan word nie, word daar gestem óf met opsteek van hande, óf in die geval van kontensieuse sake op 'n geslote stemwyse, indien die vergadering so besluit. Indien die stemming oor 'n saak gelykop is, word die saak terugverwys.
- 5.4.2 In die geval van 'n voorstel met amendemente:
- Amendemente word eerste tot stemming gebring in opgaande orde vanaf die laaste amendement wat ingedien is. en
  - Indien die amendement(e) aanvaar is, word gestem vir die voorstel soos deur die aanvaarde amendement(e) gewysig.
  - Slegs indien al die amendemente verwerp word, stem die vergadering oor die oorspronklike voorstel.
- 5.4.3 Na elke stemming oor 'n amendement of 'n voorstel word die uitslag van die stemming aangekondig – nie die getal stemme vir of teen die voorstel of amendement uitgebring nie, maar of dit aanvaar of verwerp is.
- 5.4.4 Dit staan 'n lid vry om met of sonder opgaaf van redes te laat notuleer dat die persoon met 'n besluit wat geneem is nie saamstem nie of dat die persoon nie teenwoordig was toe die besluit geneem is nie.

## **6. MOSIE VAN ORDE**

- 6.1 'n Mosie van orde is 'n voorstel wat betrekking het op:
- 6.1.1 die volgorde waarin sake ter tafel moet kom; of
- 6.1.2 die opskorting van die bespreking van 'n bepaalde saak; of
- 6.1.3 die verwysing van 'n bepaalde saak; of
- 6.1.4 die afstap van 'n bepaalde saak.

6.2 'n Ordemosie kan op enige tydstip gedurende die voortgang van die bespreking ingedien word. Daar word dadelik sonder bespreking oor die ordemosie gestem. Dit word egter aan die oordeel van die voorsitter oorgelaat om die mosie terug te hou as die voorsitter van mening is dat dit aangewend word om 'n behoorlike bespreking van die onderwerp te voorkom. Die aktuaris kan die voorsitter hieroor adviseer.

## 7. BESKRYWINGSPUNTE

7.1 Alleen 'n kerkvergadering of sy gevolmagtigde of 'n kuratorium wat oor beleid, soos vervat in artikels van die *Kerkorde* 'n wysiging wil aanbring, mag beskrywingspunte by die Algemene Sinode indien. Beskrywingspunte wat hulle oorsprong by kerkrade of ringe het, word met 'n motivering na die betrokke samestellende sinode of moderamen of diensraad gestuur. Beskrywingspunte is bedoel om die Algemene Sinode in sitting behulpsaam te wees met die neem van ingeligte en weldeurdatge besluite.

7.2 Die betrokke sinodale vergadering of sy gevolmagtigde neem die beskrywingspunt van 'n kerkrade of ring in behandeling en stuur die beskrywingspunt met bykomende kommentaar na die Algemene Sinode.

7.3 Beskrywingspunte is alleen ontvanklik as dit in ooreenstemming met Artikel 43 van die *Kerkorde* is en minstens drie maande voor die vergadering deur die Algemene Sekretaris ontvang is.

7.4 Beskrywingspunte word wanneer dit ontvang word onmiddellik na die ATR verwys vir beoordeling van die ontvanklikheid daarvan aan die hand van kriteria in punte 7.1-7.3 hierbo.

7.5 Die ATR kan die beoordeling van die ontvanklikheid elektronies doen ten einde nie die proses te vertraag nie.

7.6 Na die beoordeling van die ontvanklikheid van 'n beskrywingspunt word dit na die Algemene Sekretaris terugverwys met die bevinding vir opname in die agenda van die eerskomende Algemene Sinode (vgl. artikel 43.2.2). Hy handel as volg daarmee:

7.6.1 Beskrywingspunte wat nie ontvanklik is nie word teruggestuur na die insender met opgaaf van redes.

7.6.2 Beskrywingspunte wat ontvanklik is word verwys na die toepaslike permanente taakspan vir behandeling met verslag aan die eersvolgende Algemene Sinode

7.7. Beskrywingspunte wat as nie-ontvanklik bevind word, kan weer ingedien word met dien verstande dat dit wel aan die tydsbeperking en ander kriteria sal voldoen. Beskrywingspunte wat weer ingedien word volg dieselfde roete as wat in punte 1-3 uitgespel word.

7.8. Beskrywingspunte wat na die sperdatum ingedien word, word as volg hanteer:

- 7.8.1 dit moet vergesel word van 'n opgaaf van redes waarom dit nie betyds ingedien kon word nie en waarom dit spoedeisend van aard is.
- 7.8.2 dit word na die TTR verwys vir beoordeling van die ontvanklikheid daarvan en moet tydens die TTR se eerste vergadering behandel word
- 7.8.3 indien dit ontvanklik is verwys die TTR dit na die toepaslike tydelike taakspan vir behandeling met verslag aan die AS in sitting. Die TTR doen verslag hieroor aan die AS in sitting.
- 7.8.4 indien dit nie ontvanklik is nie doen die TTR met opgaaf van redes hieroor verslag aan die AS in sitting.
- 7.9 Aanbevelings in beskrywingspunte van kerkvergaderings waar nuwe aanbevelings oor vorige besluite gemaak word, word gesien as kennisgewing van hersiening met betrekking tot vorige besluite van die Algemene Sinode. Die kerkvergadering wat nuwe voorstelle oor vorige besluite maak, lig die vergadering in oor die vorige besluite wat ter sake is. (Sien punt 10.3 hieronder)
- 7.10 Wanneer 'n beskrywingspunt aan die orde gestel word (vgl. punt 4.2 hierbo), kry 'n verteenwoordiger van die sinode wat dit ingestuur het geleentheid om die beskrywingspunt toe te lig, onderworpe aan die dieselfde tydsreëling as die inleiers van taakspanverslae. Die inleier wat die taakspanverslag wat die betrokke beskrywingspunt hanteer het, kry vervolgens geleentheid om die aanbeveling/amendament rakende die beskrywingspunt toe te lig, onderworpe aan dieselfde tydsreëling wat vir die toeligting van amendamente geld. Aan die einde van die bespreking het die verteenwoordiger van die sinode reg tot repliek (vgl. punt 4.10 en 4.11 hierbo).
- 7.11 Die sinode wat beskrywingspunt(e) instuur het die verantwoordelikheid om met kennisname aan die Algemene Sekretaris en die betrokke taakspan 'n verteenwoordiger(s) aan te wys om dit toe te lig tydens die vergadering van die Algemene Sinode.

## **8. GRAVAMEN (BESWAARSKRIF)**

- 8.1 'n Gravamen (beswaar) is 'n ernstige beswaar teen 'n besluit wat die Algemene Sinode geneem het ten opsigte van 'n leerstellige aangeleentheid.
- 8.2 Alleen 'n kerkvergadering of sy gevolmagtigde kan 'n gravamen (beswaar) by die Algemene Sinode indien.
- 8.3 'n Gravamen (beswaar) wat sy oorsprong by 'n lidmaat, kerkraad of ring het, word met 'n motivering na die betrokke samestellende sinode of moderamen of diensraad gestuur.
- 8.4 Die betrokke sinodale vergadering of sy gevolmagtigde neem die gravamen (beswaar) van die lidmaat, kerkraad of ring in behandeling en stuur die gravamen (beswaar) met bykomende kommentaar na die Algemene Sinode.

- 8.5 Die gravamen (beswaar) moet minstens 'n jaar voor die volgende sitting van die Algemene Sinode by die Algemene Sekretaris ingedien word.
- 8.6 Die Algemene Taakspan Regte besluit oor die ontvanklikheid van die gravamen (beswaar) met verslag aan die moderamen van die Algemene Sinode.
- 8.7 Indien die gravamen (beswaar) ontvanklik is, word dit vir oorweging aan die volgende Algemene Sinode voorgelê.
- 8.8 Indien die gravamen (beswaar) nie ontvanklik is nie, word die betrokke kerkvergadering wat die gravamen ingedien het na verslag aan die ASM skriftelik in kennis gestel van die redes waarom die gravamen (beswaar) nie ontvanklik is nie.
- 8.8.1 Indien die gravamen (beswaar) ontvanklik is, verwys die ASM of sy gevolmagtigde (dagbestuur van die ASM) dit na 'n taakspan vir hantering met verslag aan die Algemene Sinode.
- 8.8.2 Die taakspan kan die indiener van die gravamen (beswaar) vooraf aanhoor met die oog op die hantering van die beswaar.
- 8.8.3 Alle gravamina (besware) word volledig in die agenda van die Algemene Sinode opgeneem.
- 8.8.4 Vir die aanvaarding vir 'n gravamen (beswaar) word 'n tweederde- meerderheid vereis (vergelyk artikel 44.4).

## **9. VERSLAE**

- 9.1 Verslae van algemene taakspanne van die Algemene Sinode moet minstens drie maande voor die vergadering by die Algemene Sekretaris ingedien word.
- 9.2 Dringende sake wat binne die drie-maande-tydperk voor die vergadering van die Algemene Sinode voorkom en deur algemene taakspanne behandel is, mag by wyse van addendum verslae, met verlof van die taakspan vir die agenda, ter tafel gelê word.
- 9.3 Die taakspan vir die agenda het die bevoegdheid om verslae, wat deur die algemene taakspanne ingedien is, te laat verkort indien dit onnodig lank is.
- 9.4 Aanbevelings van taakspanne wat wysigings aan die *Kerkorde en reglemente* behels, word in die agenda gemerk: Vir die aandag van die Tydelike Taakspan Regte. Hierdie voorstelle word dan voor die sinodesitting deur die Tydelike Taakspan Regte nagegaan vir kerkregtelik bevredigende formulerings, sonder uitspraak oor die beginsel vervat in die voorstel. Tydens die behandeling van die betrokke voorstel in die projek- of algemene taakspan se verslag, lewer die Tydelike Taakspan Regte advies oor die kerkregtelike aspekte daaraan verbonde.
- 9.5 Aanbevelings in verslae van taakspanne waar nuwe aanbevelings oor vorige besluite gemaak word, word gesien as kennisgewing van hersiening met

betrekking tot vorige besluite van die Algemene Sinode. Die taakspan wat nuwe voorstelle oor vorige besluite maak, lig die vergadering in oor die vorige besluite wat ter sake is. (Sien punt 11.3 hieronder)

## 10. TAAKSPANNE

- 10.1 Tydelike taakspanne, soos deur die projekspan vir die agenda aangewys, mag voor die aanvang van die vergadering met hulle werksaamhede begin.
- 10.2 Die benoeming van tydelike taakspanne gedurende die sitting van die Algemene Sinode word, op aanbeveling van die moderatuur, deur die vergadering met opsteek van hande gedoen.
- 10.3 Amptenare in diens van die samestellende sinodes en van die Algemene Sinode het sitting met adviserende stem in tydelike taakspanne (wat hulle portefeuljes raak), as afgevaardigdes of waarnemers wat op koste van die onderskeie sinodes teenwoordig is.
- 10.4 Tydelike taakspanne maak nie aanbevelings (sien 4.6) oor die verslae van taakspanne nie, tensy daar 'n beskrywingspunt oor dieselfde saak is wat nuwe aspekte na vore bring, of wanneer 'n saak deur die vergadering na hulle verwys is.
- 10.5 Na afloop van die vergadering word opdragte uitgevoer en werksaamhede voortgesit deur taakspanne onder die strategiese leiding van die ASM, met ondersteuning van die kantoor van die Algemene Sinode. *Ad-hoc* taakspanne hanteer korttermyn opdragte en werksaamhede en ontbind as die opdrag afgehandel is. Algemene taakspanne bestaan vir die volle termyn tussen die gewone sinodesittings en het 'n deurlopende opdrag en werksaamheid.
- 10.6 Taakspanne van die Algemene Sinode word na afloop van die vergadering deur die ASM saamgestel. 'n Voorsitter, ondervoorsitter en skriba word tydens die konstitueringsvergadering vir die hele termyn tussen die gewone sinodevergaderings verkies.
- 10.7 Vakatures wat tussen gewone vergaderinge van die Algemene Sinode in taakspanne ontstaan, word deur die ASM op aanbeveling van die betrokke taakspan, aangevul.

## 11. HERSIENING<sup>1</sup>

- 11.1 Besluite wat geneem is, mag alleen na voorafgaande kennisgewing en met die toestemming van die vergadering op 'n tyd wat deur die moderatuur bepaal is, in revisie geneem word.

---

<sup>1</sup> Vergelyk ook Reglement 23 vir Hersiening (revisie), Appèl en Prosedurele Beswaar, 2.1

## 11.2 Kennisgewing van revisie:

### 11.2.1 Revisie kan toegestaan word indien oortuigend aangevoer word dat:

- daar in die bespreking van die saak waarom dit gaan, aan sekere aspekte daarvan nie voldoende aandag gegee is nie of glad nie aandag gegee is nie; en/of
- daar later inligting na vore gekom het wat hersiening van die besluit noodsaaklik maak.

### 11.2.2 Elke kennisgewing van revisie word na die Tydelike Taakspan Regte verwys om oor die meriete daarvan te oordeel teen die agtergrond van 11.2.1.

### 11.2.3 Die aansoeker stel die rede(s) vir die aansoek om revisie aan die Tydelike Taakspan Regte.

### 11.2.4 Die Tydelike Taakspan Regte doen 'n aanbeveling aan die vergadering ten opsigte van elke kennisgewing van revisie.

### 11.2.5 Die vergadering beslis met meerderheidstem of die revisie toegestaan word. Indien toegestaan, word die saak weer oopgestel vir bespreking en kan die vergadering tot 'n ander besluit kom of die vorige besluit kan gehandhaaf word.

### 11.3 Wanneer revisie by wyse van die proses soos beskryf in 11.2 of by wyse van 'n verslag soos beskryf in 9.5 of by wyse van 'n beskrywingspunt soos beskryf in 7.9 behandel word, is die saak waaroor dit gaan oop vir bespreking en word voorstelle en amendemente opnuut ingedien (sien paragraaf 4).

### 11.4 Indien 'n nuwe voorstel goedgekeur word, vervang dit die vorige besluit(e).

## 12 NOTULE

### 12.1 Voorstelle moet skriftelik ingedien word en sodanig genotuleer word.

### 12.2 Alle voorstelle en amendemente, ook dié wat nie aanvaar word nie, word in die notule opgeneem.

### 12.3 Die notule van elke sittingsdag word deur 'n notulekommissie versorg en tydens die volgende sittingsdag deur die vergadering goedgekeur en deur die moderator en skriba onderteken.

### 12.4 Die notule van die laaste sittingsdag word deur die notulekommissie geredigeer en deur die Moderamen by sy eerste vergadering goedgekeur en onderteken.

### 12.5 Funksionele besluite van die Algemene Sinode tree in werking wanneer die goedgekeurde notule beskikbaar is, tensy die Algemene Sinode anders besluit. Besluite wat kerkordelike en reglementele veranderinge tot gevolg het, tree in werking met die elektroniese publikasie van die *Kerkorde*, tensy die Algemene Sinode anders besluit.

**13. TOEGANG TOT MINDERE VERGADERINGE, AMPSDRAERS EN LIDMATE**

- 13.1 Indien die Algemene Sinode beleidsbesluite neem, is hy bevoeg om die kerk in geheel aan te spreek, dit wil sê mindere kerkvergaderings, ampsdraers en lidmate.
- 13.2 Indien die Algemene Sinode beleidsbesluite neem wat opgevolg of in die praktyk uitgevoer moet word, werk die Algemene Sinode deur die samestellende sinodes.

**14. SLUITING**

Die vergadering word op 'n wyse afgesluit waarop die moderatuur besluit.

## REGLEMENT 4

### REGLEMENT VIR DIE ALGEMENE TAAKSPAN ARGIEF

#### 1. NAAM

Algemene Taakspan Argief (ATA).

#### 2. SAMESTELLING

2.1 Die taakspan, bestaande uit sewe lede, word soos volg deur die Algemene Sinodale Moderamen (ASM) saamgestel:

- 2.1.1 'n argivaris of persoon belas met die argief uit elk van die kerkargiewe te Stellenbosch  
Bloemfontein  
Pietermaritzburg  
Pretoria (Oostelike Sinode)  
Windhoek

soos aangewys deur hul onderskeie Sinodale Taakspanne vir die Argief.

2.1.2 een kundige op die terrein van argiefwese. (Die kundige moet verkieslik 'n dosent aan 'n teologiese fakulteit wees.)

2.1.3 Die hoofinligtingsbeampte van die Nederduitse Gereformeerde Kerk met as sekundes die bestuurder van die Argief in Stellenbosch, synde die “adjunkinligtingsbeampte van die Nederduitse Gereformeerde Kerk, vir die doeleindes van Wet 2 van 2000 en Wet 4 van 2013

2.2 Die ASM wys sekundi vir elkeen van bogenoemde primariuslede aan. Indien sowel die primarius as die sekundus nie beskikbaar is nie, wys die ASM, op aanbeveling van die betrokke sinodes of hulle gevolmagtigdes, 'n nuwe verteenwoordiger en sekundus aan.

2.3 Indien sowel die primarius as die sekundus kundige lid nie beskikbaar is nie, het die taakspan die bevoegdheid om 'n plaasvervanger kundige aan te wys.

#### 3. OPDRAG

Die taakspan se opdrag is die:

- 3.1 formulering van 'n algemene argiefbeleid vir die kerk;  
*(Beleid vir Argiefbewaarplesse van die NG Kerk goedgekeur deur die Algemene Sinode 2015 - Agenda Algemene Sinode 2015, p. 27, pt. 4.3, Notule Algemene Sinode 2015, p 7, pt. 14). Vergelyk ook Riglyne vir die Argief (Webwerf van die NG kerk).*
- 3.2 bevordering van die teologies-wetenskaplike arbeid van die kerkargiewe ten einde die institusionele geheue van die kerk uit te bou en die kerk in staat te stel om sy werksaamhede op 'n verantwoordelike en pragmatiese wyse voort te sit;
- 3.3 koördinerings van werksaamhede van die argiewe van die onderskeie sinodes;

- 3.4 advisering van die onderskeie sinodes se argiefkommissies oor die toepassing van relevante wetgewing;
- 3.5 kontrolering dat die onderskeie kerkargiewe voldoen aan die standaardvereistes vir doelmatige en veilige bewaring van argivalia;
- 3.6 toesig oor die bewaring en ontsluiting van die Algemene Sinode se eie argivalia by die aangewese kerkargief;
- 3.7 toesig oor die opstelling van die “In Memoriam-verslae” van amptenare en ampsdraers in diens van die NG Kerk;
- 3.8 bevordering van die bekendstelling van die geskiedenis van die kerk as geheel; en
- 3.9 verslagdoening aan die ASM en die Algemene Sinode.

#### **4. VERGADERINGS**

- 4.1 Die taakspan vergader minstens een maal per jaar.
- 4.2 Die taakspan kies ’n voorsitter, ondervoorsitter en skriba uit eie geledere na afloop van die Algemene Sinode. ’n Lid kan nie vir meer as twee termyne in dieselfde posisie verkies word nie.
- 4.3 Die sakelys maak by elke vergadering voorsiening vir
  - 4.3.1 verslagdoening oor die uitvoering van die taakspan se opdragte; en
  - 4.3.2 ’n oorsig oor die finansiële state en begroting van die taakspan.
- 4.4 Op die laaste vergadering van die taakspan se termyn, word kundige lede benoem met die oog op benoeming deur die Algemene Sinode/ASM.
- 4.5 Die taakspan se vergaderings kan van tyd tot tyd uitgebrei word tot ’n konferensie waarheen argivarisse van ander kerke en ander toepaslike kundiges en belangstellendes uitgenooi kan word om op eie koste deel te neem. Die doel van so ’n konferensie is onder andere om
  - 4.5.1 die werksaamhede van die argiewe van die onderskeie kerke deur onderlinge samewerking te bevorder;
  - 4.5.2 uitvoering aan die taakspan se opdrag te kan gee ten opsigte van die bevordering van die teologies-wetenskaplike arbeid van kerkargiewe; en
  - 4.5.3 om enige ander sake te bespreek wat kerkargiewe raak.

#### **5. DAGBESTUUR**

- 5.1 Die taakspan het nie ’n dagbestuur nie.

#### **6. BEGROTING**

- 6.1 Die taakspan begroot vir een vergadering/konferensie per jaar.

## REGLEMENT 5

### REGLEMENT VIR DIE ALGEMENE TAAKSPAN BYBELVERTALING, -VERKLARING EN -VERSPREIDING

#### 1. NAAM

Algemene Taakspan Bybelvertaling, -verklaring en -verspreiding (ATBV).

#### 2. SAMESTELLING

- 2.1 Die taakspan word soos volg deur die Algemene Sinodale Moderamen (ASM) saamgestel:
  - 2.1.1 een Ou-Testamentikus en een Nuwe-Testamentikus van die NG Kerk deur elk van die NG Kerkdosenterade van die teologiese fakulteite Stellenbosch, Pretoria en Bloemfontein uit die huidige of vorige dosentekorps aanbeveel; en
  - 2.1.2 twee predikante van die NG Kerk in diens van die Bybelgenootskap van Suid-Afrika.
  - 2.1.3 een verteenwoordiger van die Bybelgenootskap van Namibië wat verkieslik 'n geordende van die NG Kerk Namibië is.
- 2.2 Ander vakkundiges kan gekoöpteer word, maar die aantal teoloë en vakkundiges mag nie tien oorskry nie.
- 2.3 Die Verenigende Gereformeerde Kerk in Suidelike Afrika (VGKSA) kan op eie koste een Ou-Testamentikus en een Nuwe-Testamentikus uit die VGKSA se huidige of vorige dosentekorps met adviserende stem benoem.
- 2.4 Die vul van vakatures word deur die ASM of sy gevolmagtigde bekragtig op aanbeveling van die taakspan.

#### 3. OPDRAG

Die taakspan

- 3.1 adviseer die Algemene Sinode in verband met die aanwysing van Bybelvertaling(s) wat amptelik gebruik moet word (vergelyk artikel 43.1.5 van die *Kerkorde*);
- 3.2 neem inisiatief en adviseer die Algemene Sinode in verband met die publikasie van Bybelvertalings na aanleiding van die behoefte van lidmate;
- 3.3 dien as amptelike skakel tussen die NG Kerk en die Bybelgenootskap van Suid-Afrika ten opsigte van die werksaamhede van die Bybelgenootskap van Suid-Afrika, onder andere Bybelvertalingsprogramme, navorsing, publikasies en Bybelverspreiding;
- 3.4 doen gereeld verslag aan die Algemene Sinode/ASM en ander sinodes oor tersaaklike aangeleenthede, asook oor die werk van die Bybelgenootskap van Suid-Afrika; en

- 3.5 benoem in samewerking met die Bybelgenootskap, predikante (voltyds of deelyds) in diens van die Bybelgenootskap; en
- 3.6 adviseer die Algemene Sinode met die oog op die goedkeuring van Bybelvertalings wat in opdrag van die Algemene Sinode deur die Bybelgenootskap vertaal is. Hiervoor word 'n addisionele kundige taakspan aangewys waar geen persoon wat persoonlik betrokke is by die vertaling, teenwoordig kan wees nie.

#### **4. KONSTITUERING EN VERGADERINGS**

- 4.1 Die taakspan konstitueer so spoedig moontlik na aanwysing.
- 4.2 Indien dit nie moontlik is om saam op 'n plek te vergader nie, hanteer die aangewese sameroeper die konstituering telefonies of elektronies.
- 4.3 Die taakspan vergader minstens twee keer tussen vergaderings van die Algemene Sinode.
- 4.4 Tussentydse vakatures word deur die ASM gevul op aanbeveling van die taakspan.
- 4.5 Met die eerste vergadering na elke gewone Algemene Sinode word 'n voorsitter, ondervoorsitter en sekretaris gekies, wat ook as dagbestuur optree.

#### **5. BEFONDSING**

Die taakspan lê 'n begroting vir sy werksaamhede aan die Bedryfspan van die Algemene Sinode voor na oorlegpleging met die Algemene Taakspan Fondse en Bates.

#### **6. PREDIKANTE VAN DIE NG KERK IN DIENS VAN DIE BYBELGENOOTSKAP VAN SUID-AFRIKA**

- 6.1 Die Algemene Sinode stel per ooreenkoms 'n aantal predikante beskikbaar vir diens aan die Bybelgenootskap van Suid-Afrika.
- 6.2 Predikante vir diens aan die Bybelgenootskap van Suid-Afrika (voltyds en deelyds) word deur die Algemene Taakspan Bybelvertaling, -verklaring en -verspreiding formeel benoem en bevestig vir diens aan die kerkverband.
- 6.3 Die benoeming van predikante word gedoen deur die dagbestuur van die ATBV, ten minste een verteenwoordiger van die Bybelgenootskap op die ATBV en ander lede soos deur die Bybelgenootskap aangewys. Dit word vir goedkeuring elektronies aan die volle ATBV voorgehou.
- 6.4 Predikante in diens van die Bybelgenootskap van Suid-Afrika se diensverhouding word per diensooreenkoms tussen die betrokkenes en die Bybelgenootskap gereël.
- 6.5 Die vergoeding van predikante in diens van die Bybelgenootskap van Suid-Afrika geskied volledig deur die Bybelgenootskap van Suid-Afrika.

## REGLEMENT 6

### REGLEMENT VIR DIE ALGEMENE TAAKSPAN FONDSE EN BATES (ATFB)

#### 1. NAAM

Algemene Taakspan Fondse en Bates (ATFB).

#### 2. SAMESTELLING

2.1 Die taakspan word na die sinodesitting deur die ASM saamgestel.

2.2 Die taakspan bestaan uit die volgende lede:

2.2.1 Die voorsitters of 'n sekundus (verteenwoordiger) soos aangewys deur die betrokke sinode, (maar verkieslik nie betaalde amptenare nie) van die onderskeie sinodes se taakspanne vir finansies.

2.2.2 Vyf kundige lede soos deur die ATFB aangewys.

2.2.3 Die betaalde amptenaar/e van die Algemene Sinode en die finansiële beampte in die kantoor van die Algemene Sinode dien as adviserende lede.

2.3 Vakatures ten opsigte van sinodale verteenwoordigers word deur die betrokke sinodes aangevul, terwyl vakatures ten opsigte van kundige lede deur die ATFB aangevul word. Die aanvulling van vakatures word deur die ASM bekragtig.

2.4 Dagbestuur

2.4.1 Die ATFB wys 'n dagbestuur aan wat bestaan uit die voorsitter, ondervoorsitter, skriba en een kundige lid. Die betaalde amptenaar/e van die Algemene Sinode en rekeningkundige beampte is *ex officio* adviserend lede van die dagbestuur.

2.4.2 Die dagbestuur kan vakatures wat tussen vergaderings van die ATFB op die dagbestuur ontstaan, self aanvul vanuit die ATFB lede.

#### 3. OPDRAG VAN DIE ATFB

Die taakspan

3.1 adviseer die Algemene Sinode in verband met die beleid wat gevolg moet word ten opsigte van finansiële bestuur, bates, beleggings, eiendomme en audit;

3.2 stel jaarliks die begroting vir onderskeidelik die strategiese en operasionele werksaamhede van die Algemene Sinode op aan die hand van

3.2.1 Artikel 43 van die *Kerkorde*;

3.2.2 die roepingsverklaring van die Algemene Sinode;

3.2.3 die prioriteite deur die Algemene Sinode gestel;

3.2.4 die begrotings- en beleggingsbeleid van die Algemene Sinode; en

3.2.5 die beskikbaarheid van fondse daarvoor.

3.3 bepaal 'n strategie vir die befondsing van die werksaamhede van die Algemene Sinode en pas dit aan soos omstandighede dit vereis.

- 3.4 hou toesig oor die besteding van fondse ten opsigte van al die werksaamhede van die Algemene Sinode, waaronder die administratiewe, personeel- en kapitale uitgawes;
- 3.5 tree in gesprek met die Ouditkomitee soos nodig;
- 3.6 kontroleer en bespreek die jaarlikse geouditeerde finansiële state en bestuursbrief van die Algemene Sinode en lê dit aan die Ouditkomitee voor wat dit dan aanbeveel na die Algemene Sinode/Moderamen vir goedkeuring;
- 3.7 lewer jaarliks insette aan die Taakspan Predikantesake in verband met die riglyne vir die vergoedingspakket van predikante;
- 3.8 beoordeel die finansiële implikasies by die vulling van vakatures in poste vir werknemers in algemene sinodale diens;
- 3.9 sien toe dat die Reglement vir Eiendomme, Goedere en Fondse uitgevoer word ten opsigte van die Algemene Sinode, die afsonderlike regsentiteite én trusts se fondse en bates;
- 3.10 tree saam met die ATR op in alle regsgedinge of dispute oor eiendom, goedere en fondse sonder meer bepaalde lasgewing sowel eisend as verwerend ten behoeve van die Algemene Sinode na raadpleging van die Algemene Taakspan Regte;
- 3.11 stel in oorleg met die Algemene Taakspan Regte reglemente op vir geadmistrateerde fondse en lê dit vir goedkeuring voor aan die Algemene Sinode of die Moderamen wanneer die Algemene Sinode nie in sitting is nie;
- 3.12 wys sonder afstanddoening van aanspreeklikheid die nodige subtaakspanne aan om gedelegeerde werksaamhede te onderneem, waaronder 'n subtaakspan vir beleggings en 'n subtaakspan vir eiendom;
- 3.13 wys elke twee jaar drie fidusiële verantwoordelike persone aan soos vereis vir die Algemene Sinode as Openbare Weldaadsorganisasie; en
- 3.14 sien toe dat die jaarlikse opgawe van inkomste aan die Suid-Afrikaanse Inkomstediens (SAID) voorsien word soos deur die Belastingvrystellingseenheid van die SAID vereis.
- 3.15 Die ATFB adviseer die ASM wanneer buitengewone omstandighede in een of meer deelnemende sinodes ontstaan wat die bydraes van daardie sinode(s) affekteer.

#### **4. KONSTITUERING EN VERGADERINGS**

- 4.1 Die Taakspan konstitueer so spoedig moontlik na aanwysing en vergader ten minste een keer per jaar. Dit kan ook virtueel geskied.
- 4.2 Indien nodig, kan daar ook bykomend van elektroniese vergaderings gebruik gemaak word.

#### **5. MANDAAT EN FUNKSIE VAN DIE DAGBESTUUR**

- 5.1 Opvolg en afhandeling van sake vanuit die ATFB-vergadering.
- 5.2 Konsolidasie van 'n konsepbegroting vir voorlegging aan die ATFB.

- 5.3 Finalisering van die begroting in oorleg met die ouditkomitee vir goedkeuring deur die ATFB en die ASM.
- 5.4 Bestuur die Gebeurlikheidsfonds. Die Gebeurlikheidsfonds is die oorskot van die vorige boekjaar en kan net gebruik word in die volgende boekjaar. Die doel van die Gebeurlikheidsfonds is om onverwagte uitgawes te dek.
- 5.5 Die bestuur van die lopende begroting.
  - 5.5.1 Stel bestuurstate op in oorleg met taakspanne oor die besteding, al dan nie, van hulle begrotings en gee terugvoer aan die ASM daaroor.
  - 5.5.2 Onbenutte fondse van taakspanne word weer beskikbaar gestel in die begroting.
  - 5.5.3 Ontvang en besluit oor versoeke van taakspanne vir die aanvul van begrotingstekorte uit onbenutte fondse (5.5.2), indien moontlik.
  - 5.5.4 Goedkeuring van *ad hoc* of spesiale projekte, waarvoor nie begroot is nie, en kan uit die Gebeurlikheidsfonds befonds word.
- 5.6 Notules van die dagbestuur word elektronies aan die ATFB voorgelê.

## REGLEMENT 7

### REGLEMENT VIR DIE ALGEMENE TAAKSPAN REGTE

#### 1. NAAM

Algemene Taakspan Regte (ATR).

#### 2. SAMESTELLING

2.1 Die taakspan word soos volg deur die Algemene Sinodale Moderamen (ASM) saamgestel:

2.1.1 die aktuaris van die Algemene Sinode;

2.1.2 die aktuaris of 'n ander kerkregkundige van elk van die samestellende sinodes;

2.1.3 die bestuurder of ander lid van die Algemene Taakspan Predikantesake.

2.1.4 Die taakspan kan kundige lede koöpteer met volle sittingsreg.

2.1.5 Die vul van vakatures word deur die ASM of sy gevolmagtigde bekragtig op aanbeveling van die sinode en taakspan.

#### 3. OPDRAG

3.1 Die taakspan:

3.1.1 gee advies in verband met die interpretasie en toepassing van die *Kerkorde*, reglemente van die Algemene Sinode en algemene sinodale besluite.

3.1.2 maak 'n studie van sake wat deur die Algemene Sinode na die taakspan verwys word en dien die Algemene Sinode/ASM met 'n verslag en aanbevelings in dié verband;

3.1.3 sien toe dat alle besluite van die Algemene Sinode wat wysigings aan die artikels van die *Kerkorde* en die reglemente van die Algemene Sinode meebring, redaksioneel versorg en so spoedig moontlik gepubliseer word;

3.1.4 bring kerkregtelike ongerymdhede in algemene sinodale verband, wat onder sy aandag kom, onder aandag van die ASM met 'n aanduiding van die moontlike weg tot herstel;

3.1.5 tree, ingeval waar teen 'n besluit van 'n sinode geappelleer word op as appèlriggaam van die Algemene Sinode (vergelyk Artikel 23 en 43.1.11 van die *Kerkorde* en *Reglement 23 vir Hersiening (revisie), Appèl, Gravamen (Beswaarskrif) en Prosedurele Beswaar* of wys uit eie geledere so 'n gevolmagtigde appèlriggaam aan om die appèl te hanteer;

3.1.6 hanteer prosedurele besware teen besluite van die Algemene Sinode in terme van Reglement 23;

3.1.7 bestudeer vooraf alle beskrywingspunte in verband met wysigings van die *Kerkorde* en die reglemente van die Algemene Sinode;

3.1.8 adviseer die Algemene Sinode of sy gevolmagtigde(s) in gevalle waar die Algemene Sinode by die hof aangekla mag word;

3.1.9 wend doelbewuste pogings aan om kerklike sake uit die hof te hou en dra sorg dat sake wat wel in die hof beland, behoorlik verdedig word;

- 3.1.10 win in opdrag van die Algemene Sinode of sy gevolmagtigde(s) regsadvies in;
- 3.1.11 hersien die *Kerkorde* en die reglemente van die Algemene Sinode en bedien die Algemene Sinode met voorstelle; en
- 3.1.12 gee terugvoer aan die ASM en doen verslag aan die Algemene Sinode.

#### **4. KONSTITUERING EN VERGADERINGS**

- 4.1 Die taakspan konstitueer so spoedig moontlik na aanwysing en vergader wanneer nodig.
- 4.2 'n Dagbestuur word by konstituering saamgestel, bestaande uit 'n voorsitter, ondervoorsitter, skriba en die aktuaris. Die dagbestuur vergader wanneer nodig.
- 4.3 Die taakspan benoem subtaakspanne na behoefte.

## **REGLEMENT 8**

### **REGLEMENT VIR DIE ALGEMENE TAAKSPAN PREDIKANTESAKE**

#### **1. NAAM**

Die Algemene Taakspan Predikantesake (ATP).

#### **2. SAMESTELLING EN FUNKSIONERING**

- 2.1 Die taakspan word soos volg deur die Algemene Sinode/Algemene Sinodale Moderamen (ASM) saamgestel en bestaan uit tien lede (vergelyk 2.3.1 tot 2.3.5 hieronder) wat gesamentlik oor kundigheid en ervaring beskik op die terreine van begeleiding en versorging van predikante, voortgesette bedieningsontwikkeling van predikante, bestuur van diensverhoudinge, kerkreg en statutêre reg.
- 2.2 Minstens twee lede van die taakspan moet afgevaardigdes na die Algemene Sinode wees.
- 2.3 Die taakspan word soos volg saamgestel:
  - 2.3.1 die verteenwoordiger van die Algemene Taakspan Regte, met sekundus;
  - 2.3.2 die bestuurder van die kantoor vir predikantesake;
  - 2.3.3 twee verteenwoordigers van teologiese opleiding (een uit die Algemene Kuratorium en een van die Forum vir Voortgesette Bedieningsontwikkeling), met sekundi;
  - 2.3.4 twee verteenwoordigers van predikantebegeleiding, met sekundi; en
  - 2.3.5 vier kundiges, waarvan minstens twee nie-gelegitimeerdes moet wees, met sekundi.
  - 2.3.6 Die taakspan kan twee addisionele lede koöpteer.
- 2.4 Die kantoor vir predikantesake hanteer die skribaats van die taakspan.
- 2.5 Die voorsitter en ondervoorsitter word deur die taakspan uit eie geledere aangewys.
- 2.6 Vakatures in die taakspan word op aanbeveling van die taakspan deur die ASM aangevul.
- 2.7 Die voorsitter, bestuurder en nog 'n lid deur die taakspan aangewys, tree as dagbestuur op.
- 2.8 Die dagbestuur hanteer, in terme van die taakspan se opdrag, alle administratiewe en spoedeisende sake met verslag aan die taakspan.
- 2.9 Die taakspan lewer verslag aan die ASM en die Algemene Sinode.
- 2.10 Die taakspan word, wanneer nodig, bygestaan deur een lid uit elke sinode, deur die betrokke sinode of sy gevolmagtigde aangewys, met sekundus. Wanneer die taakspan 'n bevoegdheidsaangeleentheid hanteer, geskied dit waar moontlik in oorleg met die lid deur die betrokke sinode aangewys.

### **3. WERKSTERREINE EN OPDRAG**

#### **3.1 Beleid**

Adviseer die kerkverband oor die beleid wat verband hou met predikantesake.

#### **3.2 Subtaakspanne**

Die taakspan verrig die volgende funksies deur middel van die volgende subtaakspanne:

##### **3.2.1 Bevoegdheidsaangeleenthede**

3.2.1.1 die verlening van bedieningsbevoegdheid (legitimasië) op aanbeveling van die kuratoria;

3.2.1.2 die opskorting of ontneming van bedieningsbevoegdheid (legitimasië) op aanbeveling van 'n ring of sy gevolmagtigde ondersoekliggaam

3.2.1.3 die instandhouding van die bevoegdheidsregister;

3.2.1.4 die advisering van aansoekers en kerkvergaderinge oor die hantering van aansoeke om herstel van bevoegdheid en die vereistes wat daarvoor nagekom moet word; en

3.2.1.5 die verskaffing van tersaaklike inligting aan kerklike vergaderings en die *Jaarboek* oor bedieningsbevoegdheid van proponente, predikante, emeriti, diensleraars en standplaasleraars.

##### **3.2.2 Diensverhoudinge**

3.2.2.1 die gee van advies en leiding aan sinodes, ringe en kerkrade, in oorleg met die aktuaris van die Algemene Sinode én die aktuaris van die betrokke sinode, met die oog op eenvormige en gekoördineerde optrede ten opsigte van hantering van diensverhoudinge;

3.2.2.2 die samestelling en bywerk van die *Bestuurshandleiding vir Diensverhoudinge*; en

3.2.2.3 die jaarlikse aanbeveling van die riglyne vir vergoedingspakkette van predikante aan in oorleg met die Algemene Taakspan Fondse en Bates.

##### **3.2.3 Arbeidsregtelike Dienste**

3.2.3.1 die instandhouding van 'n persoonlike lêer waarin die bevindinge van alle tug/dissiplinêre en appèlsake, waarby studente en gelegitimeerdes betrokke is, aangeteken word;

3.2.3.2 die gee van advies en leiding aan ondersoekliggame, in oorleg met die aktuaris van die Algemene Sinode én die aktuaris van die betrokke sinode, met die oog op eenvormige en gekoördineerde optrede ten opsigte van die hantering van tug- en dissiplinêre ondersoeke, appèlsake en beslissings oor bedieningsbevoegdheid;

3.2.3.3 die verskaffing van opleiding en toerusting ten opsigte van arbeidsregtelike en gemeenregtelike aangeleenthede in tug- en/of dissiplinêre optrede en bevoegdheidsaansoeke; en

3.2.3.4 die gee van advies aan ondersoekliggame, in oorleg met die aktuaris van die Algemene Sinode en die sinodes.

##### **3.2.4 Standplaasverwisseling**

3.2.4.1 die gee van advies en leiding aan die sinodale predikantebegeleiers, sinodes, ringe, kerkrade en predikante oor die beleid ten opsigte van standplaasverwisseling; en

### 3.2.5 **Predikantebegeleiding**

Die gee van advies en leiding, in oorleg met die sinodale predikante begeleiers, oor die beleid ten opsigte van die implementering van die *A tot Z-beleid*, predikante-versorging en die mentorprogram.

### 3.2.6 **Opleiding en VBO**

3.2.6.1 die lewering van jaarliks insette by die Algemene Kuratorium rakende behoeftes van opleiding aan studente;

3.2.6.2 die lewering van jaarlikse insette by die Forum vir Voortgesette Bedieningsontwikkeling en diensverskaffers rakende voortgesette bedieningsontwikkeling; en

3.2.6.3 die administrasie van krediete vir voortgesette bedieningsontwikkeling.

### 3.3 **Sekretariaat**

Die sekretariaat van die taakspan verrig die volgende funksies:

3.3.1 die gereelde instandhouding van die bevoegdheidsregister;

3.3.2 die hantering van alle korrespondensie rakende die bevoegdheidsregister; en

3.3.3 die hantering van die skribaats van die taakspan.

### 3.4 **Begroting en befondsing**

3.4.1 Die begroting vir die kantoor en werksaamhede van die taakspan word deur die Algemene Taakspan Fondse en Bates in samewerking met die taakspan hanteer.

3.4.2 Die werksaamhede van die kantoor, taakspan en subtaakspanne wat betrekking het op alle bevoegdheidsaangeleenthede, word befonds uit die registrasiefooi, wat slegs hiervoor aangewend mag word. Die jaarlikse registrasiefooi word deur die Algemene Taakspan Fondse en Bates, op aanbeveling van die taakspan, vasgestel.

3.4.3 Die Algemene Sinode begroot vir werksaamhede van die taakspan wat op die terrein van die Algemene Sinode tuishoort.

## 4. **VERGADERINGS**

4.1 Die taakspan vergader minstens kwartaalliks waarvan een vergadering per jaar uitgebrei word met een verteenwoordiger uit elke sinode op die koste van die sinode.

4.2 Die subtaakspanne vergader soos nodig.

## 5. **KANTOOR VIR DIE TAAKSPAN**

5.1 Die taakspan:

5.1.1 neem 'n bestuurder in diens wat die kantoor bestuur en die werksaamhede koördineer.

5.1.2 skep 'n ondersteunde infrastruktuur vir die werksaamhede.

## REGLEMENT 9

### REGLEMENT VIR DIE ALGEMENEKURATORIUM

#### 1. NAAM

Algemene Kuratorium (AK).

#### 2. SAMESTELLING

Die taakspan word soos volg deur die Algemene Sinode/Algemene Sinodale Moderamen (ASM) saamgestel:

- 2.1 twee verteenwoordigers van elk van die kuratoria te Stellenbosch, Pretoria en Bloemfontein, verkieslik die voorsitter en skriba, met sekundi;
- 2.2 een verteenwoordiger van elke sinode wat nie reeds in terme van 2.1 hierbo verteenwoordig is nie, met sekundus;
- 2.3 een verteenwoordiger van elk van die NG Kerkdosesenterade aan die teologiese fakulteite te Stellenbosch, Pretoria, Bloemfontein, Hugenate Kollege en Namibia Evangelical Theological Seminary (NETS), verkieslik die voorsitter, met sekundus;
- 2.4 twee verteenwoordigers deur die Algemene Sinode of die ASM aangewys, waaronder 'n verteenwoordiger van die Algemene Taakspan Predikantesake, met sekundi; en
- 2.5 een verteenwoordiger van die Forum vir Voortgesette Bedieningsontwikkeling, met sekundus.
- 2.6 Elke lidkerk van die NG Kerkfamilie kan op eie koste in adviserende hoedanigheid een verteenwoordiger benoem.
- 2.7 Die vul van vakatures word deur die ASM of sy gevolmagtigde bekragtig op aanbeveling van die sinode, kuratoria en taakspan.

#### 3. OPDRAG

##### 3.1 Die taakspan

- 3.1.1 sien in die algemeen om na die teologiese opleiding en verdere bedieningsontwikkeling, en adviseer die Algemene Sinode in verband met die beleid wat gevolg moet word ten opsigte van teologiese opleiding en verdere bedieningsontwikkeling in die lig van die *A tot Z-beleid*;
- 3.1.2 koördineer en bespreek sake van gemeenskaplike belang vir die onderskeie teologiese fakulteite en die sentra vir verdere bedieningsontwikkeling soos deur die Algemene Sinode en/of die kuratoria na die taakspan verwys, en gee daaroor leiding;
- 3.1.3 bepaal in oorleg met die kuratoria en NG Kerkdosesenterade die minimum vereistes vir toelating tot die evangeliebediening en lê dit aan die Algemene Sinode vir goedkeuring voor;
- 3.1.4 sien in oorleg met die kuratoria toe dat die vereistes vir toelating tot die evangeliebediening in die NG Kerk in die akademiese programme aan die

- universiteit en/of in die programme van die sentra vir bedieningsontwikkeling geïmplementeer word;
- 3.1.5 verseker deur genoegsame kontrole en toepaslike optrede dat die teologiese opleiding by die onderskeie teologiese opleidingsentra geskik en gelykwaardig is;
  - 3.1.6 bepaal die bestek vir *colloquium doctum*, waaraan die kuratoria uitvoering gee;
  - 3.1.7 oefen in geval van verdienstelike aansoeke vir legitimasië 'n diskresie uit om 'n aanbeveling aan 'n kuratorium te maak ten opsigte van aanvullende studie en/of eksaminering met die oog op legitimasië;
  - 3.1.8 beskik oor diskresionêre bevoegdheid rakende die vereistes vir die (aanvullende) opleiding van tweede loopbaan-aansoekers;
  - 3.1.9 hou register van alle studente wat gekeur is vir die teologiese opleiding en voorsien die Algemene Taakspan Predikantesake van 'n afskrif daarvan;
  - 3.1.10 ontvang verslae van kuratoria oor die verdere bedieningsontwikkeling van gelegitimeerdes by die onderskeie sentra vir verdere bedieningsontwikkeling en voorsien die Algemene Taakspan Predikantesake van afskrifte daarvan;
  - 3.1.11 kompilleer, sonder inhoudelike wysiging, die verslae van die onderskeie kuratoria met die oog op een samevattende verslag aan die Algemene Sinode; en
  - 3.1.12 gee terugvoer aan die ASM en doen verslag aan die Algemene Sinode.

#### **4. KONSTITUERING EN VERGADERINGS**

- 4.1 Die taakspan konstitueer so spoedig moontlik na aanwysing en vergader hoogstens twee maal per jaar.
- 4.2 'n Dagbestuur word by konstituering saamgestel, bestaande uit 'n voorsitter, 'n ondervoorsitter en 'n skriba.
- 4.3 Die taakspan kan subtaakspanne benoem vir advies rakende enige aspek van teologiese opleiding.

### **PREDIKANTE**

Die volgende nege reglemente (10-19) handel oor die bevoegdheid van predikante, proponente, emeriti, diens- en standplaasleraars asook die onderskeie predikantsposte. Ter wille van duidelikheid gee die ATR die volgende kort verklarings van elk:

“*bevoegdheid*” - word deur die kerk (Algemene Sinode) by wyse van legitimasië aan persone verleen wat aan al die neergelegde vereistes voldoen om kerklike/ampswerk te verrig.

“*legitimasië*” - 'n plegtige geleentheid waar kandidate wat aan die neergelegde vereistes voldoen 'n *legitimasiëverklaring* aflê.

“*proponent*” - is 'n persoon wat die vereiste teologiese opleiding deurloop het, aan die neergelegde vereistes voldoen, *legitimasiëverklaring* afgelê het, maar nog nie georden of in die amp van predikant bevestig is nie

“*predikant*” - is 'n persoon wat gelegitimeer, georden en bevestig is en in aktiewe kerklike diens werksaam is.

- “*emeritus*” - is ’n gelegitimeerde wat weens die bereiking van die aftree-ouderdom uit die amp van predikant getree het en steeds oor ampsbevoegdheid beskik. Onder sekere voorwaardes kan emeriti nog in ’n aktiewe bediening staan tot op 70 jaar waarna finaal uit aktiewe kerklike diens getree moet word.
- “*standplaasleeraar*” - is ’n persoon wat die spesifieke vereiste kerklike opleiding vir standplaasleeraars deurloop het, gelegitimeer, georden en bevestig is om diens te lewer binne die konteks waarvoor hy/sy opgelei en beroep is, byvoorbeeld: Khoi-San, Dowes en Portugeessprekendes.
- “*diensleeraar*”- is ’n persoon wat die spesifieke vereiste kerklike opleiding deurloop het, gelegitimeer is en georden en bevestig is om diens te lewer met ’n spesifieke toegespitsde opdrag ooreenkomstig die terrein van opleiding, soos byvoorbeeld: pastoraat, jeug- en familiebediening, diakonaat, geloofsvorming, evangelisasie, kerkplanting, aanbidding, bejaardebediening, berading, lering, onderrig, uitreikbediening, gemeente-administrasie/bestuur en sending.
- “*voltydse predikantspos*” - is ’n voltydse pos met ’n onbepaalde termyn en verwys na die bediening van ’n predikant wat in ’n bepaalde gemeente bevestig is en wat volgens diensooreenkoms sy volle lewensonderhoud van die gemeente ontvang.
- “*deelydse predikantspos*” - is ’n pos vir ’n predikant wat op ’n deelydse basis vir ’n onbepaalde termyn ’n predikantspos in ’n gemeente beklee en verwys na die bediening van ’n predikant wat in ’n bepaalde gemeente bevestig is en wat volgens diensooreenkoms vir ’n vasgestelde gedeelte van sy tyd diens lewer aan die gemeente en slegs ’n gedeelte van sy/haar lewensonderhoud van die gemeente ontvang.
- “*tentmakerpos*”- is ’n deelydse pos vir ’n predikant wat op ’n vrywillige basis soos ooreengekom, vir ’n onbepaalde termyn ’n bediening in ’n gemeente verrig sonder enige vergoeding en vertoon die karakter van ’n gewone pos vir predikant.
- “*vastetermynpredikantspos*” - is ’n pos vir ’n predikant en duur vir ’n vasgestelde termyn (met ’n aanvangs- en einddatum) van langer as ses maande, met ’n duidelik omskrewe taak/opdrag en wat termineer na die termyn en na voltooiing van die taak. ’n Vastetermynpos kan voltydse of deelydse gevul word.
- “*brugpredikantspos*”- ’n brugpredikantspos is vastetermynpos wat aan die hand van die prosedure van ’n vastetermynposte geskep en gevul word. ’n Brugpredikant het ’n spesifieke funksie om om ’n gemeente te begelei in die oorgangstyd wat ontstaan nadat ’n vakature ontstaan het en die pos weer gevul word.

## REGLEMENT 10

### REGLEMENT VIR DIE OPLEIDING EN LEGITIMASIE VAN PREDIKANTE, DIENSLERAARS EN STANDPLAASLERAARS

#### 1. PLEK WAAR EN OOREENKOMS MET DIE OPLEIDINGSENTRA

Teologiese opleiding in die NG Kerk geskied aan die teologiese fakulteite van en sentra vir bedieningsontwikkeling by die universiteite van Stellenbosch, Pretoria en Bloemfontein, asook die Hugenote Kollege en die Namibiese Evangeliese Teologiese Seminarium, en word by wyse van skriftelike ooreenkoms tussen die betrokke sinode(s) en die onderskeie opleidingsentra bepaal, op voorwaarde dat dit nie in stryd is met die besluite van die Algemene Sinode soos in hierdie *reglement* vervat nie.

#### 2. SAMESTELLING EN FUNKSIES VAN DIE ALGEMENE KURATORIUM, DIE PLAASLIKE KURATORIUM EN SUBTAAKSPANNE OF SUBKOMMISSIES

##### 2.1 Algemene Kuratorium

Die Algemene Kuratorium is die taakspan van die Algemene Sinode wat oorhoofse verantwoordelikheid dra vir teologiese opleiding (vergelyk *Reglement 9 vir die Algemene Kuratorium*).

##### 2.2 Plaaslike Kuratorium

###### 2.2.1 Samestelling

Die kuratorium word saamgestel uit verteenwoordigers van die sinode(s) binne wie se gebied die teologiese fakulteit geleë is. Die getal lede in 'n kuratorium word bepaal deur die betrokke sinode(s). Ander sinodes het die reg om op eie koste elk een verteenwoordiger in die onderskeie kuratoria te benoem. Een lid van die NG Kerkdosenteraad het sitting in die kuratorium. Indien die betrokke sinode(s) 'n predikant(e) met opdrag teologiese opleiding benoem en vir diens aan die kerkverband bevestig het, dien hierdie persoon in die kuratorium.

###### 2.2.2 Funksies

Die kuratorium

2.2.2.1 gee uitvoering aan die Algemene Sinode se beleid én reglemente en die betrokke sinode(s) se bepalings en besluite vir teologiese opleiding;

2.2.2.2 is verantwoordelik vir die keuring, begeleiding, versorging, toesighouding oor, eksaminering en aanbeveling vir toelating tot die evangeliebediening van teologiese studente wat by die betrokke universiteit/opleidingsentrum ingeskryf is en gelegitimer wil word in die NG Kerk;

2.2.2.3 voer onderhandelinge en sluit ooreenkomste met die universiteit /opleidingsentrum oor die kerk se vereistes vir die aard van en die toesig oor teologiese opleiding;

- 2.2.2.4 benoem en stel teologiese dosente aan vir diens aan die kerkverband, of benoem dosente in die teologie wat met kerklike inspraak deur die universiteit/opleidingsentrum aangestel word in 'n pos toegeken aan die kerk, of akkrediteer dosente wat sonder kerklike inspraak deur die universiteit aangestel is;
- 2.2.2.5 sorg vir en hou toesig oor die verdere bedieningsontwikkeling van gelegitimeerdes binne die gebied van die betrokke sinode(s) in die lig van die *A tot Z-beleid*; en
- 2.2.2.6 werk saam met die ander kerklike vennote by die universiteit/opleidingsentrum, die ander kuratoria van die Kerk, die Algemene Kuratorium en ander gereformeerde kerke op ekumeniese gebied om teologiese opleiding te bevorder en uit te bou.

### **2.3 Dagbestuur**

Elke kuratorium wys 'n dagbestuur aan ooreenkomstig die bepalinge en/of reglemente van die betrokke sinode(s).

### **2.4 Subtaakspanne of subkommissies**

Die kuratorium behartig die volgende funksies self of word in die uitvoering daarvan bygestaan en/of geadviseer deur subtaakspanne of subkommissies:

#### **2.4.1 Keuring**

- 2.4.1.1 'n Voornemende teologiese student word deur die ring met 'n gemotiveerde verslag as teologiese kandidaat by die kuratorium aangemeld. Die kuratorium word voorsien van 'n skriftelike verklaring deur die sturende gemeente dat die voornemende student 'n lidmaat van die gemeente is. Die kuratorium kan ook 'n student voorlopig toelaat in afwagting van die kennisgewing, verslag en/of verklaring.
- 2.4.1.2 Tot die keuringstaak van die kuratorium behoort die beoordeling van die verslag van die ring, die aanvanklike en verdere persoonlikheidsevaluering van die student, die verkryging van die student se instemming met die kerk se verstaan van die amp van predikant/diensleer soos in die Woord, belydenis, kerklike bepalinge, roepingsverklaring en beleid van die Algemene Sinode uitgedruk.
- 2.4.1.3 Die kuratorium ontmoet vóór die aanvang van teologiese studies die voornemende teologiese student, verkieslik saam met verteenwoordigers van die sturende gemeente en die ring. Die ontmoeting word benut vir gesprek oor die student se roepingsverstaan, geestelike groei, kerklike betrokkenheid, beskikbaarheid van studiebeurse en bedieningsmoontlikhede.
- 2.4.1.4 Gekeurde teologiese studente word tydens die formele inskrywing aan die universiteit/opleidingsentrum deur die kuratorium bygestaan, van advies oor kursusaangeleenthede bedien en aan die Kerk se betrokkenheid by die teologie fakulteit bekendgestel.
- 2.4.1.5 Die kuratorium verleen jaarliks op grond van 'n skriftelike keuringsverslag toestemming aan teologiese studente om voort te gaan met hulle teologiese studie.

- 2.4.1.6 'n Teologiese student se keuring kan deur die kuratorium opgeskort of beëindig word wanneer akademiese vordering, klasbywoning, gedrag en kerklike meelewing nie bevredigend is nie.
- 2.4.1.7 Die kuratorium doen jaarliks aan die stuurende gemeente, die student se huidige gemeente, die betrokke ring(e) en die Algemene Kuratorium verslag oor die student se vordering.
- 2.4.1.8 Die keuring van 'n teologiese student aan een van die kerklik-goedgekeurde teologiese opleidingsentra kan deur die kuratorium na 'n ander kerklik-goedgekeurde teologiese opleidingsentrum oorgedra word, mits die nodige dokumentasie daarmee saamgaan en die ander kuratorium die keuring aanvaar.
- 2.4.1.9 Finale keuring vind by eksaminering voor legitimasie plaas.
- 2.4.2 Begeleiding, versorging en toesighouding**
- 2.4.2.1 Die begeleiding van teologiese studente het 'n versorgingswaarde en 'n keuringsfunksie. Begeleiers doen jaarliks op grond van goeie persoonlike kontak met die teologiese student en aan die hand van 'n skriftelike verslag 'n aanbeveling met die oog op die voortsetting van die opleiding.
- 2.4.2.2 Die begeleiding en versorging van teologiese studente is 'n geïntegreerde proses waarin gemeente(s), die ring(e) en die kuratorium 'n eie bydrae lewer.
- 2.4.2.3 Die kuratorium begelei en versorg die teologiese student ten opsigte van akademiese ontwikkeling, spiritualiteitsvorming én persoonsontwikkeling.
- 2.4.2.4 Die kuratorium neem verantwoordelikheid vir die bedieningsgeskiktheid en bedieningsgereedheid van die teologiese student, waarby ingesluit word deurlopende professionele vorming en 'n praktiese gemeentejaar.
- 2.4.2.5 Die kuratorium stel 'n gedragskode vir teologiese studente op en hou toesig en oefen dissipline uit oor die student se nakoming van die gedragskode.
- 2.4.2.6 Die gemeente waar die teologiese student tydens opleiding lidmaat is, is verantwoordelik vir die pastorale versorging van en toesig oor die leer en lewe van die student.
- 2.4.3 Dissiplinerings**
- 2.4.3.1 Teologiese studente staan vir die duur van hulle opleiding onder die gesamentlike toesig van die kuratorium en die NG Kerk dosenteraad.
- 2.4.3.2 As lidmate en ampsdraers in gemeentes staan teologiese studente, wat hulle leer en lewe betref, onder die toesig en tug van die kerkvergadering wat kerkordelik daarvoor verantwoordelik is. Die kuratorium kan met die betrokke kerkvergadering daarvoor in verbinding tree.
- 2.4.3.3 Hierdie toesig hef nie die toesig van die universiteit oor teologiese studente op nie.
- 2.4.3.4 Die kuratorium wys vir 'n dissiplinêre ondersoek 'n gevolmagtigde ondersoekliggaam van minstens drie lede uit eie geledere en/of uit die betrokke sinode(s) se gebied aan. Die ondersoekliggaam kan kundiges as volwaardige lede koöpteer.
- 2.4.3.5 'n Teologiese student kan tydens 'n dissiplinêre ondersoek deur 'n NG Kerklidmaat bygestaan word.

2.4.3.6 Die dissiplinêre ondersoek geskied in terme van die toepaslike voorskrifte van die *Reglement 22 vir Tug en Vermaning*.

2.4.3.7 Die volgende dissiplinêre maatreëls kan deur die ondersoekliggaam opgelê word:

2.4.3.7.1 'n vermaning in 'n privaatgesprek of ter vergadering van die ondersoekliggaam;

2.4.3.7.2 die opskorting vir 'n vasgestelde tydperk van die student se keuring met die oog op legitimasie; of

2.4.3.7.3 die beëindiging van die student se keuring met die oog op legitimasie.

2.4.3.8 Die betrokke sinode(s) of sy/hulle gevolmagtigde(s) hanteer die appèl van 'n teologiese student teen 'n dissiplinêre maatreël(s).

#### **2.4.4 Eksaminering en aanbeveling vir legitimasie**

2.4.4.1 Elke kuratorium benoem 'n proponentskommissie ooreenkomstig die bepalings en/of reglemente van die bepaalde sinode(s).

2.4.4.2 Die proponentskommissie neem die proponentseksamen (vergelyk 6. hieronder) af en beveel die suksesvolle kandidate by die kuratorium aan vir legitimasie deur die Algemene Taakspan Predikantesake.

2.4.4.3 Die proponentskommissie is deurlopend betrokke by die proses van opleiding ten einde te verseker dat die opleiding beantwoord aan die behoeftes van die kerk.

### **2.5 NG Kerkdosenteraad**

2.5.1 Die NG Kerkdosenteraad word saamgestel uit die teologiese dosente deur die NG Kerk benoem aan die teologiese fakulteit van die universiteit/opleidingsentrum en die sentrum vir bedieningsontwikkeling van die kerk by die universiteit.

2.5.2 Die NG Kerkdosenteraad is saam met die kuratorium verantwoordelik vir die vorming van teologiese studente met die oog op die bediening in die NG Kerk en die ander lidkerke van die NG Kerkfamilie.

2.5.3 Die kuratorium word deur ten minste een lid, wat nie 'n aanstelling by die universiteit/opleidingsentrum of sentrum vir bedieningsontwikkeling het nie, in die NG Kerkdosenteraad verteenwoordig.

## **3. TEOLOGIESE DOSENTE**

### **3.1 Benoeming, aanstelling, akkreditering en bevestiging**

3.1.1 Die benoeming en aanstelling van teologiese dosente by universiteite/opleidingsentra waar predikante, diensleraars en standplaasleraars vir die NG Kerk opgelei word, kan op een van twee maniere geskied:

3.1.1.1 Die universiteit/opleidingsentrum kan 'n dosent aanstel na inspraak deur die kerk soos bepaal in die ooreenkoms tussen die betrokke universiteit/opleidingsentrum en die sinode(s). Die kuratorium benoem en bevestig sodanige dosent as kerklike dosent van die NG Kerk. Sien *Reglement 19 vir Gekoppelde Predikantspos*.

- 3.1.1.2 Die kuratorium kan, ná oorleg met die betrokke universiteit/opleidingsentrum, 'n dosent aan die sentrum vir bedieningsontwikkeling benoem, aanstel en bevestig vir diens aan die kerkverband. Die universiteit word versoek om sodanige kerklike dosent te akkrediteer om ook as dosent aan die teologiese fakulteit op te tree. Sien *Reglement 19 vir Gekoppelde Predikantspos*.
- 3.1.2 In beide gevalle word die posbeskrywing en profiel bekendgestel in die *Kerkbode*.
- 3.1.3 Die benoeming en bevestiging van kerklike dosente in doseerposte wat deur die kerk geskep en gevul word, geskied in terme van artikel 8.2 en artikel 8.4 van die *Kerkorde*.
- 3.1.4 Doseerposte wat deur die universiteit/opleidingsentrum ingevolge 'n ooreenkoms aan die kerk toegeken is, word gevul in terme van die reëls en kriteria deur die universiteit/opleidingsentrum in oorleg met die kerk bepaal, en word befonds soos tussen die universiteit/opleidingsentrum en die kerk ooreengekom.
- 3.1.5 Teologiese dosente aan die universiteit/opleidingsentrum wat sonder die kerk se inspraak aangestel is, kan deur die kuratorium as kerklike dosente geakkrediteer word. Slegs benoemde en geakkrediteerde dosente kan kerkspesifieke en kerkeie opleiding vir teologiese studente van die NG Kerk aanbied.
- 3.1.6 Die benoeming en akkreditering van kerklike dosente deur die kuratorium, word in die *Kerkbode* vir approbasie deur die kerkverband voorgelê.
- 3.1.7 Teologiese dosente wat deur die kuratorium benoem is, beskik oor die bevoegdheid van predikant in die NG Kerk. Proponente word met handoplegging bevestig en verkry sodoende die bevoegdheid van predikant.

## **3.2 Vereistes by benoeming**

- 3.2.1 By die benoeming van teologiese dosente, word aan die volgende vereistes voldoen:
  - 3.2.1.1 die persoon moet oor die bevoegdheid- van predikant of proponent in die NG Kerk beskik;
  - 3.2.1.2 die persoon moet oor die nodige akademiese kwalifikasies beskik en aan die ander posvereistes voldoen;
  - 3.2.1.3 die persoon moet kerklik betrokke wees en oor genoegsame ondervinding in die kerklike bediening beskik; en
  - 3.2.1.4 die persoon moet 'n onbetwyfelbare voorstander van die gereformeerde leer wees.

## **3.3 Dissiplinerings**

- 3.3.1 As lidmate en ampsdraers in gemeentes, staan teologiese dosente, wat hulle leer en lewe betref, onder die toesig en tug van die kerkvergadering wat kerkordelik daarvoor verantwoordelik is. Die kuratorium kan die betrokke kerkvergadering daarvoor raadpleeg.
- 3.3.2 Wanneer 'n klag oor 'n dosent se leer en lewe ontvang word, word dit na die verantwoordelike ring verwys vir hantering. Die kuratorium kan ook 'n klag oor die leer en lewe van 'n dosent by die ring aanhangig maak. Waar 'n ring besluit

om 'n teologiese dosent 'n tugmaatreël(s) in terme van Artikel 64 van die *Kerkorde* op te lê en sodanige tugmaatreël die teologiese dosent se diensverhouding by die universiteit beïnvloed, word 'n ooreenkoms rakende die voortgesette diens van die dosent tussen die kerk en die universiteit/opleidingsentrum daarvoor aangegaan.

- 3.3.3 Die kuratorium hou toesig oor en is verantwoordelik vir die bestuur van die diensverhouding van teologiese dosente wat by 'n sentrum vir bedieningsontwikkeling vir diens aan die kerkverband aangestel is.
- 3.3.4 Die universiteit/opleidingsentrum hou toesig oor en is verantwoordelik vir die bestuur van die diensverhouding van teologiese dosente wat as personeel van die universiteit/opleidingsentrum aangestel is. Die bepalinge soos deur die universiteit/opleidingsentrum in dié verband neergelê, geld vir dissiplinêre optrede. Waar dissiplinêre maatreëls deur die universiteit/opleidingsentrum toegepas 'n teologiese dosent se diens aan die kerk beïnvloed, word 'n ooreenkoms rakende die voortgesette diens van die dosent tussen die kerk en die universiteit/opleidingsentrum daarvoor aangegaan.
- 3.3.5 Navrae en gerugte oor die leer en lewe van teologiese dosente word aan die hand van die volgende protokol hanteer:
  - 3.3.5.1 Navrae/vrae word op skrif gestel en aan die betrokke Kuratorium gegee.
    - 3.3.5.1.1 Die navraag word deur die Kuratorium hanteer binne die groter teologiese tema waarbinne dit hoort. Dit sou byvoorbeeld kon wees: Skrifgesag; Hermeunetiek; Skrifuitleg; Christologie; sondebegrip ens.
    - 3.3.5.1.2 Die kuratorium (indien nodig in samewerking met ander sinodale bedienings soos byvoorbeeld STLAS) bepaal die resente en relevante kerklike beleid hieroor, wat kan dien as raamwerk waarbinne die gesprek plaasvind. (Oor byvoorbeeld Skrifbeskouing en Skrifgesag kan die Algemene Sinode besluite van 2002 en 2004 gebruik word ens.) Hierdie kerklike besluite en beleidsraamwerke sal soos en wanneer nodig saam met die belydenisskrifte van die kerk en die Skrif dien as raamwerk vir die beoordeling van die betrokke saak.
  - 3.3.5.2 Eerste aanmeldingsgesprek: Die Kuratorium nooi die dosent na 'n gesprek waarin die navraag in persoon aan die dosent oorgedra word. Aangesien die raamwerk die kerk se standpunt oor die aangeleentheid is, sou die dosent se standpunt en siening oor die kerk se beleid hieroor, asook sy/haar persoonlike geloofsoortuiging ter sprake kan kom.
  - 3.3.5.3 Gesprek met die studente of persoon wat die navraag doen: In 'n opvolggesprek word die student of die persoon wat die navraag doen ook ingenuoi in 'n gesprek. (Dit kan fisies of virtueel geskied). Hierdie kan 'n reeks gesprekke wees totdat die dosent en die persoon wat die navraag gedoen het tevrede is dat vrae beantwoord is, en vrae uitgeklaar is.
  - 3.3.5.4 Indien die beswaarde steeds nie tevrede is nie en oordeel dat hier 'n leertugondersoek behoort te geskied, tree hy/sy self met die ring in verbinding.

## **4. VEREISTES VIR TEOLOGIESE OPLEIDING**

### **4.1 Algemene vereistes**

- 4.1.1 Die teologiese opleiding van die kerk is primêr gefokus op die opleiding en vorming van bedienaars van die Woord vir die bediening van die kerk.
- 4.1.2 Benewens hierdie hoofmerk hou die teologiese opleiding rekening met
  - 4.1.2.1 die opleiding van teoloë wat die kerk en evangelie kan dien deur te doseer, navorsing te doen en ander gespesialiseerde werk (soos Bybelvertaling) vir die kerk te doen;
  - 4.1.2.2 die opleiding vir ander ampte, dienste en bedieninge soos wat die kerk dit nodig ag (soos jeugwerkers, pastorale werkers, evangeliste); en
  - 4.1.2.3 die opleiding en toerusting van lidmate vir hulle dienswerk volgens hulle gewes binne en buite die gemeente.
- 4.1.3 In die gereformeerde tradisie neem teologiese opleidingsinstansies saam met gemeentes en die kerkverband verantwoordelikheid vir die opleiding vir die amp van predikant in die kerk.
- 4.1.4 In die opleiding van predikante/diensleraars word aandag gegee aan die geïntegreerde vorming van kennis (logos), karakter (etos) en vaardighede en houdings (patos). Gereelde aandag word tydens teologiese opleiding aan ten minste die volgende by studente gegee:
  - 4.1.4.1 geestelike lewe en geestelike dissiplines;
  - 4.1.4.2 roepingsbewustheid;
  - 4.1.4.3 psigiese gesondheid en persoonsgroei;
  - 4.1.4.4 Bybelse en teologiese kennis en insig;
  - 4.1.4.5 kontekstuele insig en oordeel;
  - 4.1.4.6 verstaan van die kerk en van die roeping en werking van gemeentes; en
  - 4.1.4.7 vorming van spesifieke vaardighede wat vir die bediening nodig is.
- 4.1.5 Sinodes doen alles in hulle vermoë om die praktyk van verdere bedieningsontwikkeling goed te vestig en uit te bou. Teologiese en bedieningsopleiding is 'n bedieningslange taak en verantwoordelikheid en daarom vestig die NG Kerk 'n tradisie van bedieningslange leer by gelegitimeerdes van die kerk.

### **4.2 Akademiese vereistes**

- 4.2.1 Die NG Kerk vereis van sy studente 'n sesjarige opleiding in gereformeerde teologie, wat die verkryging van die gepaardgaande grade insluit. Hierdie sesjarige opleiding moet ten minste die suksesvolle voltooiing van Grieks II en Hebreeus II insluit.
- 4.2.2 Die akademiese vereistes vir toelating tot die evangeliebediening in die NG Kerk word deur die Algemene Kuratorium in oorleg met die kuratoria en die NG Kerkdosenterade geformuleer en deur die Algemene Sinode goedgekeur. Die Algemene Kuratorium en die kuratoria sien toe dat dié vereistes in die akademiese programme by die teologiese fakulteite en/of by die programme van die sentra vir bedieningsontwikkeling geïmplementeer word.

4.2.3 Kursusse, modules en programme word deur die universiteit/opleidingsentrum in die volgende vakdissiplines aangebied:

4.2.3.1 Ou Testamentiese Wetenskap;

4.2.3.2 Nuwe Testamentiese Wetenskap;

4.2.3.3 Kerkgeskiedenis en Kerkreg/Ekklesiologie;

4.2.3.4 Dogmatiek en Etiek/Sistematiese Teologie;

4.2.3.5 Godsdienst- en Sendingwetenskap/Missiologie; en

4.2.3.6 Praktiese Teologie.

4.2.4 Spesialisering in 'n bepaalde studiegebied, insluitende 'n verhandeling oor 'n gespesialiseerde onderwerp, is 'n akademiese vereiste vir teologiese opleiding.

### **4.3 Bykomende vereistes**

4.3.1 Die volgende is bykomende vereistes vir teologiese opleiding en toelating tot die evangeliebediening as predikant:

4.3.1.1 die suksesvolle eksaminering van die kandidaat se kennis van die Bybel en die belydenisskrifte;

4.3.1.2 die suksesvolle evaluering van die kandidaat se taal- en kommunikasievaardigheid;

4.3.1.3 die gereelde bywoning van kursusse, modules en programme deur die universiteit en die sentrum vir bedieningsontwikkeling aangebied;

4.3.1.4 die suksesvolle voltooiing van die bedieningsvorming en die verpligte gemeentejaar ooreenkomstig die voorskrifte van die kuratorium en die NG Kerkdosenteraad; en

4.3.1.5 die geslaagde lewering van 'n proefpreek onder toesig van 'n dosent en 'n lid van die proponentskommissie in 'n gemeente tydens die finale studiejaar.

4.3.2 Kandidate wat toelating tot die evangeliebediening verlang, word verplig om ten minste drie jaar van die opleiding voltyds aan een van die kerklik-goedgekeurde teologiese opleidingsentra te voltooi. In die geval van tweedeloopbaanstudente en ander hoogs uitsonderlike gevalle kan die Algemene Kuratorium, op voorlegging van 'n kuratorium, hierdie vereiste ter syde stel.

4.3.3 Die Algemene Kuratorium beskik oor diskresionêre bevoegdheid rakende die vereistes vir die (aanvullende) opleiding van tweede loopbaan aansoekers en voorsien die kuratorium en die NG Kerk dosenteraad van die vereistes waaraan 'n bepaalde aansoeker moet voldoen.

## **5. GEMEENTEJAAR**

5.1 Opleiding in bedieningsvorming vir predikante geskied tydens al die studiejare, maar in besonder tydens die finale studiejaar.

5.2 Gedurende die finale studiejaar werk studente vir hulle bedieningsvorming vanaf die begin van Februarie tot die einde van Oktober onder toesig van 'n gemeentepredikant én by 'n gemeente deur die kuratorium en die NG Kerkdosenteraad goedgekeur.

- 5.3 Teologiese studente onderteken die volgende onderneming voor die aanvang van die gemeentejaar:

*“Ek, die ondergetekende, onderskryf hiermee opreg en as voor die Here die leer soos vervat in die Formuliere van Eenheid van die gereformeerde kerke, naamlik die sewe en dertig artikels van die Nederlandse Geloofsbelydenis, die Heidelbergse Kategismus en die Dordtse Leerreëls. Ek verklaar met my hele hart dat ek dit aanvaar en bely as in ooreenstemming met die Woord van God; dat ek die leer getrou sal handhaaf; dat ek my op die bevordering van godsdienskennis, Christelike sedes, orde en eendrag met alle ywer sal toelê; en ek verbind my om, sou dit bevind word dat ek teen enige gedeelte van hierdie verklaring en belofte gehandel het, my aan die uitsprake van die bevoegde kerkvergadering te onderwerp.”*

- 5.4 Die kerkraad van die gemeente waar die teologiese student die gemeentejaar doen, voorsien die kuratorium en die NG Kerk dosenteraad vóór einde September van ’n verslag oor die praktiese opleiding. Die betrokke kuratorium en NG Kerkdosenteraad voorsien die *pro forma* vir hierdie verslag (vergelyk ook 6.2.7 hieronder).

## **6. PROPONENTSEKSAMEN**

- 6.1 Die proponentseksamen geskied aan die einde van die finale studiejaar of so gou doenlik daarna en word deur die proponentskommissie afgeneem.
- 6.2 Die ondersoek tydens die proponentseksamen geskied sover moontlik in die teenwoordigheid van die kandidaat en handel oor:
- 6.2.1 die kandidaat se roeping en beweegredes om predikant te word;
  - 6.2.2 die kandidaat se getuienis oor geloofsekerheid en die ervaring van die genade van God;
  - 6.2.3 die kandidaat se lewensverhaal, wat sorg vir geestelike, fisiese en emosionele gesondheid insluit;
  - 6.2.4 die kandidaat se getuienis oor die verstaan van die inhoud van ’n predikant se ampswerk, wat bewussyn van gawes en groeigeleenthede insluit;
  - 6.2.5 die kandidaat se bedieningsgeskiktheid en bedieningsgereedheid;
  - 6.2.6 die kandidaat se spiritualiteitsvorming en persoonsontwikkeling, soos onder meer deur die deurlopende persoonlikheidsevaluering bepaal;
  - 6.2.7 die inhoud van die verslag van die gemeente(s) waar die kandidaat tydens die gemeentejaar praktiese opleiding ondergaan het, onder meer die kandidaat se gemeentelike meelewing, gehegtheid aan die leer van die kerk, voorbeeldigheid, onbesproke gedrag en getroue uitvoering van diensverpligtinge;
  - 6.2.8 die inhoud van die verslag van die sentrum vir bedieningsontwikkeling oor die kandidaat se kerkeie opleiding, professionele vorming, kennis van die Bybel en die belydenisskrifte en taal- én kommunikasievaardighede (vergelyk ook 4.3.1.1 en 4.3.1.2 hierbo);
  - 6.2.9 die inhoud van die verslag van die gemeente waar die teologiese student tydens opleiding lidmaat is oor die kandidaat se leer en lewe;

- 6.2.10 die inhoud van die verslag van die dosent en die lid van die proponentskommissie oor die beoordeling van die kandidaat se proefpreek (vergelyk 4.3.1.5 hierbo); en
- 6.2.11 die inhoud van die verslag van die NG Kerkdosenteraad oor die kandidaat se akademiese kennis, gehegtheid aan die leer van die kerk, aanwending van teoretiese akademiese kennis in die praktyk van die bediening en die suksesvolle voltooiing van die vereiste universiteits/opleidingsentrum kursusse, -modules en -programme.
- 6.3 Die kuratorium beslis op aanbeveling van die proponentskommissie dat 'n kandidaat aan die neergelegde vereistes voldoen het en daarom by die Algemene Sinode vir legitimasie aanbeveel word (vergelyk Artikel 7 van die *Kerkorde*).
- 6.4 'n Kandidaat wat deur die kuratorium afgewys word, kan weer op 'n tyd soos deur die proponentskommissie bepaal, vir eksaminering en moontlike toelating aanmeld.
- 6.5 Studente van die NG Kerk wat in die buiteland studeer het, lê die proponentseksamen af met die oog op legitimasie deur die Algemene Taakspan Predikantesake.

## 7. COLLOQUIUM DOCTUM

- 7.1 *Colloquium doctum* word by die proponentskommissie afgelê deur
  - 7.1.1 persone wie se terugkeer tot die evangeliebediening deur 'n sinode of sy gevolmagtigde by die kuratorium aanbeveel word; of
  - 7.1.2 persone wat by ander kerke se opleidingsentra tot die evangeliebediening toegelaat is en begeer om predikante in die NG Kerk te word.
- 7.2 Die volgende vereistes vir toelating tot *colloquium doctum* word gestel vir persone wat tot die evangeliebediening in die NG Kerk wil terugkeer:
  - 7.2.1 bewys van goeie sedelike gedrag deur middel van 'n getuigskrif van die kerkraad van die gemeente waarvan die kandidaat lidmaat is;
  - 7.2.2 bewys dat die kandidaat deur die betrokke sinode of sy gevolmagtigde ondersoek is met betrekking tot sy persoonlike geloofsekerheid, persoonlike ondervinding van die genade van God, roepingsbewustheid en geskiktheid vir die evangeliebediening.
- 7.3 Die kuratorium verwys alle persone wat vir *colloquium doctum* aanmeld, vooraf vir persoonlikheidsevaluering.
- 7.4 Die volgende vereistes word gestel vir predikante van gereformeerde kerke met wie die NG Kerk formele ekumeniese bande het, wat begeer om tot die evangeliebediening in die NG Kerk toegelaat te word:
  - 7.4.1 Die predikant in diens van 'n ander gereformeerde kerk dien skriftelik 'n gemotiveerde aansoek in by die kuratorium van een van die teologiese opleidingsentra van die NG Kerk. Hierdie aansoek word vergesel van die getuienis van:
    - 7.4.1.1 die ring van die NG Kerk binne wie se grense hierdie persoon as predikant in die bediening staan of woon (indien nie meer in die aktiewe bediening nie); en

- 7.4.1.2 die kerk of gemeente van waaruit die persoon wil oorkom, indien wenslik of moontlik.
- 7.4.2 'n Skriftelike onderneming rakende die inhandiging van lidmaatskap deur die aansoeker en 'n skriftelike bevestiging van die aanvaarding van lidmaatskap deur 'n gemeente van die NG Kerk word vereis alvorens verder gehandel kan word met die aansoek.
- 7.4.3 In die geval waar aanvullende opleiding vereis word, kan so 'n persoon eers na suksesvolle voltooiing van die aanvullende opleiding én na *colloquium doctum* deur die proponentskommissie by die kuratorium vir legitimasie aanbeveel word.
- 7.4.4 Indien geen verdere aanvullende opleiding vereis word nie, kan die persoon na *colloquium doctum* deur die proponentskommissie by die kuratorium vir legitimasie aanbeveel word.
- 7.5 Die volgende vereistes word gestel vir persone wat 'n volledige of gedeeltelike teologiese opleiding ondergaan het aan die opleidingsentra van gereformeerde kerke met wie die NG Kerk formele ekumeniese bande het:
- 7.5.1 Die persoon wat opleiding by 'n ander gereformeerde kerk se opleidingsentrum ondergaan het, dien skriftelik 'n gemotiveerde aansoek by die kuratorium van een van die teologiese opleidingsentra van die NG Kerk in. Hierdie aansoek word vergesel van 'n skriftelike bevestiging van lidmaatskap van 'n gemeente van die NG Kerk en die getuienis van die ring van die NG Kerk binne wie se grense hierdie persoon woon of lidmaat is.
- 7.5.2 In die geval waar aanvullende opleiding vereis word omrede die teologiese opleiding deur die NG Kerkdosenteraad en die kuratorium as nie-gelykstaande geag word met die opleiding wat die NG Kerk vir sy teologiese studente vereis, kan so 'n persoon eers na suksesvolle voltooiing van die aanvullende opleiding én na *colloquium doctum* deur die proponentskommissie by die kuratorium vir legitimasie aanbeveel word.
- 7.5.3 Indien geen verdere aanvullende opleiding vereis word nie, kan die persoon na *colloquium doctum* deur die proponentskommissie by die kuratorium vir legitimasie aanbeveel word.
- 7.6 Die volgende vereistes word gestel vir persone wat 'n volledige of gedeeltelike teologiese opleiding aan die opleidingsentra van nie-gereformeerde kerke, of aan opleidingsentra wat nie aan 'n kerk verbind is nie, ondergaan het:
- 7.6.1 Van persone wat 'n volledige of gedeeltelike teologiese opleiding aan inrigtings van nie-gereformeerde kerke gevolg het, of aan opleidingsentra wat nie aan 'n kerk verbind is nie, word verwag om die vereiste teologiese studie aan een van die kerklik-goedgekeurde teologiese opleidingsentra van die NG Kerk te voltooi. Die Algemene Kuratorium bepaal in oorleg met die betrokke kuratorium en die NG Kerkdosenteraad die ontbrekende opleiding.
- 7.6.2 Hierdie persone word as teologiese studente aan die universiteit en by die sentrum vir bedieningsontwikkeling beskou en die vereistes wat aan teologiese studente gestel word, is op hierdie persone van toepassing (vergelyk 4. hierbo).
- 7.7 Inhoud van *colloquium doctum*

- 7.7.1 Die Algemene Kuratorium bepaal die bestek vir *colloquium doctum*, waaraan die kuratoria uitvoering gee.
- 7.7.2 Die *colloquium doctum* is 'n ondersoek na die kandidaat se akademiese bekwaamheid, asook na die kandidaat se kennis van die gereformeerde teologie en gehegtheid aan die leer van die Kerk. Dié ondersoek kan mondeling of skriftelik geskied.
- 7.7.3 Die proponentskommissie voorsien die kandidaat van 'n voorgeskrewe bestek vir *colloquium doctum*, sodat onder andere die akademiese bekwaamheid en gehegtheid aan die leer van die kerk aan die hand daarvan ondersoek kan word.
- 7.7.4 By bevredigende aflegging van *colloquium doctum*, word die kandidaat by die kuratorium vir beslissing aanbeveel.
- 7.8 Die kuratorium beslis op aanbeveling van die proponentskommissie dat 'n kandidaat aan die neergelegde vereistes voldoen het en daarom by die Algemene Sinode vir legitimاسie aanbeveel word (vergelyk Artikel 7 van die *Kerkorde*).
- 7.9 'n Kandidaat wat deur die kuratorium afgewys word, kan weer na ses maande by die kuratorium aanmeld vir *colloquium doctum*.

## **8. LEGITIMASIE**

- 8.1 'n Verteenwoordiger van die Algemene Taakspan Predikantesake behartig namens die Algemene Sinode die legitimاسie (vergelyk Artikel 7 van die *Kerkorde*).
- 8.2 Die legitimاسie geskied by geleentheid van 'n openbare kerklike byeenkoms wat vir dié doel deur die kuratorium gereël word. Die legitimاسie kan ook in uitsonderlike gevalle plaasvind tydens of na afloop van 'n vergadering van die kuratorium.
- 8.3 Goedgekeurde kandidate word met 'n gepaste woord, die aflegging van die *plegtige legitimاسieverklaring* en die oorhandiging van die *Akte van Legitimاسie* tot die evangeliebediening toegelaat. Die *Akte van Legitimاسie* word onderteken deur twee lede van die Algemene Taakspan Predikantesake.
- 8.4 Die kandidaat antwoord op en onderteken die volgende *plegtige legitimاسieverklaring*:  
 “Ek, die ondergetekende, ....., oortuig van my roeping deur die Here en toegelaat tot die openbare bediening van die Woord in die Nederduitse Gereformeerde Kerk, verklaar hiermee voor die Here
  1. dat ek glo dat die leer soos vervat in die drie algemene belydenisskrifte en die drie Formuliere van Eenheid - naamlik die Nederlandse Geloofsbelydenis (*Confessio Belgica*), die Heidelbergse Kategismus en die Dordtse Leerreëls, ooreenkom met die Woord van God;
  2. dat ek hierdie leer getrou sal verkondig en uitleef;
  3. dat ek alle dwalinge wat met hierdie leer in stryd is, sal weerlê en alles in my vermoë sal doen om dit uit die kerk te weer;

4. dat, indien ek later enige beswaar of ander insig oor die leer ontwikkel, ek dit nie sal leer of bevorder voordat ek dit aan 'n bevoegde kerkvergadering vir 'n beslissing voorgelê het nie;
5. dat ek my aan die *Kerkorde* van die NG Kerk sal hou;
6. dat ek, om beroep te word, volgens die *Kerkorde* en besluite van die Nederduitse Gereformeerde Kerk sal optree;
7. dat ek my op die uitbreiding van die Koninkryk van God sal toelê deur die bevordering van die kennis van, vertroue in en gehoorsaamheid aan die Drie-enige God;
8. dat ek myself verbind tot voortgesette bedieningsontwikkeling.

Ek verbind my deur my handtekening tot al die voormelde.”

- 8.5 Gelegitimeerdes beskik oor die bevoegdheid van proponent in die NG Kerk. Die registrasie by die Algemene Taakspan Predikantesake en die jaarlikse aanmelding met die oog op die behoud van die bevoegdheid van proponent word gereël deur die *Reglement 11 vir die Bevoegdheid van Predikante, Proponente en Emeriti*.

## **9. BYKOMENDE SINODALE BEPALINGE**

Die betrokke sinode(s) wat verantwoordelikheid vir die teologiese opleiding by 'n kerklik goedgekeurde teologiese opleidingsentrum aanvaar het, kan na gelang van die plaaslike omstandighede en verhoudinge met die betrokke universiteit/opleidingsentrum, eie of bykomende bepalinge neerlê, op voorwaarde dat dit nie in stryd is met die besluite van die Algemene Sinode soos onder meer in hierdie reglement vervat nie.

## REGLEMENT 11

### REGLEMENT VIR DIE BEVOEGDHEID VAN PREDIKANTE, DIENSLERAARS, STANDPLAASLERAARS, PROPONENTE EN EMERITI

#### 1. ALGEMENE UITGANGSPUNTE

- 1.1 Daar moet by elke aspek van die reëling van die bevoegdheid (wat verpligtinge en regte insluit) van predikante, diensleraars, proponente en emeriti daarvan uitgegaan word dat dit Christus is wat sy kerk deur die Woord en die Heilige Gees regeer en dat Hy dit doen deur mense wat Hy daartoe roep, toerus en in sy diens stel.
- 1.2 Die verlening van bevoegdheid om as predikant/diensleer/standplaasleer beroep te word, asook die behoud daarvan, geskied deur die Algemene Sinode of sy gevolmagtigde (vergelyk Artikel 7 van die *Kerkorde*) op aanbeveling van 'n kuratorium van die NG Kerk.
- 1.3 Die beëindiging van bevoegdheid as predikant/diensleer/standplaasleer geskied deur die Algemene Sinode of sy gevolmagtigde (vergelyk Artikel 7 van die *Kerkorde*) op aanbeveling van 'n ring of sy gevolmagtigde.
- 1.4 Die bevoegdheid vir die uitvoering van die werk van die predikant/diensleer /standplaasleer is nie geleë in bepaalde vermoëns of besondere kwaliteite, of 'n aparte geestelike stand wat beklee is met 'n blywende eer of mag en wat deur ordening verkry word nie. Daar bestaan nie so iets soos 'n ampsbevoegdheid wat aan die persoon kleef en aan sodanige persoon sekere regte, voorregte en bevoegdhede verleen sonder dat die betrokke die amp binne gemeentelike verband beklee nie. Bevoegdheid word verleen aan gelegitimeerdes wat kerklike werk doen, hetsy in 'n gemeente, die kerkverband, 'n teologiese fakulteit of 'n kerklike instansie waarvoor die posvereistes dié van 'n opgeleide predikant is.
- 1.5 Wanneer 'n ring na 'n tug- of dissiplinêre ondersoek die reg om beroep te word, tydelik wegneem, het dit nie sonder meer die permanente verlies van ampsbevoegdheid tot gevolg nie.
- 1.6 'n Persoon kan 'n predikant/diensleer/standplaasleer wees indien hy/sy op 'n wettige wyse beroep is, die nodige approbasie verkry het, en in 'n gemeente bevestig is (Artikel 5 en 8 van die *Kerkorde*). Die amp van predikant/diensleer/standplaasleer funksioneer dus binne gemeentelike verband.
- 1.7 Predikante/diensleraars/proponente wat in 4.4.3 hieronder genoem, naamlik diegene wat deur die kerkverband benoem is vir diens aan die kerkverband, word

deur 'n gemeente beroep en in 'n gemeente in die amp bevestig.

## **2. VERLENING VAN BEVOEGDHEID OM BEROEP TE WORD**

### **2.1 Die bevoegdheid om beroep te word**

Die bevoegdheid om beroep te word, word aan die volgende gelegitimeerdes verleen nadat hulle aan die gestelde vereistes voldoen het:

2.1.1 standplaasleraars

2.1.2 diensleraars

2.1.3 proponente

2.1.4 predikante

2.1.5 emerituspredikante jonger as 70 jaar

### **2.2 Standplaasleraar**

2.2.1 'n Standplaasleraar is 'n persoon wat die vereiste kerklike opleiding deurloop het, 'n legitimasie ontvang het wat beperk is tot 'n toegespitse bediening, georden en bevestig is om 'n toegespitste diens te lewer binne die besondere konteks waarvoor hy/sy opgelei en beroep is.

2.2.2 'n Standplaasleraar verrig 'n toegespitste bediening in 'n besondere konteks, soos byvoorbeeld: Khoi-San, Dowes, Portugeessprekendes, ens.

2.2.3 'n Standplaasleraar moet aan die volgende vereistes voldoen:

2.2.3.1 'n innerlike oortuiging van die Here se roeping tot die kerklike bediening;

2.2.3.2 die voorgeskrewe kerklike opleiding deurloop het;

2.2.3.3 oor persoonlike en teologiese vaardighede beskik, asook 'n gesonde geestelike lewe wat insluit:

2.2.3.3.1 gevestigde geestelike dissiplines;

2.2.3.3.2 psigiese gesondheid en geestelike volwassenheid;

2.2.3.3.3 Bybelse-, kerklike- en teologiese kennis en insig;

2.2.3.3.4 kontekstuele insig en hermeneutiese oordeel;

2.2.3.3.5 verstaan van die kerk en van gemeentes se roeping en funksionering;

2.2.3.3.6 opgeleiding in spesifieke vaardighede vir 'n bepaalde konteks;

2.2.3.4 die suksesvolle eksaminering van die kandidaat se kennis van die Bybel en die belydenisskrifte;

2.2.3.5 die suksesvolle evaluering van taal- en kommunikasievaardigheid;

2.2.3.6 die suksesvolle voltooiing van die bedieningsvorming en die verpligte praktykvorming ooreenkomstig die voorskrifte van die Algemene Kuratorium

(vergelyk Reglement 10, *Reglement vir die Opleiding en Legitimasië van Predikante*); en

2.2.3.7 die geslaagde lewering van 'n proefpreek onder toesig van 'n dosent en 'n lid van die proponenteskommissie in 'n gemeente tydens die finale studiejaar;

2.2.3.8 deur die Algemene Sinode gelegitimeer wees.

2.2.4 Standplaasleraars moet jaarliks vóór 31 Mei by die Algemene Taakspan Predikantesake aanmeld ten einde aan te dui of hulle steeds beskikbaar is vir bediening in die kerk. Hierdie aanmelding moet vergesel wees van die bygewerkte vertroulike inligting en die nodige jaarlikse registrasiegelde soos bepaal deur die Algemene Sinode of sy gevolmagtigde.

2.2.5 Standplaasleraars word met goedkeuring van die ring in 'n spesifieke gemeente vir 'n spesifieke opdrag bevestig. Wanneer standplaasleraars nie meer hierdie taak verrig nie, of verhuis, verloor hulle die bevoegdheid wat verleen is om die werk te verrig.

2.2.6 Standplaasleraars het preekbevoegdheid en kan die sakramente bedien in die besondere konteks van sy/haar bediening.

2.2.7 Standplaasleraars is nie beroepbaar vir ander bedieninge buite die spesifieke bediening/konteks waarvoor hulle opgelei is nie.

### **2.3 Diensleeraar**

2.3.1 'n Diensleeraar is 'n persoon wat die vereiste kerklike opleiding deurloop het, 'n legitimasië ontvang het wat beperk is tot 'n toegespitste bediening en georden en bevestig is om diens te lewer ooreenkomstig die terrein van opleiding.

2.3.2 'n Diensleeraar verrig 'n toegespitste bediening (soos op die legitimasiësertifikaat aangedui) in een of meer van die volgende toegespitste velde: pastoraat, jeug- en familiebediening, prediking, diakonaat, geloofsvorming, evangelisasië, gemeente-administrasie/bestuur, kerkplanting, aanbidding, bejaardebediening, berading, lering, uitreikbediening en sending.

2.3.3 'n Diensleeraar moet aan die volgende vereistes voldoen:

2.3.3.1 'n innerlike roeping hê en oortuig wees van die Here se roeping tot die kerklike bediening;

2.3.3.2 die voorgeskrewe kerklike opleiding deurloop het;

2.3.3.3 oor persoonlike en teologiese vaardighede beskik, asook 'n gesonde geestelike lewe wat insluit:

2.3.3.3.1 gevestigde geestelike dissiplines;

2.3.3.3.2 psigiese gesondheid en geestelike volwassenheid;

2.3.3.3.3 Bybelse, kerklike en teologiese kennis en insig;

- 2.3.3.3.4 kontekstuele insig en hermeneutiese oordeel;
- 2.3.3.3.5 verstaan van die kerk en van gemeentes se roeping en funksionering;
- 2.3.3.3.6 opgelei wees in spesifieke vaardighede in 'n bepaalde studieveld byvoorbeeld jeug, pastoraat, diakonaat, berading, en so meer wat vir die kerklike bediening toepaslik is;
- 2.3.3.4 die suksesvolle eksaminering van die kandidaat se kennis van die Bybel en die belydenisskrifte;
- 2.3.3.5 die suksesvolle evaluering van die kandidaat se taal- en kommunikasievaardigheid;
- 2.3.3.6 die suksesvolle voltooiing van die bedieningsvorming en die verpligte praktykvorming ooreenkomstig die voorskrifte van die Algemene Kuratorium (vergelyk Reglement 10, *Reglement vir Opleiding en Legitimasië van Predikante*);
- 2.3.3.7 die geslaagde lewering van 'n proefpreek onder toesig van 'n dosent en 'n lid van die proponentskommissie in 'n gemeente tydens die finale studiejaar; en
- 2.3.3.8 deur die Algemene Sinode gelegitimeer wees.
- 2.3.4 Diensleraars moet hulle jaarliks vóór 31 Mei by die Algemene Taakspan Predikantesake aanmeld ten einde aan te dui of hulle steeds beskikbaar is vir bediening in die kerk. Hierdie aanmelding moet vergesel wees van die bygewerkte vertroulike inligting en die nodige jaarlikse registrasiegelde soos bepaal deur die Algemene Sinode of sy gevolmagtigde.
- 2.3.5 Diensleraars word met goedkeuring van die ring in 'n spesifieke gemeente vir 'n spesifieke opdrag bevestig. Wanneer 'n diensleraar nie meer hierdie taak verrig nie, verloor hy/sy die bevoegdheid wat verleen is om die werk te verrig. Bevoegdheid word behou wanneer 'n diensleraar in dieselfde toegespitste bediening beroep word of toestemming by die ATP gekry het om weens 'n *bona fide* rede bevoegdheid te behou.
- 2.3.6 Diensleraars het preekbevoegdheid en kan die sakramente bedien in die konteks van hulle bediening.
- 2.3.7 Diensleraars is nie beroepbaar vir ander bedieninge buite die toegespitste bedieningsveld waarvoor hulle opgelei is nie.
- 2.3.8 Diensleraars werk altyd onder toesig van die betrokke plaaslike gemeente se predikant of in uitsonderlike omstandighede onder die toesig van 'n ringspredikant.
- 2.3.9 Diensleraars kan ook in tentmakerposte, deelydse poste en termyn-bepaalde poste bevestig word.

### 3. PROPONENT

- 3.1 'n Proponent is 'n persoon wat die vereiste teologiese opleiding deurloop het, gelegitimeer is en nog nie georden of in die amp van predikant bevestig is nie en aan die volgende vereistes voldoen:
  - 3.1.1 'n innerlike roeping hê en oortuig wees van die Here se roeping tot die kerklike bediening;
  - 3.1.2 teologiese opleiding deurloop het;
  - 3.1.3 wat gedurende teologiese opleiding deurentyd bewys gelewer het van die volgende persoonlike en teologiese vaardighede :
    - 3.1.3.1 'n gevestigde geestelike lewe en geestelike dissiplines;
    - 3.1.3.2 'n roepingsbewustheid;
    - 3.1.3.3 psigiese gesondheid en geestelike volwassenheid;
    - 3.1.3.4 Bybelse, kerklike en teologiese kennis en insig;
    - 3.1.3.5 kontekstuele insig en oordeel;
    - 3.1.3.6 'n verstaan van die kerk en van gemeentes se roeping en funksionering;
    - 3.1.3.7 die vorming van spesifieke vaardighede wat vir die bediening nodig is;
  - 3.1.4 die suksesvolle eksaminering van die kandidaat se kennis van die Bybel en die belydenisskrifte;
  - 3.1.5 die suksesvolle evaluering van die kandidaat se taal- en kommunikasievaardigheid;
  - 3.1.6 die suksesvolle voltooiing van die bedieningsvorming en die verpligte gemeentejaar ooreenkomstig die voorskrifte van die kuratorium en die NG Kerkdosenteraad (vergelyk *Reglement 10 vir die Opleiding en Legitimasie van Predikante*); en
  - 3.1.7 die geslaagde lewering van 'n proefpreek onder toesig van 'n dosent en 'n lid van die proponentskommissie in 'n gemeente tydens die finale studiejaar;
- 3.2 'n Proponent word deur die Algemene Sinode gelegitimeer nadat aan al bogenoemde kriteria voldoen is.
- 3.3 'n Proponent het preekvergunning en kan dus op uitnodiging van 'n gemeente die Woord- en sakramentsbediening behartig.
- 3.4 Persone wat reeds by legitimasie die normale aftree-ouderdom van 65 jaar bereik het, ontvang die bevoegdheid om beroep te word in terme van *Reglement 16 vir Vastetermynpredikantsposte* (punt 4).
- 3.5 Proponente moet hulle jaarliks vóór 31 Mei by die Algemene Taakspan Predikantesake aanmeld ten einde aan te dui of hulle steeds beskikbaar is vir

beroeping. Hierdie aanmelding moet vergesel wees van 'n vertroulike aanbeveling oor die persoon se gemeentelike meelewing, uitgereik deur die kerkraad van die gemeente waar die persoon lidmaat is.

- 3.6 Aangesien proponente onder die opsig van die kerkraad staan, word dit van die kerkraad verwag om op die hoogte te bly van die leer en lewe van proponente wat onder sy opsig val.
- 3.7 Proponente mag op uitnodiging van 'n kerkraad die Woord verkondig en sakramente bedien tydens eredienste en ander geleenthede.
- 3.8 Die volgende voormalige predikante behou die bevoegdheid om beroep te word, maar ontvang die bevoegdheid as proponent:
  - 3.8.1 Predikante wat op grond van Artikel 11 vooraf by die Algemene Taakspan Predikantesake toestemming ontvang om hulle diensooreenkoms met die gemeente te beëindig.
  - 3.8.2 Predikante wat met die oog op verdere studie demissie ontvang het (vergelyk *Reglement 20 vir Verlof van Predikante*, punte 5.4 en 5.5).
  - 3.8.3 Predikante wie se diensooreenkoms, met behoud van bevoegdheid, deur die ring beëindig (losgemaak is van die gemeente) is in ooreenstemming met artikel 12.7 en *Reglement 21 vir die Bestuur van Diensverhoudinge vir Predikante by Ongeskiktheid en Onvermoë*, asook *Reglement 22 vir Tug en Vermaning*.
  - 3.8.4 Predikante wat deur ander erkende denominasies (vergelyk *Reglement 26 vir die Verhouding tot ander Kerke en Groepe*) beroep word en wat vooraf by die Algemene Taakspan Predikantesake toestemming ontvang het.
  - 3.8.5 Indien die man of vrou van 'n predikant in diens van 'n gemeente of die kerkverband verplaas word, en dit meebring dat demissie verleen moet word en die diensverhouding beëindig word.

#### **4. DIE BEVOEGDHEID VAN PREDIKANT**

- 4.1 Predikante is persone wat die vereiste teologiese opleiding deurloop het, gelegitimeer is, verdere bedieningsontwikkeling ondergaan, reeds georden is en wat voldoen aan die beskrywing soos uiteengesit in 3.1 tot 3.2 wat handel oor 'n proponent.
- 4.2 Gelegitimeerdes wat oor predikantsbevoegdheid beskik, is persone wat:
  - 4.2.1 op wettige wyse beroep (of benoem) is,
  - 4.2.2 die nodige approbasie verkry het, en
  - 4.2.3 bevestig en georden is.
- 4.3 Elke predikant wat in 'n gemeente in die amp bevestig is, beskik oor volle

ampsbevoegdheid en beklee die amp soos omskryf in Artikel 9 van die *Kerkorde*.

- 4.4 Elke predikant wat in 'n gekoppelde predikantspos (vir diens aan die kerkverband of 'n pos waar predikantsbevoegdheid vereis word) bevestig is, beskik oor volle ampsbevoegdheid (Vergelyk Reglement 19).

Hierdie persone is

- 4.4.1 predikante wat as kerklike dosente deur die kerkverband benoem is om as NG Kerkdosente teologiese studente aan die kerklik-goedgekeurde teologiese opleiding-sentra van die NG Kerk op te lei;
- 4.4.2 predikante wat deur die kerkverband benoem is vir diens aan ringe, sinodes en die Algemene Sinode; en
- 4.4.3 predikante wat deur die kerkverband benoem is vir diens aan instansies soos die Bybelgenootskap, die Kapelaansdienste of ander instansies wat deur die Algemene Sinode, of die ASM namens die Algemene Sinode, goedgekeur is.
- 4.5 Predikante moet hulle jaarliks vóór 31 Mei by die Algemene Taakspan Predikantesake aanmeld ten einde aan te dui of hulle steeds beskikbaar is vir beroeping. Hierdie aanmelding moet vergesel wees van die bygewerkte vertroulike inligting en die nodige jaarlikse registrasiegelde soos bepaal deur die Algemene Sinode of sy gevolmagtigde.

## **5. DIE BEVOEGDHEID VAN EMERITUS**

- 5.1 Emeriti is gelegitimeerdes wat afgetree het. Emeriti jonger as 70 is beroepbaar, onderworpe aan die volgende vereistes:
- 5.1.1 'n bewys dat alle verpligtinge by emeritaat nagekom is;
- 5.1.2 'n bewys van die persoon se mediese geskiktheid; en
- 5.1.3 'n verklaring deur die ring dat die emeritus bedieningsbevoeg is om weer beroep te word.

Hierdie verklaring word geskryf op grond van 'n getuigskrif wat deur die emeritus se plaaslike gemeente geskryf is en aan die volgende vereistes voldoen:

- 5.1.3.1 Dit moet 'n getuigskrif wees wat deur die kerkraad hanteer en goedgekeur is.
- 5.1.3.2 Die getuigskrif moet op die briefhoof van die gemeente wees met die datum wanneer die betrokke kerkraad die getuigskrif goedgekeur het. Dit moet onderteken word deur die voorsitter en skriba van die kerkraad.
- 5.1.3.3 Inhoudelik moet die getuigskrif die volgende inligting bevat:
- 5.1.3.3.1 Bevestig lidmaatskap by die gemeente.
- 5.1.3.3.2 Getuienis oor die persoon se betrokkenheid in die gemeente.

- 5.1.3.3.3 Getuienis oor die persoon se belydenis van die kerklike leer en sy/haar verbondenheid daaraan.
- 5.2 'n Emeritus is 'n predikant wat ingevolge Artikel 14 van die *Kerkorde* geëmeriteer het en 'n eervolle Akte van Demissie by Emeritaat ontvang het.
- 5.3 'n Emeritus (ouer as 70 jaar) behou die bevoegdheid van predikant en kan in terme van Artikel 9 van die *Kerkorde* die bediening van die Woord, die bediening van die sakramente en die diens van die gebede op uitnodiging van 'n gemeente behartig.
- 5.4 'n Emeritus (ouer as 65 en jonger as 70 jaar) is beroepbaar in terme van *Reglement 16 vir Vastetermynpredikantsposte* (punt 4).
- 5.5 'n Emeritus (ouer as 70 jaar) kan nie meer enige kerklike pos vul nie, maar kan voortgaan om die Woord op uitnodiging te bedien en as huweliksbevestiger op te tree.
- 5.6 Ter wille van die behoorlike instandhouding van die bevoegdheids-register moet emeriti tot op ouderdom 70 jaarliks vóór 31 Mei by die Algemene Taakspan Predikantesake aanmeld.

## **6. BEHOUD VAN BEVOEGDHEID OM BEROEP TE WORD**

Hierdie deel handel oor alle persone wat gelegitimeer is en steeds bevoegdheid wil behou om beroepbaar te wees en/of in 'n kerklike betrekking te dien.

### **6.1 PROPONENTE**

Proponente moet

- 6.1.1 beskik oor 'n bewys dat voortgesette bedieningsontwikkeling (VBO) soos voorgeskryf deur die Algemene Sinode en wat die volle spektrum van alle teologiese vakgebiede en bedieningsontwikkeling dek, deurloop is.
- 6.1.2 ter wille van hulle eie bedieningsontwikkeling en die welwese van die gemeente, ingeskakel wees by die mentorprogram van die kerk.
- 6.1.3 volgens die siklus soos voorgeskryf deur die Algemene Sinode hulle onderwerp aan 'n evalueringsproses onder leiding van die betrokke se ring.
- 6.1.4 hulle aan die gedragskode vir predikante in die NG Kerk onderwerp.
- 6.1.5 jaarliks voor 31 Mei by die Algemene Taakspan Predikantesake aanmeld.

### **6.2 PREDIKANTE**

Predikante moet

- 6.2.1 beskik oor 'n bewys dat voortgesette bedieningsontwikkeling (VBO) soos voorgeskryf deur die Algemene Sinode en wat die volle spektrum van alle

teologiese vakgebiede en bedieningsontwikkeling dek, deurloop is.

- 6.2.2 ter wille van hulle eie bedieningsontwikkeling en die welwese van die gemeente, inskakel wees by die mentorprogram van die kerk.
- 6.2.3 volgens die siklus soos voorgeskryf deur die Algemene Sinode hulle onderwerp aan 'n evalueringsproses onder leiding van die betrokke se ring.
- 6.2.4 hulle aan die gedragskode vir predikante in die NG Kerk onderwerp.
- 6.2.5 hulle volgens die siklus (elke tien jaar), soos voorgeskryf deur die Algemene Sinode, onderwerp aan 'n evalueringsproses oor standplaasverwisseling onder leiding van die ring.
- 6.2.6 jaarliks vóór 31 Mei by die Algemene Taakspan Predikantesake aanmeld.

### **6.3 EMERITUS**

Emeriti moet

- 6.3.1 beskik oor 'n bewys dat voortgesette bedieningsontwikkeling (VBO) soos voorgeskryf deur die Algemene Sinode op datum is.
- 6.3.2 om bo die aftree-ouderdom van 65 jaar weer beroep te word, bereid wees om onderwerp te word aan 'n evalueringsproses onder leiding van die betrokke se ring.
- 6.3.3 onderworpe bly aan die gedragskode vir predikante in die NG Kerk.
- 6.3.4 wanneer hulle jonger as 70 jaar is, jaarliks vóór 31 Mei by die Algemene Taakspan Predikantesake aanmeld.

## **7. VERANDERING VAN TOEGEKENE BEVOEGDHEID VAN GELEGITIMEERDES**

- 7.1 Persone aan wie die Algemene Taakspan Predikantesake die bevoegdheid van predikant, proponent of emeritus toegeken het, behou hierdie bevoegdheid, ook al sou die Algemene Sinode hierdie reglement wysig, mits die oorspronklike voorwaardes wat in hulle geval gegeld het, dieselfde bly.
- 7.2 Predikante, proponente en emeriti van die kerk wat predikant wil word in 'n ander denominasie van gereformeerde belydenis, kan vooraf by die Algemene Taakspan Predikantesake aansoek doen om beroepbaar te bly binne die NG Kerk terwyl die persoon in die ander denominasie werk.
- 7.3 Predikante wat om *bona fide* redes<sup>1</sup> die bediening wil verlaat, kan 'n aansoek rig aan die Algemene Taakspan Predikantesake wat deur die predikant, die kerkraad

---

<sup>1</sup> *Bona fide* redes is wanneer 'n predikant uit sy werkkring bedank sonder dat daar enigsins sprake is van tug- en/of dissiplinêre optrede. Redes kan inhou dat die predikant vir die huidige nie die weg oopsien om met die bediening voort te gaan nie.

en ring gemotiveer word.

- 7.3.1 Die Algemene Taakspan Predikantesake hanteer die aansoek.
- 7.3.2 Indien die aansoek suksesvol is, behou sodanige predikant die bevoegdheid van proponent.
- 7.3.3 Vir die behoorlike instandhouding van die bevoegdheidsregister moet sodanige persone jaarliks vóór 31 Maart by die Algemene Taakspan Predikantesake aanmeld.

## **8. VERLIES VAN BEVOEGDHEID**

- 8.1 Persone hou op om 'n predikant óf, waar van toepassing, emeritus te wees indien hulle
  - 8.1.1 nie meer die werk verrig soos in 4.3 en 4.4 hierbo omskryf nie;
  - 8.1.2 in 'n politieke bestuursliggaam dien of hulle as 'n politieke kandidaat in 'n verkiesing vir enige vlak van regering beskikbaar stel;
  - 8.1.3 hulle deur woord of daad van 'n Nederduitse Gereformeerde gemeente afskei en daarmee hulleself buite die kerkverband van die Nederduitse Gereformeerde Kerk stel;
  - 8.1.4 'n skriftelike bedanking by die betrokke kerkvergadering of sy gevolmagtigde ingedien het en dit aanvaar word;
  - 8.1.5 skriftelik aan die Algemene Taakspan Predikantesake kennis gee dat hulle die amp van predikant neerlê, met kennisgewing aan die ring onder wie se opsig hulle val;
  - 8.1.6 dit deur tughandeling verloor (vergelyk artikel 64.5.4 van die *Kerkorde*).
- 8.2 Persone hou op om proponent te wees indien hulle
  - 8.2.1 in 'n politieke bestuursliggaam dien of hulle as politieke kandidaat in 'n verkiesing vir enige vlak van regering beskikbaar stel;
  - 8.2.2 hulle deur woord of daad van 'n Nederduitse Gereformeerde gemeente afskei en daarmee hulleself buite die kerkverband van die Nederduitse Gereformeerde Kerk stel;
  - 8.2.3 skriftelik aan die Algemene Taakspan Predikantesake kennis gee dat hulle afstand doen van hulle bevoegdheid as proponent;
  - 8.2.4 dit deur tughandeling verloor (vergelyk artikel 64.5.4 van die *Kerkorde*).
- 8.3 Wanneer 'n persoon ophou om 'n predikant, proponent of emeritus te wees, word die volgende prosedure gevolg:
  - 8.3.1 Die betrokke kerkvergadering stel die Algemene Taakspan Predikantesake van

die verlies van bevoegdheid in kennis.

8.3.2 Die persoon besorg die *Akte van Legitimasië* via die skriba van die ring/ringskommissie aan die Algemene Taakspan Predikantesake terug.

8.3.3 Die Algemene Taakspan Predikantesake gee in die *Kerkbode* kennis van die verlies van bevoegdheid.

## **9. HERSTEL VAN BEVOEGDHEID**

9.1 Eertydse predikante of proponente mag slegs langs die volgende weg weer gelegitimeer word:

9.1.1 Die persoon doen skriftelik aansoek by die ring onder wie se opsig gestaan word. Hierdie aansoek moet

9.1.1.1 'n deeglike motivering bevat waarom die aansoeker proponents- of predikantsbevoegdheid verlang;

9.1.1.2 aandui in watter gemeentes die aansoeker voor verlies van bevoegdheid gedien het;

9.1.1.3 aandui in watter gemeentes en ringe die aansoeker sedert verlies van bevoegdheid gedien en gewoon het;

9.1.1.4 'n beskrywing gee van die aard van die aansoeker se betrokkenheid by die betrokke gemeentes;

9.1.1.5 duidelik uiteensit waarom daar verlies van bevoegdheid plaasgevind het;

9.1.1.6 'n bewys van lidmaatskap van die NG Kerk insluit;

9.1.1.7 'n verklaring van die tugmaatreëls en 'n uiteensetting daarvan (indien van toepassing) bevat; en

9.1.1.8 indien van toepassing, aandui in watter mate daar vergifnis gevra is en rekonsiliasie plaasgevind het ten opsigte van alle partye wat seergekry het of benadeel is as gevolg van die aansoeker se optrede wat aanleiding gegee tot die tughandeling en gevolglike verlies van bevoegdheid.

9.2 Die ring wat die aansoek hanteer kan na gelang van omstandighede 'n verslag vereis:

9.2.1 van 'n onafhanklike mediese praktisyn wat die fisiese gesondheid van die aansoeker bevestig;

9.2.2 van 'n onafhanklike psigiater wat die psigiese toestand van die aansoeker beskryf.

9.2.3 Die koste van hierdie verslae is vir die rekening van die aansoeker.

9.2.4 Die ring kan volgens eie diskresie enige ander getuienis oor die aansoeker inwin.

9.2.5 Hierdie ring ondersoek die aangeleentheid met inagneming van artikel 66.4.5

van die *Kerkorde*. In die geval van 'n eertydse predikant word die getuienis ingewin van al die kerkrade en ringe binne wie se gebied die persoon woonagtig was tydens en sedert die bevoegdheid verloor is. Getuienis kan ook van kerkrade en ringe ingewin word waar die persoon woonagtig was voordat daar uit die bediening getree is. In die geval van 'n eertydse proponent word sover moontlik die getuienis ingewin van al die kerkrade en ringe binne wie se gebied die persoon woonagtig was voor én nadat proponentsbevoegdheid verloor is.

#### 9.2.6 Die ringskommissie moet

9.2.6.1 al die dokumente met getuienis vooraf deeglik bymekaar maak;

9.2.6.2 indien daar tugmaatreëls toegepas is, deeglik navraag doen na die omstandighede en ook moontlike herstellende maatreëls met die applikant tref (sien 9.1.1.7);

9.2.6.3 vooraf 'n onderhoud met die applikant voer;

9.2.6.4 vasstel of die aansoeker weens 'n nadelige gerug of voor tugondersoek bedank het. (Indien sodanige ondersoek nie voltooi is nie, moet die ring wat oorspronklik die klag/gerug in ontvangs geneem het, die onvoltooide ondersoek eers afhandel voordat die nuwe aansoek hanteer kan word.);

9.2.6.5 al die dokumentasie versamel, die saak deeglik ondersoek, evalueer aan die hand van al die getuienis en omstandighede en 'n aanbeveling aan die ring maak; en

9.2.6.6 'n ringsitting belê, waarna die volle ring die aansoek en aanbeveling van die ringskommissie evalueer en 'n aanbeveling aan die moderamen maak.

9.2.7 Die ring mag 'n billike kosteverhaling van die aansoeker vereis. Die aansoeker word by die indien van die aansoek deur die ring daarvan in kennis gestel.

9.3 Die ring voorsien die sinode/sinodale kommissie/moderamen binne wie se gebied die ring val, van al die tersaaklike stukke, 'n verslag en aanbevelings.

9.3.1 Die skriba van die sinode besorg al die dokumentasie aan die aktuaris van die sinode vir advies, wat dit weer op sy beurt aan die Algemene Taakspan Predikantesake stuur met die oog op advies.

9.3.2 Die sinodale regs-kommissie/kerkordekommissie neem hierna al die dokumente in behandeling, voer 'n onderhoud met die aansoeker en maak 'n aanbeveling vir die moderamen/ sinodale kommissie.

9.3.2.1 Wanneer 'n sinode/sinodale kommissie/moderamen die aansoek behandel, word die applikant ingevolge 7.2 van *Reglement 10 vir die Opleiding en Legitimasië van Predikante* ter vergadering ondersoek met inagneming van die artikel 66.4.4 en 66.4.5 van die *Kerkorde*. Indien die uitslag positief is, word die persoon na 'n proponentskommissie vir *colloquium doctum* verwys. In die geval van artikel

66.4.5 van die *Kerkorde* word die applikant se aansoek na die Algemene Sinode/ASM verwys vir beslissing alvorens vir *colloquium doctum* aangemeld mag word (vergelyk 10 hieronder).

- 9.3.2.2 Die ondersoek ter vergadering word deur die Regskommissie hanteer. Hulle doen die ondersoek vooraf en maak 'n aanbeveling aan die moderamen ter vergadering. Die moderamen neem self hieroor 'n besluit.
- 9.3.2.3 Wanneer 'n aansoek voor 'n sinode self gebring word, mag die applikant tydens die vergadering deur 'n kommissie ondersoek word, met inagneming van al die vereistes hierbo gestel. Indien die uitslag positief is, word 'n aanbeveling dienooreenkomstig voor die vergadering gelê. Indien die aanbeveling van die kommissie negatief is, mag die betrokke applikant die aansoek voor die volle vergadering verdedig of by 'n volgende sinode 'n nuwe aansoek indien.
- 9.3.2.4 Indien die sinodale kommissie/moderamen die aansoek nie goedkeur nie, word dit met opgawe van rede(s) skriftelik aan die applikant bekend gemaak. Teen die beslissing van die sinodale kommissie/moderamen mag die applikant by die sinode appèl aanteken, of by 'n latere geleentheid 'n nuwe aansoek indien.
- 9.3.2.5 Indien 'n applikant om redes wat volgens die oordeel van die vergadering aanvaarbaar is, versoek om nie ter vergadering te verskyn nie, word die aansoek in die persoon se afwesigheid behandel.
- 9.4 Nadat 'n kandidaat goedkeuring verkry het om aan te meld vir *colloquium doctum*, moet dit binne 18 maande geskied.
- 9.5 Na 'n bevredigende *colloquium doctum* by die proponents-kommissie, word die applikant by die Algemene Taakspan Predikantesake vir legitimasie aanbeveel.
- 9.6 Eertydse predikante wat weer gelegitimeer word, beskik oor die bevoegdheid van proponent. Bevestiging in 'n gemeente na die aanname van 'n beroep geskied weer met oplegging van hande.

## **10. HERTOELATING TOT DIE BEDIENING VAN PERSONE WAT IN ARTIKEL 66.4.5 GENOEM WORD**

- 10.1 Waar 'n eertydse predikant of proponent in terme van artikel 66.4.5 van die *Kerkorde* aansoek om hertoelating tot die bediening doen, moet kerkvergaderinge bykomend aan die volgende aandag gee:
- 10.1.1 Daar moet duidelike getuienis van berou en bekering wees.
- 10.1.2 Daar moet voldoende getuienis wees dat die kerklike tug tot sy reg gekom het.
- 10.1.3 Daar moet genoegsame getuienis wees dat die hertoelating tot die bediening sonder skade vir die kerk gedoen kan word.

10.1.4 Die tydsverloop, rugbaarheid, omvang van die skade, restitusie, herstel van verhoudinge, die heil van die kerk, geskiktheid vir die bediening en doelbewuste weerhouding van die ampspligte van predikant moet ook in oorweging geneem word.

10.1.5 In geval van waar verlies van bevoegdheid weens tughandeling (Artikel 66.4.5) geskied het, moet minstens drie jaar verloop voordat 'n aansoek om herstel van bevoegdheid ontvanklik is. Sien Artikel 66.4.5.

## **11. HERTOELATING TOT DIE BEDIENING VAN PERSONE WAT DIE NG KERK VERLAAT HET**

11.1 'n Eertydse predikant of proponent wat na 'n ander kerk of godsdienstige groep oorgegaan het, maar sedertdien weer lidmaat van 'n Nederduitse Gereformeerde gemeente geword het en begeer om weer tot die bediening van die Woord in die NG Kerk toegelaat te word, moet dieselfde prosedure volg soos in punt 9 hierbo vermeld.

11.2 Die *colloquium doctum* word afgeneem in terme van 7.1 tot 7.3 en 7.7 tot 7.9 van *Reglement 10 vir die Opleiding en Legitimasië van Predikante*.

## **12. TOELATING TOT DIE BEDIENING VAN PREDIKANTE UIT ANDER KERKE**

12.1 'n Predikant in diens van 'n gereformeerde kerk met wie die NG Kerk formele ekumeniese bande het, kan tot die evangeliebediening in die NG Kerk toegelaat word, indien voldoen word aan die vereistes gestel onder 7.4 van *Reglement 10 vir die Opleiding en Legitimasië van Predikante*.

## **13 BEVOEGDHEIDSREGISTER EN –SERTIFIKAAT**

13.1 Die Algemene Sinode hou 'n register van alle proponente, standplaasleraars, diensleraars, predikante en emeriti wat oor die bevoegdheid om beroep te word, beskik.

13.2 Die basiese inligting soos vervat in die *Bevoegdheidsregister* word in die *Jaarboek* gepubliseer. Regstellings verskyn in die *Kerkbode*.

13.3 Alvorens 'n kerkraad 'n beroep uitbring of 'n kerkvergadering 'n benoëming maak, moet daar by die kantoor van die Algemene Taakspan Predikantesake vasgestel word of die persone op die groslys wel oor die bevoegdheid beskik om beroep te word.

13.4 Ringe en ander kerkvergaderinge kan, wanneer 'n beroep uitbring

is/benoeming gemaak is, en voordat die beroep/benoeming goedgekeur is, by die kantoor van die Algemene Taakspan Predikantesake vasstel of die beroepene/benoemde wel oor die bevoegdheid beskik om beroep te word.

- 13.5 Proponente, predikante en emeriti wat 'n predikant wil word in 'n ander denominasie van gereformeerde belydenis, kan vooraf by die Algemene Taakspan Predikantesake aansoek doen om 'n bevoegdheidsertifikaat, in terme waarvan bevestiging aan die ander denominasie gegee kan word dat die persoon óf 'n gelegitimeerde proponent, óf 'n geordende predikant óf 'n afgetrede bedienaar van die Woord van die Nederduitse Gereformeerde Kerk is.

#### **14. REGISTRASIE- EN AANSOEKFOOIE**

- 14.1 Die ATFB van die Algemene Sinode stel jaarliks op aanbeveling van die Algemene Taakspan Predikantesake, die registrasie- en aansoekfooie vas.
- 14.2 Die vasgestelde fooie word in die *Kerkbode* gepubliseer en aan die sinodes, kerkrade en gelegitimeerdes deurgegee.
- 14.3 Die betaling van registrasiegeld is verpligtend en wanbetaling van registrasiegeld word aan die ring/sinode gerapporteer om daarmee te handel.

## REGLEMENT 12

### REGLEMENT VIR BEROEPING, BEVESTIGING, DEMISSIE EN EMERITAAT VAN PREDIKANTE, DIENSLERAARS EN STANDPLAASLERAARS

#### 1. ALGEMEEN

- 1.1 'n Predikant/diensleraar/standplaasleraar word beroep vir diens aan die gemeente of benoem vir diens aan die kerkverband (vergelyk Artikel 8.1 en 8.2 van die *Kerkorde*).
- 1.2 'n Predikant/diensleraar/standplaasleraar kan beroep, bevestig en uitgestuur word vir die gemeente se sending-/getuienisaksie of vir sending-/getuienisdiens saam met ander kerke of sendingorganisasies (vergelyk 2.5.1.2 en 2.8 van *Reglement 25 vir Gestuurdheid van die NG Kerk*).
- 1.3 Gelegitimeerdes van die ander lidkerke van die NG Kerkfamilie kan in die NG Kerk beroep en bevestig word, op voorwaarde dat
  - 1.3.1 die beroepene aan die vereistes van die NG Kerk vir opleiding en legitimasie voldoen (vergelyk *Reglement 10*), of
  - 1.3.2 die Algemene Taakspan Predikantesake op aanbeveling van die ring goedgekeur het dat die beroepene met beperkte opdrag bevestig kan word (vergelyk *Reglement 10*).
- 1.4 Gelegitimeerdes van ander gereformeerde kerke met wie die NG Kerk in terme van 'n bilaterale ooreenkoms in volle verhoudinge staan, kan met inagneming van spesifieke vereistes wat die NG Kerk stel, in die NG Kerk beroep en bevestig word (vergelyk 4.3.1 en 4.7.1 van *Reglement 26 vir die Verhouding tot Ander Kerke en Groepe*).
- 1.5 Die bepalinge van hierdie *Reglement* is van toepassing by die beroeping, bevestiging, demissie en emeritaat van predikante/diensleraars/standplaasleraars in voltydse poste, deeltydse poste, tentmakerposte en vastetermynposte.

#### 2. BEROEPING VIR DIENS AAN GEMEENTE

*Aan die einde van hierdie reglement is 'n kontrolelys aangebring om al die stappe in die beroepingsproses te kontroleer*

- 2.1 Die kerkraad van die gemeente beroep 'n predikant/diensleraar/standplaasleraar vir diens aan die gemeente en kry daarvoor die goedkeuring van die lidmate van die gemeente en die ring.

- 2.2 Voordat die beroepsbrief gestuur word, moet
  - 2.2.1 die goedkeuring (approbasie) van die gemeente deur afkondiging verkry word; en
  - 2.2.2 die ring of sy gevolmagtigde skriftelik bevestig dat daar aan al die kerklike vereistes vir die uitbring van die beroep voldoen is.
- 2.3 Besware teen 'n beroep of beroepene word by die betrokke ring of sy gevolmagtigde ingedien, wat dit volgens die bepalinge van die betrokke sinodale gebied hanteer (vergelyk ook 8 hieronder).
- 2.4 Indien nie aan die vereistes voldoen is nie, word die beroep deur die ring of sy gevolmagtigde ongeldig verklaar.

### **3. BENOEMING VIR DIENS AAN KERKVERBAND**

- 3.1 Die ring, sinode of Algemene Sinode se gevolmagtigde benoem 'n predikant, diensleeraar of standplaasleeraar vir diens aan die kerkverband en kry daarvoor die goedkeuring van die kerkverband.
- 3.2 Voordat die benoemingsbrief gestuur word, moet
  - 3.2.1 die goedkeuring (approbasie) van die kerkverband deur bekendmaking van die benoeming in die *Kerkbode* verkry word; en
  - 3.2.2 die betrokke sinodale regs-/kerkordekommissie of sy gevolmagtigde skriftelik bevestig dat daar aan al die kerklike vereistes vir die benoeming voldoen is.
  - 3.2.3 Besware teen 'n benoeming of benoemde word by die betrokke sinode of sy gevolmagtigde ingedien, wat dit volgens die bepalinge van die betrokke sinodale gebied hanteer.

### **4. PROSEDURE BY BEROEPING**

- 4.1 Die proses om die pos te vul (beroepingsproses) kan vooraf deur die kerkraad begin word, met dien verstande dat:
  - 4.1.1 goedkeuring van die ring verkry is (die aard en volhoubaarheid van die pos is van belang);
  - 4.1.2 die proses soos in hierdie reglement (12.4) gevolg word.
- 4.2 Die kerkraad bepaal die kriteria en posvereistes en kan die pos in die *Kerkbode* bekend stel.
- 4.3 'n Beroep word uitgebring vanaf 'n groslys wat deur die kerkraad opgestel is, nadat:
  - 4.3.1 die lys gesuiwer is van name wat nie kwalifiseer nie (byvoorbeeld toepaslike

- opleiding, jare diens, posvereistes).
- 4.3.2 skriftelike bevestiging van die Algemene Taakspan Predikantesake ontvang is dat die kandidate op die groslys beroepbaar is.
- 4.4 Die kerkraad stel 'n groslys aan die hand van een van die volgende wyses saam:
- 4.4.1 Lede van die kerkraad kan tydens die vergadering name op die groslys plaas wat aan die kriteria voldoen. Die beroepingsvergadering vind plaas nadat daar aan 4.3 se vereistes voldoen is.
- 4.4.2 Of een van die volgende:
- 4.4.2.1 Die ringskommissie en/of die Algemene Taakspan Predikantesake kan deur die kerkraad versoek word om vooraf name vir die groslys te verskaf; en/of
- 4.4.2.2 die lidmate van die gemeente kan versoek word om via die kerkkantoor name op die groslys te plaas; en/of
- 4.4.2.3 'n advertensie wat gelegitimeerdes uitnooi om vir die pos aansoek te doen.
- 4.5 Die kerkraad kan aan gelegitimeerdes wie se name vooraf op die groslys geplaas is, 'n vraelys stuur waarin bedieningsgerigte vrae gestel word en/of 'n *curriculum vitae* aanvra.
- 4.6 Die kerkraad kan ook van 'n pre-advieskommissie gebruik maak om 'n verslag op te stel met die oog op die beroep wat uitgebring moet word.
- 4.7 Indien die kerkraad van 'n pre-advieskommissie gebruik maak, word al die name met die beskikbare inligting aan die kommissie voorgelê.
- 4.7.1 Die pre-advieskommissie suiwer die lys van name wat nie kwalifiseer nie (byvoorbeeld opleiding, jare diens, posvereistes) en bepaal aan die hand van die kriteria en posvereistes wie die geskikte persone vir die pos is.
- 4.7.2 Die pre-advieskommissie lê 'n volledige verslag met al die name wat kwalifiseer vir die pos aan die kerkraad voor en maak 'n aanbeveling wat die kerkraad in staat stel om 'n selfstandige en ingeligte besluit te maak.
- 4.8 In geval van die vulling van 'n tentmakerpos, vastetermynpos of brugpredikantpos, hoef daar nie meer as een persoon se naam op die groslys te wees nie.
- 4.9 Vertroulikheid word gehandhaaf ten opsigte van die persoonlike inligting van diegene wie se name op die groslys geplaas is.
- 4.10 Die verteenwoordiger van die ring woon die beroepsvergadering by.
- 4.11 Die beroeping vind met geslote stemwyse plaas, en wel soos volg:
- 4.11.1 Die aanwesige kerkraadslede moet 'n kworum wees.
- 4.11.2 Elke lid van die vergadering moet stem.

- 4.11.3 Persone wat die vergadering in adviserende hoedanigheid bywoon (waaronder die verteenwoordiger van die ring en die lede van die pre-advieskommissie wat nie kerkraadslede is nie), kan aan die bespreking deelneem, maar mag nie stem nie.
- 4.11.4 Die persoon op wie die meeste stemme verenig word, is verkies indien die getal stemme op die persoon uitgebring die volstreekte meerderheid van die aanwesige stemgeregtigdes uitmaak.
- 4.11.5 Indien 'n persoon nie 'n volstreekte meerderheid van stemme kry nie, vind daar 'n verdere stemming plaas uit die name wat die hoogste getal stemme gekry het en saam 'n volstreekte meerderheid vorm.
- 4.11.6 Indien daar 'n staking van stemme is wat nie deur verdere stemming opgelos kan word nie, geskied die beslissing deur die werp van die lot.
- 4.12 In gevalle waar die benoeming deur die kerkverband geskied, sien die kerkvergadering toe dat aan die toepaslike vereistes van hierdie gedeelte van die *reglement* voldoen word.

## **5. BEROEPSBRIEF**

- 5.1 Die kerkraad stel die beroepsbrief op.
- 5.2 Die ringskommissie adviseer die kerkraad in die opstel van die beroepsbrief.
- 5.3 In die geval van benoeming deur die kerkverband, word die advies deur die betrokke sinodale regs-/kerkordekommissie of sy gevolmagtigde gegee.
- 5.4 Die beroepsbrief is die diensaanbod wat aan die hand van Artikel 9 van die *Kerkorde* die diensopdrag en in terme van Artikel 13 van die *Kerkorde* die diensvoordele van die beroepene omskryf.
- 5.5 In gevalle van benoeming deur die kerkverband, word die nodige aanpassings gemaak ten opsigte van die diensopdrag en diensvoordele.
- 5.6 Onderhandeling rakende beskikbaarheid vir die pos en enige diensvoorwaardes, kan slegs plaasvind nadat die beroep uitgebring is.

## **6. KENNISGEWING VAN BEROEP**

- 6.1 Die voorsitter van die kerkraadsvergadering gee dadelik aan die gelegitimeerde wat beroep is, kennis van die beroep wat uitgebring is.
- 6.2 Die *Kerkbode* word onverwyld deur die kerkraad/skriba van die beroepende gemeente in kennis gestel van die uitbring van die beroep (later ook van die aanneming of bedanking daarvan).

## 7. GOEDKEURING VAN BEROEP

- 7.1 Waar 'n predikant/diensleeraar/standplaasleeraar na 'n gemeente beroep word, word die naam van die beroepene op twee agtereenvolgende Sondae tydens die erediens aan die gemeente vir goedkeuring (approbasie) deur die gemeente bekendgemaak.
- 7.2 So gou doenlik na die laaste bekendmaking van die beroep en nadat die tyd vir besware verby is, lê die kerkraad die betrokke stukke aan die skriba van die ring voor.
- 7.3 Die ringskommissie kontroleer of daar aan die volgende kerkordelike vereistes vir die uitbring van die beroep voldoen is:
  - 7.3.1 skriftelike bevestiging van die Algemene Taakspan Predikantesake dat die beroepene na 'n gemeente van die kerk beroepbaar is;
  - 7.3.2 skriftelike bevestiging van die beroepene se huidige gemeente dat die persoon lidmaat is;
  - 7.3.3 skriftelike bevestiging van die konsulent of 'n verteenwoordiger van die ring tydens die beroepingsvergadering dat die korrekte kerkordelike prosedures gevolg is met die uitbring van die beroep;
  - 7.3.4 die voltooide beroepsbrief behoorlik onderteken is deur die gevolmagtigdes van die kerkraad;
  - 7.3.5 skriftelike bevestiging van die huidige ring onder wie se opsig die beroepene staan, dat daar geen tug en/of dissiplinêre ondersoek teen die beroepene hangende is nie en/of dat die persoon beroepbaar is; en
  - 7.3.6 bevestiging deur die beroepende vergadering dat geen wettige beswaar teen die beroep uitgebring is nie.
- 7.4 Waar 'n benoeming deur die kerkverband gemaak word (vergelyk artikel 8.2 van die *Kerkorde*), verkry die vergadering wat die benoeming maak die goedkeuring van die kerkverband deur bekendmaking van die benoeming in die *Kerkbode* en word die stukke genoem in 7.3.1 tot 7.3.6 hierbo aan die sinodale regs-kommissie /kerkordekommissie of sy gevolmagtigde voorgelê vir goedkeuring.
- 7.5 Indien nie aan die vereistes voldoen is nie, word die beroep deur die ring of sy gevolmagtigde, of die benoeming deur die sinodale regs-/kerkordekommissie of sy gevolmagtigde, ongeldig verklaar.
- 7.6 Sodra die beroep deur die ring of sy gevolmagtigde of die benoeming deur die sinodale regs-/kerkordekommissie goedgekeur is, word die beroepsbrief of benoemingsbrief aan die beroepene of benoemde gestuur vir oorweging van die beroep of benoeming.

7.7 Die beroepene het na ontvangs van die beroepsbrief 'n maksimum van veertien dae om die beroep te aanvaar of te bedank, tensy uitstel daartoe deur die kerkraad verleen word.

## **8. BESWARE TEEN BEROEP**

8.1 Enige lidmaat van die beroepende gemeente het die reg om tot 24 uur na die tweede afkondiging van die beroep skriftelik beswaar, met opgawe van rede(s), by die kerkraad in te dien.

8.2 Besware is slegs ontvanklik wanneer dit:

8.2.1 binne die tyd van approbasie ontvang word;

8.2.2 handel oor die leer of lewe van die beroepene;

8.2.3 handel oor prosedurele onreëlmatigheid tydens die beroepingsproses.

8.2.4 Indien die beswaar ontvanklik is, word die beroepingsproses, hangende die uitkoms van die beswaar, opgeskort met kennisgewing aan die gemeente, die ring en die persoon wat beroep is.

8.3 Besware teen die beroep ingebring, word soos volg hanteer:

8.3.1 Die besware word by die skriba van die kerkraad ingedien, wat die voorsitter versoek om spoedeisend die kerkraad byeen te roep om die besware in behandeling te neem.

8.3.2 Indien die besware handel oor onreëlmatighede gedurende die beroepsproses, word dit as 'n appèl teen die besluit van die kerkraad hanteer volgens *Reglement 23 vir Hersiening (revisie), Appèl, Gravamen (beswaar) en Prosedurele Beswaar* met dien verstande dat dit as uiters dringend hanteer sal word en indien enigsins moontlik, binne twee weke afgehandel word. Indien die beswaar gehandhaaf word, word die beroep ter syde gestel.

8.3.3 Indien die besware handel oor die leer of lewe van die beroepene, word dit as 'n tugondersoek hanteer volgens die *Reglement 22 vir Tug en Vermaning*, met dien verstande dat dit as uiters dringend hanteer sal word.

8.3.3.1 Die volgende proses word gevolg:

8.3.3.1.1 Die ringskommissie van die ring waaronder die beroepende gemeente sorteer stel eers vas of die beswaar ontvanklik is in terme van bepaling 8.2 van hierdie reglement.

8.3.3.1.2 Indien dit ontvanklik is, word dit verwys na die ring of sy gevolmagtigde wat oor die persoon wat beroep is opsig het.

8.3.3.1.3 Hierdie ring of sy gevolmagtigde stel ná die ontvangs van die skriftelike beswaar en ná gesprek met die persoon wat beroep is vas of daar bona fide-redes

is waarom die beswaar ondersoek behoort te word.

- 8.3.3.1.4 Indien besluit word dat die besware ondersoek behoort te word, word dit na 'n tugliggaam verwys vir ondersoek, waarop die beroep ter syde gestel word (vergelyk bepaling 7.3.5 van hierdie reglement wat lui: *skriftelike bevestiging van die huidige ring onder wie se opsig die beroepene staan, dat daar geen tug en/of dissiplinêre ondersoek teen die beroepene hangende is nie en/of dat die persoon beroepbaar is*).
- 8.3.4 Indien die besware ongegrond is, word opskorting van die beroep ophef en voortgegaan met die beroep.
- 8.3.5 Indien dit blyk dat die besware gegrond is, word die beroep deur die ring of sy gevolmagtigde ongeldig verklaar.
- 8.3.6 Indien die ring die beroep ongeldig verklaar, gee die kerkraad aan die beroepene daarvan kennis met opgaaf van rede(s) en kan 'n ander beroep uitgebring word.

## **9. DIENSOOREENKOMS**

- 9.1 Na oorweging van die bepalings van die beroepsbrief en enige onderhandelinge daaromtrent, word die diensooreenkoms waarvolgens die predikant/diensleeraar/standplaasleeraar in diens van die gemeente of die kerkverband gaan tree, finaal opgestel.
- 9.2 Die diensooreenkoms bevat inhoudelik die volgende:
  - 9.2.1 die identifikasie van die partye;
  - 9.2.2 die aanhef;
  - 9.2.3 die diensoms krywing (algemene diensverpligtinge – vergelyk Artikel 9 van die *Kerkorde* met gepaardgaande spesifieke verwagtinge).
  - 9.2.4 die vergoeding en byvoordele (vergelyk Artikel 13 van die *Kerkorde*);
  - 9.2.5 die wedersydse erkenning deur die partye dat hulle geskrewe ooreenkoms onderhewig is aan die bepalinge van die *Kerkorde*, die besluite van die Algemene Sinode en die betrokke sinode, soos van tyd tot tyd gewysig;
  - 9.2.6 die aanvangsdatum;  
(In die geval van predikante/diensleeraars/standplaasleeraars in diens van gemeentes of in diens van die kerkverband word die datum van demissie uit die vorige gemeente of werkkring, die aanvangsdatum. In ander gevalle word die aanvangsdatum die datum van bevestiging of 'n datum van indienstreding soos ooreengekom.)
  - 9.2.7 'n verklaring deur die beroepene dat daar geen hangende of dreigende tughandeling teen die persoon is nie en dat die persoon wat beroep is aan die

plegtige *legitimasieverklaring* getrou sal bly;

- 9.2.8 die partye se handtekeninge, met getuies en datum van ondertekening as aanvaarding dat 'n diensooreenkoms tussen die partye tot stand kom.
- 9.3 Die finale diensooreenkoms van 'n predikant, diensleeraar of standplaasleeraar in diens van 'n gemeente word deur die ring of sy gevolmagtigde en in geval van 'n predikant in diens van die kerkverband deur die betrokke sinodale regs-/kerkordekommissie of sy gevolmagtigde goedgekeur. Hierna word die finale ooreenkoms deur beide partye onderteken en kan die bevestiging plaasvind met inagneming van die ander vereistes vir bevestiging.
- 9.4 Hierdie diensooreenkoms kan van tyd tot tyd gewysig word met instemming van beide partye en skriftelike goedkeuring van die ring of sy gevolmagtigde in die geval van 'n predikant/diensleeraar/standplaasleeraar in diens van 'n gemeente, of die betrokke sinodale regs-/kerkordekommissie of sy gevolmagtigde, in die geval van 'n predikant/diensleeraar/standplaasleeraar in diens van die kerkverband.

## **10. BEVESTIGING**

- 10.1 Die bevestiging van 'n predikant/diensleeraar/standplaasleeraar vir diens aan 'n gemeente geskied nadat
- 10.1.1 die beroepende kerkraad die volgende stukke by die ring of sy gevolmagtigde ingedien het:
- 10.1.1.1 'n afskrif van die getekende dienskontrak;
- 10.1.1.2 'n afskrif van die persoon wat beroep is se *Akte van Demissie* uit die vorige werkkring óf 'n getuigskrif van eervolle ontslag in die geval van diens aan 'n instansie buite die kerkverband óf die *Akte van Legitimasie* in die geval van 'n proponent wat beroep is;
- 10.1.1.3 'n afskrif van die persoon wat beroep is se *attestaat/Akte van Demissie* van die vorige gemeente wat by die beroepende gemeente ingedien is; en
- 10.1.1.4 'n skriftelike bevestiging van die pensioenkantoor dat die persoon wat beroep is se pensioen in orde is.
- 10.1.2 die ring of sy gevolmagtigde kommissie skriftelik bevestig het dat aan die kerkordelik vereistes (vergelyk 10.1.1 hierbo) voldoen is.
- 10.2 Die bevestiging van 'n predikant/diensleeraar/standplaasleeraar in diens aan die kerkverband geskied nadat:
- 10.2.1 die kerkvergadering wat die benoeming gemaak het of sy gevolmagtigde die volgende stukke by die betrokke sinodale regs-/kerkordekommissie of sy gevolmagtigde ingedien het:

- 10.2.1.1 'n afskrif van die getekende dienskontrak;
- 10.2.1.2 'n afskrif van die benoemde se *Akte van Demissie* uit die vorige werkkring óf 'n getuigskrif van eervolle ontslag in die geval van diens aan 'n instansie buite die kerkverband óf die *Akte van Legitimasie* in die geval van 'n proponent wat beroep is;
- 10.2.1.3 'n afskrif, indien van toepassing, van die benoemde se attestaat, uitgereik deur die vorige gemeente en ingedien by 'n (ander) gemeente van die NG Kerk; en
- 10.2.1.4 'n skriftelike bewys van die pensioenkantoor dat die benoemde se pensioen in orde is.
- 10.2.2 die betrokke sinodale regs-/kerkordekommissie skriftelik bevestig het dat aan die kerkordelike vereistes (vergelyk 10.2.1 hierbo) voldoen is.
- 10.3 Die skriba van die beroepende vergadering of die kerkvergadering wat die benoeming gemaak het, rig 'n uitnodiging aan al die predikante/diensleraars/standplaasleraars in diens van die ringsgemeentes óf in diens van die breër kerkverband om die bevestiging by te woon.
- 10.4 Die bevestiging in 'n gemeente geskied deur 'n predikant in diens van die gemeente óf die konsulent of 'n ander predikant met bevoegdheid in die NG Kerk deur die konsulent/ring daartoe versoek.
- 10.5 Die bevestiging in die kerkverband geskied deur 'n predikant met bevoegdheid in die NG Kerk deur die betrokke kerkvergadering of sy gevolmagtigde daartoe aangewys.
- 10.6 Die bevestiging van 'n proponent geskied met oplegging van hande waarmee die bevoegdheid van predikant/diensleer/standplaasleer verkry word.
- 10.7 Die bevestiging vind so spoedig moontlik plaas nadat aan die kerkordelike vereistes voldoen is.
- 10.8 Die kerkraad of ander kerkvergadering stel die betrokke ring, die sinodale kantoor, die Algemene Taakspan Predikantesake en die *Kerkbode* onverwyld in kennis van die bevestiging, met vermelding van:
  - 10.8.1 die basiese biografiese besonderhede van die persoon wat bevestig is;
  - 10.8.2 die vorige gemeente/werkkring;
  - 10.8.3 die datum waarop die bevestiging plaasgevind het;
  - 10.8.4 die gemeente waarin die persoon bevestig is;
  - 10.8.5 die naam van die persoon wat die bevestiging waargeneem het; en
  - 10.8.6 die moontlike verandering in bevoegdheid wat plaasgevind het.
- 10.9 In die geval van 'n proponent of 'n bevoegde bedienaar uit 'n ander

gereformeerde kerk wat bevestig is, word

10.9.1 die betrokke sinodale kantoor versoek om aansoek te doen om die aanstelling as huweliksbevestiger; en

10.9.2 die aktuaris van die sinode versoek om 'n *Akte van Bevestiging* uit te reik.

## **11. DEMISSIE**

11.1 'n Predikant/diensleraar/standplaasleraar\_wat 'n beroep na 'n ander gemeente aangeneem het of 'n benoeming vir diens aan die kerkverband aanvaar het, stel die kerkraad of ander kerkvergadering skriftelik daarvan in kennis.

11.2 Die betrokke kerkvergadering in wie se diens die predikant/diensleraar/standplaasleraar gestaan het, maak die predikant/diensleraar/standplaasleraar op 'n eervolle wyse los van die gemeente of ander werkkring deur die uitreiking van die *Akte van Demissie*.

11.3 Die *Akte van Demissie* word onderteken deur die voorsitter en skriba van die betrokke kerkvergadering.

11.4 Die verlening van demissie geskied tydens 'n vergadering of erediens deur die voorsitter of ander lid van die betrokke kerkvergadering.

11.5 Demissie word verleen nadat

11.5.1 die beroeps- of benoemingsbrief én die getekende nuwe diensooreenkoms aan die ring of sy gevolmagtigde/betrokke sinodale regs-/kerkordekommissie voorgelê is; en

11.5.2 die ring of sy gevolmagtigde/betrokke sinodale regs-/kerkordekommissie skriftelike bevestiging ontvang het dat alle uitstaande verpligtinge teenoor die predikant/diensleraar/standplaasleraar met betrekking tot vergoeding, verlof en ander diensvoordele nagekom is.

11.6 Die *Akte van Demissie*, uitgereik deur 'n kerkraad, dien ook as attestaat vir oorplasing van lidmaatskap na die volgende gemeente.

11.7 'n Predikant/diensleraar/standplaasleraar wat uit diens van die gemeente of die kerkverband bedank, of weens tug- en/of dissiplinêre handeling uit diens van die gemeente of uit diens van die kerkverband ontslaan is (vergelyk Artikel 64.5.4 van die *Kerkorde*), ontvang by diensbeëindiging 'n dienssertifikaat.

## **12. EMERITAAT**

12.1 Predikante/diensleraars/standplaasleraars in diens van gemeentes of die kerkverband, moet by bereiking van ouderdom vyf-en-sestig (65) emeriteer.

- 12.2 Beroepbaarheid van emeriti:
- 12.2.1 'n Predikant/diensleeraar/standplaasleeraar ouer as 65 jaar en jonger 70 kan na emeritering slegs in 'n Vastetermynpos beroep word. (Vergelyk *Reglement 16 vir Vastetermyn Predikantspos*).
- 12.2.2 Vir predikante/diensleeraars/standplaasleeraars in vastetermynposte tussen die ouderdom van 65 en 70 is daar bepaalde vereiste kriteria waaraan voldoen moet word, byvoorbeeld mediese geskiktheid, VBO, ens.
- 12.2.3 Emeriti jonger as die voorgeskrewe aftreeouderdom mag in enige predikantspos/diensleeraarspos/standplaasleeraarspos waarvoor hulle kwalifiseer beroep word.
- 12.3 Geen predikant/diensleeraar/standplaasleeraar kan na ouderdom 70 jaar in enige predikantspos diens doen nie.
- 12.4 Die ring, onder wie se opsig 'n predikant/diensleeraar/standplaasleeraar by emeritering staan, reik aan die predikant by emeritering die *Akte van Demissie by Emeritaat* uit.
- 12.5 Die *Akte van Demissie by Emeritaat* word onderteken deur die voorsitter en skriba van die ring.
- 12.6 Die skriba van die ring stel die betrokke sinodale kantoor, die pensioenkantoor, die Algemene Taakspan Predikantesake én die *Kerkbode* van die emeritering in kennis.
- 12.7 Die *Akte van Demissie by Emeritaat* kan tydens 'n vergadering of erediens namens die ring oorhandig word.

### **13. AFSTERWE VAN PREDIKANT / DIENSLERAAR / STANDPLAASLERAAR**

- 13.1 Wanneer 'n predikant/diensleeraar/standplaasleeraar wat in diens van 'n gemeente staan te sterwe kom, is sy/haar huweliksmaat en afhanklike kinders geregtig op die volledige vergoedingspakket totdat die pensioenvoordele uitbetaal, met 'n maksimum van drie maande (reistoelae uitgesluit), asook drie maande behuisingsvoordele.
- 13.2 Sinodes tref hulle eie reëlins hieroor.
- 13.3 Bogenoemde reëling is ook van toepassing in geval van die afsterwe van predikante in diens van die kerkverband.

**KONTROLELYS VIR DIE STAPPE IN DIE BEROEPINGSPROSES VAN  
PREDIKANTE, DIENSLERAARS EN STANDPLAASLERAARS**

<b>VAKATURE</b>		<b>Reglement</b>	<b>Gedoen/Datum</b>
1	Watter soort pos word gevul?	13-19	
2	Indien nuwe pos is, moet goedkeuring van die ring verkry word.	13-19	
3	Finansiële volhoubaarheid van die pos deur ring gekontroleer en goedgekeur.	13.2.3 en 2.2 van 14-19	
<b>VOORBEREIDING</b>		<b>Reglement</b>	<b>Gedoen/Datum</b>
4	Kerkraad bepaal kriteria en posvereistes.	12.4.2	
5	Kerkraad kry skriftelike bevestiging van ATP dat kandidate op groslys wel beroepbaar is.	12.4.3.2	
6	Beroeping geskied aan die hand van groslys wat op een van die volgende maniere saamgestel kan word:	12.4.3	
6.1	Lede van die kerkraad kan name op die lys plaas.	12.4.4.1	
6.2	ATP kan versoek word om name deur te gee.	12.4.4.3	
6.3	Lidmate kan name via die kerkkantoor op die lys laat plaas.	12.4.4.4	
6.4	'n Advertensie (Kerkbode) kan geplaas word.	12.4.4.5	
7	Kerkraad kan van 'n preadvies kommissie gebruik maak om verslag op te stel met die oog op die beroep.	12.4.6-12.4.9	
<b>BEROEPSBRIEF</b>		<b>Reglement</b>	<b>Gedoen/Datum</b>
8	Kerkraad stel beroepsbrief voor vergadering op en ring keur dit goed.	12.5.1 13.2.7	
9	Ringskommissie adviseer kerkraad in opstel van brief.	12.5.1	
10	Beroepsbrief is slegs diensaanbod (Artikel 9 & Artikel 13).	12.5.4	
11	Alle ander diensvoorwaardes word eers onderhandel nadat beroep uitgebring is.	12.5.6	
<b>BEROEPINGSVERGADERING</b>		<b>Reglement</b>	<b>Gedoen/Datum</b>

12.1	Verteenwoordiger van die ring woon die vergadering by.	12.4.10	
12.2	Beroeping vind per geslote stembrief plaas.	12.4.11	
12.3	Aanwesige kerkraadslede moet 'n kworum wees.	12.4.11.1	
12.4	Elke lid moet stem.	12.4.11.2	
12.5	Persoon wat beroep word moet met volstrekte meerderheid verkies word.	12.4.11.5	
12.6	Voorsitter gee dadelik (in vergadering) kennis aan persoon wat beroep is.	12.6.1	
12.7	Kennis van die beroep (asook bedanking daarvan indien wel) word onverwyld aan die Kerkbode deurgegee.	12.6.2	
<b>GOEDKEURING</b>		<b>Reglement</b>	<b>Gedoen/Datum</b>
13	Die naam van die beroepende word op twee agtereenvolgende Sondae tydens die erediens aan die gemeente vir goedkeuring (approbasie) bekend maak.	12.7.1	
14	Enige lid van die beroepende gemeente kan beswaar teen die beroep maak tot 24 uur na die tweede afkondiging.	12.8.1	
14.1	Besware word hanteer aan die hand van reglement 12.8 en reglement 23.	12.8 & 23	
15	Na approbasie en tyd vir beswaar verstreke is, lê die kerkraad/skriba die volgende stukke aan die ring voor vir goedkeuring.	12.7.2	
15.1	1. Skriftelike bevestiging van die ATP dat die beroepende bevoegdheid het.	12.7.3.1	
15.2	2. Skriftelike bevestiging van beroepende se huidige gemeente dat persoon lidmaat is.	12.7.3.2	
15.3	3. Skriftelike bevestiging van verteenwoordiger van die ring dat die korrekte kerkordelike prosedures tydens vergadering gevolg is.	12.7.3.3	
15.4	4. Voltooid beroepsbrief deur gevolmagtigdes van kerkraad onderteken.	12.7.3.4	
15.5	5. Skriftelike bevestiging van die ring waar beroepende woon dat daar geen tugsake teen die persoon is nie.	12.7.3.5	

15.6	6. Skriftelike bevestiging van beroepende vergadering dat geen wettige beswaar ingebring is.	12.7.3.6	
16	Ringskommissie kontroleer stukke of daar aan die kerkordelike vereistes voldoen is en keur die beroep goed/nie goed.	12.7.6	
17	Na goedkeuring word die beroepsbrief aan die beroepende gestuur.	12.7.6	
18	Beroepende het hoogstens 14 dae na ontvangs om daarop te antwoord.	12.7.7	
<b>DIENSOOREENKOMS</b>		<b>Reglement</b>	<b>Gedoen/Datum</b>
19	Na oorweging van die bepalings van die beroepsbrief word 'n diensooreenkoms opgestel.	12.9.1	
20	Die diensooreenkoms moet ooreenkomstig reglement 12.9 opgestel word.	12.9.2- 12.9.2.8	
21	Die finale diensooreenkoms word eers aan ringskommissie voorgelê vir goedkeuring.	12.9.3	
22	Na die ring se goedkeuring word die diensooreenkoms deur partye geteken.	12.9.3	
23	Die diensooreenkoms kan van tyd tot tyd verander word met instemming van beide partye EN die goedkeuring van die ring.	12.9.4	
<b>BEVESTIGING</b>		<b>Reglement</b>	<b>Gedoen/Datum</b>
24	Voor bevestiging plaasvind, stuur die kerkraad die volgende stukke aan die ring deur vir kontrole en goedkeuring.	12.10.1.1	
24.1	1. Afskrif van getekende diensooreenkoms;	12.10.1.1.1	
24.2	2. Afskrif van persoon se akte van demissie/attestaat/akte van legitimasie/getuigskrif;	12.10.1.1.2	
24.3	3. Skriftelike bevestiging van pensioenkantoor.	12.10.1.1.4	
25	Skriba rig 'n uitnodiging aan ringsleraars en ander om bevestiging by te woon.	12.10.3	
26	Bevestiging geskied deur leraar van gemeente/konsulent/ander leraar deur die ring/konsulent versoek.	12.10.4	
27	Bevestiging van proponent geskied met handoplegging.	12.10.6	

28	Bevestiging vind sou gou moontlik na al bogenoemde stappe gevolg is, plaas.	12.10.7	
<b>NA BEVESTIGING</b>		<b>Reglement</b>	<b>Gedoen/Datum</b>
29	Kerkraad stuur aan die ring, sinodale kantoor, ATP en Kerkbode die volgende:	12.10.8	
29.1	1. Basiese biografie van persoon wat bevestig is	12.10.8.1	
29.2	2. vorige gemeente/werkring	12.10.8.2	
29.3	3. datum van bevestiging	12.10.8.3	
29.4	4. gemeente waarin persoon bevestig is	12.10.8.4	
29.5	5. persoon se naam wat bevestiging waargeneem het	12.10.8.5	
29.6	6. Enige verandering in bevoegdheid wat plaas gevind het	12.10.8.6	
30	Ingeval van proponent wat bevestig is, word sinodale kantoor gekontak om aansoek te doen vir aanstelling as huweliksbevestiger.	12.10.9.1	
31	Aktuaris van sinode reik Akte van Bevestiging uit.	12.10.9.2	

## REGLEMENT 13

### REGLEMENT VIR VOLTYDSE PREDIKANTSPOSTE

#### 1. AARD

- 1.1 'n Voltydse predikantspos is 'n voltydse pos met 'n onbepaalde termyn. (Die begrip “voltyds” verwys na die bediening van 'n predikant wat in 'n bepaalde gemeente bevestig is en wat volgens diensooreenkoms al sy tyd aan die bediening van die gemeente wy en sy volle lewensonderhoud van die gemeente ontvang.)
- 1.2 'n Predikant in 'n voltydse predikantspos:
  - 1.2.1 verrig die ampspligte van Artikel 9 van die *Kerkorde* in 'n gemeente soos in die diensooreenkoms vervat;
  - 1.2.2 verrig die pligte in die kerkverband soos in die diensooreenkoms vervat;
  - 1.2.3 ontvang volle lewensonderhoud van die gemeente of die kerkverband; en
  - 1.2.4 mag nie buite die kerkverband deelydse diens aan 'n ander werkgewer lewer nie.

#### 2. SKEP VAN POS

- 2.1 Vanaf die stigting tot die ontbinding van 'n gemeente beskik die gemeente oor 'n pos vir predikant wat óf voltyds óf deelydse vir 'n onbepaalde termyn (permanent) gevul word of op 'n vastetermynbasis vir 'n maksimum van 'n totaal van vyf jaar waarna dit as 'n permanente pos geag word.
- 2.2 Die vul van die voltydse pos vir 'n predikant in die gemeente kan met die goedkeuring van die ring of sy gevolmagtigde vir 'n tyd opgeskort word, terwyl die kerkraad met die hulp van die ring of sy gevolmagtigde na ander wyses kyk waarop die gemeente bedien kan word (soos kombinerings, eenwording of samesmelting).
- 2.3 Die beroeping van 'n predikant vir die vulling van 'n voltydse predikantspos in die gemeente, kan alleen geskied nadat die kerkraad die ring of sy gevolmagtigde oortuig het van die finansiële volhoubaarheid van die pos en die ring of sy gevolmagtigde daartoe goedkeuring verleen het.
- 2.4 Die ring of sy gevolmagtigde moet goedkeuring verleen vir die skepping en vulling van 'n voltydse predikantspos by meerdere bediening in die gemeente.
- 2.5 Die ring of sy gevolmagtigde adviseer die kerkraad met die opstel van die diensooreenkoms. Die ring of sy gevolmagtigde sien toe dat die pos aan die volgende vereiste voldoen:
  - 2.5.1 Vergoeding en ander diensvoordele vir 'n voltydse predikantspos is in ooreenstemming met die sinodale riglyne vir die vergoedingspakket vir predikante, tensy anders ooreengekom.

- 2.6 'n Voltydse predikantspos is pensioendraend. Elke gemeente is 'n verpligte deelhebber van die sinodale pensioenfonds. Die ring of sy gevolmagtigde sien toe dat die pos aan die volgende vereistes voldoen:
- 2.6.1 'n predikant in 'n voltydse predikantspos se pensioenbydraevlak word bereken volgens die ooreengekome bydraekategorie;
- 2.6.2 die werkgewer bepaal die werkgewerbydrae tot die pensioenfonds aan die hand van die reëls van die pensioenfonds;
- 2.6.3 die werkgewer se bydrae bepaal die ooreenstemmende bydraekategorie van die werknemer; en
- 2.6.4 die minimum bydraekategorie volgens die reëls van die sinodale pensioenfonds. (Elke pensioenfonds reël self sy eie minimum bydraevlakke. Werkgewers moet hulle eie pensioen- en sinodale kantoor skakel om seker te maak van die minimum bydraevlak.)
- 2.7 Nadat die ring of sy gevolmagtigde die pos en die beroepsbrief goedgekeur het, kan die kerkraad oorgaan tot beroeping.
- 2.8 By die skep van 'n voltydse predikantspos in die kerkverband, sien die betrokke kerkvergadering toe dat aan die toepaslike vereistes van hierdie *reglement* voldoen word.
- 2.9 'n Emeritus, jonger as die normale aftreeouderdom, kan met goedkeuring van die ring of sy gevolmagtigde in 'n voltydse predikantspos beroep word. (Sien artikel 14.5)

### **3. BEROEPING EN BEVESTIGING**

- 3.1 By die beroeping en bevestiging word uitvoering gegee aan die voorskrifte van Artikel 8 van die *Kerkorde en Reglement 12 vir die Beroeping, Bevestiging, Demissie en Emeritaat van Predikante*.
- 3.2 'n Predikant wie se pos van 'n tentmakerpos of 'n vastetermynpos na 'n voltydse predikantspos verander word, se diensooreenkoms word diensooreenkomstig gewysig, goedgekeur en onderteken, sonder om weer beroep en bevestig te word.
- 3.3 'n Voltydse predikant wie se pos in dieselfde gemeente na 'n deelydse-, tentmaker- of vastetermynpos verander word, se diensooreenkoms word met goedkeuring gewysig, goedgekeur en onderteken, sonder om weer beroep en bevestig te word.

### **4. AFVAARDIGING NA MEERDERE VERGADERINGE**

'n Predikant in 'n voltydse predikantspos word na meerdere vergaderinge afgevaardig.

### **5. DIENSBEËINDIGING**

- 5.1 'n Predikant in 'n voltydse predikantspos tree by aanvaarding van 'n beroep of by bereiking van die normale aftree-ouderdom uit diens van die gemeente/kerkverband.

- 5.2 By diensbeëindiging/aanvaarding van emeritaat, stel die kerkvergadering die Algemene Taakspan Predikantesake daarvan in kennis.
- 5.3 'n Predikant in 'n voltydse pos se diens aan die gemeente kan weens wangedrag, ongeskiktheid en bedryfsvereistes beëindig word. (vergelyk *Reglement 21 vir die Bestuur van Diensverhoudinge vir Predikante by Ongeskiktheid en Onvermoë en Reglement 22 vir Tug en Vermaning*).

## **6. VERGOEDING VIR PREDIKANTE**

- 6.1 Predikant in 'n voltydse predikantspos
- 6.1.1 'n Kerkraad (of ring/sinode) se verantwoordelikheid teenoor 'n predikant in 'n voltydse predikantspos is o.a. die volgende:
- 6.1.1.1 'n salaris in ooreenstemming met die riglyne van die Algemene Sinode;
- 6.1.1.2 'n reistoelae in ooreenstemming met die riglyne van die Algemene Sinode;
- 6.1.1.3 gratis huisvesting (waarby water en elektrisiteit, binne perke ingesluit is), of 'n behuisingstoelaag (markverwant soos binne die grense van die gemeente). In geval van 'n behuisingstoelaag moet die gemeente 'n kantoorfasiliteit voorsien;
- 6.1.1.4 rekenaar- en drukkerfasiliteite vir amptelike gebruik;
- 6.1.1.5 'n telefoontoelaag en/of selfoontoelaag vir amptelike gebruik;
- 6.1.1.6 minstens 50% van die premie van 'n goedgekeurde mediese fonds;
- 6.1.1.7 deelhebberbydrae tot die amptelike pensioenfonds van die sinode; en
- 6.1.1.8 verlof ooreenkomstig Reglement 20 vir Verlof van Predikante.

## REGLEMENT 14

### REGLEMENT VIR DEELTYDSE PREDIKANTSPOSTE

#### 1. AARD

- 1.1 'n Deeltydse predikantspos is 'n pos vir 'n predikant wat op 'n deelyds basis vir 'n onbepaalde termyn 'n predikantspos in 'n gemeente beklee. (Die begrip “deelyds” verwys na die bediening van 'n predikant wat in 'n bepaalde gemeente bevestig is en wat volgens diensooreenkoms vir 'n vasgestelde gedeelte van sy tyd diens lewer aan die gemeente en slegs 'n gedeelte van sy lewensonderhoud van die gemeente ontvang.)
- 1.2 'n Deeltydse predikantspos vertoon die karakter van 'n gewone pos vir predikant.
- 1.3 'n Predikant in 'n deeltydse predikantspos vervul ampspligte van Artikel 9 op 'n deelyds basis soos ooreengekom.

#### 2. SKEP VAN POS

- 2.1 Indien die gemeente 'n deeltydse predikantspos vir 'n predikant wil skep, of om finansiële of ander redes 'n bestaande voltydse pos in 'n deeltydse predikantspos wil omskep, doen die kerkraad 'n gemotiveerde voorlegging aan die ring of sy gevolmagtigde.
- 2.2 Die ring of sy gevolmagtigde keur, met inagneming van die gemeente se bedieningsbehoefte en finansiële omstandighede, die deeltydse predikantspos goed.
- 2.3 Die ring of sy gevolmagtigde adviseer die kerkraad met die opstel van die diensooreenkoms.
  - 2.3.1 Uitvoering word gegee aan die tersaaklike bepalings van Artikel 8 van die *Kerkorde, Reglement 12 vir Beroeping, Bevestiging, Demissie en Emeritaat van Predikante*, ander toepaslike bepalinge in reglemente en verbandhoudende besluite.
  - 2.3.2 'n Deeltydse predikantspos kan nie geskep word om die bevoegdheid van predikant te verkry of te behou nie, of om sitting in kerklike vergaderinge te verkry nie.
  - 2.3.3 Die diensvoordele van 'n deeltydse predikantspos word belyn met die sinodale riglyne vir 'n voltydse predikantspos, proporsioneel tot die werkslading van die pos. 'n Voltydse en deeltydse predikantspos in dieselfde gemeente word in proporsionele terme gelykwaardig behandel.
  - 2.3.4 'n Deeltydse predikantspos is pensioendraend, onderworpe aan die volgende vereistes:
    - 2.3.4.1 'n predikant in 'n deeltydse predikantspos se pensioenbydraevlak word bereken volgens die ooreengekome bydraekategorie;
    - 2.3.4.2 die werkgever bepaal die werkgeversbydrae tot die pensioenfonds aan die hand van die reëls van die pensioenfonds;
    - 2.3.4.3 die werkgever se bydrae bepaal die ooreenstemmende bydraekategorie van die werknemer;

- 2.3.4.4 wanneer die predikant in 'n deelydse predikantspos beroep is en reeds by 'n ander wetlik goedgekeurde pensioenfonds ingeskakel is (dit sluit vrywillige annuïteitsfondse uit), hoef daar nie by die kerk se amptelike pensioenfonds ingeskakel te word nie. Die werkgewer moet egter steeds die minimum bydraekategorie, soos bepaal deur die reëls van die wetlik goedgekeurde pensioenfonds waarby die predikant ingeskakel is, bydra. (Elke pensioenfonds reël self die minimum bydraevlakke. Werkgewers moet hulle eie pensioen- en sinodale kantoor skakel om seker te maak van die minimum bydraevlak.)
- 2.3.5 'n Deelydse predikantspos het duidelik omskrewre bedienings verpligtinge wat in direkte verband met die amp van predikant staan.
- 2.4 Nadat die ring of sy gevolmagtigde die pos en die voorgestelde diensooreenkoms goedgekeur het, kan die kerkraad oorgaan tot beroeping.
- 2.5 By die skep van 'n deelydse predikantspos in die kerkverband, sien die betrokke kerkvergadering toe dat aan die toepaslike vereiste van hierdie reglement voldoen word.
- 2.6 'n Deelydse predikantspos het dieselfde verlofvoordele as 'n voltydse predikantspos.
- 2.7 'n Emeritus, jonger as die normale aftreeouderdom, kan met goedkeuring van die ring of sy gevolmagtigde in 'n deelydse predikantspos beroep word.

### **3. BEROEPING EN BEVESTIGING**

- 3.1 By die beroeping en bevestiging word uitvoering gegee aan die voorskrifte van Artikel 8 van die *Kerkorde en Reglement 12 vir die Beroeping, Bevestiging, Demissie en Emeritaat van Predikante*.
- 3.2 'n Predikant wie se pos van 'n voltydse pos na 'n deelydse predikantspos verander word, se diensooreenkoms word dienoooreenkomstig gewysig, goedgekeur en onderteken, sonder om weer beroep en bevestig te word.

### **4. AFVAARDIGING NA MEERDERE VERGADERINGE**

'n Predikant in 'n deelydse predikantspos word na meerdere vergaderings afgevaardig.

### **5. DIENSBEËINDIGING**

- 5.1 'n Predikant in 'n deelydse predikantspos tree by aanvaarding van 'n beroep of by bereiking van die normale aftree-ouderdom uit diens van die gemeente/kerkverband.
- 5.2 'n Predikant in 'n deelydse predikantspos kan vóór verstryking van die termyn weens wangedrag, ongeskiktheid en bedryfsvereistes uit diens van die gemeente/kerkverband ontslaan word (vergelyk *Reglement 21 vir die Bestuur van Diensverhoudinge vir Predikante by Ongeskiktheid en Onvermoë en Reglement 22 vir Tug en Vermaning*).
- 5.3 By diensbeëindiging word 'n Akte van Demissie uitgereik waar van toepassing en word die bevoegdheid van die predikant/emertus behou.
- 5.4 By diensbeëindiging/aanvaarding van emeritaat, stel die kerkvergadering die Algemene Taakspan Predikantesake daarvan in kennis.

- 5.5 'n Predikant in 'n deeltydse predikantspos wat emeriteer, kan in dieselfde gemeente in 'n vaste termynpos aangestel word (voldoen aan vereistes in 16.4.3). In so 'n geval vind daar geen beroeping en bevestig plaas nie. 'n Nuwe diensooreenkoms moet aangegaan word.

## REGLEMENT 15

### REGLEMENT VIR TENTMAKERPOSTE

#### 1. AARD

- 1.1 'n Tentmakerpos is 'n pos vir 'n predikant wat op 'n vrywillige basis vir 'n onbepaalde termyn, vastetermyn of deelyds 'n bediening in 'n gemeente verrig.
- 1.2 'n Tentmakerpos vertoon die karakter van 'n gewone pos vir predikant. 'n Tentmaker is 'n predikant wat op 'n vrywillige basis, soos ooreengekom, ampspilte van Artikel 9 van die *Kerkorde* vervul.
- 1.3 'n Tentmakerpos is 'n pos waar geen diensvoordele, vergoeding of kompensasie vir dienste van toepassing is nie.
- 1.4 Weens die aard van 'n tentmakerspos bestaan daar geen voorgeskrewe verlofreëlings nie en word verlof onderling deur die partye gereël.

#### 2. SKEP VAN POS

- 2.1 Indien die gemeente 'n tentmakerpos vir 'n predikant wil skep, of om finansiële of ander redes 'n bestaande voltydse pos in 'n tentmakerpos wil omskep, doen die kerkraad 'n gemotiveerde voorlegging aan die ring of sy gevolmagtigde.
- 2.2 Die ring of sy gevolmagtigde keur die tentmakerpos goed, met inagneming van die gemeente se bedieningsbehoefte en finansiële omstandighede.
- 2.3 Die ring of sy gevolmagtigde adviseer die kerkraad met die opstel van die diensooreenkoms.
  - 2.3.1 Uitvoering word gegee aan die tersaaklike voorskrifte van Artikel 8 van die *Kerkorde, Reglement 12 vir Beroeping, Bevestiging, Demissie en Emeritaat van Predikante*, ander toepaslike bepalinge in reglemente en verbandhoudende besluite.
  - 2.3.2 'n Tentmakerpos kan nie geskep word om die bevoegdheid van predikant te verkry of te behou nie, of om sitting in kerklike vergaderinge te verkry nie.
  - 2.3.3 Geen vergoeding van enige aard is by 'n tentmakerpos ter sprake nie.
  - 2.3.4 'n Tentmakerpos is nie pensioendraend nie.
  - 2.3.5 'n Tentmakerpos het duidelik omskrewe bedieningsverpligtinge wat met die amp van predikant in direkte verband staan.
- 2.4 Nadat die ring of sy gevolmagtigde die pos en die voorgestelde diensooreenkoms goedgekeur het, kan die kerkraad oorgaan tot beroeping.
- 2.5 By die skep van 'n tentmakerpos in die kerkverband, sien die betrokke kerkvergadering toe dat aan die toepaslike vereiste van hierdie *Reglement* voldoen word.

#### 3. BEROEPING EN BEVESTIGING

- 3.1 By beroeping en bevestiging word uitvoering gegee aan die voorskrifte van Artikel 8 van die *Kerkorde en Reglement 12 vir die Beroeping, Bevestiging, Demissie en Emeritaat van Predikante*.

3.2 'n Predikant wie se pos van 'n voltydse pos na 'n tentmakerpos verander word, se diensooreenkoms word dienooreenkomstig gewysig, goedgekeur en onderteken, sonder om weer beroep en bevestig te word.

#### **4. AFVAARDIGING NA MEERDERE VERGADERINGE**

'n Predikant in 'n tentmakerpos word na meerdere vergaderinge afgevaardig.

#### **5. DIENSBEËINDIGING**

5.1 'n Predikant in 'n tentmakerpos tree by aanvaarding van 'n beroep of by bereiking van die normale aftree-ouderdom of by verstryking van die kontrak uit diens van die gemeente/kerkverband.

5.2 By diensbeëindiging/aanvaarding van emeritaat, stel die kerkvergadering die Algemene Taakspan Predikantesake daarvan in kennis.

## REGLEMENT 16

### REGLEMENT VIR VASTETERMYN PREDIKANTSPOS

#### 1. AARD

- 1.1 'n Vastetermynpos is 'n pos vir 'n predikant.
- 1.2 'n Vastetermynpos duur 'n vasgestelde termyn (met 'n aanvangs- en einddatum) van langer as ses maande.
- 1.3 'n Vastetermynpos het 'n duidelik omskrewe taak/opdrag.
- 1.4 Na verstryking van die termyn en na voltooiing van die taak, termineer 'n vaste termynpos.
- 1.5 'n Vastetermynpos kan voltyds of deelyds gevul word.
- 1.6 'n Predikant kan vir 'n termyn van ses maande of korter benoem word om 'n spesifieke taak in 'n gemeente te doen, byvoorbeeld tydens die kraamverlof van die gemeente se predikant. So 'n aflospos (van ses maande of korter) is vrygestel van die bepalings van hierdie reglement ten opsigte van die skep van die pos, die beroeping, bevestiging en pensioenverpligting van die pos.

#### 2. SKEP VAN POS

- 2.1 Indien die gemeente 'n vaste termynpos vir 'n predikant wil skep, doen die kerkraad 'n gemotiveerde voorlegging aan die ring of sy gevolmagtigde.
- 2.2 Die ring of sy gevolmagtigde keur die vaste termynpos goed, met inagneming van die gemeente se bedieningsbehoefte en finansiële omstandighede.
- 2.3 Die ring of sy gevolmagtigde adviseer die kerkraad met die opstel van die diensooreenkoms.
  - 2.3.1 Uitvoering word gegee aan die tersaaklike voorskrifte van Artikel 8 van die *Kerkorde, Reglement 12 vir Beroep, Bevestiging, Demissie en Emeritaat van Predikante*, ander toepaslike bepalinge in reglemente en verbandhoudende besluite.
  - 2.3.2 'n Vaste termynpos kan nie geskep word om die bevoegdheid van predikant te verkry of te behou nie, of om sitting in kerklike vergaderinge te verkry nie.
  - 2.3.3 Gegewe die sinodale riglyne word in dieselfde gemeente proporsioneel gelykwaardigheid ten opsigte van diensvoordele gehandhaaf tussen 'n vastetermynpos en 'n voltydse pos.
  - 2.3.4 'n Vastetermynpos (langer as ses maande) is:
    - 2.3.4.1 pensioendraend, onderworpe aan die volgende voorwaardes:
      - 2.3.4.1.1 'n predikant in 'n vastetermynpos se pensioenbydraevlak word bereken volgens die ooreengekome bydraekategorie;
      - 2.3.4.1.2 die werkgewer bepaal die werkgewerbydraes tot die pensioenfonds aan die hand van die reëls van die pensioenfonds;

- 2.3.4.1.3 die werkgewer se bydrae bepaal die ooreenstemmende bydraekategorie van die werknemer;
- 2.3.4.2 nie pensioendraend nie, onderworpe aan die volgende voorwaardes:
  - 2.3.4.2.1 wanneer die predikant in 'n vastetermynpos beroep word en reeds by 'n ander wetlik-goedgekeurde pensioenfonds ingeskakel is (dit sluit vrywillige annuïteitsfondse uit); en
  - 2.3.4.2.2 wanneer 'n emeritus (65 jaar en ouer) by aanvaarding van 'n vastetermynpos reeds pensioen ontvang. (Pensioenfondsreëls bepaal dat iemand wat jonger as 65 jaar oud is, en wat weer beroep word, wel by die pensioenfonds moet aansluit. Slegs emeriti ouer as 65 jaar word vrygestel van inskakeling by die pensioenfonds.)
- 2.3.5 'n Vaste termynpos het duidelik omskrewe bedieningsverpligtinge wat belyn is met die amp van predikant.
- 2.4 Nadat die ring of sy gevolmagtigde die pos en die voorgestelde diensooreenkoms goedgekeur het, kan die kerkraad oorgaan tot beroeping.
- 2.5 By die skep van 'n vaste termynpos in die kerkverband, sien die betrokke kerkvergadering toe dat aan die toepaslike vereiste van hierdie reglement voldoen word.

### **3. BEROEPING EN BEVESTIGING**

- 3.1 By die beroeping en bevestiging word uitvoering gegee aan die voorskrifte van Artikel 8 van die *Kerkorde en Reglement 12 vir die Beroep, Bevestiging, Demissie en Emeritaat vir Predikante*.
- 3.2 'n Predikant wat in dieselfde gemeente waar hy bevestig is vir 'n vaste termynpos aansoek doen en in die pos aangestel word, word nie weer beroep en bevestig nie.

### **4. EMERITI**

- 4.1 'n Emeritus kan tot op ouderdom 70 jaar, met goedkeuring van die ring of sy gevolmagtigde, in 'n vaste termynpos beroep word, waarna die emeritus finaal uit kerklike diens tree. 'n Emeritus kan nie na ouderdom 70 in 'n vaste termynpos aangestel word nie.
- 4.2 By bereiking van die normale aftree-ouderdom (65 jaar), moet geëmeriteer word sonder dat pensioen noodwendig geneem word.
- 4.3 'n Emeritus kan diens in 'n gemeente aanvaar, slegs indien
  - 4.3.1 'n vastetermynpos volgens die voorgeskrewe prosedure geskep is (vergelyk 2.1 tot 2.5 hierbo);
  - 4.3.2 alle verpligtinge by emeritaat nagekom is;
  - 4.3.3 die persoon se mediese geskiktheid bepaal is;
  - 4.3.4 'n nuwe diensooreenkoms aangegaan word;
  - 4.3.5 'n Emeritus wat in dieselfde gemeente 'n vastetermynpos aanvaar, hoef nie weer beroep en bevestig te word nie

- 4.3.6 bydraes tot die pensioenfonds voortgesit word, indien pensioen nie by emeritaat opgeneem is nie; en
- 4.3.7 die ander vereistes van hierdie reglement nagekom word.
- 4.4 'n Emeritus ouer as 65 jaar wat by aanvaarding van 'n vaste termynpos reeds pensioen ontvang, is vrygestel van pensioenbydraes.

## **5. TERMYN**

- 5.1 Die termyn vir 'n vaste termynpos duur nie langer as drie jaar nie.
- 5.2 By verstryking van die termyn, kan die pos vir 'n maksimum van twee jaar deur dieselfde of 'n ander predikant gevul word, op voorwaarde dat die ring of sy gevolmagtigde instemming daartoe verleen en 'n nuwe diensooreenkoms tot stand kom.
- 5.3 Na vyf jaar vestig 'n vastetermynpos en word geag 'n permanente pos.
- 5.4 By die uiteindelige verstryking van die termyn, kan die vastetermynpos nie voortgesit word nie. Verwagtinge moet nie geskep word dat die pos gekontinueer word nie. Diensooreenkomste moet nie na verstryking van die termyn stilswyend voortgesit word nie.
- 5.5 Indien die situasie vereis dat die pos gekontinueer moet word, kan dit slegs geskied as 'n Voltydse Predikantspos, Deeltydse Predikantspos óf Tentmakerpos.

## **6. AFVAARDIGING NA MEERDERE VERGADERINGE**

'n Predikant in 'n vaste termynpos word na meerdere vergaderinge afgevaardig.

## **7. DIENSBEËINDIGING EN BEHOUD VAN BEVOEGDHEID**

- 7.1 'n Predikant in 'n vaste termynpos tree op datum van die verstryking van die termyn uit diens van die gemeente/kerkverband.
- 7.2 'n Predikant in 'n vaste termynpos kan vóór verstryking van die termyn weens wangedrag, ongeskiktheid en bedryfsvereistes uit diens van die gemeente/kerkverband ontslaan word (vergelyk *Reglement 21 vir die bestuur van diensverhoudinge vir predikante by ongeskiktheid en onvermoë en Reglement 22 vir tug en vermaning*).
- 7.3 'n Emeritus in 'n vaste termynpos se diens word beëindig nie later nie as die laaste dag van die maand waarin die ouderdom van 70 jaar bereik is.
- 7.4 By diensbeëindiging ná verstryking van die termyn, stel die kerkvergadering die Algemene Taakspan Predikantesake daarvan in kennis.
- 7.5 By diensbeëindiging na verstryking van die termyn, word 'n Akte van Demissie uitgereik waar van toepassing en word die bevoegdheid van predikant/emeritus behou.
- 7.6 'n Predikant (jonger as 70) behou volle predikantsbevoegdheid wanneer die vastetermynpos verstryk.

## REGLEMENT 17

### REGLEMENT VIR BRUGBEDIENING

#### 1. AARD VAN DIE POS

- 1.1 'n Brugbediening is 'n korttermynbediening met die doel om 'n gemeente te begelei in die tyd nadat 'n vakature in 'n gemeente ontstaan het en voordat die vakature weer gevul word.
- 1.2 'n Brugpredikantpos is 'n vastetermynpos wat aan die hand van die prosedure soos uiteengesit in Reglement 16 vir *Vastetermynpredikantspos* geskep en gevul word.
- 1.3 'n Brugpredikantpos het 'n duidelik omskrewe taakoms krywing.

#### 2. DIE BRUGPREDIKANT

- 2.1 'n Brugpredikant is 'n gelegitimeerde predikant van die NG Kerk met die spesifieke opdrag om die gemeente in die oorgangstyd tussen twee predikantsposte in 'n gemeente (nadat 'n vakature ontstaan het) te begelei.
- 2.2 'n Brugpredikant staan onder opsig en tug van die ring en kan vóór verstryking van die termyn weens wangedrag, ongeskiktheid en bedryfsvereistes uit diens van die gemeente/kerkverband ontslaan word (vergelyk *Reglement 21 vir die Bestuur van Diensverhoudinge vir Predikante by Ongeskiktheid en Onvermoë asook Reglement 22, Reglement vir Tug en Vermaning*).
- 2.3 'n Brugpredikant moet:
  - 2.3.1 die toepaslike opleiding as brugpredikant deurloop het;
  - 2.3.2 oor 'n wye bedieningservaring beskik;
  - 2.3.3 vertrouwd wees met die breë kerkverband se funksionering;
  - 2.3.4 deurlopend oor genoegsame VBO-punte beskik; en
  - 2.3.5 na oorleg met die sinodale strukture en deur die ring of sy gevolmagtigde geskik geag word vir die spesifieke gemeente se omstandighede en bedieningsbehoefte.
- 2.4 'n Brugpredikant tree op die datum van die verstryking van die termyn uit diens van die gemeente en kan nie in 'n ander pos in die gemeente beroep word nie.
- 2.5 By diensbeëindiging na verstryking van die termyn, word die bevoegdheid van predikant/emeritus behou.

#### 3. TERMYN VAN POS

- 3.1 'n Brugbedieningspos kan voltyds of deelyds gevul word na gelang van die gemeente se situasie en behoeftes.
- 3.2 'n Brugbedieningspos het 'n vaste termyn wat kan strek van drie tot nege maande. In uitsonderlike gevalle kan die termyn tot 'n maksimum van twaalf

maande verleng word. Goedkeuring hiervoor word verkry van die ring of sy gevolmagtigde met opgaaf van redes. Sien 4.2.6 van hierdie reglement insake pensioenverpligting.

#### **4. SKEP VAN POS EN DIE TERMYN**

- 4.1 Wanneer 'n vakature in 'n gemeente ontstaan en die kerkraad op 'n brugbediening besluit, begelei die konsulent die kerkraad om 'n gemotiveerde voorlegging aan die ring of sy gevolmagtigde voor te lê oor die wenslikheid vir die skep van 'n pos vir 'n brugbediening.
- 4.2 Die ring of sy gevolmagtigde keur die pos vir brugbediening goed met inagneming van die volgende:
  - 4.2.1 Die gemeente se bedieningsbehoefte en finansiële omstandighede tydens die vakature.
  - 4.2.2 Die advies van die sinode kan ook ingewin word.
  - 4.2.3 'n Pos vir brugbediening kan nie geskep word om die bevoegdheid van predikant te verkry of te behou nie, of om sitting in kerklike vergaderinge te verkry nie.
  - 4.2.4 Gegewe die sinodale riglyne word in dieselfde gemeente gelykwaardigheid in diensvoordele gehandhaaf tussen 'n predikantspos vir brugbediening en 'n pos vir 'n onbepaalde termyn, en geskied vergoeding volgens die algemene sinodale riglyne.
  - 4.2.5 Vergoeding mag wel in uitsonderlike omstandighede *vooraf onderhandel* word tussen partye met dien verstande dat die bostaande riglyn sal geld indien die gemeente dit kan bekostig.
  - 4.2.6 Indien die pos vir brugbediening ses maande of korter is, of die posbeker 'n emeritus is en reeds pensioen ontvang, is die pos nie pensioendraend nie en berus die vergoeding op die beginsel van totale koste van indiensneming. Indien die pos vir brugbediening vir 'n periode van langer as ses maande is, is dit van dag een af pensioendraend en geld die bepalinge van *Reglement 16 vir Vastetermynpredikantsposte*.
  - 4.2.7 Die pos vir brugbediening het duidelik omskrewe bedieningsverpligtinge wat met die amp van predikant in direkte verband staan.
- 4.3 Die ring of sy gevolmagtigde adviseer die kerkraad oor
  - 4.3.1 die termyn vir die kontrakperiode van die predikant in die brugbedieningspos;
  - 4.3.2 die opstel van die diensooreenkoms; en
  - 4.3.3 die opstel van die pligtestaat aan die hand van *Kerkorde* Artikel 9.
- 4.4 Nadat die ring of sy gevolmagtigde die pos en die voorgestelde diensooreenkoms goedgekeur het, kan die kerkraad oorgaan tot die beroepingsproses.

#### **5. BEROEPING EN BEVESTIGING**

- 5.1 Die kerkraad beroep 'n geskikte kandidaat as brugpredikant in ooreenstemming met die kerklike voorskrifte (Artikel 7 van die *Kerkorde*), en finaliseer in oorleg met die ring of sy gevolmagtigde die diensooreenkoms.

- 5.2 Die beroeping geskied tydens 'n kerkraadsvergadering aan die hand van reglement 12.4.
- 5.3 Die beroeping se naam word aan die gemeente voorgelê vir approbasie by twee Sondae se eredienste.
- 5.4 Nadat approbasie verkry is, keur die ring of sy gevolmagtigde die beroep goed, tesame met die finale diensooreenkoms.
- 5.5 Nadat die skriftelike aanvaarding van die diensooreenkoms deur die beroepte ontvang is, word die beroepte as predikant in die gemeente bevestig.

## **6. TAAK EN OPDRAG VAN DIE BRUGPREDIKANT**

- 6.1 Die brugpredikant
  - 6.1.1 kan verkies word as voorsitter van die kerkraad aan die hand van Artikel 28;
  - 6.1.2 kan nie as kandidaat oorweeg word vir die vulling van die vakature nie; en
  - 6.1.3 word na meerdere vergaderings afgevaardig.
- 6.2 Die brugpredikant begelei die gemeente om met die oog op die toekomstige bedeling
  - 6.2.1 te visioeneer en te beplan;
  - 6.2.2 oor die geskiedenis van die gemeente (verlede) na te dink;
  - 6.2.3 die eie identiteit van die gemeente te herontdek; en
  - 6.2.4 God se roeping vir die gemeente vir die volgende jare te onderskei.
- 6.3 Die brugpredikant begelei die gemeente om afskeid te neem van 'n bedeling wat verby is en voorbereidings te tref vir 'n nuwe bedeling
  - 6.3.1 in hulle verhouding met die breë kerkverband; en
  - 6.3.2 ter voorbereiding vir 'n nuwe predikant.
- 6.4 Die brugpredikant doen maandeliks verslag aan die kerkraad en die ring of sy gevolmagtigde.

## REGLEMENT 18

### REGLEMENT VIR STANDPLAAS- EN DIENSLERAARSPORTE

#### 1. AARD

1.1 'n Standplaasleraar is 'n persoon

1.1.1 wat die vereiste kerklike opleiding deurloop het, gelegitimeer, georden en bevestig is om 'n toegespitste diens te lewer binne die besondere konteks waarvoor hy/sy opgelei en beroep is; en

1.1.2 wat 'n spesifieke bediening in 'n besondere konteks verrig, soos byvoorbeeld vir die Khoi-San, Dowes en Portugeessprekendes.

1.2 'n Diensleraar is 'n persoon

1.2.1 wat die vereiste kerklike opleiding deurloop het, gelegitimeer, georden en bevestig is om diens te lewer met 'n spesifieke opdrag, ooreenkomstig die terrein/e van opleiding.

1.2.2 wat toegespitste diens in een of meer van die volgende spesialisasievelde verrig, naamlik:

pastoraat, jeug- en familiebediening, prediking, diakonaat, geloofsvorming, evangelisasie, kerkplanting, aanbidding, geloofsvorming, bejaardebediening, berading, lering, uitreikbediening en sending.

1.3 Diensleraars en standplaasleraars staan soos alle ander ampsdraers onder die opsig en tug van die ring. (*Kerkorde Artikel 59 tot 66 asook Reglement 21 vir die Bestuur van Diensverhoudinge vir Predikante by Ongeskiktheid en Onvermoë en Reglement 22 vir Tug en Vermaning.*)

#### 2. SKEP VAN POS

2.1 Indien die gemeente 'n standplaas- of diensleraarpos wil skep, doen die kerkraad 'n gemotiveerde voorlegging aan die ring of sy gevolmagtigde.

2.2 'n Gemeente kan slegs 'n diensleraarpos skep as daar reeds 'n predikantspos in die gemeente gevul is. (Diensleraars werk altyd onder toesig van die betrokke plaaslike gemeente se predikant of in uitsonderlike omstandighede onder die toesig van 'n ringspredikant.)

2.3 Die ring of sy gevolmagtigde keur, met inagneming van die gemeente se bedieningsbehoefte en finansiële omstandighede, die standplaas- of diensleraarpos goed.

2.4 Die ring of sy gevolmagtigde adviseer die kerkraad met die opstel van die diensooreenkoms en sien toe dat daar uitvoering gegee word aan die tersaaklike voorskrifte van Artikel 8 van die *Kerkorde*, die *Reglement 12 vir Beroeping*,

*Bevestiging, Demissie en Emeritaat van Predikante*, ander toepaslike bepalinge in reglemente en verbandhoudende besluite.

- 2.5 'n Standplaas- of diensleraarpos kan nie geskep word om die bevoegdheid te verkry of te behou of om sitting in kerklike vergaderinge te verkry nie.
- 2.6 'n Standplaas- of diensleraarpos het duidelik omskrewe bedieningsverpligtinge wat met die opleiding van die standplaas- of diensleraarpos in direkte verband staan.
- 2.7 Nadat die ring of sy gevolmagtigde die pos en die voorgestelde diensooreenkoms goedgekeur het, kan die kerkraad oorgaan tot beroeping.
- 2.8 Standplaas- of diensleraarposte kan óf voltyds óf deelyds gevul word.

### **3. PENSIOENVOORDELE**

- 3.1 'n Standplaas- of diensleraarpos (langer as ses maande) is
  - 3.1.1 pensioendraend, onderworpe aan die volgende voorwaardes:
    - 3.1.1.1 'n standplaas- of diensleraarpos se pensioenbydraevlak word bereken volgens die ooreengekome bydraekategorie,
    - 3.1.1.2 die werkgewer bepaal die werkgewerbydraes tot die pensioenfonds aan die hand van die reëls van die pensioenfonds, en
    - 3.1.1.3 die werkgewer se bydrae bepaal die ooreenstemmende bydraekategorie van die werknemer;
  - 3.1.2 nie pensioendraend nie, onderworpe aan die volgende voorwaarde:
    - 3.1.2.1 wanneer die persoon wat beroep is reeds by 'n ander wetlik goedgekeurde pensioenfonds ingeskakel is (dit sluit vrywillige annuïteitsfondse uit).

### **4. BEROEPING EN BEVESTIGING**

By die beroeping en bevestiging word uitvoering gegee aan die voorskrifte van Artikel 8 van die *Kerkorde en Reglement 12 vir die Beroeping, Bevestiging, Demissie en Emeritaat van Predikante*.

### **5. AFVAARDIGING NA MEERDERE VERGADERINGE**

Standplaas- of diensleraarpos word na meerdere vergaderings afgevaardig.

### **6. DIENSOOREENKOMS MET DIE ANDER WERKGEWER(S)**

- 6.1 Standplaas- of diensleraars wat in deelydse poste aangestel word, kan ook in diens van ander werkgewers wees.

- 6.2 By die aangaan van 'n diensooreenkoms met 'n standplaas- of diensleraar, bepaal die kerkraad die voorwaarde(s) vir diens aan die ander werkgewer(s).
- 6.3 Die aangaan van alle toekomstige diensooreenkomste met ander werkgewers moet vooraf deur die kerkraad goedgekeur word.

## **7. DIENSBEËINDIGING**

- 7.1 'n Standplaas- of diensleraar tree by aanvaarding van 'n beroep of by bereiking van die normale aftree-ouderdom uit diens van die gemeente.
- 7.2 Diensbeëindiging anders as beroeping of emeritaat geskied aan die hand van die diensooreenkoms en ooreenkomstig die toepaslike kerkordelike reglemente (vergelyk *Reglement 21 vir die Bestuur van Diensverhoudinge vir Predikante by Ongeskiktheid en Onvermoë*) asook *Reglement 22 (Reglement vir Tug en Vermaning)*.
- 7.3 By diensbeëindiging/aanvaarding van emeritaat, stel die kerkvergadering die Algemene Taakspan Predikantesake daarvan in kennis.

## REGLEMENT 19

### REGLEMENT VIR GEKOPPELDE PREDIKANTSPOS

#### 1. AARD

- 1.1 'n Gekoppelde predikantspos is 'n pos waar 'n NG Kerk predikant buite die konteks van 'n gemeente werk verrig, maar steeds as deel van die kerkverband wil funksioneer. Hierdie werk geskied tipies binne die kerkverband, of het 'n kerklike karakter, of moet voldoen aan posvereistes wat slegs deur 'n predikant gevul kan word. Dit sluit in predikante in sinodale diens, kerklike dosente, kapelane, predikante in nie-regeringsorganisasies, die Bybelgenootskap ens.
- 1.2 'n Gekoppelde pos is 'n pos in 'n gemeente waar geen diensvoordele, vergoeding of kompensasie vir dienste, diensooreenkoms en pligtetaat van toepassing is nie.
- 1.3 'n Gekoppelde pos kan slegs geskep word vir iemand wie se beroep dit vereis dat hy/sy oor predikantsbevoegdheid beskik en kan daarom nie geskep word om die bevoegdheid van predikant te verkry of te behou nie, of om sitting in kerklike vergaderinge te verkry nie.

#### 2. SKEP EN VUL VAN DIE POS

- 2.1 Indien 'n predikant aan 'n gemeente gekoppel wil word, nader hy/sy die kerkraad in oorleg met sy werkgewer.
- 2.2 Die kerkraad besluit om 'n gekoppelde pos te skep en rig 'n versoek, met 'n gemotiveerde voorlegging aan die ring of sy gevolmagtigde vir goedkeuring.
- 2.3 Nadat goedkeuring van die ring ontvang is, formaliseer die kerkraad die pos deur:
  - 2.3.1 die naam van die persoon vir approbasie aan die gemeente voor te hou;
  - 2.3.2 die persoon te bevestig in die amp, met 'n opdrag wat verband hou met die beroep/bediening wat hy/sy beoefen;
  - 2.3.3 'n ooreenkoms op te rig wat die verhouding tussen die gekoppelde predikant en die kerkraad beskryf.
- 2.4 Hierdie ooreenkoms bevat minstens die volgende bepalings:
  - 2.4.1 geen pligte word aan die persoon opgedra nie, behalwe as anders ooreengekom;
  - 2.4.2 geen vergoeding of kompensasie van enige aard is ter sprake nie, behalwe waar anders ooreengekom;
  - 2.4.3 die gekoppelde pos termineer wanneer die persoon nie meer die pos van sy/haar beroep vul nie.
- 2.5 By die skep van 'n gekoppelde pos in die kerkverband, sien die betrokke kerkvergadering toe dat aan die toepaslike vereiste van hierdie reglement voldoen word.
- 2.6 Bevestiging van die gekoppelde predikant geskied na oorlegpleging tussen die kerklike liggaam (byvoorbeeld kuratorium/sinode) en die gemeente.

- 2.7 Gekoppelde predikante, wat insluit kerklike dosente, staan onder die opsig en tug van die ring sonder om die opsig van die kerklike liggaam in wie se diens hy/sy is uit te sluit.

### **3. VERHOUDING EN FUNKSIE**

- 3.1 Die gekoppelde predikant is *ex-officio* deel van die kerkraad. Na gelang van omstandighede kan 'n kerkraad besluit of hy/sy volle lid van die kerkraad is of net adviserend.
- 3.2 'n Predikant in 'n gekoppelde pos wat volle lid van 'n kerkraad is, kan, maar hoef nie na meerdere vergaderings afgevaardig te word nie.

### **4. DIENSBEËINDIGING**

- 4.1 'n Predikant in 'n gekoppelde pos tree by aanvaarding van 'n beroep of by bereiking van die normale aftree-ouderdom uit diens van die gemeente/kerkverband.
- 4.2 Wanneer die verhouding met die primêre werkgewer beëindig word, word die koppeling met gemeente beëindig.
- 4.3 By diensbeëindiging/aanvaarding van emeritaat, stel die kerkvergadering die Algemene Taakspan Predikantesake daarvan in kennis.

## REGLEMENT 20

### REGLEMENT VIR DIE VERLOF VAN PREDIKANTE EN DIENSLERAARS

#### 1. ALGEMENE BEPALINGE

- 1.1 Die kerkraad of sy gevolmagtigde reël alle verlof waarop 'n predikant in terme van die diensooreenkoms geregtig is.
- 1.2 Die predikant doen op voorgeskrewe wyse by die kerkraad of sy gevolmagtigde aansoek om verlof te neem. Verlof, met die uitsondering van siekteverlof, kan slegs geneem word nadat die aansoek goedgekeur is.
- 1.3 Alle verlof wat geneem word, word genotuleer en aangeteken in 'n verlofregister wat elke ses maande deur die kerkraad en jaarliks deur die ring in sitting gekontroleer word.
- 1.4 Indien 'n predikant in diens van die kerkverband is, word alle verlof gereël, goedgekeur en gekontroleer deur die kerkvergadering of sy gevolmagtigde as verteenwoordiger van die werkgewer.
- 1.5 Verlof is nie van een diensverhouding na 'n ander oordraagbaar nie.

#### 2. JAARLIKSE VERLOF

- 2.1 Voltydse predikante is geregtig op 42 kalenderdae jaarlikse verlof, met volle besoldiging vir elke twaalf maande van diens in die gemeente/kerkverband, tensy anders ooreengekom is.
- 2.2 Deeltydse predikante se verlof word per ooreenkoms proporsioneel gelykwaardig met die diensvoordele van 'n voltydse predikant bepaal.
- 2.3 Jaarlikse verlof val 'n predikant pro rata vanaf indienstreding toe.
- 2.4 Die kerkvergadering of sy gevolmagtigde en die predikant kom ooreen wanneer die jaarlikse verlof geneem kan word. Indien 'n ooreenkoms nie bereik word nie, kan die kerkvergadering of sy gevolmagtigde besluit wanneer die predikant verlof moet neem.
- 2.5 Jaarlikse verlof kan nie geneem word gedurende 'n tydperk van kennisgewing van diensbeëindiging nie, tensy die werkgewer anders besluit.
- 2.6 Jaarlikse verlof word in die jaar waarin dit verdien is, geneem. Hoogstens 21 kalenderdae kan na die volgende jaar oorgedra word. Opgehoopte verlof moet binne die eerste ses maande van die volgende jaar geneem word.
- 2.7 Minstens 21 kalenderdae aaneenlopende gewone verlof moet jaarliks geneem word.
- 2.8 Gewone verlof is slegs op die datum van diensbeëindiging uitbetaalbaar. Die pro rata-gedeelte van die huidige jaar se ongebruikte verlof en die

goedgekeurde opgehoopde verlof wat van die vorige jaar oorgedra is, kan tot 'n gesamentlike maksimum van 30 kalenderdae uitbetaal word. Uitbetaling geskied op die basis van Totale Koste vir Indiensneming (TKVI) volgens heersende wetgewing.

### **3. SIEKTEVERLOF**

- 3.1 Die kerkvergadering of sy gevolmagtigde kan aan 'n predikant siekteverlof met volle lewensonderhoud en toelaes toestaan.
  - 3.1.1 Siekteverlof word bereken teen 60 kalenderdae en word in siklusse van drie jaar toegestaan.
  - 3.1.2 Deeltydse predikante se siekteverlof word per ooreenkoms proporsioneel gelykwaardig met die diensvoordele van 'n voltydse predikant bepaal.
  - 3.1.3 In die geval van oorskryding van toegekende siekteverlof binne 'n siklus van drie jaar, kan 'n predikant kies om beskikbare vakansieverlof aan te wend vir siekteverlof. Indien geen toegekende siekteverlof of vakansieverlof meer beskikbaar is nie en swak gesondheid steeds verhinder dat diensverpligtinge doeltreffend verrig kan word, kan die predikant aansoek doen vir verdere siekteverlof. Indien die kerkvergadering die aansoek goedkeur, neem die kerkvergadering of sy gevolmagtigde 'n besluit oor vergoeding vir 'n ooreengekome tydperk, en tref gepaste reëlins vir plaasvervangende diens.
  - 3.1.4 By 'n aansoek om siekteverlof vir meer as drie kalenderdae kan die kerkvergadering of sy gevolmagtigde aandrang op 'n verslag van 'n geneesheer om te bepaal
    - 3.1.4.1 waarom die predikant nie gesond genoeg is om diens te verrig nie; en
    - 3.1.4.2 hoe lank die afwesigheid na verwagting sal duur alvorens normale diens hervat kan word.
  - 3.1.5 Die kerkvergadering of sy gevolmagtigde het die reg om op koste van die predikant 'n mediese sertifikaat van 'n geneesheer vir voorlegging aan die kerkvergadering te vereis, voordat siekteverlof goedgekeur word.
  - 3.1.6 Indien die siekteverlof sestig (60) kalenderdae per drie jaar siklus oorskry, word die advies van die ring of sy gevolmagtigde ingewin met die oog op die voortgang van die bediening in die gemeente.

### **4. VERLOF VIR BEDIENINGSONTWIKKELING**

- 4.1 'n Minimum van ses en 'n maksimum van twaalf kalenderdae per jaar word aan 'n predikant toegeken vir verlof vir bedieningsontwikkeling, tensy anders ooreengekom.
- 4.2 Verlof vir bedieningsontwikkeling val 'n predikant pro rata vanaf datum van indienstreding toe.

- 4.3 Verlof vir bedieningsontwikkeling word toegestaan nadat die kerkvergadering of sy gevolmagtigde die betrokke kursus/program goedgekeur het.
- 4.4 Verlof vir bedieningsontwikkeling kan nie oorgedra word na 'n volgende jaar nie.

## **5. STUDIEVERLOF**

- 5.1 Studieverlof is 'n vergunning en die kerkvergadering en die predikant moet in die lig van plaaslike omstandighede ooreenkom oor studieverlof.
- 5.2 Wanneer 'n kerkvergadering en die predikant ooreenkom oor deeltydse studie, is die predikant slegs geregtig op deeltydse vergoeding.
- 5.3 Wanneer 'n kerkvergadering en die predikant ooreenkom oor voltydse studie vir minder as ses maande, voorsien die predikant vir die duur van die studietydperk in eie lewensonderhoud en is toelaes nie betaalbaar nie.
- 5.4 Indien voltydse studie langer as ses maande duur, is 'n predikant verplig om demissie by die kerkvergadering te ontvang.
- 5.5 Die predikant tref self reëlins met die Algemene Taakspan Predikantesake met betrekking tot behoud van proponentsbevoegdheid by demissie weens verdere studie.
- 5.6 Die predikant is verplig om eers opgehoopte verlof te gebruik voordat die persoon kan aanspraak maak op studieverlof. 'n Predikant kan aansoek doen om 'n terugskrywing van verlof wat vir toepaslike studie gebruik is, mits 'n kursus(se) wat vooraf deur die kerkvergadering goedgekeur is, suksesvol voltooi is.

## **6. KRAAMVERLOF**

- 6.1 'n Vroulike predikant is geregtig op 'n maksimum van vier maande kraamverlof wat soos volg toegestaan word, tensy anders ooreengekom:
  - 6.1.1 'n maksimum van vier weke voor die bevalling en 'n minimum van ses weke na die geboorte van die baba kan geneem word;
  - 6.1.2 volle lewensonderhoud en toelaes is vir die tydperk van 10 weke (vergelyk 6.1.1) betaalbaar; en
  - 6.1.3 die vergoedingskomponent vir die restant van die kraamverlof word tussen die predikant en die kerkvergadering of sy gevolmagtigde onderhandel.
- 6.2 'n Vroulike predikant is geregtig op 'n maksimum van drie maande aannemingsverlof by die wettige aanneming van 'n kind.
  - 6.2.1 Volle lewensonderhoud en toelaes is vir die tydperk van 10 weke (vergelyk 6.1.2) betaalbaar; en die vergoedingskomponent vir die restant van die aannemingsverlof word tussen die predikant en die kerkvergadering of sy gevolmagtigde onderhandel.

- 6.3 Aanwas van jaarlikse verlof vind tydens kraamverlof en aannemingsverlof plaas.
- 6.4 'n Manlike predikant is geregtig op 10 kalenderdae aaneenlopende verlof, by die geboorte van sy kind, waarvan minstens die eerste drie dae betaalde verlof is (sien 8.1.1.1).
- 6.5 'n Manlike predikant is geregtig op 10 kalenderdae aaneenlopende verlof by die wettige aanneming van 'n kind, waarvan minstens die eerste drie dae betaalde verlof is (sien 8.1.1.1).

## **7. OPENBARE VAKANSIEDAE**

- 7.1 'n Predikant is geregtig op openbare vakansiedae. Indien die predikant 'n diensverpligting het, kom die persoon en die kerkvergadering of sy gevolmagtigde ooreen op 'n gepaste reëling.
- 7.2 Die gemeente/kerkverband en die predikant kan met mekaar in die dienskontrak ooreenkom dat jaarlikse verlof nie verleng word met die openbare vakansiedae wat in die verlofsiklus val nie.
- 7.3 By gebrek aan 'n skriftelike ooreenkoms, word 'n predikant se verlof verleng met elke openbare vakansiedag wat in die verloftydperk val.  
Vir volledige beskrywing van Studieverlof, vergelyk Bestuurshandleiding vir Diensverhoudinge, Hoofstuk 2, 15.7.

## **8. VERLOF VIR GESINSVERANTWOORDELIKHEDE**

- 8.1 'n Predikant is, met die oog op gesinsverantwoordelikhede, geregtig op drie dae betaalde menslikheidsverlof per jaar, wat nie oploopbaar is nie.
  - 8.1.1 Die predikant is geregtig om hierdie betaalde verlof te neem
    - 8.1.1.1 wanneer sy/haar kind gebore word;
    - 8.1.1.2 wanneer sy/haar kind siek is;
    - 8.1.1.3 in die geval van dood van die predikant se gade of lewensmaat; of
    - 8.1.1.4 in die geval van dood van die predikant se ouer, aangenome ouer, grootouer, kind, aangenome kind, kleinkind, broer of suster.

## **9. SABBATSTYD**

- 9.1 Predikante is bo en behalwe verlof, met goedkeuring van die kerkvergadering of sy gevolmagtigde, geregtig op sabbatstyd.
- 9.2 Die toekenning van sabbatstyd is onderhewig aan die volgende voorwaardes:
  - 9.2.1 Na verloop van drie jaar in dieselfde werkkring, is 'n predikant geregtig op 30 kalenderdae sabbatstyd.
  - 9.2.2 Sabbatstyd kan nie opgehoop word nie.

- 9.2.3 Sabbatstyd word aaneenlopend geneem.
- 9.2.4 Gedurende sabbatstyd is die predikant nie vir ampspligte in die gemeente of diens aan die kerkverband beskikbaar nie.
- 9.2.5 Sabbatstyd geskied met volle lewensonderhoud en toelaes.
- 9.2.6 Na die sabbatstyd gee die predikant terugvoer aan die kerkvergadering.
- 9.2.7 Sabbatstyd kan nie van een gemeente/werkring na 'n ander oorgedra word nie.
- 9.2.8 Sabbatstyd is nie by diensbeëindiging uitbetaalbaar nie.

## REGLEMENT 21

### REGLEMENT VIR DIE BESTUUR VAN DIENSVERHOUDINGE VIR PREDIKANTE/DIENSLERAARS BY ONGESKIKTHEID EN ONVERMOË

#### 1. ALGEMENE UITGANGSPUNTE

**Hierdie reglement sit prosedures uiteen vir die uitvoering van artikel 12.7 van die *Kerkorde*.**

- 1.1 Elke kerkvergadering (kerkraad/ring/sinode/Algemene Sinode) het 'n taakspan/kommissie/diensgroep wat die diensverhouding tussen die gemeente/kerkverband as werkgewer en die predikant/diensleraar as werknemer bestuur. Die kerkvergadering se taakspan/kommissie/diensgroep kan kundiges buite die gemeente/kerkverband betrek. Hierdie taakspan/kommissie/diensgroep kan 'n gevolmagtigde taakspan wees en doen verslag aan die kerkvergadering oor sy werksaamhede.

#### 2. PROSEDURE (WYSE VAN OPTREDE)

##### 2.1 Gebrekkige bedieningsvaardigheid of dienslewering (ongeskiktheid) en disfunksionele interpersoonlike verhoudings

Indien die kerkraad of die ring oordeel dat 'n predikant/diensleraar se moontlike gebrekkige bekwaamheid/geskiktheid vir die pos waarin hy/sy staan of sy/haar disfunksionele verhoudings in die gemeente, 'n disfunksionele of nadelige invloed op die funksionering van die gemeente (werkkring) het, word die saak op die agenda van die kerkraad geplaas vir 'n formele ondersoek aan die hand van die volgende prosedure, met 'n verslag aan die ring:

- 2.1.1 Die kerkraad wys 'n ondersoekliggaam aan wat saamgestel is uit drie lede van die kerkraad, waarin verkieslik die kommissie/taakspan/diensgroep wat die diensverhouding hanteer, verteenwoordig is, ten minste een lid deur die ring se gevolmagtigde aangewys, en ten minste een lid deur die sinode se gevolmagtigde aangewys.
- 2.1.2 Die ondersoekliggaam ondersoek die bekwaamheid, geskiktheid of disfunksionele verhoudings van die predikant/diensleraar. Die vereistes vir 'n formele ondersoek is dieselfde as die vereistes vir 'n tugondersoek (vergelyk Reglement 22 vir Tug en Vermaning), aangepas vir die ondersoek na bekwaamheid, geskiktheid of disfunksionele verhoudings.
- 2.1.3 Die besware oor ongeskiktheid, onbekwaamheid, of disfunksionele verhoudings wat formeel ondersoek gaan word, moet skriftelik onder die aandag van die predikant/diensleraar gebring word.

- 2.1.4 Indien bevind word dat die predikant/diensleraar onbevredigende diens lewer, moet die aard van die onbevredigende diens en die vereistes waaraan die persoon moet voldoen, skriftelik onder die betrokke se aandag gebring word, met verslag aan die kerkraad.
- 2.1.5 Die kerkraad, in oorleg met die ondersoekliggaam doen alles in sy vermoë om deur toepaslike evaluering, toerusting, begeleiding (leiding en advies), berading en mediasie die betrokke predikant/ diensleraar te help om bevredigende diens aan die gemeente te lewer en/of die disfunksionele verhoudings te herstel.
- 2.1.6 'n Redelike tyd word toegelaat vir die predikant/diensleraar om dienste te verbeter en te voldoen aan die vereistes wat die kerkraad aan die persoon gestel het, waarna die predikant/ diensleraar se dienslewering weer geëvalueer word.
- 2.1.7 Die kerkraad oorweeg eerstens ander wyses buiten diensbeëindiging om die aangeleentheid reg te stel.
- 2.1.8 Indien die ondersoekliggaam tot die gevolgtrekking kom dat die onbekwaamheid of ongeskiktheid of disfunksionele verhoudings nie uit die weg te ruim is nie, kan die kerkraad, op skriftelike aanbeveling van die ondersoekliggaam, die predikant/ diensleraar uit diens van die gemeente ontslaan. Diensbeëindiging weens gebrekkige bedieningsvaardigheid of dienslewering of disfunksionele verhoudings geskied met volle behoud van die predikantsbevoegdheid/diensleraarbevoegdheid en die uitreiking van die Akte van Demissie.
- 2.1.9 In gevalle waar die predikant/ diensleraar in diens van die kerkverband is, versoek die kerkvergadering sy gevolmagtigde wat die diensverhoudinge hanteer, om met die bystand van die sinodale regs-/kerkordekommissie/diensgroep die bekwaamheid of geskiktheid van die predikant/diensleraar of die aard en omvang van disfunksionele verhoudings tussen die predikant/diensleraar en ander personeel formeel te ondersoek. Dieselfde prosedure, uiteengesit in 2.1.2 tot 2.1.8 hierbo, en indien nodig aangepas, word gevolg.

## **2.2 Swak gesondheid of besering (ongeskiktheid)**

Indien 'n kerkraad of die betrokke ring oordeel dat 'n predikant/diensleraar weens swak gesondheid of besering nie meer die vereiste diensverpligtinge kan nakom nie, word die saak op die agenda van die kerkraad geplaas vir hantering aan die hand van die volgende prosedure, met verslag aan die ring:

- 2.2.1 Die kerkraad wys 'n gevolmagtigde ondersoekliggaam aan wat saamgestel is uit drie lede van die kerkraad, waarin verkieslik die kommissie/taakspan/diensgroep wat die diensverhoudinge hanteer, verteenwoordig is, ten minste een lid deur die ring se gevolmagtigde aangewys, en ten minste een lid deur die sinode se gevolmagtigde aangewys.

- 2.2.2 Die bewering van swak gesondheid of besering wat daartoe lei dat die persoon nie meer aan die vereiste diensverpligtinge kan voldoen nie, moet skriftelik onder die aandag van die predikant/ diensleraar gebring word.
- 2.2.3 Wanneer alternatiewe ondersoek word, word daar gekyk na die aard van die diensverpligtinge, die duur van die afwesigheid, die erns van die siekte of besering, die moontlikheid van herstel of rehabilitasie en die moontlikheid van plaasvervangende diens.
- 2.2.4 In die geval van permanente ongeskiktheid, word die moontlikheid van veranderde diensverpligtinge, en/of veranderde werksomstandighede, en/of die beskikbaarheid van enige geskikte alternatiewe werk ondersoek, ten einde die predikant/diensleraar se ongeskiktheid te akkommodeer.
- 2.2.5 Die ondersoek na die ongeskiktheid van die predikant/diensleraar weens swak gesondheid of beserings word in oorleg met die sinodale pensioenfonds en/of 'n ander soortgelyke toepaslike liggaam gedoen.
- 2.2.6 Tydens die ondersoek kry die predikant/diensleraar die geleentheid om sy/haar kant van die saak te stel en voorstelle te maak. Die predikant/diensleraar kan deur 'n NG Kerk lidmaat bygestaan word.
- 2.2.7 Indien die predikant/diensleraar tydens die uitvoering van 'n diensverpligting ernstig beseer of siek word, rus daar 'n swaarder plig op die gemeente/kerkverband om die ongeskiktheid van die predikant/diensleraar te akkommodeer.
- 2.2.8 Die kerkraad kan, nadat alle moontlike alternatiewe ondersoek is, op billike gronde, in oorleg met die sinodale pensioenfonds of ander soortgelyke toepaslike liggaam, besluit om 'n predikant/diensleraar weens swak gesondheid of besering uit diens van die gemeente te ontslaan. Diensbeëindiging weens mediese ongeskiktheid geskied met behoud van die bevoegdheid van die predikant/diensleraar en die uitreiking van die Akte van Demissie.
- 2.2.9 In gevalle waar die predikant/diensleraar in diens van die kerkverband is, versoek die kerkvergadering sy gevolmagtigde wat die diensverhoudinge hanteer, om met die bystand van die sinodale regskommissie /kerkordekommissie/diensgroep, die mediese ongeskiktheid van die predikant/diensleraar formeel te ondersoek. Dieselfde vereistes, uiteengesit in 2.2.2 tot 2.2.8 hierbo, en indien nodig aangepas, word nagekom.

### **2.3 Die gemeente/kerkverband se bedryfsvereistes**

Indien 'n kerkraad of die betrokke ring oordeel dat 'n gemeente om finansiële redes nie meer 'n predikant/diensleraar kan bekostig nie, word die saak op die agenda van die kerkraad geplaas vir hantering aan die hand van die volgende prosedure, met verslag aan die ring:

- 2.3.1 Die kerkraad wys 'n ondersoekliggaam aan wat saamgestel is uit drie lede van die kerkraad waarin verkieslik die kommissie/taakspan/diensgroep wat die diensverhoudinge en fondse hanteer, verteenwoordig is, waarvan ten minste een

- lid deur die ring se gevolmagtigde aangewys is, en ten minste een lid (verkieslik 'n finansiële kundige) deur die sinode se gevolmagtigde aangewys is.
- 2.3.2 Die ondersoekliggaam bepaal die omvang van die finansiële probleem en wend daadwerklike pogings aan om oplossings te soek, byvoorbeeld voortgesette diens teen verminderde diensvoordele en -verpligtinge, deelydse- of tentmakerbediening, aanstelling in 'n ander pos, standplaasverwisseling en kombinasie van poste.
- 2.3.3 Indien diensbeëindiging die enigste oplossing blyk te wees, pleeg die kerkraad se ondersoekliggaam oorleg met die predikant(e)/ diensleraar(s) wat waarskynlik deur die beoogde diensbeëindiging geraak sal word.
- 2.3.4 Die oorlegplegende partye poog om eenstemmigheid te bereik oor
- 2.3.4.1 geskikte maatreëls om die diensbeëindiging te vermy, dit tot die minimum persone te beperk, en die uitvoering daarvan so te bestuur dat dit die minimum ontwrigting vir al die partye tot gevolg sal hê en die nadelige gevolge daarvan te versag;
- 2.3.4.2 die metode van bepaling van die predikant(e)/diensleraar(s) wie se dienste in die geval van medeleraarskap beëindig gaan word;
- 2.3.4.3 voorsiening by diensbeëindiging (uittreeloon of skeidingspakket).
- 2.3.5 Die kerkraad se ondersoekliggaam voorsien skriftelik aan die predikant(e) /diensleraar(s) met wie oorleg gepleeg word
- 2.3.5.1 die redes vir die beoogde diensbeëindiging;
- 2.3.5.2 alternatiewe wat oorweeg is voordat diensbeëindiging voorgestel is en die redes waarom elk van die alternatiewe verwerp is;
- 2.3.5.3 die aantal predikante/diensleraars wat waarskynlik geraak gaan word in die geval van medeleraarskap;
- 2.3.5.4 die voorgestelde metode van bepaling van welke predikant(e)/diensleraar (s) se diens beëindig moet word in die geval van medeleraarskap;
- 2.3.5.5 die datum waarop die diensbeëindiging waarskynlik van krag sal word;
- 2.3.5.6 die voorgestelde voorsiening by diensbeëindiging (uittreeloon of skeidingspakket);
- 2.3.5.7 enige bystand wat die kerkraad beoog om aan te bied; en
- 2.3.5.8 die moontlikheid van 'n toekomstige beroep.
- 2.3.6 Die betrokke predikant(e)/diensleraar (s) word die geleentheid gebied om vertoë te rig oor enige aangeleentheid waaroor oorleg gepleeg word, en die ondersoekliggaam oorweeg die vertoë en reageer daarop. Indien die ondersoekliggaam nie daarmee eens is nie, word redes daarvoor verstrek.
- 2.3.7 Die kerkraad se ondersoekliggaam bepaal die predikant(e)/diensleraar (s) wie se diens beëindig gaan word volgens maatstawwe waaroor die oorlegplegende

partye ooreengekom het of wat, indien daar nie eenstemmigheid is nie, billik en objektief is.

- 2.3.8 By bereiking van 'n ooreenkoms, goedkeuring deur die kerkraad en na ondertekening daarvan deur die oorlegplegende partye, beëindig die kerkraad die diens van die predikant(e)/diensleraar(s). Indien daar nie eenstemmigheid is nie, besluit die kerkraad in oorleg met die ring of sy gevolmagtigde op billike en objektiewe wyse in die lig van die voorgeskrewe voorsiening. Diensbeëindiging weens bedryfsvereistes geskied met behoud van die bevoegdheid van predikant/diensleraar en die uitreiking van die Akte van Demissie.
- 2.3.9 In gevalle waar die predikant/diensleraar in diens van die kerkverband is, ondersoek die kerkvergadering se taakspan/kommissie/diensgroep wat die diensverhoudinge en fondse hanteer, in oorleg met die sinodale regs-kommissie/kerkordekommissie, die saak formeel. Dieselfde vereistes, uiteengesit in 2.3.2 tot 2.3.8 hierbo, en indien nodig aangepas, word nagekom.

## **2.4 Gemeente/kerkverband se bedieningsvereistes**

'n Predikant/diensleraar se diensverhouding kan ook weens die gemeente/kerkverband se veranderde tegnologiese behoeftes (bv. gebrekkige rekenaarvaardigheid), strukturele aanpassings (bv. oortollige poste by kombinerings, eenwording of samesmelting van gemeentes), bedieningsvereiste (bv. demografiese- en taalveranderinge van die lidmate) of soortgelyke omstandighede (bv. nood en oorlewing van die gemeente, of die predikant/diensleraar se onaanpasbaarheid) beëindig word.

- 2.4.1 Indien 'n kerkraad of die betrokke ring oordeel dat 'n predikant/diensleraar nie meer aan die bedieningsvereiste van die gemeente voldoen nie, word die saak op die agenda van die kerkraad geplaas vir hantering aan die hand van die volgende prosedure met verslag aan die ring:
- 2.4.1.1 Die kerkraad wys 'n ondersoekliggaam aan wat saamgestel is uit drie lede van die kerkraad waarin die kommissie/taakspan/diensgroep wat die diensverhoudinge hanteer, verteenwoordig is, waarvan ten minste een lid deur die ring se gevolmagtigde aangewys is, en ten minste een lid deur die sinode se gevolmagtigde aangewys is.
- 2.4.1.2 Die ondersoekliggaam bepaal die omvang van die bedieningsvereistes waaraan die predikant/ diensleraar nie voldoen nie en wend daadwerklike pogings aan om oplossings te soek. Dieselfde prosedure, uiteengesit in 2.1.2 tot 2.1.8 en/of 2.3.2 tot 2.3.8 (wat ook al van toepassing is) hierbo, en indien nodig aangepas, word gevolg.
- 2.4.2 In gevalle waar die predikant/diensleraar in diens van die kerkverband is, versoek die kerkvergadering sy gevolmagtigde wat die diensverhoudinge hanteer, om met die bystand van die sinodale regs-/kerkordekommissie/diensgroep, die bedieningsvereistes waaraan die predikant/diensleraar nie voldoen nie, formeel

te ondersoek. Dieselfde vereistes, uiteengesit in 2.4.1.2 hierbo, en indien nodig aangepas, word nagekom.

## **2.5 Voorsiening in gevalle van diensbeëindiging geld die volgende reëlins met betrekking tot billike voorsiening:**

2.5.1 Diensbeëindiging weens gebrekkige bedieningsvaardigheid of dienslewering of disfunksionele verhoudings

2.5.1.1 In die geval van diensbeëindiging weens onbekwaamheid, word 'n uittreeloon/skeidingspakket bereken gelyk aan ten minste twee weke se lewensonderhoud vir elke voltooide jaar van aaneenlopende diens by die betrokke werkgewer vir die eerste dertien jaar, en daarna een week per voltooide jaar. Dit word bereken teen die geldende ooreengekome TKVI (totale koste van indiensneming). In die verband geld 'n minimum van 4 weke.

2.5.1.2 Die uitbetaling van alle uitstaande verlof geskied ingevolge die bepalings van Reglement 20 vir die Verlof van Predikante en Diensleraars.

2.5.2 Diensbeëindiging weens mediese ongeskiktheid

2.5.2.1 Wanneer 'n predikant se diens weens mediese ongeskiktheid beëindig moet word, ontvang die persoon ongeskiktheidsvoordele volgens die bepalinge van die sinodale pensioenfonds (vergelyk Artikel 14 van die *Kerkorde*).

2.5.2.2 In die geval waar 'n reglement wat ongeskiktheidsvoordele reël nie van toepassing is nie, ontvang die persoon 'n uittreeloon/skeidingspakket gelyk aan ten minste twee weke se lewensonderhoud vir elke voltooide jaar van aaneenlopende diens by die betrokke werkgewer vir die eerste dertien jaar en daarna een week per voltooide jaar. Dit word bereken teen die geldende ooreengekome TKVI (totale koste van indiensneming). In die verband geld 'n minimum van 4 weke.

2.5.2.3 Die uitbetaling van alle uitstaande verlof geskied ingevolge die bepalings van Reglement 20 vir die Verlof van Predikante en Diensleraars.

2.5.3 Diensbeëindiging weens die gemeente/kerkverband se bedienings- en bedryfsvereistes

2.5.3.1 In die geval van diensbeëindiging weens die gemeente/kerkverband se finansiële onvermoë of ander bedienings- of bedryfsvereistes, word 'n uittreeloon/skeidingspakket bereken gelyk aan ten minste twee weke se lewensonderhoud vir elke voltooide jaar van aaneenlopende diens by die betrokke werkgewer vir die eerste dertien jaar en daarna een week per voltooide jaar. Dit word bereken teen die geldende ooreengekome TKVI (totale koste van indiensneming). In die verband geld 'n minimum van 4 weke.

2.5.3.2 Die uitbetaling van alle uitstaande verlof geskied ingevolge die bepalings van Reglement 20 vir die Verlof van Predikante en Diensleraars.

### **3. APPÈL**

- 3.1 In alle gevalle van diensbeëindiging het die predikant/diensleeraar die reg tot appèl ingevolge Artikel 23 van die *Kerkorde* en Reglement 23 vir Hersiening (revisie), Appèl, Beswaarskrif (gravamen) en Prosedurele Beswaar. By diensbeëindiging ingevolge artikel 12.7 van die *Kerkorde* word die predikant/diensleeraar oor die rede ingelig en herinner aan die reg tot appèl.

## REGLEMENT 22

### REGLEMENT VIR KERKLIKE TUG EN VERMANING

#### RAAMWERK VIR DIE KRONOLOGIESE VERLOOP VAN 'N KERKLIKE TUGPROSES

1. Vertrekpunte
2. Tugliggaam
3. Aanleiding tot 'n kerklike tughandeling
  - 3.1 Nadelige gerug
  - 3.2 Skriftelike klag
  - 3.3 Skriftelike verslag
  - 3.4 Aanmelding
4. Samestelling en aanwysing van 'n kerklike tugliggaam
  - 4.1 Kerkraadstugliggaam
  - 4.2 Ringstugliggaam
  - 4.3 Verdere bepalings oor aanwysing van ondersoek- en tugliggame
5. Stuiting in ampsdiens
6. Bepaling van die meriete vir 'n kerklike tugondersoek
7. Voorbereiding vir 'n ondersoek
  - 7.1 Opskrifstelling van bewerings
  - 7.2 Kennisgewing van die kerklike tugondersoek en besorging van die bewerings aan die aangeklaagde
8. Vereistes en prosedure vir die tugliggaam
9. Vereistes en prosedure vir 'n ondersoekvergadering
  - 9.1 Teenwoordigheid in die ondersoekvergadering
  - 9.2 Aanvang en prosedurele reëlins vir die ondersoekvergadering
  - 9.3 Verloop en aard van die ondersoekvergadering
  - 9.4 Getuies
10. Bevinding en besluite van die tugliggaam
  - 10.1 Bevinding
  - 10.2 Dissiplinêre maatreëls
  - 10.3 Kennisgewing van die bevinding en dissiplinêre maatreëls
11. Reëlins rondom 'n appèl
12. Koste verbonde aan kerklike ondersoeke
13. Reëlins met betrekking tot diensbeëindiging

#### 1. VERTREKPUNTE VAN KERKLIKE TUG – MATTEUS 18

Wanneer van Reglement 22 gebruik gemaak word, moet dit geskied binne die konteks van *Kerkorde* Artikel 1 en 2 se "gegrond op die Bybel" wat impliseer dat die inhoud en gees van die Bybel bepalend is vir hoe die letter van die *Kerkorde* geïnterpreteer word. Dat die Woord van God se voorskrifte bepalend

moet wees vir hoe die tug hanteer moet word, word eksplisiet aangedui in Artikel 59: *"Kerklike opsig word gehou en kerklike tug en dissipline uitgeoefen... volgens voorskrifte van die Woord van God; die belydenisskrifte; die Kerkorde en ander bepalings van die kerk; die diensooreenkoms"*. Hierdie volgorde beteken dat daar 'n bepaalde rangorde is in wat in ag geneem moet word.

Reglement 22 mag nooit so vertolk word of gebruik word dat dit die aard van die kerklike opsig en tug misken nie. Artikel 60 bepaal: *"Die kerklike opsig en tug dra 'n geestelike karakter en pas by die kerk as 'n geloofs- en liefdesgemeenskap. Opsig en tug word dus op 'n kerklike wyse en met geestelike middele uitgeoefen. Amptelike kerklike opsig en tug is pastoraal-kerkregtelik van aard en moet uit 'n Bybelse en geestelike oogpunt billik en regverdig toegepas word."* 'n Kerklike tugondersoek hou rekening met die beginsels van natuurlike geregtigheid naamlik voldoende kennisgewing, billike verhoor en geen vooroordeel, asook die *audi alteram partem* reël (die reg om gehoor te word).

Verder geskied die toepassing van Reglement 22 teen die agtergrond dat lidmate by die aflegging van belydenis van geloof, kerkraadslede by bevestiging en gelegitimeerdes by legitimasie, ordening/bevestiging en kontraktuele diensaanvaarding hulle eksplisiet onderwerp aan die kerklike opsig en tug. Daarmee lê hulle saam met ander lidmate en ander ampsdraers 'n eed af om hulle verantwoordbaar te hou aan die Woord, die belydenisskrifte en Bybelse waardes wat gepas is vir lidmate en ampsdraers en versoek hulle die geloofsgemeenskap om hulle daaraan te hou en te vermaan en te tug wanneer hulle leer en lewe in stryd is daarmee in so 'n mate dat dit hulle getuienis, geloofwaardigheid en die heil van die liggaam van Christus tot nadeel strek.

## **2. TUGONDERSOEK**

- 2.1 Bevoegdheid om 'n kerklike ondersoek te doen word soos volg gevestig:
  - 2.1.1 Kerklike ondersoeke word hanteer deur 'n bevoegde kerkvergadering of verkieslik die gevolmagtigde tugliggaam van die betrokke kerkvergadering. Ondersoeke na beweerde optrede (aksie of versuim), uitsprake of oortredings wat as tugwaardige sondes geklassifiseer kan word, word deur 'n gevolmagtigde tugliggaam met afhandelingsbevoegdheid van die bepaalde kerkvergadering hanteer.
  - 2.1.2 'n Kerklike tugondersoek na die leer en/of lewe van 'n lidmaat van die gemeente (anders as ampsdraers, emeriti en gelegitimeerdes) geskied deur die kerkraad of sy gevolmagtigde tugliggaam.
  - 2.1.3 'n Kerklike tugondersoek na die leer en/of lewe van 'n ouderling of diaken geskied deur die ring of sy gevolmagtigde tugliggaam.
  - 2.1.4 'n Kerklike tugondersoek na die leer en/of lewe van 'n gelegitimeerde met ampsbevoegdheid (byvoorbeeld: predikant, emeritus, proponent, standplaas- of diensleraar), geskied deur die gevolmagtigde tugliggaam van die ring onder wie

die lidmaatskap van die persoon ressorteer. Alhoewel die kerkraad of kerkverband die primêre werkgewer van die gelegitimeerde is, is die voortgaande diensverbintenis afhanklik van die opsig en tug wat die ring uitoefen ten opsigte van ampsbevoegdheid.

### **3. AANLEIDING TOT 'N KERKLIKE TUGONDERSOEK**

#### 3.1 'n Kerklike tugondersoek vind plaas na aanleiding van 'n:

##### 3.1.1 Nadelige gerug

'n Nadelige gerug is 'n gerug (byvoorbeeld mondelings, sosiale media, of elektronies soos e-pos) wat versprei word oor 'n lidmaat, ampsdraer of gelegitimeerde.

##### 3.1.2 Skriftelike klag/bewering

'n Klag (teen 'n lidmaat, ampsdraer of gelegitimeerde) kan skriftelik voor 'n bevoegde kerkvergadering gebring word. So 'n skriftelike klag/bewering moet die volgende elemente bevat: aard (beskrywing), tyd/periode en plek van die beweerde oortreding. Indien die klag dit nie bevat nie, moet hierdie elemente bygevoeg word indien enigsins moontlik.

##### 3.1.3 Amptelike verslag

'n Amptelike verslag is 'n skrywe van 'n ander kerklike vergadering (byvoorbeeld kerkraad) wat 'n saak teen 'n lidmaat of ampsdraer of 'n gelegitimeerde vir kerkordelike hantering by die kerkraad/ring aanhangig maak.

##### 3.1.4 Aanmelding

Enige lidmaat of ampsdraer wat oordeel dat hy/sy verdink kan word van 'n oortreding wat hom/haar in terme van Artikel 61 van die Kerkorde impliseer en besorg is oor die moontlike impak daarvan op die gemeente en sy/haar geloofwaardigheid en getuienis, kan die betrokke kerkvergadering nader om die aangeleentheid kerkordelik te hanteer.

3.2 Enige skriftelike klag/bewering, nadelige gerug, skriftelike verslag of aanmelding word deur 'n kerkvergadering of sy gevolmagtigde (bv. ringskommissie) in ontvangs geneem en sonder enige beoordeling en/of hantering na die aangewese gevolmagtigde tugliggaam, verwys vir hantering.

### **4. SAMESTELLING EN AANWYSING VAN 'N KERKLIKE TUGLIGGAAM**

Die verantwoordelike kerkvergadering (kerkraad of ring) wys 'n gevolmagtigde tugliggaam met volle afhandelingsbevoegdheid aan op die volgende wyse:

#### 4.1 Kerkraadstugliggaam

4.1.1 Die gevolmagtigde tugliggaam van die kerkraad bestaan uit ten minste drie lede. Hierdie tugliggaam word saamgestel uit minstens twee ouderlinge van die

gemeente soos deur die kerkraad aangewys, en minstens een predikant/ouderling van 'n ander ringsgemeente soos deur die ringskommissie aangewys. Verkieslik moet een vrou deur aanwysing of koöptering, op die tugliggaam dien. Indien die aangeklaagde of die klaer 'n vrou is, moet daar minstens een vrou op die tugliggaam dien. Ander kundige lidmate van binne of buite die gemeente kan ook gekoöpteer word as volwaardige lede van die tugliggaam.

4.1.2 'n Kerkraad of sy gevolmagtigde (bv. die dagbestuur) kan met opgaaf van redes ook versoek dat 'n tugliggaam van 'n ander kerkraad of van die ring die kerklike tugondersoek behartig.

#### 4.2 Ringstugliggaam

4.2.1 Die gevolmagtigde tugliggaam van die ring bestaan uit 'n minimum van vyf lede, waarvan drie lede deur die ring of sy gevolmagtigde aangewys word en minstens twee lede deur die sinodale regs-kommissie of kerkorde kommissie/taakspan of sy gevolmagtigde (aktuaris) aangewys word. Verkieslik moet een vrou deur aanwysing of koöptering, op die tugliggaam dien. Indien die aangeklaagde of die klaer 'n vrou is, moet daar minstens een vrou op die tugliggaam dien. Ander kundige lidmate van binne of buite die ring kan ook gekoöpteer word as volwaardige lede van die tugliggaam.

4.2.2 Die ring of sy gevolmagtigde (byvoorbeeld ringskommissie) kan met opgaaf van redes die sinodale regs-kommissie of kerkorde kommissie/taakspan of sy gevolmagtigde (aktuaris) versoek om 'n tugliggaam van 'n ander ring of 'n ander onafhanklike tugliggaam aan te wys om die tugondersoek namens daardie betrokke ring doen.

#### 4.3 Verdere bepalinge oor aanwysing van tugliggame

4.3.1 Enige tugliggaam wat aangewys is moet eers deur die bepaalde kerkvergadering of sy gevolmagtigde (byvoorbeeld ringskommissie) met volmag goedgekeur word voordat die tugondersoek verder gevoer word.

4.3.2 Indien 'n situasie ontstaan waartydens óf die tugliggaam óf die aangeklaagde oordeel dat 'n regverdige en billike tugondersoek nie kan plaasvind met die huidige samestelling van die tugliggaam nie, het beide die reg om, met opgaaf van rede(s), by die betrokke kerkvergadering (kerkraad of ring) of sy gevolmagtigde aansoek te doen dat 'n ander tugliggaam saamgestel word om die tugondersoek te behartig.

4.3.3 Die volgende word beskou as botsing van belange en is geldige redes waarom 'n persoon nie op 'n tugliggaam kan dien nie:

4.3.3.1 waar daar familiebande in die eerste of tweede graad is;

4.3.3.2 waar finansiële voordeel of persoonlike belang ter sprake is;

4.3.3.3 waar 'n bewys by 'n persoon bestaan dat hy/sy nie 'n objektiewe (saaklike) besluit kan neem nie;

4.3.3.4 dat werknemers nie oor hul eie werk kan toesig hou/besluite neem nie.

- 4.3.4 Kerkraad: In geval van geldige redes word die ring of sy gevolmagtigde deur 'n kerkraad of sy gevolmagtigde, versoek om 'n ander tugliggaam aan te wys om as gevolmagtigde van die betrokke kerkraad die tugondersoek te doen.
- 4.3.5 Ring: In geval van geldige redes word die sinode of sy gevolmagtigde versoek om 'n ander tugliggaam aan te wys om as gevolmagtigde van die betrokke ring die tugondersoek te doen.
- 4.3.6 Die kerkvergadering of sy gevolmagtigde het in oorleg met die tugliggaam finale besluitnemingsbevoegdheid oor sy samestelling.
- 4.3.7 Indien 'n gevolmagtigde tugliggaam van 'n kerkvergadering, benewens 'n situasie soos in punt 4.3.2, nie die kerklike tugondersoek kan hanteer nie, kan die kerkvergadering of sy gevolmagtigde, by hoë uitsondering en met opgaaf van redes, die betrokke sinode of sy gevolmagtigde (sinodale regs kommissie of kerkorde kommissie/taakspan of sy gevolmagtigde/aktuaris), versoek om 'n tugliggaam saam te stel om die tugondersoek namens die kerkvergadering te behartig. Indien die sinode of sy gevolmagtigde oordeel dat die versoek meriete dra, wys die sinodale regs kommissie, kerkorde kommissie of taakspan of sy gevolmagtigde minstens drie persone aan om die tugondersoek namens die kerkvergadering te behartig. Die kerkvergadering of sy gevolmagtigde wys hierdie persone aan as sy gevolmagtigde tugliggaam. Verkieslik moet een vrou deur aanwysing of koöptering, op die tugliggaam dien. Indien die aangeklaagde of die klaer 'n vrou is, moet daar een vrou op die tugliggaam dien. Ander kundige lidmate kan ook gekoöpteer word as volwaardige lede van die tugliggaam.
- 4.3.8 Indien die betrokke sinode of sy gevolmagtigde sinodale regs kommissie of kerkorde kommissie/taakspan of sy gevolmagtigde (aktuaris) in die geval van 4.3.6 hierbo, oordeel dat 'n geskikte tugliggaam nie uit lede van die betrokke sinode saamgestel kan word nie, kan die sinode of sy gevolmagtigde, by hoë uitsondering en met opgaaf van redes 'n ander sinode of sy gevolmagtigde sinodale regs kommissie of kerkorde kommissie/taakspan of sy gevolmagtigde (aktuaris) versoek om 'n tugliggaam saam te stel om die tugondersoek namens die kerkvergadering te behartig. Indien die ander sinode of sy gevolmagtigde oordeel dat die versoek meriete dra, wys die sinodale regs kommissie, kerkorde kommissie of taakspan of sy gevolmagtigde minstens drie persone aan om die tugondersoek namens die kerkvergadering te behartig. Die betrokke kerkvergadering of sy gevolmagtigde wys hierdie persone aan as sy gevolmagtigde tugliggaam. Verkieslik moet een vrou deur aanwysing of koöptering, op die tugliggaam dien. Indien die aangeklaagde of die klaer 'n vrou is, moet daar een vrou op die tugliggaam dien. Ander kundige lidmate kan ook gekoöpteer word as volwaardige lede van die tugliggaam.
- 4.4 Aanvanklike hantering van 'n klag  
 Nadat die tugliggaam gekonstitueer het en die tugliggaam die klag in ontvangs geneem het, word die aangeklaagde oor die volgende ingelig:

dat 'n klag ontvang is;  
dat die ontvanklikheid daarvan ondersoek word;  
dat hy/sy ingelig gehou sal word;  
dat die klag bedien sal word indien nodig.

## **5. STUITING IN AMPSDIENS**

- 5.1 By 'n beweerde oortreding in leer en/of lewe (*onder meer owerspel, onsedelikheid, seksuele teistering, molestering, pornografie, egskeiding, moord, aanranding, meineed, diefstal, bedrog, rassisme, haatspraak, laster, leerdwaling en skeurmakery – sien ook artikel 61*) deur 'n gelegitimeerde en ampsdraer, mag die tugliggaam, na ontvangs van die klag, nadelige gerug of verslag, die aangeklaagde tydelik stuit om enige ampsdiens te verrig.
- 5.2 Die tugliggaam moet die aangeklaagde vooraf skriftelik kennis gee van die voorgenome stuiting. Hierdie kennisgewing moet 'n kort en saaklike uiteensetting bevat van die beweerde oortreding ten opsigte van leer en/of lewe en die aangeklaagde inlig dat skriftelike verdoë binne drie dae gerig mag word voordat 'n besluit tot stuiting gefinaliseer word.
- 5.3 Hierdie stuiting geskied met kennisgewing aan die aangeklaagde en die kerkvergadering/instansie in wie se diens die persoon staan.
- 5.4 Stuiting behels die opskorting van ampspligte. Stuiting is nie 'n tug- en/of dissiplinêre handeling of maatreël nie, maar dien slegs om al die betrokkenes te beskerm en 'n vry en regverdige tugondersoek moontlik te maak. Dit geld in die geval waar die beweerde oortreding in leer en/of lewe van so aard en omvang is dat dit 'n negatiewe impak op die uitvoering van die aangeklaagde se ampspligte kan hê.
- 5.5 Stuiting kan hoogstens drie maande duur waarna die gevolmagtigde ringstugliggaam dit moet ophef of die voortsetting daarvan by die ring of sy gevolmagtigde (bv. ringskommissie) moet motiveer met die opgaaf van redes.
- 5.6 Volle lewensonderhoud word tydens stuiting betaal.

## **6. BEPALING VAN DIE MERIETE VIR 'N ONDERSOEK**

- 6.1 Voordat die gevolmagtigde tugliggaam besluit om die aangeleentheid formeel te hanteer oordeel die tugliggaam na aanleiding van die beskikbare dokumentasie wat ontvang is of daar genoegsame inligting is om te oordeel oor die meriete van die ondersoek.
  - 6.1.1 Indien die tugliggaam oordeel dat daar nie genoegsame inligting beskikbaar is nie, kan die tugliggaam besluit om nog relevante dokumente aan te vra of verhelderende gesprekke te voer met die aanbringer van die klag/nadelige gerug wat groter duidelikheid kan verskaf.

- 6.2 Die aard van hierdie vasstelling word aan die diskresie van die tugliggaam oorgelaat en moet so gedoen word dat 'n moontlike tugondersoek nie daardeur benadeel word nie.
- 6.3 Op grond van inligting tot beskikking van die tugliggaam, kan die tugliggaam besluit om die bewerings op een van die volgende wyses te hanteer:
- 6.3.1 dat dit nie ontvanklik is nie en van die hand gewys word;
- 6.3.2 herderlike sorg;
- 6.3.3 versoeningsaksie;
- 6.3.4 kerklike mediasie.
- 6.4 Indien enige wyse van hantering (anders as 'n formele ondersoek) nie suksesvol is nie of na die oordeel van die tugliggaam nie gepas is nie, word 'n formele kerklike tugondersoek gedoen.
- 6.5 Indien besluit word om nie 'n formele kerklike tugondersoek na die leer en/of lewe van die aangeklaagde te doen nie, moet die aanbringer van die klag of die nadelige gerug of verslag, die aangeklaagde, asook die betrokke kerkvergadering skriftelik daarvan in kennis gestel word, met opgaaf van redes.
- 6.6 'n Klag, nadelige gerug, skriftelike verslag of aanmelding wat ontvang is, word nadat besluit is om 'n kerklike tugondersoek te doen, die besit van die betrokke kerkvergadering of sy gevolmagtigde tugliggaam en kan nie sonder toestemming van die betrokke kerkvergadering of sy gevolmagtigde tugliggaam teruggetrek word nie.
- 6.7 Indien 'n lidmaat of ampsdraer voor die aanvang van of tydens 'n tugondersoek bedank, voltooi die tugliggaam die tugondersoek asof die persoon steeds 'n lidmaat en/of in die amp is, en gee kennis van die bevinding en gepaardgaande maatreëls aan die belanghebbendes, die betrokke kerkvergaderings soos bv. die betrokke kerkraad en ring, asook die Algemene Taakspan Predikantesake.
- 6.8 Aan die hand van Artikel 61 moet ondermeer die volgende oortredings as tugwaardige sondes ondersoek word: owerspel, onsedelikheid, seksuele teistering, molestering, pornografie, egskeiding, moord, aanranding, meened, diefstal, bedrog, rassisme, haatspraak, laster, leerdwaling, skeurmakery asook die oortreding van die gedragskode van predikante.

## **7. VOORBEREIDING VIR 'N ONDERSOEK**

### **7.1 Opskrifstelling van bewerings**

- 7.1.1 Indien besluit word om die klag, nadelige gerug of verslag te ondersoek, sien die tugliggaam toe dat die bewerings behoorlik op skrif gestel word.
- 7.1.2 In die geval van 'n klag of nadelige gerug kan die tugliggaam die aanbringer van die klag ken in die formulering van die bewerings.

- 7.1.3 'n Geformuleerde klag wat kerklik ondersoek word, moet sover moontlik skriftelik die aard, plek en tyd/periode van die beweerde tugwaardige sonde vermeld.
- 7.2 Kennisgewing van die tugondersoek en besorging van die bewerings aan die betrokke partye.
- 7.2.1 Indien die tugliggaam besluit om die bewerings te ondersoek, word in die geval van ampsdraers en ander gelegitimeerdes, die aangeklaagde en die kerkraad waar hy/sy lidmaat is, onmiddellik skriftelik in kennis gestel dat klagtes ontvang is wat ondersoek gaan word. Hierdie kennisgewing bevat ook die algemene aard van die bewerings, dat 'n datum van die formele tugondersoek so gou moontlik vasgestel sal word en dat die geformuleerde bewerings ingevolge 7.2.2 aan die aangeklaagde besorg sal word.
- 7.2.2 Die formele skriftelike kennisgewing van die geformuleerde bewerings moet ten minste sewe dae vóór die aanvang van die tugondersoek skriftelik aan die aangeklaagde besorg word. Hierdie kennisgewing moet onder andere die volgende bevat:
- 7.2.2.1 die samestelling van die tugliggaam en 'n versoek dat die aangeklaagde daarop reageer aan die hand van 4.3.3 van hierdie reglement.
- 7.2.2.2 die tyd en die plek waar die tugondersoek sal plaasvind.
- 7.2.2.3 'n herinnering aan die aangeklaagde se regte in terme van die *Kerkorde* en hierdie reglement soos:
- 7.2.2.3.1 die reg om deur 'n NG Kerk lidmaat ondersteun te word.
- 7.2.2.3.2 die reg om getuies te roep (of skriftelike bewyse aan te bied) om die bewerings te weerlê.
- 7.2.2.3.3 en sy plig om vooraf die tugliggaam in te lig oor sy getuies.
- 7.2.3 Die kerkraad/werkgewer van die aangeklaagde word terselfdertyd in kennis gestel van die kerklike tugondersoek en datum daarvan.

## **8. VEREISTES EN PROSEDURE VIR DIE TUGLIGGAAM**

- 8.1 Die tugliggaam maak erns met voorskrifte van Artikel 59.2 van die *Kerkorde* te wete, die eer van God, heil van die kerk en die behoud van die sondaar.
- 8.2 Die tugliggaam moet so ver moontlik binne veertien dae na ontvangs van die klagte met die proses van die ondersoek begin en dit so ver moontlik binne redelike tyd na die aanvang van die tugondersoek afhandel.
- 8.3 Enige lid wat in 'n kerklike tugliggaam dien en aan 'n tugondersoek deelneem, behou sittingsreg in die tugliggaam tot die tugondersoek voltooi is. Indien iemand weens onvoorsiene omstandighede nie kan voortgaan in die tugliggaam nie, gaan die tugliggaam voort met sy werksaamhede met dien verstande dat die tugliggaam nie minder as drie lede kan wees nie, ongeag wie onttrek.

Die lede van 'n tugliggaam wat tot 'n bevinding kom en oor maatreëls besluit moet almal vir die volle duur van die kerklike ondersoek teenwoordig wees.

## **9. VEREISTES EN PROSEDURE VIR DIE VERGADERING VAN DIE TUGONDERSOEK**

9.1 'n Kerklike tugondersoek geskied met die oog op die vasstelling- en billike beoordeling van die feite en die soeke na die waarheid. Dit is nie 'n regsding of juridiese aangeleentheid tussen twee partye, die klaer en aangeklaagde, die eiser en verweerder nie. Al die betrokkenes moet verstaan dat hulle betrokke is in 'n kerklike tugondersoek wat ten doel het om die beste belang van alle partye te dien – en dat hulle hulle vir hierdie doel onderwerp aan die proses/ondersoek. Die sogenaamde “klaer” is dus nie 'n “party” in die kerklike tugondersoek nie, maar bloot 'n besorgde lid van die liggaam wat aanleiding gegee het tot die ondersoek. Die klaer is nie die "aanklaer" in die kerklike tugondersoek nie, maar kan as getuie optree. Die tugliggaam tree nie op as "regter" of "jurie" nie, maar as 'n besorgde lid van die liggaam van Christus wat soek na weë en middele vir hoe daar gehandel kan word om die eer van God, die welwese van die liggaam van Christus, asook die behoud van die sondaar ten beste te dien. As geloofsgemeenskap is onder andere die volgende waardes van belang in 'n kerklike ondersoek: versoening, berou, vergifnis, genesing, herstelde verhoudings, geloofwaardigheid van getuïenis en die evangelie, integriteit van die amp, pastorale sensitiwiteit en die welwese van gemeentes/gelowiges.

### 9.2 Teenwoordigheid in die ondersoekvergadering

9.2.1 Die ondersoekvergadering is 'n geslote vergadering waar vertroulikheid in alle opsigte geld.

9.2.2 By die aanvang van die vergadering is die volgende persone teenwoordig: lede van die tugliggaam, die aangeklaagde en die persoon wat hom/haar ondersteun en die aanbringer van die bewering(s), indien enige.

9.2.3 Getuies word individueel in die vergadering toegelaat en verlaat die vergadering nadat die getuïenis en ondervraging afgehandel is.

9.2.4 Getuies kan ook digitaal tot die vergadering toegelaat word onderworpe aan vertroulikheid reëlins.

9.2.5 Die betrokkenes is nie geregtig op iemand wat namens hulle optree nie, maar kan ondersteun word deur enige NG Kerklidmaat.

### 9.3 Aanvang en prosedurele reëlins vir die ondersoekvergadering

9.3.1 Die vergadering word met Skriflesing en gebed begin.

9.3.2 Die doel en die wese van die tug word verduidelik aan die hand van die vertrekpunte (sien ook 9.1) asook die prosedurele verloop van die tugproses soos bepaal in hierdie reglement.

- 9.3.3 Die vergadering kom ooreen op die waardes waarvolgens kerklike vergaderings geskied. Waardes soos:
- 9.3.3.1 in biddende afhanklikheid van God die Vader;
  - 9.3.3.2 in erkenning van Jesus Christus as die hoof van die kerk;
  - 9.3.3.3 onder leiding van die Heilige Gees; en
  - 9.3.3.4 aan die hand van die Bybel, die belydenisskrifte en die *Kerkorde*
  - 9.3.3.5 respek, deernis, vertrouwe, waarheid, eerlikheid, nederigheid, leerbaarheid en deursigtigheid.
- 9.3.4 Die voorsitter van die tugliggaam neem leiding om toe te sien dat die vergadering ordelik en kerkordelik korrek verloop. Die voorsitter tree nie as 'n voorsittende beampte op wat oor enige mag beskik is om as sodanig 'n finale beslissing in eie reg te maak nie. Alle besluite en bevindings word deur die volle tugliggaam geneem.
- 9.3.5 Die rol van die persoon wat moontlik die aangeklaagde ondersteun word verduidelik. Hierdie persoon kan die aangeklaagde moreel ondersteun en met advies bedien, maar mag net by uitsondering, met vergunning van die tugliggaam die vergadering toespreek.
- 9.3.6 'n Klankopname van die vergadering kan slegs deur die tugliggaam en met die nodige instemming van die betrokkenes gemaak word. Die klankopname is ter wille van die skribaats en bly die eiendom van die tugliggaam wat die toegang daartoe reguleer. Die tugliggaam kan bepaalde voorwaardes in die verband stel.
- 9.4 Verloop en aard van die ondersoekvergadering
- 9.4.1 Die bewerings teen die aangeklaagde word aan hom/haar voorgehou waarna hy/sy geleentheid kry om daarop te reageer.
- 9.4.2 Indien die aangeklaagde skuld erken, vra die tugliggaam verdere inligting en feite om die konteks, die omstandighede en die aard en erns van die oortreding te bepaal om die tugmaatreëls asook die geloofwaardigheid van die aanvaarding van aanspreeklikheid en egtheid van berou te bepaal. Dit geskied met die oog op verswaring of versagting.
- 9.4.3 Indien die aangeklaagde skuld ontken word die tugondersoek verder geneem.
- 9.4.4 Die aangeklaagde en die aanbringer van die bewerings kry geleentheid om hulle saak te stel en getuies ter ondersteuning te roep. Die tugliggaam kan ook getuies roep om meer lig op die saak te werp.
- 9.4.5 Tydens die ondersoek kry almal in die vergadering ruim geleentheid om vrae oor en weer aan die betrokkenes en alle getuies te vra. Die *audi alteram partem-beginsel* moet ten alle tye nagekom word.
- 9.4.6 Die ondersoek van beweringe vind deurentyd plaas in die teenwoordigheid van die aanbringer van die bewerings (indien enige) as primêre getuie sowel as die aangeklaagde.

- 9.4.7 Versagtende en verswarende omstandighede vorm deurlopend deel van die totale tugondersoek.
- 9.4.8. Indien enige van die betrokkenes weier om tydens die kerklike tugondersoek te verskyn of die voortgang van die kerklike tugondersoek verhinder, kan die tugliggaam met opgaaf van rede(s) die tugondersoek in afwesigheid van die bepaalde betrokke(s) voortsit en afhandel.
- 9.5 Getuies.
- 9.5.1 Die aanbringer van die bewerings, sowel as die aangeklaagde het die reg om getuies op te roep vir die ondersoek. Die betrokke tugliggaam kan self ook getuies oproep en getuienis aanbied om tot 'n behoorlike bevinding te kom. Die betrokkenes self kan in die loop van die saak verdere getuienis aanbied om lig op die saak te werp.
- 9.5.2 Enige persoon in die ondersoekvergadering kan enige van die getuies ondervra. Getuies moet voldoende geleentheid kry om hulle saak te stel en daar moet altyd voldoen word aan die *audi alteram partem*-reël.
- 9.5.3 Persone wat as getuies optree is nooit tegelykertyd in die vergadering nie. Elke getuie verlaat die vergadering nadat getuienis gelewer is.
- 9.5.4 Skriftelike getuienisse van enige van die partye kan in die vorm van beëdigde verklarings aan die ondersoekvergadering voorgelê word. Sodanige getuienis is slegs ontvanklik as dit onderteken is, vergesel word van 'n adres en kontakbesonderhede. Skriftelike getuienis moet aan al die partye beskikbaar gestel word, met genoegsame tyd om daarop voor te berei.
- 9.5.5 Billikheid vereis dat die name van al die getuies wat ter vergadering sal verskyn aan al die betrokkenes bekend gemaak sal word.
- 9.5.6 Die tugliggaam behoort alle betrokkenes te maan om op geen manier enige onbehoorlike invloed op die proses uit te oefen nie.

## **10. BEVINDING EN BESLUIE VAN DIE TUGLIGGAAM**

### **10.1 Bevinding**

- 10.1.1 Ná die aanhoor van die betrokkenes en die getuies, kom die gevolmagtigde tugliggaam tot 'n bevinding wat op skrif gestel word. In geval van 'n skuldigbevinding vorm getuienis ter versagting of verswaring deel van die totale kerklike tugondersoek.
- 10.1.2 Die bevinding oor skuld of onskuld deur 'n gevolmagtigde tugliggaam, gaan met opgaaf van redes gepaard.

### **10.2 Tugmaatreëls**

Tugmaatreëls is gerig op die eer van God, die heil (welwese) van die gemeente/kerk en die behoud van die sondaar. Daar moet 'n balans gevind word tussen die drie. Tugmaatreëls is nie strafmaatreëls nie.

- 10.2.1 Die tugliggaam neem 'n besluit oor gepaste tugmaatreëls met opgaaf van redes.

10.2.2 By hierdie besluit word die tugliggaam gelei deur *Kerkorde* Artikel 64. Die onderstaande tug- en/of dissiplinêre maatreëls kan deur tugliggame opgelê word.

## **Artikel 64**

### **Tug- en dissiplinêre maatreëls**

64.1 Die onderstaande tug- en/of dissiplinêre maatreëls kan deur tugliggame toegepas word:

#### **64.2 Lidmate**

64.2.1 'n vermaning in 'n privaatgesprek of ter vergadering van die tugliggaam met die oog op berou en bekering;

64.2.2 geestelike begeleiding en herderlike sorg en die moontlikheid van die weerhouding van lidmaatregte met die oog op berou en bekering;

64.2.3 afsnyding van die gemeente deur die gebruik van die betrokke formulier.

#### **64.3 Ouderlinge en diakens**

64.3.1 'n vermaning in 'n privaatgesprek of ter vergadering van die tugliggaam;

64.3.2 skorsing met of sonder opskorting van lidmaatregte totdat daar bewys van grondige berou is;

64.3.3 opheffing van ampsbevoegdheid.

#### **64.4 Gelegitimeerdes**

64.4.1 'n vermaning ter vergadering van die tugliggaam,

64.4.2 'n skriftelike waarskuwing deur die tugliggaam met verslag aan die werkgewer;

64.4.3 opskorting van legitimasie vir 'n vasgestelde tydperk met een of meer van die volgende maatreëls:

64.4.3.1 gedeeltelike of volle weerhouding van lewensonderhoud en toelaes deur die werkgewer. (Uitgawes wat direk met die nakoming van pligte te doen het kan weerhou word.)

64.4.3.2 Indien die tugliggaam nie oortuig is van die egtheid van die berou nie, kan hierdie opskorting van legitimasie verleng word.

64.4.4 Verlies van legitimasie waarna die kerkraad verplig is om uitvoering gee aan Artikel 12.

64.4.4.1 Hierdie verlies van legitimasie kan vir 'n vasgestelde tydperk of permanent wees.

64.4.4.1.1 In die geval van die tydelike verlies van bevoegdheid is die betrokke weer beroepbaar na die verstryking van die vasgestelde tydperk.

64.4.4.1.2 In die geval van permanente verlies van bevoegdheid word die akte van legitimasie nietig verklaar.

64.4.4.2. Kennisgewings word in beide gevalle aan die Algemene Taakspan Predikantesake gegee.

### 10.3 Kennisgewing van die bevinding en tugmaatreëls

- 10.3.1 Die tugliggaam moet binne 10 dae nadat tot 'n bevinding gekom is en op tugmaatreëls besluit is, die volgende betrokkenes skriftelik in kennis stel:  
die aangeklaagde;  
die aanbringer van die beweringe;  
die betrokke kerkvergadering/werkgewer.
- 10.3.2 Die tugliggaam het die diskresie om te besluit oor hoe die bevinding en tugmaatreëls aan die aangeklaagde en die gemeente oorgedra word.
- 10.3.3 Die tugliggaam gee onverwyld kennis van die bevinding aan die Algemene Taakspan Predikantesake. In geval van appèl moet die appèlliggaam die uitslag van die appèl aan die ATP stuur.
- 10.3.4 Die Algemene Taakspan Predikantesake word onverwyld deur die betrokke kerkvergadering of sy gevolmagtigde in kennis gestel wanneer 'n tugmaatreël opgehef word of 'n verdere tugmaatreël toegepas word rakende 'n gelegitimeerde.
- 10.3.5 Die tugliggaam bly dormant voortbestaan totdat die tydperk vir appèl verstryk het of die appèl afgehandel is, waarna dit ontbind. Die tugliggaam kan weer in die lewe geroep word indien dit genoodsaak word.

## **11. REËLINGS RONDOM 'N APPÈL**

- 11.1 Wanneer 'n lidmaat (of kerkvergadering) appèl aanteken teen die bevinding en/of dissiplinêre maatreëls van 'n meerdere kerkvergadering of sy gevolmagtigde, moet dit ingevolge die bepalings van Reglement 23 vir Hersiening (revisie), Appèl, Beswaarskrif (gravamen) en Prosedurele Beswaar gedoen word.
- 11.2 In gevalle van verlies van legitimasie tree dit eers in werking wanneer die tydperk vir appèl soos gereël deur Reglement 23 vir Hersiening (revisie), Appèl, Beswaarskrif (gravamen) en Prosedurele beswaar geëindig het. Hierdie appèl kan slegs aangeteken word deur die gelegitimeerde wie se legitimasie in gedrang is. Die betrokke ampsdraer word gestuit tot die tydperk vir appèl verstryk het. In gevalle waar wel appèl aangeteken word, word die betrokke ampsdraer verder gestuit tot by die afhandeling van die appèl.
- 11.3 Indien die appèl nie gehandhaaf word nie, tree die verlies van legitimasie onmiddellik in werking.
- 11.4 Volle lewensonderhoud word nie tydens stuiting opgeskort nie.

## **12. KOSTES VERBONDE AAN KERKLIKE ONDERSOEKE**

- 12.1 Die koste van 'n ondersoek, wat koste vir duplisering van dokumente, reis- en vergaderkoste en ander uitgawes insluit, word deur die betrokke kerkvergadering gedra. Die sinode dra die koste van die sinodale lede wat op 'n gevolmagtigde tugliggaam aangewys is.
- 12.2 Alle koste wat deur die betrokkenes self aangegaan is om óf die beskuldiging te maak óf te weerlê, sowel as die koste van hulle getuies word deur die betrokkenes gedra.

## REGLEMENT 23

### REGLEMENT VIR HERSIENING (REVISIE), APPÈL, GRAVAMEN (BESWAARSKRIF) EN PROSEDURELE BESWAAR

#### 1. HERSIENING (REVISIE), APPÈL, GRAVAMEN (BESWAARSKRIF), PROSEDURELE BESWAAR

##### Doel en voorskrifte

- 1.1. Appèl, gravamen, revisie en prosedurele besware word uitgeoefen
  - 1.1.1. tot eer van God;
  - 1.1.2. tot heil van die kerk of gemeente;
  - 1.1.3. tot behoud van die sondaar;
- 1.2. volgens die voorskrifte van
  - 1.2.1. die Woord van God;
  - 1.2.2. die belydenisskrifte; en
  - 1.2.3. die *Kerkorde*, reglemente en ander bepalinge van die kerk.

#### 2. HERSIENING (REVISIE), APPÈL (KERKRAAD, RING, SINODE), GRAVAMEN (LEERSTELLIGE BESWAAR), PROSEDURELE BESWAAR

- 2.1. Besluite van kerklike vergaderings is bindend, maar dit kan herroep, gewysig of vervang word by wyse van hersiening (revisie), gravamen (leerstellige beswaar) of appèl (in die geval van kerkraad, ring, sinode). In die geval van die Algemene Sinode geskied dit deur middel van 'n prosedurele beswaar.
  - 2.1.1 Hersiening (revisie) behels die hersiening van 'n bestaande besluit, tydens dieselfde of 'n volgende vergadering op versoek van 'n lid van die vergadering.
  - 2.1.2 'n Gravamen (leerstellige beswaar) is 'n ernstige beswaar teen 'n besluit wat die Algemene Sinode geneem het oor leerstellige aangeleenthede en word gebruik om 'n ernstige beroep hieroor op die Algemene Sinode te doen.
  - 2.1.3. Appèl behels 'n beroep op 'n meerdere vergadering wanneer 'n lidmaat en/of kerkvergadering 'n ernstige beswaar het oor 'n kerkvergadering se besluit.
  - 2.1.4 'n Prosedurele beswaar is 'n beswaar in terme van 'n kerkordelike prosedurele ongerymdheid tydens 'n vergadering van die Algemene Sinode of sy gevolmagtigde.

#### 2.2. HERSIENING (REVISIE) VAN BESLUIE

##### 2.2.1 Prosedure en hantering van hersiening (revisie)

- 2.2.1.1 Besluite wat geneem is, mag alleen na vooraf kennisgewing deur 'n lid van die vergadering en met die toestemming van die vergadering, in hersiening (revisie)

geneem word. Kennisgewing geskied óf tydens die vergadering waar die besluit(e) geneem is, óf in die agenda vir die volgende vergadering. (Sien Reglement van Orde)

2.2.1.2 Hersiening (revisie) kan toegestaan word indien oortuigend aangevoer word dat in die bespreking van die saak waaroor dit gaan, aan sekere aspekte daarvan glad nie, of nie voldoende aandag gegee is nie en/of daar later inligting na vore gekom het, en/of omstandighede sodanig verander het wat hersiening van die besluit noodsaaklik maak.

2.2.1.3 Die aansoek om hersiening (revisie) word op skrif gestel, aan die vergadering voorgelê en die vergadering beslis met meerderheidstem of die hersiening (revisie) toegestaan word. Indien toegestaan, is die saak weer oop vir bespreking. Die aansoek om hersiening (revisie) moet duidelik aandui watter besluite van die vergadering ter sprake is, en hoe die besluite moontlik gewysig kan word.

2.2.1.4 Tydens die behandeling van die aansoek om hersiening (revisie) kan 'n nuwe voorstel of amendement(e) opnuut ingedien word. Die vergadering kan tot 'n gewysigde of ander besluit kom, of die vorige besluit kan gehandhaaf of herroep word.

2.2.1.5 Indien die hersieningsvoorstel (revisie) goedgekeur is, vervang dit die vorige besluit(e).

## **2.2.2. Besluite tydens die vergadering:**

2.2.2.1 Wanneer kennis van hersiening (revisie) met betrekking tot besluite van dieselfde vergadering gegee word, word die redes verstrekkend waarom hersiening (revisie) aangevra word, maar 'n beredenering van die saak waaroor die besluit handel, word nie toegelaat nie.

2.2.2.2 Nadat kennis van hersiening (revisie) gegee is, besluit die vergadering of hersiening (revisie) toegestaan word.

2.2.2.3 Indien hersiening (revisie) toegestaan word, word die besluit tydens die vergadering in behandeling geneem op 'n tydstip soos deur die voorsitter gereël.

## **2.2.3 Besluite van die verlede:**

### **2.2.3.1 Kerkraadsvergaderings:**

2.2.3.1.1 Wanneer kennis van hersiening (revisie) gegee word, word die redes verstrekkend waarom hersiening (revisie) aangevra word, maar 'n beredenering van die saak waaroor die besluite handel, word nie toegelaat nie.

2.2.3.1.2 Nadat kennis van hersiening (revisie) gegee is, besluit die vergadering of hersiening (revisie) toegestaan word.

2.2.3.1.3 Indien hersiening (revisie) toegestaan word, word die besluit by 'n volgende vergadering in behandeling geneem.

### **2.2.3.2 Meerdere vergaderings:**

2.2.3.2.1 Besluite van meerdere vergaderings word na vooraf skriftelike kennisgewing in behandeling geneem.

2.2.3.2.2 Verslae van kommissies/taakspanne en beskrywingspunte waar nuwe aanbevelings oor vorige besluite gemaak word, word geag genoegsame skriftelike kennisgewing van hersiening (revisie) te wees.

### **3. GRAVAMEN (LEERSTELLIGE BESWAAR)**

- 3.1 'n Gravamen (leerstellige beswaar) is 'n ernstige beswaar teen 'n besluit wat die Algemene Sinode geneem het ten opsigte van 'n leerstellige aangeleentheid.
- 3.2 Alleen 'n kerkvergadering of sy gevolmagtigde kan 'n gravamen (beswaar) by die Algemene Sinode indien.
- 3.3 'n Gravamen (beswaar) wat sy oorsprong by 'n lidmaat, kerkraad of ring het, word met 'n motivering na die betrokke samestellende sinode of moderamen of diensraad gestuur.
- 3.4 Die betrokke sinodale vergadering of sy gevolmagtigde neem die gravamen (beswaar) van die lidmaat, kerkraad of ring in behandeling en stuur die gravamen (beswaar) met bykomende kommentaar na die Algemene Sinode.
- 3.5 Die gravamen (beswaar) moet minstens 'n jaar voor die volgende sitting van die Algemene Sinode by die Algemene Sekretaris ingedien word.
- 3.6 Die ATR besluit oor die ontvanklikheid van die gravamen (leerstellige beswaar) met verslag aan die moderamen van die Algemene Sinode.
- 3.7 Indien die gravamen (leerstellige beswaar) ontvanklik is, word dit vir oorweging aan die volgende Algemene Sinode voorgelê.
- 3.8 Indien die gravamen (leerstellige beswaar) nie ontvanklik is nie, word die betrokke kerkvergadering wat die gravamen ingedien het na verslag aan die ASM skriftelik in kennis gestel van die redes waarom die gravamen (leerstellige beswaar) nie ontvanklik is nie.
- 3.9 Indien die gravamen (beswaar) ontvanklik is, verwys die ASM of sy gevolmagtigde (dagbestuur van die ASM) dit na 'n taakspan vir hantering met verslag aan die Algemene Sinode.
- 3.10 Die taakspan kan die indiener van die gravamen (leerstellige beswaar) vooraf aanhoor met die oog op die hantering van die beswaar.
- 3.11 Alle gravamina (leerstellige besware) word volledig in die agenda van die Algemene Sinode opgeneem.
- 3.12 Vir die aanvaarding vir 'n gravamen (beswaar) word 'n tweederdemeerderheid vereis (vergelyk artikel 44.4).

### **4. APPÈL**

#### **4.1 ALGEMENE SAKE**

- 4.1.1 'n Lidmaat of 'n kerkvergadering wat 'n ernstige beswaar het op grond van die Bybel, die belydenis en/of die *Kerkorde* teen 'n besluit van 'n kerkraad, ring of sinode (streeksinode) kan appèl by 'n meerdere kerkvergadering teen daardie besluit aanteken.

- 4.1.2 Kennis van appèl word binne 21 kalenderdae nadat die besluite van die kerkvergadering in werking tree, ingedien.
- 4.1.3 Die gronde vir appèl word binne 21 kalenderdae na die kennisgewing van appèl ingedien by die skriba van die kerkvergadering by wie daar appèl aangeteken word.
- 4.1.4 Daar kan nie meer as een keer oor dieselfde saak by dieselfde vergadering appèl aangeteken word nie.
- 4.1.4.1 In terme van Artikel 65.2 en 65.3 van die *Kerkorde* kan daar oor leerstellige sake en bevoegdheidsaangeleenthede van gelegitimeerdes tot by die Algemene Sinode geappelleer word. Oor ander sake wat met die tug verband hou, kan daar nie verder as die sinode geappelleer word nie.
- 4.1.5 Wanneer 'n appèl ingedien word, besluit die appèlriggaam oor die moontlikheid om die uitvoering van die besluit op te skort. Indien opskorting oorweeg word, verkry die appèlriggaam die mening van die betrokke kerkvergadering of sy gevolmagtigde oor redes waarom die besluit nie opgeskort moet word nie en neem daarna 'n besluit.
- 4.1.6 Die kerkvergadering of sy gevolmagtigde appèlriggaam, kan waar toepaslik, die saak éers vir herderlike sorg, versoeningsaksie, kerklike mediasie of die hantering daarvan as 'n geskil verwys (vergelyk Funksionele Besluite: Riglyne vir die Beslegting van Kerklike Geskille).
- 4.1.6.1 Indien geskilbeslegting nie die gewenste resultaat lewer nie, gaan die appèl voort.
- 4.1.6.2 As deel van geskilbeslegting kan die kerkvergadering wat die besluit geneem het waarteen geappelleer word, eers deur die meerdere vergadering of sy gevolmagtigde versoek word om die appellant aan te hoor en die besluit reg te stel. Indien die besluit nie na bevrediging van die appellant gewysig word nie, gaan die appèl voort.

## **4.2 APPÈL TEEN BESLUIE VAN DIE KERKRAAD**

- 4.2.1 Lidmate van die gemeente wat 'n ernstige beswaar het op grond van die Bybel, die belydenis en/of die *Kerkorde* teen 'n besluit van die kerkraad, kan binne die toegelate tyd (vergelyk 4.1.2 en 4.1.3) skriftelik by die ring daarteen appelleer. Die appellant gee daarvan kennis aan die kerkraad.
- 4.2.2 Die gronde vir appèl wat later daarop volg, word aan die skriba van die ring of sy gevolmagtigde appèlriggaam gestuur.
- 4.2.3 Die kerkvergadering wat die besluit geneem het waarteen geappelleer word, kan eers besluit om die appellant aan te hoor. Indien die kerkraad of sy gevolmagtigde besluit om eers die appellant aan te hoor, word die ring of sy gevolmagtigde binne 14 kalenderdae na die ontvangs van die kennisgewing van appèl daarvan in kennis gestel. Die ring of sy gevolmagtigde bepaal die tydsraamwerke waarbinne so 'n gesprek of ontmoeting moet plaasvind. Die ring

of sy gevolmagtigde kan 'n persoon of persone aanwys om die ontmoeting as waarnemer by te woon.

4.2.4 Die kerkvergadering of sy gevolmagtigde appèllichaam, kan waar toepaslik, die saak éers vir herderlike sorg, versoeningsaksie, kerklike mediasie of die hantering daarvan as 'n geskil verwys (vergelyk Funksionele Besluite: Riglyne vir die Beslegting van Kerklike Geskille).

4.2.4.1 Indien die optrede waarna in 4.2.4 verwys word nie die gewenste resultaat lewer nie, gaan die appèl voort.

4.2.4.2 As deel van die optrede waarna in 4.2.4 verwys word, kan die kerkvergadering wat die besluit geneem het waarteen geappelleer word, eers deur die meerdere vergadering of sy gevolmagtigde versoek word om die appellant aan te hoor en die besluit reg te stel. Indien die besluit nie na bevrediging van die appellant gewysig word nie, gaan die appèl voort.

### **4.3. APPÈL TEEN BESLUIE VAN DIE RING OF SY GEVOLMAGTIGDE**

4.3.1 Lidmate of 'n kerkraad van 'n ringsgemeente wat 'n ernstige beswaar het op grond van die Bybel, die belydenis en/of die *Kerkorde* teen die besluit(e) van die ring of sy gevolmagtigde, kan binne die toegelate tyd (vergelyk 4.1.2 en 4.1.3) skriftelik by die sinode daarteen appèl aanteken. Die appellant gee daarvan kennis aan die ring.

4.3.2 Die gronde vir appèl wat later daarop volg, word aan die skriba van die sinode of sy gevolmagtigde appèllichaam gestuur.

4.3.3 Die kerkvergadering wat die besluit geneem het waarteen geappelleer word, kan eers besluit om die appellant aan te hoor. Indien die ring of sy gevolmagtigde besluit om eers die appellant aan te hoor, word die sinode of sy gevolmagtigde binne 14 dae na die ontvangs van die kennisgewing van appèl daarvan in kennis gestel. Die sinode of sy gevolmagtigde bepaal die tydsraamwerke waarbinne so 'n gesprek of ontmoeting moet plaasvind. Die sinode of sy gevolmagtigde kan 'n persoon of persone aanwys om die ontmoeting as waarnemer by te woon.

4.3.4 Die kerkvergadering of sy gevolmagtigde appèllichaam, kan waar toepaslik, die saak éers vir herderlike sorg, versoeningsaksie, kerklike mediasie of die hantering daarvan as 'n geskil verwys (vergelyk Funksionele Besluite: Riglyne vir die Beslegting van Kerklike Geskille).

4.3.4.1 Indien die optrede waarna in 4.3.4 verwys word nie die gewenste resultaat lewer nie, gaan die appèl voort.

4.3.4.2 As deel van die optrede kan die kerkvergadering wat die besluit geneem het waarteen geappelleer word, eers deur die meerdere vergadering of sy gevolmagtigde versoek word om die appellant aan te hoor en die besluit reg te stel. Indien die besluit nie na bevrediging van die appellant gewysig word nie, gaan die appèl voort.

#### **4.4. APPÈL TEEN BESLUIE VAN 'N SINODE OF SY GEVOLMAGTIGDE**

- 4.4.1 Lidmate of 'n kerkraad of 'n ring wat 'n ernstige beswaar het op grond van die Bybel, die belydenis en/of die *Kerkorde* teen die besluit(e) van 'n sinode of sy gevolmagtigde, kan binne die toegelate tyd (vergelyk 4.1.2 en 4.1.3) skriftelik by die Algemene Sinode daarteen appelleer. Die appellant gee daarvan kennis aan die sinode.
- 4.4.2 Die gronde vir appèl wat later daarop volg, word aan die Algemene Sekretaris van die Algemene Sinode gestuur.
- 4.4.3 Die kerkvergadering of sy gevolmagtigde appèllichaam, kan waar toepaslik, die saak éers vir herderlike sorg, versoeningsaksie, kerklike mediasie of die hantering daarvan as 'n geskil verwys (vergelyk Funktionale Besluite: Riglyne vir die Beslegting van Kerklike Geskille).
- 4.4.3.1 Indien die optrede waarna in 4.4.3 verwys word nie die gewenste resultaat lewer nie, gaan die appèl voort.
- 4.4.4 Die sinode wat die besluit geneem het of sy gevolmagtigde, waarteen geappelleer word, kan eers besluit om die appellant aan te hoor. Indien die sinode of sy gevolmagtigde besluit om eers die appellant aan te hoor, word die Algemene Sinode of sy gevolmagtigde binne 14 kalenderdae na die ontvangs van die kennisgewing van appèl daarvan in kennis gestel. Die Algemene Sinode of sy gevolmagtigde bepaal die tydsraamwerke waarbinne so 'n gesprek of ontmoeting moet plaasvind. Die Algemene Sinode of sy gevolmagtigde kan 'n persoon of persone aanwys om die ontmoeting as waarnemer by te woon.
- 4.4.5 Die beslissing van die Algemene Sinode of sy gevolmagtigde appèllichaam is finaal ten opsigte van daardie aangeleentheid wat tot sy bevoegdheid behoort.

#### **4.5 PROSEDURELE BESWAAR TEEN BESLUIE VAN DIE ALGEMENE SINODE OF SY GEVOLMAGTIGDE (ALGEMENE SINODALE MODERAMEN)**

- 4.5.1 'n Sinode (of sy gevolmagtigde) wat op grond van prosedurele ongerymdhede volgens die *Kerkorde* ernstig beswaard is (sien 3.5) oor besluit(e) van die Algemene Sinode of sy gevolmagtigde (ASM) kan binne 21 kalenderdae nadat die notule van die vergadering beskikbaar is, skriftelik kennis van 'n beswaar by die Algemene Sekretaris indien. Die Algemene Sekretaris stel die moderatuur in kennis van die beswaar wat ontvang is en stuur dit aan die Algemene Taakspan Regte.
- 4.5.2 Die beswaargronde met motivering word skriftelik binne 21 kalenderdae ná die kennisgewing van die beswaar aan die Algemene Sekretaris verskaf. Die Algemene Sekretaris stuur die skriftelik gemotiveerde beswaargronde aan die Algemene Taakspan Regte.
- 4.5.3 By ontvangs van die prosedurele beswaar kan die ATR besluit om die beswaarde(s) te ontmoet ten einde die aangeleentheid te bespreek en tot 'n moontlike vergelyk te kom oor die beswaargronde en die hantering daarvan.

Indien daar nie 'n bevredigende ooreenkoms bereik word nie, gaan die formele hantering van die beswaar voort.

4.5.4 By die ontvangs van die beswaar oor prosedurele ongerymdhede wys die Algemene Taakspan Regte 'n onafhanklike tribunaal van minstens drie persone aan om die beswaar te oorweeg. Die tribunaal van minstens drie persone word saamgestel uit regspraktisyns wat NG lidmate is, en ten minste een kerkregkundige wat nie lid was van die betrokke vergadering nie. Daar mag egter nooit meer kerkregkundiges as regspraktisyns in die tribunaal wees nie. Die indiener van die prosedurele beswaar staan in vir die werklike koste (sien 4.6.5 van hierdie reglement) van die lede van die tribunaal.

4.5.5 Die tribunaal oorweeg die skriftelik gemotiveerde beswaargronde nadat die skriftelike kommentaar (repliek) van die Algemene Sinode of sy gevolmagtigde verkry is.

4.5.5.1 Die tribunaal oordeel oor die dringendheid van die beswaar. Indien die tribunaal oordeel dat die beswaar sonder nadelige gevolge vir die kerk kan oorstaan na die volgende vergadering van die Algemene Sinode, stel die tribunaal die persoon wat die prosedurele beswaar ingedien het, asook die ASM, in kennis daarvan en sien die Algemene Sekretaris toe dat die saak op die agenda van die volgende Algemene Sinode geplaas word.

4.5.6 Indien die tribunaal van mening is dat die aangeleentheid dringend hanteer moet word, neem hy dit in behandeling en kom tot 'n bevinding en stel die persoon wat die beswaar ingedien het, asook die ASM, in kennis van die bevinding.

4.5.7 Die bevinding van die tribunaal is finaal.

4.5.8 Maatreëls tot beskikking van die tribunaal:

4.5.8.1 In geval van ernstige prosedurele foute wat die betrokke besluit(e) onwettig maak, word die besluit(e) ter syde gestel.

4.5.8.2 In geval van prosedurele foute wat nie die integriteit van die besluit aantast nie, word die Algemene Sinode gewys op die prosedurele fout wat gemaak is.

4.5.8.3 In die geval van geen wesentlike prosedurele foute nie, word die beswaar van die hand gewys.

#### **4.6. HANTERING VAN APPÈL DEUR KERKVERGADERINGE OF HULLE GEVOLMAGTIGDE APPÈLLIGGAME**

4.6.1 Indien 'n kerkvergadering nie self 'n appèl of beswaar aanhoor nie, word 'n appèlliggaam van minstens drie lede deur die kerkvergadering of sy gevolmagtigde aangewys om die appèl te hanteer. Die appèlliggaam kan kundige lidmate koöpteer. Die vergadering van die appèlliggaam is 'n geslote vergadering.

4.6.2 'n Lidmaat of 'n kerkvergadering wat 'n appèlstuk wil indien, moet binne 21 kalenderdae nadat die vergadering se goedgekeurde notule beskikbaar gestel is, of nadat die bevindinge van 'n tug- en/of dissiplinêre ondersoek bekend gemaak

is, by die meerdere vergadering daarvan kennis gee. In die geval van 'n kerkraad moet die kennisgewing van appèl binne 21 kalenderdae nadat die besluit geneem is, ingedien word.

- 4.6.3 Die appellant moet binne 21 kalenderdae nadat daar kennis van appèl gegee is, aan die appèlliggaam 'n skriftelike uiteensetting van die gronde van/redes vir die appèl (ter sake dokumentasie ingesluit) voorsien, anders verval die reg op appèl.
- 4.6.4 Die skriba van die appèlliggaam voorsien die kerkvergadering, of sy gevolmagtigde teen wie se besluit daar geappelleer word, asook enige ander partye (bv. klaer of aangeklaagde in die geval van 'n tugsak) van die gronde van appèl en verkry binne 21 kalenderdae nadat die gronde van/redes vir die appèl ingedien is, die kerkvergadering wat die besluit(e) geneem het, asook enige ander party betrokke, se skriftelike reaksie daarop (ter sake dokumentasie, waaronder alle dokumente, notules, transkripsies, ensovoorts, moet ingesluit word) en besorg dit aan die appèlliggaam.
- 4.6.5 Die appellant word by die indiening van die appèl in kennis gestel dat, indien die appèl van die hand gewys word, die uiteindelijke koste van die saak van die appellant gevorder mag word, indien die betrokke appèlliggaam só besluit. Die appellant moet skriftelike instemming met die reëling betuig. Indien die appellant dit nie doen nie, verval die appèl. Die appellant is geregtig om vooraf 'n aanduiding te kry van die beraamde koste.
- 4.6.6 Die appèlliggaam vergader binne 21 kalenderdae na die ontvangs van die antwoord van die kerkvergadering wat die besluit geneem het, op die appèl en beslis so spoedig moontlik daaroor.
- 4.6.7 Die appèlondersoek geskied op grond van die skriftelike uiteensetting van die appellant se gronde vir appèl (met ter sake dokumentasie) en op grond van die skriftelike reaksie van die kerkvergadering op die appellant se gronde vir appèl (met ter sake dokumentasie).
- 4.6.8 Appèlle met betrekking tot prosedurele foute en tug/dissipline van individue, word in 'n geslote vergadering hanteer. Wanneer die appèl afgehandel is, is die appèl, die gronde vir die appèl, die reaksie van die kerkvergadering, asook die notules van die appèlliggaam ter insae vir enige iemand wat met opgaaf van redes insae sou wou hê. Sulke inligting sal nie sonder baie goeie redes weerhou word nie. Die koste van 'n appèlsaak word beperk tot die billike koste verbonde aan die vergader-, reis-, duplisering- en administratiewe uitgawes.

#### **4.7 MIDDELE TOT BESKIKKING VAN 'N APPÈLLIGGAAM**

- 4.7.1 Na oorweging van 'n appèl kan die appèlliggaam, die appèl op een van die volgende wyses hanteer:
  - 4.7.1.1 die appèl in geheel of gedeeltelik toestaan, of
  - 4.7.1.2 die appèl in geheel of gedeeltelik afwys, of
  - 4.7.1.3 indien die appèl berus op wesenlike onreëlmatighede, stel die appèlliggaam die besluit van die betrokke kerkvergadering tersyde.

- 4.7.2 Indien die appèlliggaam die appèl in geheel of gedeeltelik toestaan, word die betrokke kerklike vergadering se besluit/uitspraak, waar van toepassing, na die betrokke kerkvergadering of gevolmagtigde ondersoekliggaam terugverwys vir hersiening.
- 4.7.3 In die geval van 'n ondersoekliggaam, kan die kerkvergadering na wie die saak terugverwys is, 'n nuwe gevolmagtigde ondersoekliggaam aanwys om die saak van nuuts af te ondersoek.

#### **4.8 BESLISSING VAN DIE APPÈLLIGGAAM**

- 4.8.1 Die appèlliggaam kom tot 'n beslissing oor die appèl en notuleer ook die rede(s) daarvoor. Die appellant en die kerkvergadering teen wie se besluit(e) geappelleer is, word skriftelik in kennis gestel van die beslissing en die rede(s) daarvoor.
- 4.8.2 Indien die appèl betrekking gehad het op die bevoegdheid van 'n gelegitimeerde, word die Algemene Taakspan Predikantesake binne 14 dae in kennis gestel van die beslissing van die appèlliggaam.

## REGLEMENT 24

### REGLEMENT VIR KERKLIKE GOEDERE

#### 1. ALGEMENE SINODALE GOEDERE

##### 1.1 ADMINISTRASIE VAN ALGEMENE SINODALE GOEDERE<sup>1</sup>

- 1.1.1 Die Nederduitse Gereformeerde Kerk (NG Kerk) in algemene sinodale verband is 'n regspersoon en die Algemene Sinode, of ander gevolmagtigde(s) deur die Algemene Sinode aangewys, is sy orgaan. Die NG Kerk is dus eienaar van alle roerende en onroerende goedere wat deur die Algemene Sinode beheer en verkry word.
- 1.1.2 Vaste eiendom word in die naam van die *Nederduitse Gereformeerde Kerk Algemene Sinode* geregistreer.
- 1.1.3 Algemene sinodale kerklike goedere word geadministreer deur die Algemene Taakspan Fondse en Bates ingevolge besluite van die Algemene Sinode.<sup>2</sup>
- 1.1.4 Die Algemene Taakspan Fondse en Bates is bevoeg om in opdrag van die Algemene Sinode enige regshandeling te verrig en om tussentydse beleggings te maak wat verband hou met die beskikking, verkryging, ontvangs van testamentêre bemakings, vervreemding, beswaring of versekering van die betrokke bates, onderhewig daaraan:
- 1.1.4.1 dat die inkomste en eiendom van die Algemene Sinode, met inbegrip van eiendom of inkomste wat deur enige gevolmagtigde van die Algemene Sinode bestuur word, nie aan enige persoon uitgekeer mag word nie, maar uitsluitlik aangewend mag word vir die beoefening van die aktiwiteite (openbare weldade) van die Algemene Sinode; en
- 1.1.4.2 dat niks wat hierin bepaal is, die betaling te goeder trou belet van redelike besoldiging (synde vergoeding wat nie oormatig is nie, inaggenome wat algemeen as redelik geag word in die openbare weldaadorganisasie-sektor en met betrekking tot die diens gelewer) aan enige werknemer of beampte van die Algemene Sinode vir dienste wat sodanige persoon werklik aan die Algemene Sinode gelewer het nie; en met insluiting van
- 1.1.4.2.1 die ontvang van oordrag van alle eiendomme, goedere of fondse van die ontbinde Raad van Kerke en die gefedereerde rade;

---

<sup>1</sup> *Kerklike goedere* [versamelnaam vir besittings] sluit in alle roerende en onroerende besittings soos eiendomme en fondse, skenkings en bemakings, asook handelware of koopware, materiaal en stof.

<sup>2</sup> Die Algemene Sinode het in 2013 bevestig dat met die ontbinding van die Algemene Sinodale Sendingkommissie (ASSK) en die Algemene Kommissie vir Diens van Barmhartigheid (AKDB) volgens besluit van die Algemene Sinode in 2004, die Algemene Diensgroep Diensgetuienis (ADD) die gemagtigde orgaan van die Algemene Sinode as regspersoon geword het. Die Algemene Sinode het in 2013 bevestig dat met die ontbinding van die Algemene Jeugkommissie volgens besluit van die Algemene Sinode in 2004, die Algemene Diensgroep Gemeente-ontwikkeling (ADGO) die gemagtigde orgaan van die Algemene Sinode as regspersoon geword het. Die Algemene Sinode het in 2013 bevestig dat met die ontbinding van die Algemene Diensgroep Gemeente-ontwikkeling (ADGO) en die Algemene Diensgroep Diensgetuienis (ADD), die Algemene Sinodale Moderamen die gemagtigde orgaan van die Algemene Sinode as regspersoon geword het.

- 1.1.4.2.2 die verkryging van eiendomme, roerend en/of onroerend, deur skenking, erflating, aankoop, huur of op enige ander wyse; en
- 1.1.4.2.3 die behoud van 'n belegging in die vorm van 'n besigheidsonderneming of handelsaktiwiteit (of enige bate in so 'n besigheidsonderneming of handelsaktiwiteit) wat dit as 'n skenking, bemaking of erflating verkry, in die vorm waarin dit verkry is mits dit voldoen aan die wet en die vereistes van die belastingvrystellingseenheid van die SAID.
- 1.1.5 In geval van die uittrede van al die sinodes in terme van Artikel 36 van die *Kerkorde* óf die ontbinding van die Algemene Sinode word alle eiendomme, goedere en fondse tussen die samestellende sinodes na verhouding van die getal belydende lidmate binne die gebied van elke sinode ten tye van die ontbinding verdeel.
- 1.1.6 Die Algemene Taakspan Fondse en Bates administreer die algemene sinodale kerklike goedere, met dien verstande dat die taakspan
  - 1.1.6.1 deurlopend sal verseker dat daar voldoen word aan die kerkordelike bepalinge, reglemente en besluite van die Algemene Sinode en die vereistes van die belastingvrystellingseenheid van die SAID;
  - 1.1.6.2 die volgende beheer- en bestuursdokumente vir goedkeuring voorlê:
    - 1.1.6.2.1 aan die Algemene Sinode/Algemene Sinodale Moderamen (ASM) wanneer nodig, die reglemente, aktes van oprigting en/of konstitusies van al die betrokke strukture en afsonderlike kerklike regsenteite wat aan die taakspan finansiële verslag doen, asook enige voorgestelde wysigings daaraan; en
    - 1.1.6.2.2 aan die Bedryfspan jaarliks, die onderstaande finansiële bestuursinligting ten opsigte van alle strukture en ander regsenteite soos verwys na in 1.1.6.2.1, naamlik
      - 1.1.6.2.2.1 goedgekeurde geouditeerde finansiële state van die vorige finansiële jaar;
      - 1.1.6.2.2.2 die goedgekeurde begroting vir die huidige finansiële jaar; en
      - 1.1.6.2.2.3 enige ander toepaslike finansiële bestuursinligting soos deur die Bedryfspan versoek; asook
  - 1.1.6.3 volledige registers moet byhou van alle vaste bates en eiendomme, alle skenkings en bemakings, asook beleggings van die Algemene Sinode en dit moet ook as sodanig in die staat van finansiële posisie van die Algemene Sinode getoon word.

## **1.2 SKENKINGS EN BEMAKINGS**

- 1.2.1 Alle skenkings en bemakings aan die Algemene Sinode word deur die Algemene Taakspan Fondse en Bates hanteer en bestuur in oorleg met die Algemene Taakspan Regte. Wanneer skenkings en bemakings volgens wetlike eise anders hanteer moet word, moet die korrekte voorskrifte nagekom word met verantwoording aan die Algemene Sinode. Die Algemene Sinode sal nie 'n skenking wat herroeplik op aandrang van die skenker is, vir ander redes as die wesenlike versuim om aan die aangewese oogmerke en voorwaardes van bedoelde skenking te voldoen (met inbegrip van enige wanvoorstelling met betrekking tot die belastingaftrekbaarheid daarvan ingevolge Artikel 18A van die

wet) aanvaar nie: met dien verstande dat 'n skenker nie enige voorwaarde mag oplê wat bedoelde skenker of enige verbonde persoon met betrekking tot bedoelde skenker in staat kan stel om enige direkte of indirekte voordeel uit die aanwending van die skenking te verkry nie.

- 1.2.2 Indien 'n skenking/bemaking vir 'n spesifieke doel gemaak word, moet dit ten behoeve van daardie gespesifiseerde doel aangewend word.
- 1.2.3 Indien 'n skenking/bemaking vir 'n goedgekeurde projek gedoen word, mag die betrokke projekspan dit daarvoor aanwend.
- 1.2.4 Indien 'n projekspan 'n skenking/bemaking wil aanwend vir 'n doel of projek waarvoor daar nog nie goedkeuring ontvang is nie, moet die advies en goedkeuring van die Algemene Taakspan Fondse en Bates eers verkry word.
- 1.2.5 In geval die Algemene Taakspan Fondse en Bates nie goedkeuring gee nie, mag die projekspan hom na die ASM wend.
- 1.2.6 Om eiendomme, roerend en/of onroerend, te verkoop, te verruil, te verhuur, te skenk of op enige ander manier te vervreem, te verbind, in pand, as sekuriteit te gee, of op enige ander wyse te beswaar, met dien verstande dat:
  - 1.2.6.1 skenkings slegs gemaak mag word ter bevordering van die doelstellings van die Algemene Sinode volgens Artikel 43 óf aan teologiese studente óf aan predikante/diensleraars, werknemers en amptenare in diens van kerkvergaderinge van die NG Kerk, asook aan godsdienstige, liefdadigheids- en/of opvoedkundige inrigtings wat ingevolge die bepalings van die wet en die vereistes van die belastingvrystellingseenheid van die SAID van belasting vrygestel is;
  - 1.2.6.2 slegs sekuriteit gegee mag word vir die verpligtinge van die Algemene Sinode.

### **1.3 BELEGGING VAN FONDSE**

- 1.3.1 Om gelde onder sy beheer te belê en om sodanige beleggings te gelde te maak, op te vra, te kanselleer, te sedeer, te verander of andersins daarmee te handel met dien verstande dat
  - 1.3.1.1 Die Algemene Taakspan Fondse en Bates die verantwoordelikheid het om die Algemene Sinode se beleggingsportefeulje deurlopend te beskerm deur te verseker dat die nodige maatreëls in plek is.
  - 1.3.1.2 Beleggings word slegs gedoen in terme van die Algemene Sinode se goedgekeurde beleggingsbeleid.
  - 1.3.1.3 Die Algemene Sinode se *strategiese bateverdeling* jaarliks saamgestel word na inagneming van die Algemene Sinode se begrote bedryfsuitgawes en dat die allokasie in ooreenstemming moet wees met Regulasie 28-bepelings wat die pensioenfondswet voorstel.
  - 1.3.1.4 Die beleggingskommissie van die taakspan die beleggingsbeleid en -strategie van die Algemene Sinode deurlopend moet nakom, met dien verstande dat die Algemene Taakspan Fondse en Bates nietaenstaande bostaande beperkings, 'n skenking of bemaking belê in ooreenstemming met die voorgeskrewe vereistes soos deur die skenker/bemaker bepaal.

## **1.4 REGSGEDINGE OF DISPUTE OOR ALGEMENE SINODALE KERKLIKE GOEDERE**

- 1.4.1 In alle regsgedinge of dispute oor algemene sinodale kerklike goedere tree die Algemene Taakspan Fondse en Bates sonder meer bepaalde lasgewing, sowel eisend as verwerend, ten behoeve van die Algemene Sinode op, ná raadpleging van die Algemene Taakspan Regte.
- 1.4.2 Ten einde hierdie handeling te verrig, word alle amptelike dokumente onderteken deur twee lede van die Algemene Taakspan Fondse en Bates wat daartoe deur die Algemene Sinode of die ASM gemagtig is.
- 1.4.3 Die Algemene Sinode het geen aanspraak op die eiendomme, goedere en fondse wat aan die samestellende sinodes, ringe of kerkrade behoort en onder afsonderlike reglemente besit en beheer word nie.
- 1.4.4 Waar enige vaste eiendom aan die Algemene Sinode geskenk of nagelaat word ten behoeve van 'n werksaamheid of inrigting binne die gebied van 'n sinode, word dit met wedersydse instemming vir beheer en administrasie opgedra aan die betrokke sinode om vir die werksaamhede of inrigting aangewend te word.
- 1.4.5 Eiendomme wat voor die totstandkoming van die Algemene Sinode van die NG Kerk in gefedereerde verband gevestig was (soos byvoorbeeld die eiendomme onder die toesig en beheer van die Algemene Sondagskoolkommissie) het in 1962 met kerkvereniging die eiendomme van die NG Kerk in die algemene sinodale verband geword. Transportaktes van sodanige eiendomme wat op naam van die verskillende sinodes geregistreer staan, kan met die oog op besparing van koste, onveranderd bly. Enige handeling in verband met sodanige eiendomme geskied egter in terme van die bepaling van hierdie *reglement*. Hierdie eiendomme kan verbind of vervreem word volgens die bepaling van die *Kerkorde* van die betrokke sinode in wie se naam dit geregistreer is, slegs nadat die Algemene Taakspan Fondse en Bates in oorleg met die Algemene Taakspan Regte en die Algemene Sinode/ASM daaroor besluit het.

## **2. SINODALE GOEDERE**

- 2.1 Die Nederduitse Gereformeerde Kerk (NG Kerk) in sinodale verband is 'n regspersoon en die sinode, of ander gevolmagtigde(s) deur die sinode aangewys, is sy orgaan.
- 2.2 Die NG Kerk is dus eienaar van alle roerende en onroerende goedere wat deur die sinode beheer en verkry word en vaste eiendom word in die naam van die *Nederduitse Gereformeerde Kerk Sinode* ..... (voeg in die amptelike naam van die betrokke sinode) geregistreer.
- 2.3 Sinodale kerklike goedere word geadministreer ingevolge besluite van die sinode.
- 2.4 Die sinode of sy gevolmagtigde is bevoeg om enige regshandeling te verrig en om tussentydse beleggings te maak wat verband hou met die beskikking, verkryging, ontvangs van testamentêre bemakings, vervreemding, beswaring of versekering van die betrokke bates, onderhewig daaraan

- 2.4.1 dat die inkomste en eiendom van die sinode, met inbegrip van eiendom of inkomste wat deur enige gevolmagtigde van die sinode bestuur word, nie aan enige persoon uitgekeer mag word nie, maar uitsluitlik aangewend mag word vir die beoefening van die aktiwiteite (openbare weldade) van die sinode; en
- 2.4.2 dat niks wat hierin bepaal is, die betaling te goeder trou belet van redelike besoldiging, synde vergoeding wat nie oormatig is nie, inaggenome wat algemeen as redelik geag word in die openbare weldaadorganisasie-sektor en met betrekking tot die diens gelewer aan enige werknemer of beampte van die sinode vir dienste wat sodanige persoon werklik aan die sinode gelewer het nie; en met insluiting van
- 2.4.3 die verkryging van eiendomme, roerend en/of onroerend, deur skenking, erflating, aankoop, huur of op enige ander wyse; en
- 2.4.4 die behoud van 'n belegging in die vorm van 'n besigheidsonderneming of handelsaktiwiteit (of enige bate in so 'n besigheidsonderneming of handelsaktiwiteit) wat dit as 'n skenking, bemaking of erflating verkry, in die vorm waarin dit verkry is, mits dit voldoen aan die wet en die vereistes van die belastingvrystellingseenheid van die SAID.
- 2.5 Volledige registers moet bygehou word van alle vaste bates en eiendomme, alle skenkings en bemakings, asook beleggings van die sinode en dit moet ook as sodanig in die staat van finansiële posisie van die sinode getoon word.

### **3. RINGSGOEDERE**

- 3.1 Die Nederduitse Gereformeerde Kerk (NG Kerk) in ringsverband is 'n regspersoon en die ring, of ander gevolmagtigde(s) deur die ring aangewys, is sy orgaan.
- 3.2 Die ring is dus eienaar van alle roerende en onroerende goedere wat deur die ring beheer en verkry word en vaste eiendom word in die naam van die *Nederduitse Gereformeerde Ring* ..... geregistreer.
- 3.3 Die ring se kerklike goedere word geadministreer ingevolge besluite van die ring.
- 3.4 Die ring of sy gevolmagtigde is bevoeg om enige regshandeling te verrig en om tussentydse beleggings te maak wat verband hou met die beskikking, verkryging, ontvangs van testamentêre bemakings, vervreemding, beswaring of versekering van die betrokke bates, onderhewig daaraan dat
  - 3.4.1 die inkomste en eiendom van die ring, met inbegrip van eiendom of inkomste wat deur enige gevolmagtigde van die ring bestuur word, nie aan enige persoon uitgekeer mag word nie, maar uitsluitlik aangewend mag word vir die beoefening van die aktiwiteite (openbare weldade) van die ring; en
  - 3.4.2 niks wat hierin bepaal is, die betaling te goeder trou belet van redelike besoldiging (synde vergoeding wat nie oormatig is, inaggenome wat algemeen as redelik geag word in die openbare weldaadorganisasie-sektor en met betrekking tot die diens gelewer nie) aan enige werknemer of beampte van die ring vir dienste wat sodanige persoon werklik aan die ring gelewer het nie); en met insluiting van

- 3.4.3 die verkryging van eiendomme, roerend en/of onroerend, deur skenking, erflating, aankoop, huur of op enige ander wyse; en
- 3.4.4 die behoud van 'n belegging in die vorm van 'n besigheidsonderneming of handelsaktiwiteit (of enige bate in so 'n besigheidsonderneming of handelsaktiwiteit) wat dit as 'n skenking, bemaking of erflating verkry, in die vorm waarin dit verkry is, mits dit voldoen aan die wet en die vereistes van die belastingvrystellingseenheid van die SAID.
- 3.5 Volledige registers moet bygehou word van alle vaste bates en eiendomme, alle skenkings en bemakings asook beleggings van die ring.

#### **4. GEMEENTELIKE GOEDERE**

- 4.1 Die Nederduitse Gereformeerde Kerk (NG Kerk) in gemeenteverband is 'n regspersoon en die kerkraad, of ander gevolmagtigde(s) deur die kerkraad aangewys, is sy orgaan.
- 4.2 Die gemeente is dus eienaar van alle roerende en onroerende goedere wat deur die kerkraad beheer en verkry word en vaste eiendom word in die naam van die *Nederduitse Gereformeerde Gemeente* ..... geregistreer.
- 4.3 Gemeentelike kerklike goedere word geadministreer ingevolge besluite van die kerkraad.
- 4.4 Die kerkraad of sy gevolmagtigde is bevoeg om enige regshandeling te verrig wat verband hou met die beskikking, verkryging, ontvangs van testamentêre bemakings, vervreemding, beswaring of versekering van die betrokke bates, of tussentydse beleggings wat hiermee verband hou, onderhewig daaraan dat:
  - 4.4.1 die inkomste en eiendom van die gemeente, met inbegrip van eiendom of inkomste wat deur enige gevolmagtigde van die kerkraad bestuur word, nie aan enige persoon of instansie uitgekeer mag word nie, maar uitsluitlik aangewend mag word vir die beoefening van die aktiwiteite (openbare weldade) van die gemeente;
  - 4.4.2 niks wat hierin bepaal is, die betaling te goeder trou belet van redelike besoldiging (synde vergoeding wat nie oormatig is, inaggenome wat algemeen as redelik geag word in die openbare weldaadorganisasie-sektor en met betrekking tot die diens gelewer nie) aan enige werknemer of beampte van die gemeente vir dienste wat sodanige persoon werklik aan die gemeente gelewer het nie, en met insluiting van
    - 4.4.2.1 die verkryging van eiendomme, roerend en/of onroerend, deur skenking, erflating, aankoop, huur of op enige ander wyse, asook
    - 4.4.2.2 die behoud van 'n belegging in die vorm van 'n besigheidsonderneming of handelsaktiwiteit (of enige bate in so 'n besigheidsonderneming of handelsaktiwiteit) wat dit as 'n skenking, bemaking of erflating verkry, in die vorm waarin dit verkry is, mits dit voldoen aan die wet en die vereistes van die belastingvrystellingseenheid van die SAID.
  - 4.4.3 vervreemding van gemeentelike eiendom sal geskied, met approbasie van die gemeente en in oorleg met die ring, wat sal toesien dat dit teen 'n markverwante

prys vervreem word en dat die inkomste wat daardeur gegeneer word, steeds aangewend word vir die beoefening van die aktiwiteit (openbare weldaad) van die gemeente (Artikel 31.2).

- 4.5 Volledige registers moet bygehou word van alle vaste bates en eiendomme, alle skenkings en bemakings, asook beleggings van die gemeente.

## **5. KERKLIKE REGSENTITEITE**

- 5.1 Alhoewel die Algemene Sinode<sup>3</sup> nie regs aanspreeklikheid aanvaar vir die werksaamhede en verpligtinge van afsonderlike kerklike regsentiteite (bv maatskappye, organisasie sonder winsoogmerk en openbare weldaadsorganisasies) waarvan die lede van die ASM die ledevergadering vorm óf waarvan die Algemene Sinode of die ASM die lede van die ledevergadering aanwys of laat aanwys nie, is dit vir die strategiese belyning en operasionele beplanning van die Algemene Sinode se werksaamhede noodsaaklik dat die finansiële inligting genoem in 2.6.3 ten opsigte van die afsonderlike kerklike regsentiteite (buiten die Algemene Sinode, sinodes, ringe en gemeentes) vir die Algemene Sinode en sy gevolmagtigde(s) beskikbaar moet wees en dat daar deurlopend voldoen moet word aan toepaslike wetgewing.
- 5.2 Die Algemene Sinode, of die ASM wanneer die Algemene Sinode nie in sitting is nie, beslis in gevalle waar die Algemene Taakspan Fondse en Bates en 'n ander gevolmagtigde van die Algemene Sinode, én/óf waar die Algemene Taakspan Fondse en Bates en 'n bepaalde regsentiteit waarvan die lede van die ASM die ledevergadering vorm, of die lede van die ledevergadering aanwys of laat aanwys, én/óf waar die afsonderlike regsentiteite onderling nie eenstemmigheid kan bereik nie.
- 5.3 Al die kerklike regsentiteite moet voldoen al die wetlike vereistes soos op die betrokke kerklike regsentiteit van toepassing.
- 5.4 Die reglemente, aktes van oprigting en/of konstitusies van kerklike regsentiteite, asook enige wysigings daaraan, word aan die Algemene Sinode/ASM via die Algemene Taakspan Fondse en Bates voorgelê en goedgekeur waar van toepassing.
- 5.5 Aangesien die Algemene Sinode die rekeningkundige raamwerk "*IFRS for SMEs excluding business combinations*" vir sy eksterne oudit volg, hoef die finansiële state van ander kerklike regsentiteite nie gekonsolideer te word nie, tensy daar vir 'n spesifieke regsentiteit anders besluit word deur die Algemene Sinode.

### **Die volgende afdelings is van toepassing op kerklike organisasies wat binne die grense van die RSA ressorteer.**

## **6. DIE KERK<sup>4</sup> SE OPENBARE WELDAADSORGANISASIES**

---

<sup>3</sup> Waar nodig ook van toepassing op sinodes, ringe en gemeentes.

<sup>4</sup> Die Algemene Sinode, sinodes, ringe en gemeentes en ander kerklike regsentiteite

- 6.1 Die voorwaardes en vereistes vir 'n organisasie om as 'n openbare weldaadsorganisasie (OWO) goedgekeur te word, is vervat in Artikel 30 van die wet, terwyl die reëls wat die voorkeurbehandeling van 'n OWO ten opsigte van belastingvrystelling vervat is in Artikel 10(1)(cN) van die wet. Artikel 10(1)(cN) maak voorsiening vir die vrystelling van normale belasting van sekere ontvangstes en toevallings van goedgekeurde OWO's. Sekere ontvangstes en toevallings van 'n besigheidsonderneming of handelsaktiwiteit sal nogtans belasbaar wees.
- 6.2 Goedgekeurde OWO's moet regdeur hulle bestaan voldoen aan die wet en verwante wetgewing. Indien 'n fidusiêre persoon skuldig bevind word aan 'n misdryf, kan hy/sy na skuldigbevinding 'n boete opgelê word of tronkstraf kry vir 'n periode wat nie twee jaar oorskry nie.
- 6.3 Die volgende vereistes is belangrik om na te kom:
- 6.3.1 Die enigste oogmerk van die OWO is om een of meer openbare weldaadsaktiwiteit, soos omskryf in Artikel 30(1) van die wet, op 'n nie-winsgewende grondslag en met 'n altruïstiese of filantropiese bedoeling, te onderneem.
- 6.3.2 Geen aktiwiteit sal regstreeks of onregstreeks die ekonomiese eiebelang van enige fiduciarius of werknemer van die organisasie bevorder nie, anders as by wyse van redelike besoldiging.
- 6.3.3 Die OWO is verplig om ten minste drie (3) persone, wat nie verbonde persone met betrekking tot mekaar is nie, te hê om die fidusiêre verantwoordelikheid van bedoelde organisasie te aanvaar en geen enkele persoon regstreeks of onregstreeks die besluitnemingsbevoegdheid met betrekking tot daardie organisasie beheer nie: met dien verstande dat die bepalinge van hierdie paragraaf nie van toepassing is nie op enige trust wat ingevolge die testament van 'n persoon wat voor of op 31 Desember 2003 te sterwe gekom het, opgerig is:
- Adresverandering moet binne 60 dae aan die Kommissaris van die SAID verskaf word.
  - Enige verandering aan die konstitusie moet onmiddellik by die kommissaris aangemeld word.
  - Alle finansiële state moet vir vier jaar bewaar word.
  - Veranderinge ten opsigte van die drie fidusiêre persone moet onmiddellik by die kommissaris aangemeld word.
- 6.3.4 Die OWO word verbied om direk of indirek enige van sy fondse aan enige persoon uit te keer (behalwe in die loop van die beoefening van enige openbare weldaadsaktiwiteit) en dit word vereis om sy fondse alleenlik vir die oogmerk waarvoor dit ingestel is, aan te wend.
- 6.3.5 Die fondse van die OWO sal slegs aangewend word vir die oogmerk waarvoor dit ingestel is.
- 6.3.6 By ontbinding van die OWO sal die oorblywende bates oorbetaal word aan

- 6.3.6.1 enige soortgelyke OWO, wat goedkeuring ingevolge Artikel 30 van die wet geniet;
- 6.3.6.2 enige instelling, raad of liggaam wat ingevolge die bepalings van Artikel 10(1)(cA)(i) van die betaling van belasting vrygestel is, wat as enigste of vernaamste oogmerk die beoefening van enige openbare weldaadsaktiwiteit het; of
- 6.3.6.3 enige staatsdepartement of administrasie in die nasionale of provinsiale of plaaslike regeringsfeer van die republiek, soos in Artikel 10(1)(a) of (b) van die wet bedoel.
- 6.3.7 Die OWO is verbied om 'n skenking wat herroeplik op aandrang van die skenker is, vir ander redes as die wesentlike versuim om aan die aangewese oogmerke en voorwaardes van bedoelde skenking te voldoen, met inbegrip van enige wanvoorstelling met betrekking tot die belastingaftrekbaarheid daarvan ingevolge Artikel 18A, te aanvaar nie: Met dien verstande dat 'n skenker (behalwe 'n skenker wat 'n goedgekeurde OWO is of 'n instelling, raad of liggaam is wat ingevolge Artikel 10(1)(cA)(i) van belasting vrygestel is en wat as sy enigste of vernaamste oogmerk het die beoefening van enige openbare weldaadsaktiwiteit) nie enige voorwaarde mag oplê wat bedoelde skenker of enige verbonde persoon met betrekking tot bedoelde skenker in staat kan stel om enige direkte of indirekte voordeel uit die aanwending van die skenking te verkry nie.
- 6.3.8 'n Afskrif van enige wysigings aan die konstitusie, trustakte, akte van oprigting en statute, of enige ander geskrewe stuk waarkragtens die OWO ingestel is, sal aan die kommissaris voorgelê word.
- 6.3.9 Geen oormatige besoldiging, inaggenome wat algemeen as redelik geag word in die sektor vir die diens gelewer, sal aan enige werknemer, amptenaar, lid of ander persoon betaal word nie en geen persoon sal ekonomies bevoordeel word op enige wyse wat nie in ooreenstemming is met sy funksie is nie.
- 6.3.10 Die OWO nie bewustelik 'n party is of was nie, of nie bewustelik toelaat, of toegelaat het, dat dit gebruik word as deel van 'n transaksie, handeling of skema waarvan die enigste of hoofdoel die vermindering, uitstel of vermyding is van die aanspreeklikheid vir enige belasting, reg of heffing wat by ontstentenis van bedoelde transaksie, handeling of skema, deur 'n persoon ingevolge hierdie wet of enige ander wet wat deur die kommissaris geadministreer word, betaalbaar sou wees of was.
- 6.3.11 Geen hulpbronne regstreeks of onregstreeks mag gebruik word om enige politieke party te ondersteun, bevorder of te opponeer nie.
- 6.3.12 Die OWO sal die vereiste Inkomstebelastingopgawe IT12EI (tesame met aanvullende dokumentasie, indien aangevra) indien. Alle inkomste en uitgawes moet verklaar word.
- 6.3.13 In die geval van 'n OWO wat fondse of bates voorsien aan enige vereniging van persone soos verwys in paragraaf (b)(iii) van die omskrywing van 'n "openbare weldaadsaktiwiteit" in Artikel 30 van die Wet, redelike stappe sal neem om te verseker dat die fondse vir die doel waarvoor dit voorsien is, aangewend word.

6.3.14 'n Goedgekeurde OWO ingevolge Artikel 18A(1)(b)(i) van die wet, moet ten minste 75% van die fondse wat ontvang is deur die organisasie by wyse van skenkings wat ingevolge hierdie artikel as 'n aftrekking kwalifiseer, uitkeer (of die verpligting aangaan om aldus uit te keer) binne 'n tydperk van twaalf maande vanaf die einde van die finansiële jaar waartydens bedoelde skenkings verkry is.

6.3.15 In die geval van OWO's bepaal Artikel 63A van die wet:

'n OWO ingevolge Artikel 30(3) van die wet deur die kommissaris goedgekeur moet enige kapitaalwins of kapitaalverlies bepaal ten opsigte van 'n beskikking oor 'n bate verontagsaam, waar

6.3.15.1 die gebruik van daardie bate vanaf waardasiedatum deur daardie OWO nie gerig was op enige besigheidsonderneming of handelsaktiwiteit nie; of

6.3.15.2 wesenlik die geheel van die gebruik van daardie bate op en na waardasiedatum deur daardie OWO gerig is op

6.3.15.2.1 'n doelstelling anders as die beoefening van 'n besigheidsonderneming of handelsaktiwiteit; of

6.3.15.2.2 die beoefening van 'n besigheidsonderneming of handelsaktiwiteit in Artikel 10(1)(cN)(ii)(aa), (bb) of (cc) van die wet beoog.

6.3.16 *Vrystellings van die normale belasting:* Artikel 10 van die wet bepaal die volgende:<sup>5</sup>

*van die normale belasting word vrygestel;*

*die ontvangste en toevallings van enige OWO ingevolge Artikel 30(3) van die wet deur die kommissaris goedgekeur, in die mate wat die ontvangste en toevallings verkry is, anders as uit enige besigheidsonderneming of handelsaktiwiteit; of uit enige besigheidsonderneming of handelsaktiwiteit;*

(i) *indien die onderneming of aktiwiteit*

- *integraal en direk verwant is tot die enigste of vernaamste oogmerk van daardie OWO soos in paragraaf (b) van die omskrywing van "openbare weldaadsorganisasie" in Artikel 30 van die wet beoog;*
- *beoefen of uitgevoer word op 'n grondslag waarvan wesenlik die geheel gerig is op die verhaling van koste; en*
- *wat nie onregverdige mededinging met betrekking tot belasbare entiteite tot gevolg het nie*

(ii) *indien die onderneming of aktiwiteit van 'n toevallige aard is en wesenlik onderneem word met vrywillige bystand sonder vergoeding;*

(iii) *indien die onderneming of aktiwiteit deur die minister by kennisgewing in die Staatskoerant goedgekeur is, met inagneming van*

- *die omvang en welwillendheidsaard van die onderneming of aktiwiteit;*
- *die direkte verband en verwantskap van die onderneming of aktiwiteit met die enigste of vernaamste oogmerk van die OWO;*

---

<sup>5</sup> Kyk ook INTERPRETATION NOTE: NO. 24 (Issue 2)

- *die winsgewendheid van die onderneming of aktiwiteit; en*
  - *die vlak van ekonomiese verwringing wat deur die belastingvrye status van die OWO wat die onderneming of aktiwiteit bedryf veroorsaak mag word; of*
- (iv) *behalwe 'n onderneming of aktiwiteit ten opsigte waarvan item (i), (ii) of (iii) van toepassing is en nie meer is nie as die grootste van*
- *vyf persent van die totale ontvangste en toevallings van daardie OWO gedurende die betrokke jaar van aanslag; of*
  - *R200 000.*

## **7. DEFINISIES**

### **7.1 FIDUSIËRE PERSOON EN PLIGTE**

7.1.1 Die vereiste vir 'n fidusiêre persoon is een wat 'n vertrouensposisie beklee en verantwoordelik optree met besluitnemingsbevoegdheid met betrekking tot die besigheid van 'n organisasie.

#### *7.1.2 Fidusiêre persone*

7.1.2.1 moet konflik van belange vermy;

7.1.2.2 mag nie die grense van hulle bevoegdhede oorskry nie;

7.1.2.3 moet deurgaans 'n onbevange diskresie handhaaf; en

7.1.2.4 moet hulle bevoegdhede uitoefen vir die doel waarvoor dit toegeken is.

7.1.3 'n Openbare Weldaadsorganisasie (OWO) moet ten minste drie onverbonde persone hê wat die fidusiêre verantwoordelikheid vir die organisasie aanvaar.

### **7.2 KOMMISSARIS**

Die Kommissaris van die Suid-Afrikaanse Inkomstediens (SAID) word hieronder “kommissaris”.

### **7.3 OPENBARE WELDAADSAKTIWITEIT**

'n Openbare weldaadsaktiwiteit is

7.3.1 enige aktiwiteit in Deel I van die Negende Bylae van die wet gelys as

#### *7.3.1.1 Godsdiens en Geloof*

*7.3.1.1.1 Die bevordering of beoefening van godsdiens wat dade van aanbidding, getuienis, onderrig en gemeenskapsdiens insluit, gebaseer op 'n geloof in 'n godheid.*

*7.3.1.1.2 Die bevordering en/of beoefening van 'n geloof; en*

7.3.2 enige ander aktiwiteit van tyd tot tyd deur die minister by kennisgewing in die Staatskoerant bepaal as van 'n welwillendheidsaard te wees, met inagneming van die behoeftes, belange en welvaart van die algemene publiek.

### **7.4 OPENBARE WELDAADSORGANISASIE**

7.4.1 Dis enige organisasie wat

7.4.1.1 'n nie-winsgewende maatskappy is, soos omskryf in klousule a1 van die Maatskappywet 71 van 2008 of 'n trust of 'n vereniging van persone is wat in die republiek ingelyf, opgerig of gestig is; of

- 7.4.1.2 'n tak binne die republiek is van enige maatskappy, vereniging of trust opgerig, ingelyf of ingestel in 'n land behalwe die republiek en wat van belasting op inkomste in daardie ander land vrygestel is;
- 7.4.2 Dis enige organisasie waarvan die enigste of hoofmerk die beoefening van een of meer openbare weldaadsaktiwiteite is, waar
- 7.4.2.1 al daardie aktiwiteite beoefen word op 'n nie-winsgewende grondslag en met 'n altruïstiese of filantropiese bedoeling;
- 7.4.2.2 geen van daardie aktiwiteite bedoel is om regstreeks of onregstreeks die ekonomiese eie belang van enige fiduciarius of werknemer van die organisasie te bevorder nie, anders as by wyse van redelike besoldiging wat aan daardie fiduciarius of werknemer betaalbaar is; en
- 7.4.3 Dis enige organisasie waar
- 7.4.3.1 elke sodanige aktiwiteit deur daardie organisasie beoefen word vir die voordeel van, of algemeen toeganklik is, vir die algemene publiek, ingesluit enige sektor daarvan (behalwe klein en eksklusiewe groepe); en
- 7.4.3.2 enige aktiwiteit soos deur die minister ingevolge paragraaf (b) van die omskrywing van "*openbare weldaadsaktiwiteit*" in subartikel 30 (1) van die wet bepaal, of enige voorwaardes deur die minister ingevolge subartikel 30 (3)(a) van die wet voorgeskryf moet binne 'n tydperk van 12 maande ná die datum van publikasie van daardie aktiwiteit of daardie voorwaardes deur die minister in die Staatskoerant in die parlement ter tafel gelê word vir insluiting in die wet.

## **7.5 WET**

*Wet* verwys na die Inkomstebelastingwet 58 van 1962 (soos gewysig).

## REGLEMENT 25

### REGLEMENT VIR GESTUURDHEID VAN DIE NG KERK

#### 1. DEFINISIE

- 1.1 Die missie van die Drie-enige God, Vader, Seun en Heilige Gees is om lewe en volheid aan die wêreld te gee. Die kerk is in diens van hierdie missie van God.
- 1.2 Deur die Woord en Gees vergader God vir Hom 'n gemeente. Deur dié gemeente
  - 1.2.1 laat God sy Woord verkondig,
  - 1.2.2 bring Hy die gemeenskap van heiliges uit alle nasies tot stand,
  - 1.2.3 laat Hy diens aan die wêreld in nood lewer,
  - 1.2.4 laat Hy sy opdrag om die skepping en lewe te bewaar sigbaar tot uitdrukking bring, en
  - 1.2.5 word sy geregtigheid en versoening verkondig. Só laat Hy sy Koninkryk kom.
- 1.3 Die gestuurde kerk bedien die evangelie in al sy dimensies aan mense wat die evangelie nie ken nie of daarvan vervreemd is.
- 1.4 Elke gemeente is 'n gestuurde gemeente en so ook elke lidmaat van die gemeente.
- 1.5 Gestuurdheid (missionale kerkwees) is die roeping van elke lidmaat, asook van die plaaslike gemeente. Waar die omvang en ander omstandighede van die werk dit vereis, geskied dit in die kerkverband deur ringe en sinodes.
- 1.6 Waar binne een geografiese gebied meer as een kerkverband van die NG Kerkfamilie bestaan, word gestuurdheid in oorleg en samewerking met mekaar gedoen.

#### 2. UITVOERING

##### 2.1 Kerklike betrokkenheid by God se missie

- 2.1.1 Die kerk is in diens van God se missie.
- 2.1.2 Dit is die plig van die kerkraad om die gemeente te motiveer en toe te rus om as gestuurde gemeente betrokke te wees by die heilshandeling van God met die wêreld. Hierdie betrokkenheid sluit in persoonlike getuienis deur woord en lewe, die beoefening van geloofsgemeenskap, voorbidding, rentmeesterskap, die diens van barmhartigheid en die ywer vir reg en geregtigheid in die samelewing.
- 2.1.3 Vir die koördinering, stimulering en uitvoering van die getuienistaak benoem die kerkraad 'n gevolmagtigde wat die gestuurdheid van die gemeente hanteer.
- 2.1.4 Elke kerkraad onderneem gestuurde dienswerk, sowel binne as buite eie gemeentegrense, na gelang van omstandighede. In alle gevalle geskied hierdie dienswerk in oorlegpleging met, en waar moontlik in samewerking met, ander

lede van die NG Kerkfamilie (gemeente, ring of sinode) wat belang mag hê by die betrokke bediening.

- 2.1.5 Waar die omvang van die gestuurde dienswerk dit vereis, kan die kerkverband deur ring en sinode die kerkraad in die uitvoering van die dienswerk steun.
- 2.1.6 Die ring en sinode neem respektiewelik die verantwoordelikheid vir die gestuurde dienswerk in die ring- en sinodale gebied.
- 2.1.7 Waar gestuurde dienswerk buite die grense van die gemeente geskied, moet waar moontlik, skakeling en samewerking wees met ander gestuurde kerke en instansies wat reeds daar werksaam is.
- 2.1.8 Waar 'n sinode 'n gestuurde aksie begin met spontane bydraes van lidmate vanuit die kerk as geheel (byvoorbeeld 'n geloofsaksie), moet ander sinodes wie se lidmate daarby betrokke word, ook in die saak geken word.
- 2.1.9 Die Algemene Sinode bepaal die beleid vir die gestuurdheid van die NG Kerk.
- 2.1.10 Deur middel van bediening op die terreine van byvoorbeeld mediese werk, onderwys, lektuurvoorsiening, tegniese hulpmiddels, sosio-ekonomiese opheffing, publieke getuienis teenoor die owerheid en missionêre barmhartigheidsdiens streef die NG Kerk daarna om die koninkryk van God op omvattende wyse met woord en daad te dien.

## **2.2 Toerusting vir gestuurdheid**

- 2.2.1 Die NG Kerk aanvaar dit as taak en verantwoordelikheid om lidmate en ander werkkragte op te lei en toe te rus met die oog op eie gestuurde diens, asook met die oog op beskikbaarstelling van werkkragte, waar verlang of benodig, vir gestuurde diens by ander lede van die NG Kerkfamilie.
- 2.2.2 Die opleiding en toerusting vir eie gestuurde diens, asook gestuurde diens by 'n lid van die NG Kerkfamilie, geskied op die volgende wyse:
  - 2.2.2.1 deur lidmate te aktiveer en te skool vir gestuurdheid met woord en daad;
  - 2.2.2.2 deur gestuurde werkkragte op te lei en toe te rus vir 'n bepaalde deelydse of voltydse diens waarvoor hulle 'n roeping het, of vir die dienswerk wat hulle gevra mag word om by ander lede van die NG Kerkfamilie te verrig; of
  - 2.2.2.3 deur die opleiding van predikante/diens- en standplaasleraars vir gestuurde diens op die terreine van
    - 2.2.2.3.1 die opbou van gemeentes tot gestuurde gemeentes;
    - 2.2.2.3.2 die bediening op 'n bepaalde gestuurde bedieningsgebied;
    - 2.2.2.3.3 die bediening as predikant/diens- en standplaasleraars by 'n ander lid van die NG Kerkfamilie waarheen die persoon beroep mag word;
    - 2.2.2.3.4 'n bediening van spesialiteitswerk op bepaalde terreine by 'n ander lid van die NG Kerkfamilie, indien daarvoor 'n behoefte bestaan; en/of
    - 2.2.2.3.5 'n bediening in die wêreldsending.

## **2.3 Lidmate in diens van ander kerke en organisasies**

2.3.1 Die NG Kerk keur dit goed dat lidmate hulle by kerke en sendingorganisasies wat vir die kerk aanvaarbaar is, kan aansluit vir gestuurde diens, veral in ander wêrelddele, mits die kerk se belydenis nie in gedrang kom nie en die NG Kerk se beleid vir gestuurdheid daardeur gedien word. Vir hierdie soort diens word die volgende bepaal:

2.3.1.1 Die sinode of sy gevolmagtigde bepaal met watter kerke en organisasies ooreenkomste in dié verband aangegaan mag word. 'n Organisasie word geag 'n goedgekeurde organisasie te wees indien die werksaamheid van die organisasie 'n geestelike karakter dra, met die verkondiging van die Woord in regstreekse verband staan, en ten bate van die NG Kerk geag word.

2.3.1.2 Wanneer lidmate begerig is om by 'n erkende kerk of organisasie te gaan werk, word 'n ooreenkoms met daardie kerk of organisasie aangegaan oor aangeleenthede soos lewensonderhoud, toelaes, pensioenvoorsiening, en kerklike lidmaatskap van en toesig oor die betrokke werker.

2.3.1.3 Lidmate wat begerig is om gestuurde dienswerk buite 'n diensterrein van die NG Kerk te doen, verkry, indien nodig, 'n buitelandse reisattestaat van hul kerkraad.

2.3.1.4 Lidmate wat voornemens of begerig is om by so 'n erkende kerk of organisasie in te skakel, tree met die betrokke sinode of sy gevolmagtigde in verbinding.

## **2.4 Basis waarop met ander kerke en organisasies saamgewerk word**

2.4.1 Die kerke en organisasies moet van Protestants-Christelike belydenis wees.

2.4.2 NG Kerk werkers moet die vryheid hê om hul geloofsbeskouing ooreenkomstig die Drie Formuliere van Eenheid uit te leef.

2.4.3 Lidmate moet eweneens die vryheid behou om in beskouinge waaroor daar verskille tussen gelowiges bestaan, hul eie standpunt daarop na te hou.

2.4.4 Die NG Kerk werkers moet getrou bly aan die belydenis van die kerk.

## **2.5 Gelegitimeerdes in diens van ander kerke en organisasies**

2.5.1 Ten opsigte van hul bedieningsbevoegdheid is daar drie kategorieë waarvolgens gelegitimeerdes in gestuurde diens gebruik kan word:

2.5.1.1 Predikante/diensleraars/standplaasleraars van die NG Kerk wat deur erkende kerke vir gestuurde diens beroep en bevestig word Hulle verkry bevoegdheid in die ander kerk, en verloor bevoegdheid in die NG Kerk. Hulle kan egter vooraf by die Algemene Taakspan Predikantesake aansoek doen om die opskorting van bevoegdheid in die NG Kerk. Terugkeer na die NG Kerk geskied na suksesvolle colloquium doctum by die Algemene Kuratorium en die herstel van proponentsbevoegdheid deur die Algemene Taakspan Predikantesake, op voorwaarde dat daar jaarliks nie later nie as 31 Maart by die Algemene Taakspan Predikantesake aangemeld is en die registrasiegeld betaal is.

2.5.1.2 Predikante/proponente/diensleraars/standplaasleraars van die NG Kerk wat deur kerkvergaderings of hul gevolmagtigdes beroep en uitgestuur word vir 'n eie

gestuurde diens of vir gestuurde diens saam met ander kerke en/of organisasies word deur die kerkvergadering of sy gevolmagtigde benoem en bevestig.

Terwyl hulle lidmaatskap van die gemeente van die NG Kerk behou, deur die gemeente beroep en bevestig is én in diens van die gemeente/kerkverband bly, behou hulle die bevoegdheid van predikant/diensleraars/standplaasleraars solank hulle met hierdie opdrag besig is. Indien hulle lidmaat van die ander kerk word en in diens van daardie kerk tree, kan hulle vooraf by die Algemene Taakspan Predikantesake aansoek doen om opskorting van bevoegdheid in die NG Kerk. Terugkeer na die NG Kerk geskied na suksesvolle colloquium doctum by die Algemene Kuratorium en die herstel van proponentsbevoegdheid deur die Algemene Taakspan Predikantesake, op voorwaarde dat daar jaarliks nie later nie as 31 Maart by die Algemene Taakspan Predikantesake aangemeld is en die registrasiegeld betaal is.

2.5.1.3 Predikante/proponente/diensleraars/standplaasleraars van die NG Kerk wat in diens van 'n organisasie tree en daarom nie meer in diens van die NG Kerk of ander erkende kerk staan nie, kan vooraf by die Algemene Taakspan Predikantesake aansoek doen om die behoud van proponentsbevoegdheid/status as diensleraars en standplaasleraars.

2.5.2 Pensioenaandeel vir uitgestuurdes

'n Gemeente of die kerkverband wat 'n gelegitimeerde beroep/benoem, bevestig en uitstuur vir gestuurde diens saam met ander kerke en organisasies (vergelyk 2.5.1.2 hierbo), moet in belang van so 'n persoon deelhebber word van die pensioenfonds.

2.5.3 Lewensonderhoud en toelaes vir uitgestuurdes

'n Gemeente of die kerkverband wat 'n predikant/proponent/diensleeraar/standplaasleeraar vir 'n eie gestuurde aksie of vir gestuurde diens saam met ander kerke en/of organisasies beroep/benoem, bevestig en uitstuur (vergelyk 2.5.1.2 hierbo), kan die lewensonderhoud en toelaes vir die predikant/proponent/diensleeraar/standplaasleeraar op een van die volgende wyses reël:

2.5.3.1 Die gemeente/kerkverband is verantwoordelik vir die volle lewensonderhoud en toelaes, waarby die pensioenbydrae ingesluit is.

2.5.3.2 Die gemeente/kerkverband is verantwoordelik vir 'n kontraktuele gedeelte van die lewensonderhoud en toelaes én die pensioenbydrae.

2.5.3.3 Die ander kerk of sendingorganisasies neem kontraktueel verantwoordelikheid vir die volle lewensonderhoud en toelaes, maar die gemeente/kerkverband bly verantwoordelik vir die pensioenbydrae.

2.5.4 Kerklike inskakeling van uitgestuurdes

'n Predikant/proponent/diensleeraar/standplaasleeraar wat beroep, bevestig en uitgestuur word (vergelyk 2.5.1.2 hierbo), skakel as lidmaat en ampsdraers by die sturende gemeente in, onderhewig aan die volgende:

- 2.5.4.1 Indien dit vir 'n uitgestuurde onmoontlik is om sy lidmaatregte en ampsvoorregte in die plaaslike gemeente uit te oefen, word die persoon met 'n reisattestaat aan die sorg en toesig van 'n ander gemeente toevertrou.
- 2.5.4.2 Die uitgestuurde staan egter steeds onder die tug en/of dissipline van die sturende gemeente en die betrokke ring.
- 2.5.4.3 Indien die uitgestuurde nie aan die kerkregering kan deelneem nie, wat die bywoning van kerkraadsvergaderings en die afvaardiging na meerdere vergaderinge insluit, kan die ring daaraan vrystelling verleen en kan dit as sodanig in die diensooreenkoms opgeneem word.

## **2.6 Lidmaatskap en kerkverband**

- 2.6.1 Gelowiges uit elke taal en nasie wat deur die gestuurde aksies van die NG Kerk vergader word en deur doop lidmate van die kerk van Christus word, vorm met alle gelowiges 'n eenheid in die ware geloof in Christus as lidmate van sy liggaam.
- 2.6.2 Nuwe lidmate sal, waar moontlik, inskakel by 'n gemeente van die NG Kerkfamilie. By gebrek aan sodanige gemeente kan hulle, ná onderhandeling, by 'n ander kerk inskakel of kan daar, wanneer genoegsaam getalle bestaan, tot selfstandige gemeentevorming in die kerkverband oorgegaan word.
- 2.6.3 Ter wille van meer doeltreffende Woordbediening is dit wenslik dat elkeen "in sy eie taal praat oor die groot dinge wat God gedoen het" (Handelinge 2:11). Daarom behoort daarvoor ruimte te bestaan dat Woordbediening en aanbidding kan geskied met inagneming van eiesoortige taal- en kultuuragtergrond en bedieningsbehoefte.
- 2.6.4 Indien 'n bepaalde groep gelowiges dit mettertyd sou verlang en omstandighede dit regverdig, kan daar ruimte vir hulle geskep word om in eie gemeenteverband op te tree, ooreenkomstig hul eie bedieningsbehoefte binne die konteks van eie taal en kultuur, maar verkieslik word aansluiting gesoek by die bestaande kerk in die streek waarmee die kerk in die NG Kerkfamilie die nouste bande het.
- 2.6.5 Eie gemeentevorming impliseer ook die moontlikheid van eie breër verbande van ring en sinode. Hier sal faktore soos geografiese verwyderdheid, staatkundige bestel, en die behoefte aan inkleding van die evangelie in eie kulturele konteks 'n rol speel. Voorop bly egter staan dat die eenheidsband met die bestaande kerk in die NG Kerkfamilie in die streek sover moontlik behoue bly en steeds uitdrukking sal vind op die mees sinvolle en effektiewe wyse.

## **2.7 Die NG Kerkfamilie**

- 2.7.1 Die NG Kerk aanvaar dat die eenheid van die kerk 'n onmisbare toetssteen is vir die egtheid en geloofwaardigheid van die kerk se getuienis in die wêreld (Kerk en Samelewing, par 83).
- 2.7.2 Daarom onderskryf die NG Kerk die ideaal van één kerkverband binne die NG Kerkfamilie (Kerk en Samelewing, par 236).

- 2.7.3 Met die oog op die opbou van die kerk tot gestuurde diens in die wêreld, onderskryf die NG Kerk die beginsel van wederkerige hulp en bystand ten opsigte van behoeftes binne die hele NG Kerkfamilie.
- 2.7.4 Solank die hele NG Kerkfamilie nog nie in een kerkverband verenig is nie, geld die volgende ten opsigte van die wedersydse beskikbaarstelling van werkkragte binne die NG Kerkfamilie:
- 2.7.4.1 Die NG Kerk kan predikante/diensleraars vir ander lede beskikbaar stel as hulle dit versoek. Hierdie leraars word in ooreenstemming met die kerkordes en bepalinge van die onderskeie kerkverbande beroep en bevestig, of soos ooreengekom in die ooreenkomste tussen die betrokke sinodes.
- 2.7.4.2 Predikante/diensleraars wat deur die NG Kerk beskikbaar gestel word en beroep en bevestig is in 'n ander kerkverband van die NG Kerkfamilie, se bevoegdheid en opsig en tug word bepaal deur die kerkorde van daardie kerkverband.
- 2.7.4.3 Die NG Kerk kan kundiges op die gebied van teologiese opleiding, jeugwerk, sending, evangelisasie, kerklike administrasie, diakonaat, ensovoorts op versoek van 'n ander lid van die NG Kerkfamilie vir tydelike diens in daardie kerkverband beskikbaar stel. Hulle posisie met betrekking tot die strukture van die ander kerkverband word by wyse van onderlinge ooreenkomste gereël.
- 2.7.4.4 Ander werkkragte uit die NG Kerk wat volgens ooreenkoms dienswerk in 'n lidkerk van die NG Kerkfamilie verrig, word lidmate van die betrokke kerk. In 'n gebied waar nie 'n gemeente van die NG Kerkfamilie bestaan nie, bly hulle lidmate van die NG Kerk.

## **2.8 Gesamentlike gestuurde diens**

- 2.8.1 Die NG Kerk aanvaar gesamentlike gestuurde diens as verantwoorde benadering. Indien gestuurde diens in 'n gebied of land gedoen word waar daar reeds 'n kerk uit die NG Kerkfamilie bestaan, word samewerking gesoek.
- 2.8.2 Indien die NG Kerk in 'n gebied of land werk waar daar nog nie 'n gemeente van een van die lidkerke van die NG Kerkfamilie is nie, kan die NG Kerk self of saam met ander lidkerke werkkragte beroep, bevestig en uitstuur.
- 2.8.3 Waar geleentheid tot gesamentlike gestuurde diens voorkom, kan gesamentlike diensgroepe vir gestuurde diens van die betrokke lidkerke van die NG Kerkfamilie in die lewe geroep word om verantwoordelikheid vir die werk te aanvaar.
- 2.8.4 Gesamentlike gestuurde diens word gereël volgens onderlinge ooreenkoms tussen die betrokke kerkvergaderinge of hulle gevolmagtigdes.

## **2.9 Skakeling met die owerheid**

- 2.9.1 Die kerk se roeping tot getuienis behels ook skakeling met die owerheid op alle vlakke, oor aangeleenthede op die terrein van getuienis.
- 2.9.2 Skakeling met die owerheid geskied volgens Artikel 67 van die *Kerkorde*.

## REGLEMENT 26

### REGLEMENT VIR DIE VERHOUDING TOT ANDER KERKE EN GROEPE

#### 1. BEPALING VAN DIE VERHOUDING TOT ANDER KERKE EN GROEPE

- 1.1 Die Woord van God is die primêre maatstaf en basis by die bepaling van die NG Kerk se houding teenoor en verhouding tot ander kerke en godsdienstige groepe.
- 1.2 Hoe 'n kerk die Bybel verstaan, die hoofsaak van die boodskap van die Bybel interpreteer en dit op die lewe toepas, staan uitgedruk in die kerk se belydenisskrif(te).
- 1.3 Die belydenisgrondslag wat die NG Kerk onderskryf en waaraan hy hom gebonde ag, is
  - 1.3.1 Die drie ekumeniese belydenisse, naamlik die Apostoliese Geloofsbelydenis, die Geloofsbelydenis van Nicea en die Geloofsbelydenis van Athanasius, wat die NG Kerk met die meeste ander Christelike kerke deel.
  - 1.3.2 Die drie Formuliere van Eenheid, naamlik die Nederlandse Geloofsbelydenis, die Heidelbergse Kategismus en die Dordtse Leerreëls, wat die NG Kerk met 'n aantal gereformeerde kerke deel, en wat die eiendomlike van die NG Kerk is.
- 1.4 Die NG Kerk se belydenisgrondslag is ondergeskik aan die Bybel en moet steeds daaraan getoets word.
- 1.5 Dit is nie voldoende dat 'n belydenis op papier staan of dat iemand dit op 'n stadium in die verlede onderskryf het nie. Daar moet ook gevra word of 'n bepaalde kerk en sy lidmate hulle daardeur gebonde ag en of die belydenis in 'n godvrugtige lewe konkreet word.
- 1.6 Die gesamentlike kriteria<sup>1</sup> vir bepaling van die NG Kerk se houding teenoor en verhouding tot ander kerke en groepe is dus die wil van God Drie-enig, soos in die Bybel weergegee, en weerspieël in
  - die belydenis,
  - die *Kerkorde*,
  - die erediens, en
  - die Christelike lewenswandel, diens en getuienis.

#### 2. GROEPERINGE VAN DIE CHRISTENDOM

- 2.1 Om kerke en Christelike groepe in te deel, is moeilik omdat sekeres in meer as een kategorie pas en ander nêrens. Verder moet daar rekening gehou word met die feit dat kerke nie staties is nie, maar gedurig besig is om te verander, asook dat sekere kerke gekenmerk word deur 'n patroon van wyduiteenlopende modaliteite wat

---

<sup>1</sup> Vergelyk Agenda van die Algemene Sinode 1994, p 66, 14.2.1 tot 14.2.5 vir 'n bespreking van dié kriteria.

onder een struktuur gehuisves word. Oor die aard en graad van die NG Kerk se verhouding tot onderstaande kerke word deur die Algemene Sinode beslis (vergelyk ook 3.1.2, 3.1.4, 3.2 en 3.3 hieronder).

2.2 Hier word uitgegaan van die groot groeperinge van die Christendom soos dit in die geskiedenis ontvou het, naamlik:

### 2.2.1 Gereformeerde kerke

Waaronder die Familie van NG Kerke, die Gereformeerde Kerke in Suid-Afrika, die Nederduitsch Hervormde Kerk van Afrika, die Afrikaanse Protestantse Kerk, die Presbiteriaanse Kerke (Uniting Presbyterian Church in Southern Africa, Evangelical Presbyterian Church), die Church of England in Southern Africa, die United Congregational Church of Southern Africa, die Volkskerk van Afrika, die Calvyn Protestantse Kerk en die Rynse Kerk.

### 2.2.2 Ander Protestantse kerke

Waaronder die Lutherse kerke, die Anglican Church of Southern Africa (die Anglikaanse Kerk), die Methodist Church of Southern Africa, die Baptiste Kerke (in onderskeiding van die charismatiese baptiste kerke) en die Evangelies Gereformeerde Kerk.

### 2.2.3 Pinkster en Charismatiese kerke

Die pinkstergroepe, byvoorbeeld die Apostoliese Geloofsending van Suid-Afrika, die Volle Evangelie Kerk, die Pinkster Protestantse Kerk en die Assemblies of God. Charismatiese groepe, byvoorbeeld die Hatfield Christian Church/Centre en Rhema. Ander, byvoorbeeld die Kerk van die Nasarener, Lede in Christus en die Sewende Dag Adventiste.<sup>2</sup>

### 2.2.4 Nie-Reformatoriese Kerke

Waaronder die Rooms Katolieke Kerk en die Oosters Ortodokse Kerke.

### 2.2.5 Afrika Onafhanklike Kerke

### 2.2.6 Ander groepe

Waaronder die Jehovasgetuies, die Christian Science, die Church of Jesus Christ of the Latter Day Saints (die Mormone) en die Apostelkerke (die Ou Apostoliese Kerk, die Nuwe Apostoliese Kerk, die Apostel Eenheid, die Twaalf Apostels, ensovoorts).

## 3. PRAKTIESE TOEPASSING VAN DIE KRITERIA

### 3.1 Samewerking met ander Christelike kerke

3.1.1 Die NG Kerk stel hom ten doel om op verantwoordelike wyse, sonder prysgawe van die eie standpunt, met ander Christelike kerke saam te werk ter bevordering van die Koninkryk van God.

3.1.2 Die graad en wyse van samewerking sal in elke geval bepaal word deur die graad van ooreenstemming ten opsigte van belydenis, kerkorde, erediens en die Christelike lewenswandel van die betrokke kerk (vergelyk 1.6 hierbo).

---

<sup>2</sup> Hierdie twee kerke word vir praktiese redes hier geplaas.

3.1.3 Ekumene moet deur alle kerkvergaderinge beoefen word, te wete die Algemene Sinode, sinodes, ringe en kerkrade. Dit is nodig om te beklemtoon dat plaaslike ekumene op die agenda van elke kerkraad moet bly.

3.1.4 Die Algemene Sinode bepaal die beleid oor die aard en graad van ekumeniese verhoudinge (vergelyk Artikel 70 van die *Kerkorde*).

### **3.2 Assosiasie**

3.2.1 Nadat 'n formele aansoek ontvang en beoordeel is, kan die Algemene Sinode met 'n tweederdemeerderheidstem goedkeuring verleen dat ander kerke of kerkgemeenskappe (ingesluit gemeentes van ander kerke) in assosiasie met die NG Kerk tree.

3.2.2 Die graad en wyse van assosiasie word in elke geval bepaal deur die graad van ooreenstemming ten opsigte van belydenis, kerkorde, erediens en die Christelike lewenswandel, diens en getuienis van die betrokke kerk of kerkgemeenskap.

3.2.3 'n Ander kerk of kerkgemeenskap se assosiasieverbintenis met die NG Kerk word in 'n assosiasieooreenkoms vervat. In hierdie ooreenkoms word wedersydse voorregte en verpligtinge uitgespel, waaronder die wyse waarop daar oor-en-weer in die kerkvergaderinge sitting geneem (waarnemend, adviserend of stemhebbend) en aan die vergaderinge deelgeneem word. Ander reëlings kan insluit: wedersydse erkenning van opleiding en legitimasie, oor-en-weer aanvaarding van lidmaatskap, kanselruiling met die bevoegdheid om sakramente te bedien, gesamentlike werksaamhede, finansiële verpligtinge, die wyse waarop die assosiasie kan oorgaan tot inlywing by die NG Kerk, die wyse waarop die assosiasie beëindig kan word, ens.

### **3.3 Verlening van kerklike voorregte sonder oordrag van lidmaatskap**

#### **3.3.1 Die doop**

3.3.1.1 Die doop word aan kinders van lidmate van kerke uit die eerste vier groeperinge, wat nie die verbondsdooop verwerp nie, bedien, mits hulle skriftelike verlof daartoe van die betrokke kerkraad of instansie van die kerk waaraan hulle behoort, ontvang het.

3.3.1.2 Lidmate van kerke uit die eerste vier groeperinge wat nie die verbondsdooop verwerp nie, kan, met toestemming van hulle eie kerkraad en na die dooponderhoud, toegelaat word om saam met hulle eggenoot/eggenote, wat lidmaat van die NG Kerk is, by te staan by die doopbediening van hulle kinders en ook op die vrae te antwoord.

3.3.1.3 Lidmate van kerke wat die verbondsdooop verwerp, persone uit groepering 5 en 6, asook mense wat Christus bely, maar nie formeel aan 'n kerk behoort nie, kan na die dooponderhoud toegelaat word om saam met hulle eggenoot/eggenote, wat lidmaat van die NG Kerk is, by te staan by die doopbediening van hulle kinders sonder dat die vrae aan hulle gestel word en hulle daarop moet antwoord.

3.3.1.4 Die kerkraad van 'n NG gemeente kan aan lidmate toestemming verleen om hulle kinders in 'n gemeente van 'n kerk uit die eerste twee groeperinge (vergelyk 2.2.1 en 2.2.2 hierbo) te laat doop.

### **3.3.2 Die nagmaal**

3.3.2.1 In gemeentes van die NG Kerk mag besoekers die nagmaal gebruik op voorwaarde dat hulle toegang en vrymoedigheid daartoe in hulle eie gemeentes het.

3.3.2.2 Die volgende sou as moontlike voorbeeld kon dien van 'n uitnodiging tot deelname aan die nagmaal:

“Aangesien die kerk van Christus meer omvattend is as slegs hierdie gemeente word elkeen van u wat u persoonlike verlossing in Jesus Christus gevind het, in u eie gemeente toegang tot die nagmaal en vrymoedigheid daartoe het en wat u kan vereenselwig met die leer oor die nagmaal, soos dit in die formulier aan u voorgehou is, uitgenooi om aan hierdie nagmaalsfees deel te neem. Wie egter die genadewerk van God minag en tog deelneem, eet en drink 'n oordeel oor hulleself.”

3.3.2.3 In ekumeniese verhoudinge op sowel gemeentelike as sinodale vlak word wedersydse toeganklikheid, al dan nie, van die betrokke kerke bespreek en dienooreenkomstige gedragswyses bepaal.

3.3.2.4 Lidmate van 'n NG gemeente kan op besoek in 'n ander kerk nagmaal gebruik indien daardie kerk dit toelaat. Lidmate behoort dus voortdurend ingelig te word oor die sin van die nagmaal en die implikasies wat dit het vir die wyse waarop 'n mens as nagmaalsgas in ander gemeentes en kerke optree. Hierdie inligting kan verskaf word deur die prediking, die inkleding van die liturgie en die kategeese.

## **3.4 Oorkoms na 'n Nederduitse Gereformeerde Gemeente**

### **3.4.1 Algemeen**

3.4.1.1 Geloof in die God van die Heilige Skrif soos dit in die Formuliere van Eenheid tot uitdrukking kom, is die enigste voorwaarde om aan 'n NG gemeente as gemeente van Christus te behoort.

3.4.1.2 Lidmaatskap van alle NG gemeentes is oop vir enige gelowige wat die belydenis van hierdie kerk aanvaar.

3.4.1.3 Die opneem van lidmate uit ander kerke is in beginsel en praktyk 'n gemeentelike aangeleentheid wat onder die toesig van die kerkraad en in ooreenstemming met die kerkordelike bepalings plaasvind.

3.4.1.4 In elke geval waar iemand uit 'n ander kerk of groep na 'n NG gemeente wil oorkom/terugkom, moet 'n deeglike pastorale gesprek gevoer word oor alle aspekte van die leer en lewe van so iemand (vergelyk ook 1.6 hierbo) en oor die beweegredes vir die aansoek.

3.4.1.5 Tydens hierdie pastorale gesprek moet rekening gehou word met die feit dat nie alle lede van 'n bepaalde kerk dieselfde geestelike ingesteldheid en geestelike peil het of dieselfde opvattinge huldig nie.

### **3.4.2 Aanvaarding van doop**

3.4.2.1 Die doop van persone uit ander kerke word aanvaar mits dit

- geskied het in die Naam van die Drie-enige God Vader, Seun en Heilige Gees,
- met water bedien is, en

- bedien is deur 'n persoon wat afgesonder is vir die bediening van die Woord en die sakramente.
- 3.4.2.2 Die doop van persone wat in een van die Apostelkerke (waaronder die Ou Apostel Kerk, die Nuwe Apostel Kerk, die Apostel Eenheid en die Twaalf Apostels) gedoop is, word nie aanvaar nie.
- 3.4.3 Belydende lidmaatskap**
- 3.4.3.1 In die pastorale gesprek met persone wat uit kerke uit die eerste twee groeperinge van kerke na 'n NG gemeente wil oorkom, word gelet op punte van verskil in leer en lewe sodat die persoon die leer van die NG Kerk heelhartig kan onderskryf.
- 3.4.3.2 Van persone uit kerke uit groepering 3 en 4 word naas die pastorale gesprek ook gedeeltelike of volledige onderrig met belydenis van geloof voor 'n kommissie van die kerkraad of voor die gemeente vereis.
- 3.4.3.3 Persone uit die vyfde en sesde groeperinge moet 'n deeglike kategese deurloop en openbare belydenis van geloof aflê.

## **4. EKUMENIESE BELEID**

### **4.1 Uitgangspunte vir die NG Kerk met betrekking tot ekumeniese verhoudinge**

Hierdie uitgangspunte moet saam gelees word met die volgende: (i) 1 tot 3 hierbo; (ii) Agenda Algemene Sinode 1994, p 66, 14.2.1-14.2.5; (iii) Die Ekumeniese Beleid, Agenda Algemene Sinode 1990, pp 61-64, Handeling Algemene Sinode 1990, pp 546-549.

4.1.1 Die kerk van Christus is wêreldwyd één.

4.1.2 Die kerk van Christus is oor die grense van plek en tyd één.

4.1.3 Eenheid is 'n gawe aan en 'n roeping vir die kerk

Hierdie taak word veral ook op plaaslike vlak volvoer – hier word die kragtige getuigenis van eenheid tot stand gebring. Plaaslike kerke streef daarna om met die ware kerk van Christus (NGB Artikel 29) saam te aanbid, te getuig en te werk.

4.1.4 Eenheid en verskeidenheid

Eenheid is nie eendersheid nie. Die verskeidenheid van volke, tale, gebruike en kulture moet erken word. Ook die gevolglike ryk verskeidenheid in aanbidding, kerkstrukture, konfessionele uitdrukkings, formuliere en kerkstrukture. Die verskeidenheid mag egter nie tot geskeidenheid lei nie – dit is 'n verskeidenheid in die eenheid van Christus se kerk.

4.1.5 Eenheid in waarheid

Kerke streef daarna om saam die waarheid van die Woord van die Here, wat nie ter wille van eenheid prysgegee moet word nie, te soek.

### **4.2 Die NG Kerk en ekumeniese verhoudinge, bilateraal en multilateraal (ekumenies)**

4.2.1 Die NG Kerk (Algemene Sinode) wil aktief bilaterale (een-tot-een) verhoudinge met ander Christelike kerke (denominasies) aanknoop, handhaaf en bevorder, beide op nasionale en internasionale vlak.

- 4.2.2 Oor die kerke met wie bilaterale verhoudinge aangegaan word, en die aard en graad van elke verhouding, besluit die Algemene Sinode op onder meer aanbeveling van die Algemene Sinode se gevolmagtigde wat die ekumeniese verhoudinge hanteer.
- 4.2.3 Die NG Kerk wil ook sy roeping tot die eenheid van die kerk bevorder en handhaaf deur in nasionale en internasionale ekumeniese organisasies en liggame op 'n multilaterale vlak (ekumenies) met ander kerke en organisasies in verhouding te tree.
- 4.2.4 Oor die ekumeniese organisasies of liggame met wie in verbinding getree word, en die aard en graad van die multilaterale verhoudinge, besluit die Algemene Sinode op aanbeveling van onder meer sy gevolmagtigde wat die ekumeniese verhoudinge hanteer.

### **4.3 Bilaterale kerklike verhoudinge**

Bilaterale kerklike verhoudinge met ander kerke (nasionaal of internasionaal) kan bestaan uit:

- Volle verhoudinge.
- Gedeeltelike verhoudinge.
- Dialoogverhoudinge.
- Insidentele kontakverhoudinge.

#### **4.3.1 Volle verhoudinge** (vergelyk 4.7.1 hieronder)

##### 4.3.1.1 Volle verhouding met 'n ander kerk behels die volgende:

- die stuur van afgevaardigdes na mekaar se sinodes;
- die toelaat van leraars op mekaar se kansels;
- die toelaat van mekaar se lidmate tot die nagmaalstafel;
- gesamentlike optrede op terreine van gemeenskaplike verantwoordelikheid;
- kommunikasie met mekaar oor sake van gemeenskaplike belang en kommer;
- wedersydse opsig oor en sorg vir mekaar as kerke ten einde die eenheid van die kerk te bevorder;
- die pastorale versorging van mekaar se lidmate wanneer hulle binne die grense van mekaar se kerke vestig; en
- die wedersydse erkenning van mekaar se teologiese opleiding en gevolglike oor-en-weer beroepbaarheid van leraars met inagneming van spesifieke vereistes wat 'n kerk kan stel.

4.3.1.2 Die Algemene Sinode se gevolmagtigde wat die ekumeniese verhoudinge hanteer, sien toe dat die bepalinge rakende die volle verhouding met die ander kerk in 'n ooreenkoms beslag vind en nagekom word.

4.3.1.3 Die Algemene Sinode se gevolmagtigde wat die ekumeniese verhoudinge hanteer, bly op hoogte van ontwikkelinge in dié kerke met wie die NG Kerk volle verhoudinge het en lig die Algemene Sinode gereeld daarvoor in.

- 4.3.1.4 Die Algemene Sinode se gevolmagtigde wat die ekumeniese verhoudinge hanteer, adviseer die Algemene Sinode oor die kerke met wie volle verhoudinge aangegaan en volgehou kan word.
- 4.3.1.5 Indien alle aspekte van 'n volle kerklike verhouding vanweë praktiese omstandighede nie kan gerealiseer nie, kan volle verhoudinge ten opsigte van sommige aspekte aangegaan word. Die doel moet steeds volle verhoudinge ten opsigte van alle fasette wees.
- 4.3.2 Gedeeltelike verhoudinge** (vergelyk 4.7.2 hieronder)
- 4.3.2.1 Die NG Kerk streef daarna om gedeeltelike kerklike verhoudinge na te streef en aan te gaan met kerke van gereformeerde oortuiging met wie die NG Kerk nie in volle verhouding staan nie.
- 4.3.2.2 Voorwaardes vir die aangaan van 'n gedeeltelike kerklike verhouding is:
- 4.3.2.2.1 Wedersydse erkenning van 'n gemeenskaplike basis in gereformeerde geloofsoortuiginge soos uitgedruk in reformatoriese belydenisskrifte.
- 4.3.2.2.2 'n Wedersydse begeerte om 'n kerklike verhouding aan te gaan.
- 4.3.2.3 'n Gedeeltelike verhouding word aangegaan met die veronderstelling dat dit tot 'n volle kerklike verhouding kan lei.
- 4.3.2.4 Samewerkingsooreenkomste, gesamentlike optrede ten opsigte van gemeenskaplike verantwoordelikhede, voortgaande kommunikasie oor sake van gemeenskaplike kommer en wedersydse sorg vir mekaar se lidmate, indien daartoe versoek, is moontlik met kerke met wie die NG Kerk in 'n gedeeltelike verhouding staan.
- 4.3.2.5 Die Algemene Sinode se gevolmagtigde wat die ekumeniese verhoudinge hanteer, identifiseer met verantwoording aan die Algemene Sinode die kerke met wie die NG Kerk gedeeltelike verhoudinge wil aangaan en is, indien nodig, namens die NG Kerk verantwoordelik vir die samewerkingsooreenkomste, gesamentlike optredes, voortgaande kommunikasie en die implementering van die wedersydse versorging van lidmate, indien daartoe versoek.
- 4.3.2.6 Die Algemene Sinode se gevolmagtigde wat die ekumeniese verhoudinge hanteer, adviseer die Algemene Sinode wanneer 'n gedeeltelike verhouding kan oorgaan in 'n volle verhouding.
- 4.3.3 Dialoogverhoudinge** (vergelyk 4.7.3 hieronder)
- 4.3.3.1 Die NG Kerk streef daarna om deur die Algemene Sinode se gevolmagtigde wat die ekumeniese verhoudinge hanteer, in gereelde dialoog te tree met 'n wye verskeidenheid kerke wat nie noodwendig dieselfde belydenisgrondslag of standpunte het nie ten einde ingelig te word oor hulle kerklike lewe, verhoudinge en standpunte.
- 4.3.3.2 Algemene Sinode se gevolmagtigde wat die ekumeniese verhoudinge hanteer, identifiseer die kerke en voer die gesprekke op 'n gereelde basis met verantwoording aan die Algemene Sinode.
- 4.3.3.3 Benewens dat die dialoog kan lei tot gedeeltelike of volle kerklike verhoudinge, kan die gesprekke ook op kort termyn die moontlikhede van samewerking,

gesamentlike optredes en kommunikasie oor sake van gemeenskaplike kommer oorweeg en soos nodig verder voer.

#### 4.3.4 **Kontakverhoudinge** (vergelyk 4.7.4 hieronder)

4.3.4.1 Die NG Kerk wil ook die roeping tot ekumene uitvoer deur na aanleiding van behoeftes, omstandighede en geleenthede, insidentele kontak op te neem met ander kerke.

4.3.4.2 Die kontakverhoudinge word deur die Algemene Sinode se gevolmagtigde wat die ekumeniese verhoudinge hanteer, behartig met verantwoording aan die Algemene Sinode.

#### 4.4 **Multilaterale kerklike verhoudinge** (vergelyk 4.7.5 hieronder)

4.4.1 Die NG Kerk wil sy ekumeniese roeping bevorder en uitbou deur

4.4.1.1 deel te wees van ekumeniese organisasies waar die Kerk met ander gereformeerde kerke kan saamwerk;

4.4.1.2 deel te neem aan ekumeniese organisasies, geselskappe en verenigings wat die Kerk sal toelaat om die ekumeniese verantwoordelikhede wyd, effektief en doeltreffend na te kom; en

4.4.1.3 verhoudinge met ekumeniese organisasies te ontwikkel.

4.4.2 Oor die aard, graad en omvang van deelname aan 'n multilaterale ekumeniese organisasie, geselskap of vereniging, besluit die Algemene Sinode na 'n bestudering van die aard van 'n betrokke ekumeniese organisasie, soos dit gevind en gedemonstreer word in die grondwet, basiese uitgangspunte, verklarings, aktiwiteite en optredes van elke organisasie. Die Algemene Sinode se gevolmagtigde wat die ekumeniese verhoudinge hanteer, adviseer die Algemene Sinode hierin.

4.4.3 Grade van betrokkenheid by multilaterale organisasies kan, wat die NG Kerk betref, die volgende behels:

4.4.3.1 volle lidmaatskap – dit wil sê volle deelname, verkiesbaarheid tot posisies, aanvaarding van medeverantwoordelikheid vir besluite en aksies.

4.4.3.2 waarnemerlidmaatskap – dit wil sê die kerk neem net die handeling en optredes van die betrokke organisasie waar, aanvaar nie verantwoordelikheid vir besluite en optredes nie en verteenwoordigers is ook nie verkiesbaar tot enige posisies nie.

#### 4.5 **Die Algemene Sinode se gevolmagtigde wat die ekumeniese verhoudinge hanteer**

4.5.1 Die Algemene Sinode se gevolmagtigde wat die ekumeniese verhoudinge hanteer, word deur die ASM saamgestel en rapporteer aan die Algemene Sinode deur die ASM.

4.5.2 Ooreenkomstig die uitgangspunte van die NG Kerk vir ekumeniese betrekkinge en ander besluite van die Algemene Sinode, dra die Algemene Sinode dit op aan die Algemene Sinode se gevolmagtigde wat die ekumeniese verhoudinge hanteer om belangstelling in en verhoudinge met die kerk van Christus wêreldwyd (nasionaal en internasionaal) te handhaaf en te bevorder.

- 4.5.3 Die taak van die Algemene Sinode se gevolmagtigde wat die ekumeniese verhoudinge hanteer, is soos volg:
- 4.5.3.1 Met betrekking tot kerke met wie die NG Kerk in **volle verhouding** is (vergelyk 4.7.1 hieronder):
- 4.5.3.1.1 Identifiseer kerke met wie die Algemene Sinode in volle verhoudinge kan tree en adviseer die Algemene Sinode daarvoor.
- 4.5.3.1.2 Handhaaf noue en voortgesette verhoudinge met dié kerke met wie die Algemene Sinode besluit het om in volle verhouding te tree.
- 4.5.3.1.3 Bly ingelig oor ontwikkelinge in dié kerke met wie die Algemene Sinode volle verhoudinge aangegaan het en lig ook die Algemene Sinode dienooreenkomstig in.
- 4.5.3.1.4 Benewens die normale spektrum van vol verhoudinge beveel die Algemene Sinode se gevolmagtigde wat die ekumeniese verhoudinge hanteer, by die Algemene Sinode aan watter spesifieke soort vol verhoudinge met elke kerk aangegaan moet word.
- 4.5.3.2 Met betrekking tot kerke met wie die NG Kerk in **gedeeltelike verhoudinge** is (vergelyk 4.7.2 hieronder):
- 4.5.3.2.1 Identifiseer kerke met wie die NG Kerk gedeeltelike verhoudinge wil aangaan en adviseer die Algemene Sinode daarvoor.
- 4.5.3.2.2 Inisieer en/of maak kontak met kerke met wie die NG Kerk gedeeltelike verhoudinge sou kon aangaan. In hierdie proses kan van die volgende gebruik gemaak word
- Uitnodigings kan na wedersyds afgevaardigdes se algemene sinodes (of die ekwivalent) gestuur word, waar die afgevaardigdes erken word en geleentheid kry om verteenwoordigers van die kerk te ontmoet. Die NG Kerk sou ook aan die afgevaardigde van die ander kerk geleentheid kon gee om kortliks groete oor te dra.
  - Indien daar nie van wedersydse ekumeniese afgevaardigdes gebruik gemaak word nie, kan daar per skrywe gekommunikeer word. Verslag word aan die Algemene Sinode gedoen.
  - Daar kan ook wedersyds van persone of instellinge gebruik gemaak word wat per geleentheid by 'n kerk besoek kan aflê.
  - Agendas, handeling en die *Kerkorde* en ander amptelike dokumente kan gereeld aan die ander kerk gestuur word.
  - Bedink weë waarop die NG Kerk tot diens kan wees en dit onder die aandag van die ander kerk(e) kan bring, soos byvoorbeeld geleentheid vir opleiding van predikante en ander werkkragte, beskikbaarheid van onderrigmateriaal, of enige ander vorm van diens wat die NG Kerk sou kon lewer. Daar moet ook kennis geneem word van die dienste wat ander kerke sou kon lewer.

4.5.3.3 Met betrekking tot kerke met wie die NG Kerk in **dialoog/kontak** is (vergelyk 4.7.3 en 4.7.4 hieronder):

In uitvoering van die standpunt van die NG Kerk om betrekkinge met ander kerke te bevorder en te handhaaf, gee die Algemene Sinode se gevolmagtigde wat die ekumeniese verhoudinge hanteer, deur studie en kontak – soos die geleentheid hom voordoen – uitvoering aan die beleidstandpunt van die Kerk. Dit gebeur deur dialoog of ander vorme van kontak met

- kerke wat belangstel om een of ander vorm van verhouding aan te gaan;
- kerke wat spesifiek met die NG Kerk 'n verhouding wil aangaan;
- kerke wat hulle bande met die NG Kerk verbreek het of hulle om een of ander rede teruggetrek het uit 'n vorige verhouding; en
- kerke van verskillende historiese of konfessionele agtergronde wat bereid is om sake van gemeenskaplike belang of oor sake wat opklaring verg, te praat of te kommunikeer.

4.5.3.4 Met betrekking tot **multilaterale verhoudinge** (vergelyk 4.7.5 hieronder):

- dien as kontakliggaam van die NG Kerk met ekumeniese organisasies; en
- dien as die skakelligaam tussen die NG Kerk en dié ekumeniese liggame of organisasies met wie die NG Kerk betrekkinge het. Ten opsigte van hierdie liggame/organisasies moet die Algemene Sinode se gevolmagtigde wat die ekumeniese verhoudinge hanteer
- hulle aktiwiteite bestudeer en die Algemene Sinode met 'n verslag en aanbevelings dien; en
- persone identifiseer wat die NG Kerk by die onderskeie organisasies/liggame verteenwoordig.
- stel ondersoek in na verskillende ekumeniese organisasies, neem dit waar, bestudeer dit en doen daarvoor aan die Algemene Sinode verslag.

## **4.6 Ekumene in ander staatkundige bedelings**

4.6.1 Aan samestellende sinodes wat in state buite die Republiek van Suid-Afrika (bv Namibië) is, word die reg verleen om selfstandige ekumeniese verhoudinge aan te gaan en uit te bou binne die raamwerk van die besluite van die Algemene Sinode.

4.6.2 In die aanwysing van afgevaardigdes na ekumeniese liggame, moet die Algemene Sinode rekening hou met die feit dat die algemene sinodale verband in verskillende state funksioneer.

## **4.7 Die stand van sake van die NG Kerk se ekumeniese verhoudinge**

Onderstaande is die stand van sake sedert Oktober 2013. Die Moderamen van die Algemene Sinode (ASM) word gereeld op hoogte gehou van die toedrag van sake.

**4.7.1 Kerke met wie die NG Kerk in vol verhoudinge staan** (vergelyk 4.3.1 hierbo)

4.7.1.1 Die Familie van NG Kerke in Suid-Afrika, naamlik die Verenigende Gereformeerde Kerk in Suider-Afrika, die Nederduitse Gereformeerde Kerk in Afrika en die Reformed Church in Africa

4.7.1.2 Die lede van die NG Kerkfamilie buite Suid-Afrika (volle verhoudinge word onderhandel kragtens besluit van die Algemene Sinode 2011) naamlik die Dutch Reformed Church in Botswana, Swaziland Reformed Church, Reformed Church in Zimbabwe, Reformed Church in Zambia, Church of Central Africa Presbyterian (Nkhoma Synod), Church of Central Africa Presbyterian (Harare Synod), Igreja Reformada em Moçambique en Reformed Church of East Africa

4.7.1.3 Nederduitsch Hervormde Kerk van Afrika

4.7.1.4 Gereformeerde Kerke in Suid-Afrika

4.7.1.5 Christian Reformed Church in North America

4.7.1.6 Christian Reformed Churches of Australia

4.7.1.7 Reformed Church in Japan

4.7.1.8 Christian Reformed Church in Sri Lanka

4.7.1.9 Reformed Church in Hungary

4.7.1.10 Gereformeerde Evangeliese Kerk van Australië

4.7.1.11 Afrikaanse Christenkerk van Nieu-Seeland

**4.7.2 Kerke met wie die NG Kerk in gedeeltelike verhoudinge staan** (vergelyk 4.3.2 hierbo)

4.7.2.1 Die Volkskerk van Afrika en Calvin Protestantse Kerk.

4.7.2.2 Gedeeltelike verhoudinge word kragtens besluite van die Algemene Sinode onderhandel met die Uniting Presbyterian Church in Southern Africa, Uniting Church in Australia, Church of Jesus Christ in Madagascar, Communauté Evangélique du Congo, Protestantse Kerk in Nederland, Verenigde Protestantse Kerk in België, Voortgezette Gereformeerde Kerken in Nederland, en Lesotho Evangelical Church in Southern Africa.

**4.7.3 Kerke met wie die NG Kerk in dialoog is** (vergelyk 4.3.3 hierbo)

4.7.3.1 Evangelische Kirche Deutschland

4.7.3.2 Apostoliese Geloofsending van Suid-Afrika

4.7.3.3 Methodist Church of Southern Africa

4.7.3.4 Rooms-Katolieke Kerk van Suid-Afrika

4.7.3.5 Anglican Church of South Africa

4.7.3.6 Evangelical Lutheran Church in Southern Africa (NT)

4.7.3.7 Federasie van Switserse Protestantse Kerke

4.7.3.8 Presbyterian Church of Australia

4.7.3.9 Presbyterian Church (USA)

4.7.3.10 Reformed Churches in New Zealand

4.7.3.11 United Congregational Church in Southern Africa

**4.7.4 Kerke met wie die NG Kerk in kontakverhoudinge is** (vergelyk 4.3.4 hierbo)

4.7.4.1 Afrikaanse Protestantse Kerk

4.7.4.2 Church of England in South Africa

4.7.4.3 Rynse Kerk

**4.7.5 Multilaterale verhoudinge** (vergelyk 4.3.5 hierbo)

Die NG Kerk is lid van die

4.7.5.1 Wêreldgemeenskap van Gereformeerde Kerke (WGGK) [World Communion of Reformed Churches (WCRC)]

4.7.5.2 Gemeenskap van Gereformeerde Kerke in Afrika (GGKA) [Communion of Reformed Churches in Africa (CRCA)]

4.7.5.3 Suid-Afrikaanse Raad van Kerke (SARK)

4.7.5.4 Council of Churches in Namibië

4.7.5.5 The Evangelical Alliance of South Africa (TEASA)

4.7.5.6 Conventus van Reformatoriese Kerke

4.7.5.7 Tussenkerklike Raad (TKR)

4.7.5.8 All Africa Conference of Churches (AACC)

4.7.5.9 World Reformed Fellowship

4.7.5.10 Die Algemene Sinode het die NG Kerk se lidmaatskap van die volgende liggame goedgekeur en dit is tans in proses van afhandeling: Wêreldraad van Kerke (WRK), World Reformed Fellowship (WRF) en Global Christian Forum (GCF)

## REGLEMENT 27

### REGLEMENT VIR DIE VERMEERDERING, KOMBINERING, EENWORDING EN SAMESMELTING VAN GEMEENTES

#### 1. VERMEERDERING/AFSTIGTING VAN GEMEENTES

##### 1.1 Algemene reëlings

- 1.1.1 Die uitbreiding van die kerk en die gevolglike vermeerdering van gemeentes is die roeping en plig van 'n groeiende en lewenskragtige kerk.
- 1.1.2 Indien ongesensureerde belydende lidmate oortuig is van die noodsaaklikheid van die stigting van 'n nuwe gemeente, moet hulle 'n skriftelike versoek tot die kerkraad rig. Die versoekskrif moet die volgende insluit: (1) 'n ondersoek na die lewensvatbaarheid van 'n nuwe gemeente, (2) moontlike plekke van aanbidding, (3) begroting, (4) voorstelle oor leierskorps vir die gemeente en die toerusting van leiers.
- 1.1.3 Indien die kerkraad oordeel dat daar genoeg rede vir die stigting van 'n nuwe gemeente is, gee hy verlot dat die lidmate wat die nuwe gemeente wil vorm, mag oorgaan tot gemeentestigting. Dit beteken ook dat die betrokke lidmate 'n ooreenkoms met die kerkraad onderteken om die nuwe gemeente te stig.
  - 1.1.3.1 Die ooreenkoms om die nuwe gemeente te stig moet voorstelle bevat oor die wyse waarop die gemeente se bediening sal geskied, asook voorstelle oor die wyse waarop en wanneer 'n predikant bekostig sal word.
  - 1.1.3.2 Wanneer die kerkraad oortuig is van die wenslikheid van die stigting van 'n nuwe gemeente en dat dit lewensvatbaar is, stuur die kerkraad die versoekskrif en die ooreenkoms kragtens artikel 31.4 van die *Kerkorde* saam met *aanbevelings* oor die volgende sake aan die skriba van die ring of die ring se gevolmagtigde:
    - 1.1.3.2.1 die voorgestelde naam en grense van die nuwe gemeente; of
    - 1.1.3.2.2 indien die gemeente nie geografies saamgestel word nie, die bedieningsfokus van die nuwe gemeente. Die bedieningsfokus sluit die volgende moontlike in
      - kerkplanting in snelgroeiende gebiede of gebiede waar die sosio-ekonomiese omstandighede verander,
      - kerkplanting waar bestaande gemeentes nie meer aan bedieningsbehoeftes kan voldoen nie,
      - kerkplanting waar geen gemeente funksioneer nie, en
      - kerkplanting waar bestaande gemeente(s) kwynend is, soos blyk uit 'n dramatiese daling in lidmaatgetalle en 'n ernstige daling in finansiële vermoë van gemeente(s);
    - 1.1.3.2.3 die ooreenkoms tot gemeentestigting; en
    - 1.1.3.2.4 aanverwante sake wat die aandag van die ring moet geniet.

- 1.1.4 Wanneer by die ring aansoek gedoen word om die stigting van 'n gemeente, beoordeel die ring die ingekome stukke en indien die ring oordeel dat die nuwe gemeente in staat sal wees om te bestaan, word verlof tot gemeentestigting gegee.
- 1.1.5 Die stigting van 'n nuwe gemeente geskied deur die ring of die ring se gevolmagtigde op las van die ring, tydens 'n vergadering waarvan vier weke vooraf in die *Kerkbode* kennis gegee is, en waarheen die belanghebbendes uit die betrokke gemeente(s) opgeroep is. Die betrokke lidmate het deur die ondertekening van die ooreenkoms reeds die stigting van die gemeente goedgekeur en stem op hierdie vergadering nie weer oor die saak nie.
- 1.1.6 Tydens hierdie vergadering stel die ring of die ring se gevolmagtigde die grense van die gemeente so duidelik moontlik vas en gee 'n noukeurige beskrywing van die grense van reeds bestaande gemeentes wat met die grense van die nuwe gemeente saamval. Indien die ring of die ring se gevolmagtigde toestemming gee dat die nuwe gemeente nie geografies saamgestel word nie, word die bedieningsfokus van die nuwe gemeente so duidelik moontlik bepaal (vergelyk 1.1.3.2.2 hierbo).
- 1.1.7 Tydens hierdie vergadering wat onder leiding van die ring of die ring se gevolmagtigde staan, word die kerkraadslede van die nuwe gemeente met opsteek van hande verkies en wel deur die belydende lidmate wat deur hul handtekening reeds tot die stigting van die gemeente ooreengekom het.
- 1.1.8 Die bevestiging van hierdie kerkraadslede geskied sonder afkondiging van hul name deur die konsulent, of op sy versoek, deur 'n ander predikant binne die kerkverband. Indien daar teen 'n persoon wat verkies is, beswaar ingebring word, word die persoon se bevestiging uitgestel totdat die saak deur die kerkraad ondersoek is.
- 1.1.9 Die kerkraad benoem een van sy lede as die bewaarder van die boeke en dokumente van die gemeente totdat 'n skriba en/of kassier benoem is. 'n Inventaris van die boeke en dokumente moet opgestel word en 'n duplikaat aan die konsulent oorhandig word.
- 1.1.10 Die koste van die ring, of die ring se gevolmagtigde in verband met die stigting van nuwe gemeente(s), word deur die gemeente(s) gedra.
- 1.1.11 Indien die kerkraad op versoek van sy lidmate weier om voorbereidende stappe te doen of te laat doen met die oog op die stigting van 'n nuwe gemeente, het sodanige lidmate die reg om hulle na die ring te wend. 'n Afskrif van die versoekskrif met volle besonderhede moet minstens drie weke voor die vergadering van die ring by die betrokke kerkraad vir kennisname ingedien word.
- 1.2 Wanneer meer as een gemeente en/of ring by die afstigting betrokke is**
- 1.2.1 Indien dit blyk dat die beoogde nuwe gemeente uit gedeeltes van meer as een gemeente moet bestaan, terwyl die saak slegs deur lidmate van een gemeente aanhangig gemaak is, het die betrokke kerkraad die reg om die ander kerkrade regstreeks om hul medewerking te nader.
- 1.2.2 Indien die aangrensende kerkrade wat genader is, weier om voorbereidende stappe te doen of te laat doen met die oog op die stigting van 'n nuwe gemeente, het die betrokke kerkraad die reg om sy versoek aan die ring voor te lê.

- 1.2.3 Die ring het die reg om te besluit dat maatreëls in die betrokke wyke van die gemeente(s) binne die grense van daardie ring met die oog op moontlike afstigting getref word.
- 1.2.4 Waar die nuwe gemeente met lidmate uit gemeentes van meer as een ring gestig word, moet die betrokke ringe onderling besluit watter ring die stigting moet waarneem.
- 1.2.5 Wanneer die ring 'n opdrag tot stigting gee, moet die kerkraad dadelik die versoekskrif en ooreenkoms laat onderteken deur die lidmate wat deel van die nuwe gemeente wil wees.
- 1.2.6 Die kerkraad van elke gemeente wat deel van die nuwe gemeente uitmaak, moet die versoekskrif en die ooreenkoms saam met sy aanbevelings daarvoor aan die ring voorlê.

### **1.3 Die ring kan self inisiatief neem**

- 1.3.1 Waar 'n ring dit nodig ag, kan hy een of meer kerkrade opdrag gee om die stigting van 'n nuwe gemeente te ondersoek. Die ring kan ook aan sy gevolmagtigde opdrag gee om 'n kerkraad te ontmoet en tot stigting van 'n nuwe gemeente aan te spoor.
- 1.3.2 Ringe kan die stigting van 'n nuwe gemeente oor of binne bestaande gemeentegrense aanbeveel, met inagneming van kategorieë, fokusgroepe, bedieningsverskeidenheid in omliggende gemeentes en bedieningsbehoefte.
- 1.3.3 In buitengewone omstandighede kan 'n ring, wanneer geen kerkraad gevind kan word om 'n nuwe gemeente te stig nie, self poog om lidmate te vind wat oortuig is van die noodsaaklikheid van die stigting van 'n nuwe gemeente. Die ooreenkoms tot nuwe gemeentestigting word in sulke buitengewone omstandighede in die lig van 1.3 hierbo met die ring gesluit.
- 1.3.4 In buitengewone omstandighede kan die sinodale verband aan die ring opdragte gee om die stigting van 'n nuwe gemeente te ondersoek. Die sinodale verband kan in sulke omstandighede 'n kerkraad ontmoet en tot stigting van 'n nuwe gemeente aanspoor.

### **1.4 Kennisgewing van afstigting**

- 1.4.1 Die skriba van die ringskommissie oorhandig aan die kerkraad van die nuwe gemeente 'n uittreksel uit die notule van die ring of die ring se gevolmagtigde, bevattende die naam van die gemeente, beskrywing van die grense of, indien toepaslik, omskrywing van die bedieningsfokus, name van kerkradslede, *aanbevelings* genoem onder 1.1.3.2 hierbo, die naam van die konsulent en ander sake waarby die nuwe gemeente belang mag hê.
- 1.4.2 Die skriba van die ring of die ring se gevolmagtigde gee aan die skriba van die sinode se gevolmagtigde<sup>1</sup> kennis van die stigting van die nuwe gemeente met vermelding van die grenslyne of, indien toepaslik, omskrywing van die bedieningsfokus, asook die name van die eerste lede van die kerkraad met die oog op publikasie in die *Kerkbode*.

---

<sup>1</sup> Die onderskeie sinodes het verskillende benaminge (bv. moderamen, diensraad, sinodale dienskommissie) vir die liggaam wat die funksies van die sinodale kommissie verrig.

- 1.4.3 Die skriba van die sinode of die sinode se gevolmagtigde gee aan die Registrateur van Aktes kennis van die stigting van die nuwe gemeente.
- 1.4.4 Die naam van die nuwe gemeente word in die kennisgewing soos volg aangegee: *Nederduitse Gereformeerde Gemeente .....*
- 1.4.5 Indien dit by die vermeerdering van gemeentes sou blyk dat verteenwoordigers nie aangewys is vir die ondertekening van dokumente en stukke namens die nuwe gemeente vir doeleindes van uitvoering van stigting nie, moet sulke dokumente of stukke geteken word deur die voorsitter en skriba van ring of die ring se gevolmagtigde of die gevolmagtigde van die ring binne wie se grense die te stigte gemeente geleë is.

## **2. KOMBINERING VAN GEMEENTES**

Kombinasie beteken dat twee of meer gemeentes, wat selfstandig voortbestaan, kontraktueel ooreenkomste met mekaar aangaan ter wille van die effektiewe evangeliebediening.

### **2.1 Prosedure vir kombinerings**

- 2.1.1 Die kerkraad stel ondersoek in na die moontlikheid van kombinasie as die kerkraad self oordeel dat dit nodig is, of ook op versoek van 'n groep lidmate.
- 2.1.2 In alle gevalle van kombinasie word 'n geskrewe ooreenkoms opgestel en aan die betrokke kerkrade vir goedkeuring voorgelê. Indien van toepassing, moet 2.4 van die *Reglement vir die Bestuur van Diensverhoudinge vir Predikante by Ongeskiktheid en Onvermoë* in ag geneem word. Ten minste twee derdes van die kerkraadslede van elke betrokke kerkraad moet die ooreenkoms goedkeur.
- 2.1.3 Nadat die kerkrade die kombinasie-ooreenkoms goedgekeur het, word die ooreenkoms op twee agtereenvolgende Sondae tydens die erediens aan elkeen van die betrokke gemeentes vir approbasie bekend gemaak, met vermelding dat besware daarteen binne sewe dae na die laaste bekendmaking skriftelik by die skriba van die kerkraad ingedien moet word.
- 2.1.4 Nadat die gemeente approbasie verleen het, word die kombinasie-ooreenkoms aan die betrokke ring of die ring se gevolmagtigde vir goedkeuring en bekragtiging voorgelê. Nadat die ring die ooreenkoms bekragtig het, word dié ooreenkoms van krag of op 'n datum wat in die ooreenkoms bepaal word.
- 2.1.5 Die koste van die ring(e) of die ring(e) se gevolmagtigde(s) met betrekking tot die kombinasie van gemeentes, word deur die gemeente(s) gedra.
- 2.1.6 Indien die kerkraad weier om op versoek van 'n groep lidmate die moontlikheid van kombinasie te ondersoek, het die lidmate die reg om hulle met hulle versoek tot die ring te wend. 'n Afskrif van die versoekskrif moet minstens drie weke voor die vergadering van die ring by die betrokke kerkraad vir kennisname deur die skriba van die ring of die ring se gevolmagtigde ingedien word.
- 2.1.7 Wanneer meer as een ring by kombinasie betrokke is, moet vooraf, na ooreenkoms deur die ringe, by die sinode aansoek gedoen word vir hergroepering van die betrokke gemeentes wat wil kombineer.
- 2.1.8 Die ring kan self die inisiatief neem en waar hy dit nodig ag, aan twee of meer kerkrade opdrag gee om kombinasie te ondersoek. Die ring kan ook aan sy

gevolmagtigde opdrag gee om die betrokke kerkrade te ontmoet en tot kombinasie aan te spoor.

- 2.1.9 Die kombinasie-ooreenkoms kan in beraad met die ringe en approbasie van die gemeentes na wedersydse kennisgewing en ooreenkoms gewysig of beëindig word as al die betrokke kerkrade in hulle aparte vergaderings hulle goedkeuring daaraan heg.
- 2.1.10 Wanneer die gemeentes wat wil kombineer, nie vakant is nie, kan daar nie tot kombinasie oorgegaan word voordat die betrokke predikant(e) en die ring of die ring se gevolmagtigde tevrede is dat daar billike voorsiening vir die betrokke predikant(e) gemaak is nie.
- 2.1.11 Die beroeping en demittering van 'n predikant vir kombinasie-gemeentes geskied op 'n gesamentlike vergadering van die betrokke kerkrade, onder voorsitterskap van die konsulent van die gemeente waar die vergadering plaasvind. Vir die gemeentes in die kombinasie word 'n konsulent benoem. Die naam van die beroepene word op twee agtereenvolgende Sondae tydens die erediens vir approbasie aan elke gemeente van die kombinasie bekend gemaak.
- 2.1.12 'n Predikant moet in een van die kombinasie-gemeentes bevestig word.
- 2.1.13 'n Predikant in kombinasie-gemeentes word deur die gemeente wat die persoon beroep en bevestig het, afgevaardig na meerdere vergaderings. Die predikant het egter as afgevaardigde net een stem. Elke kombinasie-gemeente verkies en vaardig volgens voorskrif van die *Kerkorde* ook 'n ouderling/diaken af.
- 2.1.14 Die kombinasie-gemeentes is verplig om gesamentlik 'n aandeel in die pensioenfonds vir die predikant te hou. Alle ander koste met betrekking tot die predikant moet in die ooreenkoms van kombinasie gereël word.
- 2.1.15 Die ooreenkoms met die predikant kan, na wedersydse kennisgewing, gewysig of beëindig word, indien al die betrokke kerkrade, in hul aparte vergaderinge, hul goedkeuring daaraan heg.
- 2.1.16 Indien dit by die kombinerings van gemeentes sou blyk dat verteenwoordigers nie aangewys is vir die ondertekening van dokumente en stukke namens die gemeentes vir doeleindes van uitvoering van ooreenkomste nie, moet sulke dokumente of stukke geteken word deur die voorsitter, en skriba van die ring, of die ring se gevolmagtigde, of die gevolmagtigde van die ring in wie se gebied die kombinerende gemeentes geleë is.

### **3. EENWORDING VAN GEMEENTES**

Eenwording beteken dat 'n gemeente wat nie langer selfstandig wil of kan voortbestaan nie, ontbind en dat die betrokke lidmate by ander bestaande gemeente ingelyf word.

#### **3.1 Prosedure vir eenwording**

- 3.1.1 Die kerkraad van die gemeente wat wil ontbind, moet 'n besluit tot ontbinding neem en die kerkraad van die gemeente waarby die betrokke lidmate ingelyf word, moet toestemming tot inlywing gee. Ten minste twee derdes van die

- dienende kerkraadslede van elke betrokke kerkraad moet ten gunste van eenwording besluit.
- 3.1.2 Die betrokke kerkrade moet oor die voorwaardes vir ontbinding en inlywing ooreenkom. Indien van toepassing moet 2.4 van die *Reglement vir die Bestuur van Diensverhoudinge vir Predikante by Ongeskiktheid en Onvermoë* in ag geneem word.
  - 3.1.3 Die ooreenkoms waartoe die kerkrade gekom het, moet vir approbasie op twee agtereenvolgende Sondae by al die openbare eredienste van die betrokke gemeentes bekend gemaak word, met vermelding dat besware daarteen binne sewe dae na die laaste bekendmaking skriftelik by die skriba van die kerkraad ingedien moet word.
  - 3.1.4 Nadat die approbasie van die ongesensureerde belydende lidmate op dié wyse verkry is, word die ooreenkoms aan die betrokke ring(e) vir goedkeuring voorgelê. Nadat hierdie goedkeuring verkry is of op 'n datum wat in die ooreenkoms bepaal word, word die ooreenkoms van krag.
  - 3.1.5 Aangesien hiermee 'n verandering van gemeentegrense geïmpliseer word, moet die ooreenkoms 'n duidelike omskrywing van grenslyne bevat.
  - 3.1.6 Die betrokke ringskriba gee aan die skriba van die sinode of die sinode se gevolmagtigde kennis van die ontbinding van die gemeente, asook van die nuwe grenslyne van die inlywende gemeente(s). Die skriba van die sinode of die sinode se gevolmagtigde sorg vir die publikasie van bostaande feite in die *Kerkbode*.
  - 3.1.7 'n Afskrif van die ooreenkoms tussen die gemeentes word aan die skriba van die sinode, of die sinode se gevolmagtigde op papier, soos deur die argief voorgeskryf, en in tweevoud gestuur.
  - 3.1.8 Die kerkraad van die gemeente wat ontbind, gee aan die Registrateur van Aktes kennis van die ontbinding en van die oordrag van sy eiendomme.
  - 3.1.9 Die dienende kerkraadslede van die gemeente wat ontbind, dien ook, indien dit so ooreengekom word, in die inlywende gemeente.
  - 3.1.10 Die onroerende eiendomme van die ontbonde gemeente word, tensy anders ooreengekom, op die naam van die inlywende gemeente geregistreer en alle roerende goed van die ontbonde gemeente, met die regte en verpligtinge daaraan verbonde, gaan op die inlywende gemeente oor.
  - 3.1.11 Die eenwording van gemeentes kan alleen plaasvind wanneer die gemeente wat ontbind, vakant is of indien nie, as daar vir die predikant(e), na die oordeel van die ring, billike voorsiening gemaak is.
  - 3.1.12 Indien dit by die eenwording van gemeentes sou blyk dat verteenwoordigers namens 'n gemeente wat ontbind het nie aangewys is vir die ondertekening van dokumente en stukke vir doeleindes van uitvoering van ooreenkomste nie, moet sulke dokumente of stukke geteken word deur die voorsitter en skriba van die ring of die ring se gevolmagtigde, of die gevolmagtigde van die ring, binne wie se grense die ontbinde gemeente geleë was.

#### **4. SAMESMELTING VAN GEMEENTES**

Samesmelting beteken dat twee of meer gemeentes, wat nie langer selfstandig wil of kan voortbestaan nie, afsonderlik ontbind om saam een totaal nuwe gemeente te stig binne dieselfde geografiese gebied as waarbinne die onderskeie samestellende gemeentes aanvanklik voor ontbinding bestaan het.

##### **4.1 Prosedure**

4.1.1 Die kerkrade van die onderskeie samesmeltende gemeentes neem afsonderlik 'n besluit tot samesmelting.

4.1.2 Aan alle ongesensureerde belydende lidmate van die onderskeie samesmeltende gemeentes word aan die hand van 'n vraelys-stembrief geleentheid gebied om skriftelik aan te dui of hulle ten gunste van die samesmelting, is al dan nie.

4.1.2.1 Die genoemde vraelys-stembrief word persoonlik en sonder enige stemwerwing deur die onderskeie kerkrade van die samesmeltende gemeentes aan elke ongesensureerde belydende lidmaat binne die bepaalde gemeente beskikbaar gestel.

4.1.2.2 Dit is elke lidmaat se eie verantwoordelikheid om toe te sien dat die persoon se voltooidde vraelys-stembrief die kerkkantoor van die gemeente bereik vóór of óp die sperdatum wat deur die kerkraad bepaal is.

4.1.2.3 Goedkeuring moet van 'n meerderheid van die lidmate wat vraelys-stembriewe ingehandig het, verkry word, alvorens met die proses van samesmelting voortgegaan kan word.

4.1.3 Nadat die goedkeuring van die lidmate volgens die prosedure onder 4.1.2. hierbo verkry is, kom die kerkrade afsonderlik én gesamentlik ooreen tot 'n samesmeltingsooreenkoms bevattende onder andere 'n duidelike grensbeskrywing van die nuwe gemeente, die posisie van die predikant(e) en kerkraadslede in die nuwe saamgestelde gemeente en reëlins in verband met die hantering van die onderskeie gemeentes se bates (roerend en onroerend). Elke kerkraad benoem twee persone om namens die samesmeltende gemeente alle nodige dokumentasie te onderteken.

4.1.4 Die samesmeltingsooreenkoms word vir approbasie op twee agtereenvolgende Sondae by al die openbare eredienste van die betrokke gemeentes bekend gemaak, met vermelding dat besware daarteen binne sewe dae na die laaste bekendmaking skriftelik by die skriba van die kerkraad ingedien moet word.

4.1.4.1 Lidmate wat wil beswaar maak, moet dit skriftelik met gemotiveerde opgaaf van rede(s) doen vóór die verstryking van die week eindigend na die tweede afkondiging.

4.1.4.2 Besware word aan die ring of die ring se gevolmagtigde voorgelê vir oorweging van die geldigheid daarvan.

4.1.5 Nadat approbasie verkry is, word die ooreenkoms aan die ring voorgelê vir goedkeuring.

4.1.5.1 Die skriba van die ring of die ring se gevolmagtigde gee kennis aan die skriba van die betrokke sinode of die sinode se gevolmagtigde.

4.1.5.2 Die kerkraad van die nuwe gemeente gee kennis aan die Registrateur van Aktes van die oordrag van eiendomme.

## **5. KOMBINASIE VAN WERKSAAMHEDE VAN GEMEENTES, RINGE EN SINODES/GEMAGTIGDES VAN SINODES UIT VERSKILLENDE KERKVERBANDE**

Kombinasie beteken hier dat twee of meer kerkvergaderinge van verskillende kerkverbande, of gevolmagtigdes van kerkvergaderinge, as deel van die soeke na kerklike eenheid in die NG Kerkfamilie, ten bate van die koninkryk van God en as gelyke deelgenote van mekaar, kontraktuele ooreenkomste aangaan vir die uitvoering van sekere gemeenskaplike werksaamhede.

### **5.1 Praktiese en kerkregtelike riglyne**

5.1.1 Die aspekte of saak ten opsigte waarvan die partye 'n kombinasie beoog, moet duidelik omskryf word.

5.1.2 'n Skriftelike ooreenkoms word opgestel wat alle regte, pligte en verantwoordelikhede (insluitende finansies) van die partye duidelik omskryf.

5.1.3 *Reglement 24 vir Kerklike Goedere* moet by die opstel van die ooreenkoms in aanmerking geneem word.

5.1.4 Waar die standplaas of ander pos van 'n predikant kragtens die beoogde kontrak in gedrang kan kom, moet Artikel 12 van die *Kerkorde* in ag geneem word.

5.1.5 Indien dit die bedoeling is dat die gekombineerde liggaam die reg sal hê om sake te hanteer soos die beroep en indiensstelling van 'n predikant, moet aspekte soos konstituering, kworumvereistes, wyse van besluitneming, stemreg, befondsing, verantwoordelikheid vir die standplaas of aanstelling, pensioen, medies, administrasie, ensovoorts noukeurig uitgeklaar word.

5.1.6 Die ooreenkoms moet dit duidelik stel dat die daarstelling van die gemeenskaplike doelwitte kragtens die kontraktuele ooreenkoms, nie die regte en verantwoordelikhede van die kontrakterende kerkvergaderinge of hulle gevolmagtigdes kan ophef of tot niet verklaar nie.

5.1.7 Die ooreenkoms kan voor die verstryking van die vasgestelde termyn gewysig of beëindig word, indien die betrokke partye, na wedersydse kennisgewing, in hulle afsonderlike vergaderinge hulle goedkeuring daaraan heg.

5.1.8 Die kontrakterende party val steeds onder die regering, opsig en tug van die verantwoordelike kerkvergadering.

### **5.2 Werkswyse**

5.2.1 Die betrokke kerkvergaderinge as regspersone moet die skriftelike ooreenkoms afsonderlik in die onderskeie kerkvergaderinge goedkeur.

5.2.2 Nadat die kerkvergaderinge of hulle gevolmagtigdes onderling tot 'n ooreenkoms gekom het, neem die ring van die betrokke gemeente verantwoordelikheid vir die opsig en tug van die predikant.

5.2.3 Die betrokke kerklike liggame in wie se diens die predikant is, neem self verantwoordelikheid vir die bestuur van die diensverhouding (vergelyk Reglement 21).

## AFDELING F: RIGLYNE WAT KERKORDE ARTIKELS EN REGLEMENTE AANVUL EN TOELIG

### 1. **BEGINSELS, BESLUIE, RIGLYNE EN HANDLEIDINGS**

- 1.1 As gereformeerdes aanvaar ons die Skrif as hoogste *norm*.
- 1.2 Uit die Skrif lei ons sekere beginsels af.
- 1.3 Wanneer 'n *beginsel(s)* en die daaruit voortvloeiende *standpunt* tot 'n geheel saamgevoeg word om 'n program/gedragslyn vir optrede in die kerklike lewe aan te dui, kan van 'n *beleid* gepraat word.
- 1.4 Daar kan tussen twee soorte besluite deur kerkvergaderings onderskei word, naamlik:
  - (1) besluite wat bindend/voorskriftelik van aard is; en
  - (2) besluite wat aanwysend/rigtinggewend van aard is.
- 1.4.1 **Voorskriftelike besluite (waaronder *Kerkorde*, *bepalings* en *reglemente*)**
  - 1.4.1.1 Voorskriftelike besluite kom dikwels voor in die vorm van *Kerkorde*-artikels, bepalinge by die *Kerkorde* en reglemente, maar besluite wat nie spesifiek aandui dat dit 'n "reglement" is nie, is nie daarom nie-voorskriftelik of van enige mindere gesag nie. 'n Spaarsamige gebruik van bewoordings soos "die sinode keur die volgende as reglement/riglyn/beleid goed" ten gunste van "die sinode besluit" sal help om groter duidelikheid te bring en sal voorkom dat "gewone" besluite gesien word as "mindere" besluite.
  - 1.4.1.2 Alle besluite is bindend, tensy die woordgebruik of algemene samehang die teendeel aandui.
- 1.4.2 **Rigtinggewende besluite (waaronder *riglyne* en *handleidings*)**
  - 1.4.2.1 Riglyne vir die uitvoering van 'n kerklike beleid word deur rigtinggewende besluite gegee. (Vergelyk DCG Fourie: *Die Gesag van kerkvergadering* in Die Kerkbode 24 Desember 1980, p 805).
  - 1.4.2.2 'n *Riglyn* dui die weg aan waarlangs/wyse waarop 'n saak/beleid prakties toegepas of uitgevoer kan word. *Daar is ruimte vir diskresie om aanpassings te maak*, mits daar nie afgewyk word van die beginsels waarvan uitgegaan word of die beleid wat vasgelê is nie.
  - 1.4.2.3 'n *Handleiding* is die uiteensetting van 'n reeks riglyne, reëls of prosedurestappe wat gevolg moet word by die hantering van 'n sekere soort saak. Waar 'n handleiding egter nie elke stap wat gevolg moet word voorskryf nie, kan daar ruimte vir aanwending van diskresie wees mits die doelwit wat gestel word bevredigend bereik word en geeneen van die neergelegde reëls oortree word nie. (Handelinge 1994, p 457, pt 2)

## **2. RIGLYNE VIR BEROEPSBRIEF [Vergelyk die *Kerkorde*, Artikel 7 (nou Artikel 8)]**

- 2.1.1 Identifikasie van die partye.
- 2.1.2 Aanhef.
- 2.1.3 Diensoms krywing: Algemene diensverpligtinge (Artikel 9) met gepaardgaande spesifieke verwagtinge.
- 2.1.4 Vergoeding en byvoordele (Artikel 13).
- 2.1.5 Die wedersydse erkenning deur die partye dat hulle geskrewe ooreenkoms onderhewig is aan die bepalinge van die *Kerkorde* en die besluite van die Algemene Sinode en die betrokke sinode soos van tyd tot tyd gewysig.
- 2.1.6 Aanvangsdatum (a) in die geval van leraars in diens van gemeentes of in diens van die kerkverband, die datum van demissie. (b) in ander gevalle waar 'n beroep aanvaar is, is die aanvangsdatum die datum van bevestiging of 'n datum soos ooreengekom.
- 2.1.7 'n Verklaring deur die beroepene dat daar geen hangende of dreigende tughandeling teen hom/haar is nie en dat hy/sy aan die plegtige legitimasi-verklaring getrou sal bly.
- 2.1.8 Die partye se handtekening met getuies en datum van ondertekening as aanvaarding dat 'n diensooreenkoms tussen die partye tot stand kom.

## **3. RIGLYNE VIR BEDIENING IN BUITENGEWONE OMSTANDIGHEDE**

- 3.1 Die *status quo* word gehandhaaf naamlik dat daar net drie soorte poste vir bedienaars van die Woord is, te wete voltyds-onbepaalde voltyds-permanente? pos, tentmakerpos (deelyds onbepaald) en vastetermynpos (voltyds of deelyds).
- 3.2 Waar in buitengewone omstandighede 'n bedieningsbehoefte ontstaan wat nie deur punt 11.1 bevredig kan word nie, het die sinodale regs-/kerkordekommissie diskresie om op versoek van die ring aan 'n gemeente toestemming te verleen om gebruik te maak van die dienste van 'n emeritus ouer as 70 jaar.
- 3.3 Hierdie reëling geld net vir 'n jaar en moet daarna hersien word.
- 3.4 Verslag van die gemeentelike bediening moet jaarliks deur die kerkraad en konsulent aan die ring gelewer word.  
(Handeling AS 2013)

## **4. RIGLYNE VIR BEDIENAARS (OUDERLINGE EN DIAKENS MET BEVOEGDHEID)**

- 4.1 Wanneer 'n behoefte op grond van plaaslike omstandighede in 'n spesifieke bedieningsarea ontstaan, wat nie deur 'n opgeleide predikant gevul kan/hoef word nie, bepaal die ring die meriete daarvan. (Spesifieke bedieningsarea sluit in: eredienste, pastoraat, bejaardebediening, jeug en familie, kinderbediening, diakonaat, geloofsvorming, kerkplanting, aanbidding, ens.)

- 4.2 Indien die ring die behoefte goedkeur, nomineer kerkrade persone wat 'n spesifieke bedieningsgerigte roeping het en oor die gewenste gawes beskik.
- 4.3 Die ring of sy gevolmagtigde voer 'n onderhoud met die genomineerde en beveel hom aan vir die toepaslike opleidingsprogram van die Algemene Kuratorium by Hugenote Kollege.
- 4.4 Ná goedkeuring deur die ring of sy gevolmagtigde, skryf die kerkraad die genomineerde in vir opleiding en toerusting van die goedgekeurde opleidingsprogram. Die kerkraad/ring behoort in te staan vir die aansoeker se opleidingskoste.
- 4.5 Ná die suksesvolle voltooiing van die opleiding word die bedienaar tot die kerkraad van die plaaslike gemeente verkies.
- 4.6 Die bedienaar se take asook bedieningsgebied (wat beperk is tot die ringsgebied) word duidelik omskryf.
- 4.7 Die ring of sy gevolmagtigde wys 'n predikant uit sy geledere aan om deurlopend aan sodanige bedienaar begeleiding te gee. Die begeleier doen jaarliks skriftelik verslag aan die ring ten opsigte van die geskiktheid van die bedienaar.
- 4.8 Die bedienaar word aangewend soos en waar die bedieningsnood deur die ring of die gemeente geïdentifiseer is.
- 4.9 Die bedienaar staan onder die opsig van die ring.
- 4.10 Bedienaarsposte is nie gesalarieerde poste nie. Slegs onkoste kan vergoed word of honoraria kan gegee word.
- 4.11 'n Bedienaar behou die bedieningsbevoegdheid vir solank hy in die amp staan en op voorwaarde dat die ring dit jaarliks goedkeur.
- 4.12 Wanneer die bedienaar die gemeente/ring verlaat word die bedieningsbevoegdheid beëindig.
- 4.13 Van dienende bedienaar word verwag om voortgesette opleidingsprogramme by te woon.

## **5. RIGLYNE VIR PREDIKANT AFTREEOUDERDOM NA 65 JAAR**

'n Bedienaar van die Woord wat die ouderdom van 65 jaar bereik, mag vir hoogstens 6 maande na die bereiking van sy 65ste verjaarsdag op versoek van die betrokke kerkvergadering/kommissie in sy diens aanbly. (Vergelyk die besluit Algemene Sinode 1986, Acta p 712, en die *Reglement vir Vaste Termynposte*, punt 4)

## **6. RIGLYNE VIR DIE DOOP VAN 'n KIND OUER AS SEWE**

By die doop van 'n kind ouer as sewe jaar en voor belydenisaflegging:

- 6.1 moet die kerkraad daarvan oortuig wees dat die ouers/doopgetuies se gesindheid en meelewing tans reg is, en die kind wat gedoop moet word, moet in staat wees om, na gelang van die kind se bevatlikheid, 'n eenvoudige belydenis van instemming met die Christelike waarheid af te lê, tesame met 'n getuienis aangaande liefde tot en geloof in Jesus Christus.

- 6.2 Die eenvoudige belydenis word deur die kind slegs by die dooponderhoud afgelê.
- 6.3 Tydens die dooponderhoud word die kind voorberei op die vrae en antwoord slegs met 'n "ja". Die vrae lui soos volg:
  - 6.3.1 Glo jy dat die Bybel die Woord van God is ?
  - 6.3.2 Glo jy dat God, die Vader, die Skepper van hemel en aarde is ?
  - 6.3.3 Glo jy dat die Here Jesus Christus vir jou sondes gesterf het en dat Hy uit die dood opgestaan het, en het jy Hom lief ?
  - 6.3.4 Glo jy dat die Heilige Gees in jou woon en jou lewe nuut maak ?

## **7. RIGLYNE VIR DIE BEDIENING VAN DIE NAGMAAL BUITE DIE EREDIENS**

- 7.1 Dit is die verantwoordelikheid van die plaaslike kerkraad om toe te sien dat die nagmaal ordelik en in ooreenstemming met die Skrif geskied.
- 7.2 Die nagmaal word, behalwe by hoë uitsondering, in 'n erediens bedien.
- 7.3 Die kerkraad besluit oor die bediening van die nagmaal in sulke uitsonderlike gevalle.
- 7.4 Die volgende algemene riglyne word deur die kerkraad gehandhaaf in die bediening van die nagmaal buite die erediens:
  - 7.4.1 Die kerkraad evalueer die meriete van elke aansoek.
  - 7.4.2 Die Woord moet bedien word.
  - 7.4.3 Die ware betekenis van die nagmaal word verduidelik sodat bygeloof uitgeskakel kan word hetsy deur die formulier of andersins.
  - 7.4.4 Minstens een ampsdraer, verkieslik die wyksouderling, woon die nagmaalbediening by. Waar moontlik word gereël dat ander medegelowiges dit ook bywoon sodat die gemeenskapskarakter van die nagmaal bewaar kan bly.  
(Handelinge 1994, p 514-515, 4.2)

## **8. RIGLYNE VIR PRAKTIESE HANTERING VAN LIDMAATSKAP**

- 8.1 Persone kan binne geografiese grense van 'n bepaalde gemeente *intrek* en lidmaatskap van daardie gemeente verlang.
- 8.2 Lidmate handig self hulle attestate by die nuwe gemeente in of versoek die administratiewe amptenaar van die gemeente om dit van die vorige gemeente aan te vra.
- 8.3 Persone kan binne die geografiese grense van 'n gemeente *intrek en lidmaatskap van 'n ander gemeente verlang*.
- 8.4 Gemeentes behoort nie sonder meer sulke lidmate te verwelkom as die motivering vir hulle keuse om in te skakel verband hou met slegte verhoudings tussen die persoon(-ne) en iemand anders in die gemeente vanwaar hulle kom nie. In so 'n geval moet die kerkraad deur pastorale begeleiding die saak hanteer en in die reine bring.

- 8.5 Gemeentes behoort net lidmate van buite hulle geografiese grense te aanvaar indien dit prakties moontlik is om sulke lidmate te bedien waar hulle woon en dit vir sulke lidmate prakties moontlik is om aktiewe lidmate te wees van die geloofsgemeenskap. (’n Uiterste voorbeeld illustreer dit: Dit sal bv. onprakties en onaanvaarbaar wees as ’n lidmaat van Laingsburg sou besluit om by Roodepoort in te skakel. Die kerkraad van Roodepoort sou in die geval van so ’n versoek om erkenning as lidmaat dit alleen kon aanvaar as die kerkraad die vermoë het om die lidmaat in Laingsburg te versorg en as die lidmaat in Laingsburg die vermoë het om in te skakel by die gemeente-aktiwiteite in Roodepoort.)
- 8.6 Lidmate versoek skriftelik die gemeente waar hulle wil inskakel om as lidmate aanvaar te word en verskaf die nodige dokumentasie soos attestate en doopbewyse waar nodig. Die gemeente wat so ’n aansoek ontvang kan lidmate help met die verkryging van hierdie dokumente.
- 8.7 Kerkrade wat ’n lidmaat van buite die gemeentegrense ontvang, gee daarvan kennis aan die kerkraad van die gemeente waar die lidmaat woon.
- 8.8 Persone kan binne die geografiese grense van ’n bepaalde gemeente *intrek en verlang om lidmaat te bly van die gemeente waar hulle lidmaat was.*
- 8.9 Kerkrade wat ’n lidmaat van buite die gemeentegrense ontvang, gee daarvan kennis aan die kerkraad van die gemeente waar die lidmaat woon.
- 8.10 Persone kan vir ’n *tydperk lidmaat van ’n bepaalde gemeente wees* (hetsy omdat hulle binne die grense woon of oor grense lidmaatskap bekom het) *en besluit om lidmaat van ’n ander gemeente te word.*
- 8.11 Lidmate moet die kerkraad waar hulle lidmaat is daarvan in kennis stel met opgaaf van redes. Indien die kerkraad bevind dat die redes vir verandering van lidmaatskap nie kwaadwillig is nie, kan die attestaat na die nuwe gemeente oorgeplaas word.

(Handelinge AS 2002, p 559)

## **9. RIGLYNE VIR VERGOEDING AAN WERKGEWERS**

- 9.1 Vanweë die aard van die NG Kerk as ’n kerkverband en nie net losstaande gemeentes nie, kan van kerkrade en gemeentes verwag word om hulle leraars en ook kerkraadslede beskikbaar te stel vir diens in die kerkverband (ring, sinode en Algemene Sinode).
- 9.2 Wanneer ’n predikant ’n buitengewone deel van sy/haar dienstyd in die diens van die kerkverband bestee, kan die kerkraad en die betrokke kommissie(s) met mekaar in gesprek tree oor kompenserende vergoeding aan die kerkraad of moontlike ander reëlins – die kerkraad of die betrokke kommissie neem die inisiatief. Onderhandelinge oor kompenserende vergoeding moet vroegtydig gereël word.
- 9.3 Vergaderinge en kommissies van die kerkverband moet toesien dat die werk wat deur ’n predikant in kerkverband gedoen word nie ten koste van sy/haar gemeentewerk geskied nie. Indien dit wel gebeur, moet die kommissie(s) eers ’n

poging aanwend om die werk te verdeel alvorens daar om kompenserende vergoeding gevra word en met 'n behoorlike motivering die nodige goedkeuring verkry word.

- 9.4 Kommissies kan in oorleg met die verantwoordelike kommissie reël om 'n spesiale vergoeding aan 'n persoon te betaal vir die verrigting van besondere dienste aan 'n kommissie. Hiervoor moet voorsiening gemaak word in die begroting van die kommissie.
- 9.5 Waar nodig, behoort persone wat dienste vir 'n kommissie van die kerkvergadering lewer, deur die kerkvergadering van 'n administratiewe infrastruktuur voorsien te word, waaronder die vergoeding vir sekretariële dienste, fotokopiëerkoste, telefoon- en fakskostes.
- 9.6 Billike vergoeding vir reis- en verblyfkoste en daggelde aan persone wat in kommissies van die kerkverband dien, behoort betaal te word.  
(Handelinge AS 2002, p 570, pt 8.10.2.3).
- 9.7 Fondse: inkoop van dienste  
Die Algemene Sinode besluit om die inkoop van dienste tot uitgawes van funksionaries te beperk. Leraars wat vir bepaalde dienswerk verkies word, moet dit binne die riglyn van 10% van hulle tyd aan die kerkverband uitvoer. Taakspanne van die Algemene Sinode moet so funksioneer dat hulle hulle personeel binne hierdie riglyn aanwend.  
(Handelinge 2011, p 110, pt 23)

## **10. RIGLYNE VIR TELEFOON-/ ELEKTRONIESE VERGADERINGS EN STEMWYSES**

Die Algemene Sinode keur die volgende advies van die ATR oor telefoonvergaderings en elektroniese stemwyse of -vergaderings goed:

- 10.1 Telefoon- en elektroniese vergaderings vir die taakspanne (sluit kommissies / diensrade/diengroepe in) van die Sinode(s), ringe en kerkrade is toelaatbaar vir die hantering van spoedeisende sake onder die volgende voorwaardes:
- 10.1.1 Die vereistes vir telefoon- en elektroniese vergaderings is dieselfde as wat geld vir 'n gewone vergadering van die taakspan onder andere ten opsigte van kennisgewing, agenda, kworum en besluitneming.
- 10.1.2 Die notule van so 'n vergadering word by die volgende vergadering van die taakspan voorgelê vir goedkeuring.
- 10.2 Elektroniese stemwyse vir taakspanne van die sinodes is toelaatbaar onder die volgende voorwaardes:
- 10.2.1 Die Dagbestuur van die taakspan stel 'n verslag op in verband met die saak waaroor die taakspan besluit(e) wil neem. In die verslag word die sake waaroor en die manier waarop daar gestem moet word, duidelik aangedui.
- 10.2.2 Die verslag word elektronies aan al die lede van die taakspan versend.

10.2.3 Die elektroniese stemming se uitkoms is alleen geldig as die meerderheid van die lede hulle instemming met die voorstel wat voorgelê is vir stemming betuig het.

10.2.4 Die notule van so 'n stemming word by die volgende vergadering van die taakspan voorgelê vir goedkeuring.

(Handelinge AS 2011, p 117, pt 5.1.8)

## **11. RIGLYNE VIR DIE BESLEGTING VAN KERKLIKE GESKILLE**

11.1 Ampsdraers en lidmate poog allereers om onderlinge konflik op 'n persoonlike en pastorale wyse op te los.

11.2 'n Kerkvergadering kan, waar konflik onder sy aandag kom, persone benoem om die oplossing daarvan te begelei.

11.3 Oplossing word bereik wanneer:

11.3.1 'n alternatief as oplossing vir die probleem gevind is wat vir al die betrokkenes aanvaarbaar is, of

11.3.2 die betrokkenes ooreenkom om ruimte vir mekaar te maak om van mekaar te kan verskil en met mekaar versoen.

11.4 In die hantering van konflik geld onder meer die volgende:

11.4.1 Duidelikheid moet verkry word oor die presiese aard en omvang van die konflik.

11.4.2 Alle betrokkenes moet volle geleentheid kry om hulle siening van die saak te stel.

11.4.3 Die begeleier(s) tree altyd so op dat hy/sy nie by die konflik betrokke raak nie.

11.4.4 Alle betrokkenes behoort hulle volle samewerking te gee om 'n oplossing te bereik.

11.4.5 Die begeleiers rapporteer aan die kerkvergadering wat hulle benoem het.

11.4.6 'n Kerkvergadering kan ook 'n ander kerkvergadering vra om die hantering van die konflik oor te neem.

(Handelinge 1998, p 462, pt 2.10)

## **12. RIGLYNE VIR DIE HANTERING VAN ARGIEF- EN MUSEUMMATERIAAL**

Hierdie riglyne is op die NG Kerk se webblad beskikbaar

## **13. RIGLYNE VIR DIE HANTERING SEKSUELE MISBRUIK/ WANGEDRAG**

### **1. INLEIDING**

Vir die kerk van die Here Jesus Christus is dit belangrik dat almal moet weet, dat hulle in die gemeente van die Here Jesus Christus veilig is. Hierdie wete van veiligheid geld veral vir die wat hulleself as weerloos of in 'n kwesbare

situasie bevind. In die tyd waarin ons leef is dit ongelukkig so dat vroue dikwels, selfs in die kerklike omgewing, onveilig voel. Dit behoort vir die kerk van die Here Jesus 'n ereplig te wees om sulke mense se veiligheid te verseker en te beskerm. Daarom neem die kerk sterk standpunt in teen enige vorm van magsmisbruik, asook en teen elke vorm van seksuele misbruik in gemeentes, kerkvergaderings en kerklike strukture.

Alle lidmate, werknemers en ampsdraers van die NG Kerk moet te alle tye deur hulle optrede uitdrukking gee aan die integriteit van die kerk van Christus. Seksuele wangedrag is 'n oortreding van die beginsels van die Bybel as die Woord van God, die Belydenisskrifte en die *Kerkorde*. Onder geen omstandighede is dit vir 'n lidmaat, werknemer of ampsdraer aanvaarbaar om by enige vorm van seksuele wangedrag betrokke te wees nie.

Die etiese optrede van ampsdraers is van die uiterste belang vir die geloofwaardigheid van kerk van die Here omdat die boodskap van die evangelie van Jesus Christus op 'n besondere wyse deur die lewe van ampsdraers sigbare gestalte kry.

## **2. ALGEMEEN**

### **2.1 Begripsomskrywing**

#### **2.1.1 Seksuele misbruik/wangedrag**

Seksuele misbruik is 'n omvattende term wat in hierdie reglement gebruik word en sluit die volgende in:

**2.1.1.1 Seksuele misbruik van kinders** sluit in, maar is nie beperk tot enige kontak of interaksie tussen 'n kind en 'n volwassene wanneer die kind gebruik word vir die seksuele stimulasie van die volwassene of 'n derde persoon. Hierdie gedrag kan fisiese kontak insluit, maar is nie beperk tot dit nie. Seksuele kontak met 'n kind word altyd beskou as geforseerd, ongeag of die kind daartoe instemming verleen of nie. In die NG Kerk is seksuele misbruik van toepassing op enige iemand jonger as 18.

**2.1.1.2 Seksuele misbruik in die geval van volwassenes**, word verstaan as enige vorm van seksuele optrede waarin 'n persoon wat, ongeag ouderdom, nie oor die verstandelike vermoë beskik om in te stem tot seksuele omgang nie, of dit te weier nie. Dit geld waar die seksuele omgang of optrede gepaard gaan met mag, dreigemente, manipulerings, intimidasie, of die misbruik van posisie, amp of status.

**2.1.1.3 Seksuele teistering**, word gesien as onwelkome seksuele toenadering of versoeke vir seksuele gunste, asook enige ander verbale of fisiese optrede van 'n seksuele aard wanneer sulke optrede en die toegee daaraan of verwerping daarvan:

- 'n voorwaarde word vir iemand se indiensneming, of voortgesette diens;
- gebruik word in enige besluitneming met betrekking tot die individu se status as werknemer;
- die doel het om in te meng of 'n invloed te hê op die individu se werksprestasie deur 'n omgewing van intimidasie of vyandigheid te skep;
- wanneer 'n persoon onderwerp word aan onwelkome seksuele grappe, onwelkome of ontoepaslike aanraking, of die blootstelling aan visuele seksuele materiaal, vernederend en/of die seksuele uitbuiting van mans, vroue of kinders.

**2.1.1.4 Verkragting** of enige seksuele kontak wat geforseer of by wyse van dreigement of intimidasie, asook enige seksuele kontak met 'n persoon onder 18 (agtien).

**2.1.1.5 Aanstootlike seksuele gedrag** is suggestiewe taal of gedrag, onaanvaarbare oogkontak, onwelkome aanraking of streling wat fisiese of emosionele welwese van die persoon sou bedreig.

**2.1.1.6 Seksuele wangedrag** word verstaan as optrede wat daartoe aanleiding gee dat die vertrouensverhouding tussen 'n persoon in 'n professionele hoedanigheid (bv. predikant, maatskaplike werker) en 'n ander persoon deur seksuele optrede uitgebuit word.

**2.1.1.7 Misbruik van tegnologie** is wanneer tegnologie gebruik word om iemand seksueel te teister of te misbruik. Hierdie misbruik sluit die volgende in: selfoon boodskappe; eposse om suggestiewe boodskappe en ander materiaal aan iemand te stuur met wie die persoon in 'n professionele verhouding (bv. predikant en lidmaat/werknemer) is. Onder geen omstandighede sal die kyk van pornografiese materiaal op kerkgronde aanvaarbaar wees nie. Wanneer 'n persoon onder 18 blootgestel word aan pornografie is dit molestering van 'n minderjarige. Niemand wat gebruik maak van tegnologie op kerkgronde of enige kerklike ruimte, of wat die tegnologie binne die konteks van kerklike werksaamhede gebruik, kan aanspraak maak op privaatheid nie.

## **2.1.2 Kerklike funksionaris/ampsdraer**

'n Kerklike funksionaris of 'n ampsdraer is 'n man of 'n vrou wat deur 'n gemeente en/of vergadering van die NG Kerk in een of ander kerklike amp bevestig of aangestel is, waar hy/sy in 'n posisie van vertrou en verantwoordelikheid geplaas is.

**2.1.3 'n Lidmaat** is 'n ongedoopte, gedoopte of belydende lidmaat van die NG Kerk wat volgens die registers van die kerk een van bogenoemde lidmate is, of 'n persoon wat oor 'n geruime tyd by die gemeente betrokke is of was en daardeur gewys het dat hy/sy deel van 'n betrokke gemeente is.

#### **2.1.4 Klaer**

‘n Klaer is ‘n enige persoon wat met ‘n funksionaris/ampsdraer kontak gehad het in die uitvoering van sy/haar amp of verantwoordelikheid. In die geval van ‘n minderjarige kan so ‘n persoon se wettige voog of ouer as klaer optree. Dit geld ook enige persoon wat verontreg voel deur die optrede van 'n funksionaris/ampsdraer of enige ander lidmaat.

#### **2.1.5 Geïmpliseerde**

hierdie konteks is of was ‘n geïmpliseerde ‘n kerklike funksionaris/ampsdraer of lidmaat van die NG Kerk wat van seksuele misbruik beskuldig word in die tyd wat hy/sy 'n funksionaris/ampsdraer was.

#### **2.1.6 Tugliggaam**

‘n Tugliggaam is ‘n wat deur een van die kerkvergaderinge (kerkraad, ring of sinode) as ‘n gevolmagtigde tugliggaam aangewys is om ‘n klag van seksuele teistering of misbruik te ondersoek. ‘n Tugliggaam wat klagtes van seksuele wangedrag (misbruik of teistering) ondersoek bestaan verkieslik uit ‘n meerderheid van vroue.

#### **2.1.7 Appelligaam**

‘n Appelligaam is ‘n liggaam wat deur een van die kerkvergaderinge (gemeente, ring of sinode) van die NG Kerk, of so ‘n vergadering se gevolmagtigde liggaam (sinodale taakspan regte, regs kommissie, kerkorde kommissie, aktuaris) aangewys is om 'n appèl ten opsigte van bevindings oor klagtes van seksuele misbruik te ondersoek. ‘n Appelligaam bestaan uit ten minste drie lede waarvan die meerderheid verkieslik vroue is.

#### **2.1.8 Klag**

‘n Klag is ‘n skriftelike klag wat deur ‘n klaer ingedien word waarin ‘n bewering van seksuele misbruik teen ‘n lidmaat, funksionaris/ampsdraer van die NG Kerk gemaak word.

#### **2.1.9 Aanmeldingsliggaam (seksuele misbruik)**

Die aanmeldingsliggaam, aangewys deur die sinode of sy gevolmagtigde, is ‘n sentrale punt waarop deskundige medewerkers dien om klagtes oor seksuele misbruik te ontvang, te evalueer en te verwys vir hantering, asook inligting en advies te verskaf oor prosedure wat met die hantering hiervan verband hou. Die aanmeldingsliggaam kan wanneer nodig, ‘n klag na ‘n tugliggaam verwys. Die aanmeldingsliggaam kan ‘n vertrouenspersoon aanwys om die klaer te begelei tydens en na die hantering van die klag.

#### **2.1.10 Vertrouenspersoon**

‘n Vertrouenspersoon is iemand wat op versoek van die klaer en/of aangeklaagde sy/haar belange behartig en kan as die klaer/aangeklaagde se

verteenwoordiger of gevolmagtigde optree. Die vertrouenspersoon kan 'n lid van die aanmeldingsliggaam wees.

### **2.1.11 Kerkvergadering**

'n Kerkvergadering is 'n vergadering aan wie die ondersoekliggaam verantwoordbaar is. In die geval van 'n gemeente is dit die kerkraad of die gemeente se diensverhouding kommissie; in die geval van 'n ring is dit die ring of die ringskommissie as gevolmagtigde van die ring; in die geval van die sinode is dit die sinodale taakspan regte.

### **2.1.12 Gevolmagtigde tugliggaam.**

'n Gevolmagtigde tugliggaam is 'n tugliggaam wat deur die kerkraad, ring of sinode aangewys is om 'n bewering teen 'n werknemer, lidmaat of ampsdraer onder wie se opsig en tug (Artikel 61) die persoon val, te ondersoek en af te handel. Die besluit of bevinding van 'n tugliggaam is bindend maar daarvoor kan in appèl na 'n meerdere vergadering of 'n meerdere vergadering se gevolmagtigde (Artikel 23) gegaan word.

## **3. DOEL**

Die doel van die reglement is om prosedure tot stand te bring waar klagtes oor seksuele misbruik/wangedrag ingedien kan word en die belange van die klaer en die aangeklaagde beskerm word terwyl 'n klag hanteer word.

## **4. BEGINSELS**

- 4.1 *Beskerming van persone betrokke.*** Wanneer 'n saak van seksuele misbruik/wangedrag aangemeld word, is dit deurlopend die verantwoordelikheid van alle rolspelers en persone wat met die saak in aanraking kom om die betrokke persone te beskerm, terwyl die privaatheid van die persone beskerm word en alle inligting as hoogs vertroulik hanteer word.
- 4.2 *Handhawing van menswaardigheid.*** Alle rolspelers sal deurlopend verseker dat al die betrokke persone se menswaardigheid beskerm moet word. Dit geld vir die klaer, die persoon of persone wat van seksuele misbruik/wangedrag beskuldig word, asook die families en gemeenskappe van elkeen van die persone.
- 4.3 *Die kerk is verantwoordelik vir die opsig en tug (Artikel 62) oor werknemers, lidmate en ampsdraers.*** Hierdie opsig en tug gee aan die verskillende kerkvergaderings (Artikel 18) of hulle gevolmagtigdes, die verantwoordelikheid om enige klagte van optrede wat indruis teen die Woord van God, die Belydenis van die Kerk (Kerkorde artikel 61.1), die *Kerkorde*, of optrede wat openbare aanstoot gee (Kerkorde artikel 61.2), of optrede wat die bepaalde personeelbeleid oortree (Kerkorde artikel 61.3), op 'n verantwoordelike wyse te hanteer. Bewerings van seksuele

misbruik/wangedrag word altyd beskou as bewerings van optrede wat strydig is met die Woord van God, die Belydenis van die Kerk, die *Kerkorde*, *optrede* wat openbare aanstoot gee, menswaardigheid aantast, seksueel bedreigend van aard is en ook in terme van die diensverhouding en etiese waardes van die NG Kerk as wangedrag beskou word.

**4.4 Nie (meer) werknemers, ampsdraers of lidmate.** Persone wat nie (meer) lidmate of werknemers of ampsdraers van die NG Kerk is nie, maar van seksuele misbruik/wangedrag beskuldig word in die tyd toe so 'n persoon lidmaat en/of werknemer of ampsdraer van die NG Kerk was, het die verantwoordelikheid om steeds seker te maak dat die bewering/klagte aangehoor word, al is dit net om te verseker dat so 'n gebeurtenis nie herhaal word nie. Indien die betrokke persoon 'n gelegitimeerde was, word die uitkoms van so 'n ondersoek aan die Algemene Taakspan Predikante sake gestuur met die oog op liassering om die persoon se persoonlike lêer vir toekomstige verwysing indien die persoon aansoek sou doen om weer predikant in die NG Kerk te wees.

**4.5 Aanmeldingsliggaam vir seksuele misbruik.** Elke kerkvergadering van die NG Kerk wys ten minste drie persone aan, waarvan verkieslik die meerderheid vroue moet wees. Hierdie aangewese persone dien as aanmeldingsliggaam vir seksuele wangedrag.

#### **4.6 Kerklike tug**

Die (teologiese) betekenis van die kerklike tug is nie om die oortreder te vervolg nie, maar tot insig, berou, verskoning, versoening te lei en remediërend te rig tot beter gedrag wat soortgelyke insidente sal voorkom.

### **5. SAMESTELLING VAN DIE TUGLIGGAAM**

5.1 'n Tugliggaam wat 'n klag van seksuele misbruik teen 'n werknemer, lidmaat of ampsdraer van die NG Kerk ondersoek, tree as gevolmagtigde tugliggaam (sien 2.1.12) van 'n kerkvergadering op.

5.2 Wanneer die aanmeldingsliggaam bewus gemaak word van 'n bewering van seksuele misbruik deur of teen 'n werknemer, lidmaat of ampsdraer van die kerk word so 'n klag na die volgende vergaderings verwys:

5.2.1 in die geval van 'n werknemer van 'n gemeente wat nie 'n lidmaat van die NG Kerk is nie, na die diensverhoudingekommissie van die kerkraad wat in so 'n geval as gevolmagtigde van die kerkraad optree;

5.2.2 in die geval van 'n werknemer van die gemeente wat ook 'n lidmaat van die gemeente is, of 'n lidmaat van die gemeente, na die kerkraad wat in samewerking van die diensverhoudingekommissie 'n tugliggaam aanwys aan wat die aangeleentheid aan die hand van Reglement 22 hanteer;

- 5.2.3 in die geval van 'n werknemer of predikant in diens van die kerkverband of ampsdraer (diaken, ouderling, predikant) van 'n gemeente, na die ring onder wie se opsig die werknemer of ampsdraer staan. Die meerdere vergadering wys 'n tugliggaam aan wat die aangeleentheid aan die hand van Reglement 22 hanteer.
- 5.4 Die betrokke tugliggaam bestaan uit 'n minimum van vyf lede en moet verkieslik minstens een van elk van die volgende insluit:
- 5.4.1 'n Verteenwoordiger aangewys deur die betrokke sinode of sy gevolmagtigde as kerkregkundige;
- 5.4.2 'n maatskaplike werker
- 5.4.3 'n pastorale persoon en
- 5.4.4 ten minste een verteenwoordiger van die kerkvergadering onder wie se opsig en tug die werknemer of amptenaar staan.
- 5.5 In die samestelling van die tugliggaam word daar altyd probeer om 'n gelyke verteenwoordiging van mans en vroue te hê.

## **6. Hantering van klag.**

Die aangewese tugliggaam hanteer die klag aan die hand van Reglement 22, Reglement vir Tug en Vermaning, *Kerkorde van die Nederduitse Gereformeerde Kerk 2023*.

## **14. RIGLYNE REGLEMENT VIR DIE ONTWIKKELING VAN NUWE GELOOFS-GEMEENSAPPE EN (KERN)GEMEENTES**

### **1. UITGANGSPUNTE**

- 1.1. Hierdie reglement is gerig op die vorming van nuwe geloofsgemeenskappe en gemeentes, insluitend die vorming van nuwe gemeentes wat nie deel van die NG Kerk word nie.
- 1.2. Die bepalings in die reglement beskryf nie 'n voorgeskrewe model van hoe gemeentevorming moet geskied nie. Behalwe dat dit gemeentes wil help met doelbewuste gemeentevorming, hou dit ook rekening met die feit dat sommige geloofsgemeenskappe spontaan gevorm word uit ander bedieninge van die kerk, soos byvoorbeeld noodleniging. Dit erken dat die vorming van nuwe geloofsgemeenskappe kontekstueel beïnvloed word en dat sterk konfessionele oortuigings van almal betrokke soms groot wysheid en verdraagsaamheid vereis. Die reglement vestig eerder die aandag op belangrike kerkregtelike sake wat in die prosesse en vorme van gemeentevorming moet aandag kry.
- 1.3. Daar word onderskei tussen die missionale bedieninge van gemeentes, ringe en sinodes waar alle kerkordelike bepalings nie volledig geld nie en die interne funksionering van gevestigde NG Kerk-gemeentes ringe en sinodes waar alle kerkordelike bepalings geld t.o.v. sake soos bv. besluitnemingsproesse, leierskap, kerkvergaderings, finansies.

- 1.4. Nuwe geloofsgemeenskappe en kerngemeentes:
  - 1.4.1. kan gestig of ontwikkel word om volledig deel van die NG Kerk te wees.
  - 1.4.2. kan gestig of ontwikkel word om as 'n langtermynbediening van 'n gemeente of ring te funksioneer
  - 1.4.3. kan gestig word of ontwikkel as gemeentes wat nie deel van die NG Kerk sal wees nie.
  - 1.4.4. kan gestig of ontwikkel word om in noue verband met die NG Kerk selfstandig te funksioneer en daarom nie deel het aan al die voorregte en verpligtinge van die NG Kerk nie. Voorbeelde NG Kerk Vennootskapgemeentes en Vars Uitdrukkinge van kerkwees (Fresh Expressions).

*Die ideaal is dat kerngemeentes ook kerkregtelike volwasse selfstandige gemeentes word (regspersoon binne of buite denominasionale verband).*

## 2. **BEGRIPSVERKLARING**

Die volgende begrippe word omskryf om kommunikasie te bevorder. Dit beskryf nie 'n verpligte proses wat gevolg moet word nie.

### 2.1. Nuwe geloofsgemeenskap

'n Nuwe geloofsgemeenskap is 'n groepering van hoofsaaklik nuwe gelowiges wat hulle vrywillig onder die gesag van die Woord en Gees aan mekaar gebonde voel om as 'n eenheid te funksioneer. 'n Nuwe geloofsgemeenskap is gewoonlik die vrug van intensionele prosesse waar die evangelie geleef en gedeel word met nie-Christene en mense wat nie meer kerklik betrokke is nie. Belangstellende ongelowiges skakel ook soms by hierdie geloofsgemeenskap in. Samebindende faktore is o.a. die volgende: 'n spontane soeke of begeerte van mense om in 'n verhouding met Jesus te leef; om God beter te leer ken; om 'n dissipel van Jesus te wees; om onderlinge gemeenskap en hulpverlening te beleef; om diens aan die gemeenskap te lewer en om die koninkryk te soek. Sulke geloofsgemeenskappe kan binne die grense van 'n gemeente ontstaan of waar lidmate binne hulle werk-, sport- of ontspanningskonteks nuwe geloofsgemeenskappe buite gemeentegrense vorm.

Die potensiaal van nuwe geloofsgemeenskappe om tot nuwe (kern)gemeentes te ontwikkel moet ontgin word, hoewel dit nie altyd moontlik of wenslik is dat sulke geloofsgemeenskappe tot gemeentes ontwikkel nie.

Die hergroepering van gelowiges in 'n bestaande gemeente vir bedieningsdoeleindes, bv. jeugdienste, dienste vir bejaardes ens. word nie as nuwe geloofsgemeenskappe beskou nie.

### 2.2. Kerngemeentes

'n Nuwe geloofsgemeenskap word as 'n kerngemeente (kerk) beskou wanneer die geloofsgemeenskap oor 'n tydperk van ten minste ses maande die volgende eienskappe van kerkwees vertoon:

Die geloofsgemeenskap:

- bestaan uit mense wat in Jesus Christus glo,
- aanbid die Drie-enige God op 'n deurlopende wyse;
- bevorder onderlinge gemeenskap en eenheid tussen alle lede;
- bou mekaar as medegelowiges op in die geloof
- skep ruimte waar al die lede se gawes en bedieninge tot hulle reg kom;
- ontwikkel goeie verhoudings en samewerking met ander gemeentes;
- is betrokke by die werk van God in die gemeenskap en wêreld;
- word gelei deur 'n bekwame leierspan wat die geloofsgemeenskap toerus om konkrete gestalte te gee aan die bovermelde aspekte van kerkwees.
- het beleid en praktyke in plek om toenemend finansiële selfstandig te funksioneer.

2.3. 'n NG Kerk vennootskap gemeente

'n NG Kerk vennootskap gemeente is 'n gemeente wat aan bepaalde kriteria voldoen en amptelik in n vennootskap met 'n NG Kerk gemeente (s) funksioneer.

2.4. 'n Vars uitdrukking van kerkwees (Fresh Expression)

Vars uitdrukkings van kerkwees is nuwe kontekstuele vorme van kerkwees wat gestalte kry deur kultuursensitiewe interaksie en bedieninge wat primêr fokus op nie-gelowiges en kerklos mense wat nie by bestaande kerke inskakel nie.

### 3. **DIE ONTSTAAN VAN NUWE GELOOFSGEMEENSKAPPE EN KERNGEMEENTES**

3.1. Nuwe geloofsgemeenskappe ontstaan hoofsaaklik:

3.1.1. deur spontane dissipelmaking van lidmate in hulle woon-, werk-, sport- of ontspanningskontekste;

3.1.2. as gevolg van intensionele aksies en prosesse van lidmate, gemeentes, ringe of sinodes (bv. dienslewering, evangelisasie, dissipelskap of die versameling en organisering van gelowiges wat nie by gemeentes/kerke inskakel nie).

3.1.3. as vrug van missionale diakonaat in gemeentes en gemeenskappe.

3.2. Kerngemeentes kom hoofsaaklik op twee maniere tot stand:

3.2.1. Na 'n proses van interne voorbereiding en toerusting van 'n leierspan en kerngroep, word 'n kerngemeente op 'n bepaalde dag publiek gestig en verder gegroei.

3.2.2. 'n Kerngemeente kan ook die produk wees van die organiese groei van 'n klein geloofsgemeenskap tot 'n geloofsgemeenskap wat die eienskappe van 'n kerngemeente het en daarom as sodanig deur die gemeente/ringe erken word.

3.3. Die plaaslike ring(e) en ander tersaaklike gemeentes van die NG Kerk word vooraf in kennis gestel van die ter stigte kerngemeente.

#### **4. DIE ROL VAN GEMEENTES IN DIE ONTWIKKELING VAN NUWE GELOOFSGEMEENSAPPE EN KERNGEMEENTES**

- 4.1. Gemeentes is geroep om die ontwikkeling van nuwe geloofsgemeenskappe en kerngemeentes aan te moedig en te bevorder. Die ontwikkeling van nuwe kerngemeentes kan veral in die volgende omstandighede voorkom:
  - 4.1.1. In nuwe of snelgroeiende gebiede waar tersaaklike bedienings deur bestaande gemeentes van die NG Kerk nie voldoende is nie.
  - 4.1.2. In gebiede waar die sosio-ekonomiese omstandighede verander het.
  - 4.1.3. Waar bestaande gemeentes nie meer aan bedieningsbehoefte kan voldoen nie.
  - 4.1.4. In gebiede waar geen gemeente in praktyk funksioneer nie.
  - 4.1.5. In gebiede waar gemeente(s) kwynend is
  - 4.1.6. In gemeenskappe waar ongelowiges en kerkvervreemdes nie deur tradisionele bediening van gemeentes bereik word nie.
  - 4.1.7. In kulturele of nie-Christelike godsdienstige gemeenskappe waar daar nie gemeentes bestaan nie.
- 4.2. Kerkrade bemagtig lidmate om grense oor te steek ten einde die evangelie aan mense te verkondig en nuwe geloofsgemeenskappe te vorm. Hulle ondersteun lidmate met toerusting, vorming, hulpbronne en inskakeling by netwerke.
- 4.3. Gemeentes streef na samewerking met ander gemeentes en kerke in die ontwikkeling van nuwe geloofsgemeenskappe en kerngemeentes
- 4.4. Kerkrade het die verantwoordelikheid om nuwe geloofsgemeenskappe en kerngemeentes te ondersteun met onder andere leierskap, hulpbronne en vaardighede.
- 4.5. Met inagneming van die konteks word gepoog om optimale gestalte te gee aan die belydenisgrondslag en kerkordelike bepalings van die NG Kerk.
- 4.6. Na gelang van die groei van die nuwe geloofsgemeenskap fasiliteer die kerkraad 'n proses om te verseker dat die geloofsgemeenskap duidelike besluite en aksies neem oor die toekomstige aard van die geloofsgemeenskap. Dit kan byvoorbeeld wees:
  - 4.6.1. 'n kerngemeente as langtermynbediening van 'n bestaande gemeente;
  - 4.6.2. 'n Nuwe gemeente in die NG Kerk,
  - 4.6.3. 'n Gemeente in vennootskap met 'n NG Kerk-gemeente;
  - 4.6.4. 'n Gemeente van 'n ander denominasie;
  - 4.6.5. 'n Voortgesette bediening van die kerkraad of ring.

#### **5. DIE ROL VAN RINGE EN SINODES IN DIE ONTWIKKELING VAN NUWE GELOOFSGEMEENSAPPE EN KERNGEMEENTES**

- 5.1. Ringe in samewerking met sinodes moedig gemeentes aan om nuwe geloofsgemeenskappe en kerngemeentes in die gemeenskap te ontwikkel. Ringe kan ook opdrag aan een of meer kerkrade gee om die vorming van nuwe kerngemeentes in 'n geografiese gebied of met 'n spesifieke fokus in die gemeenskap te ondersoek.

- 5.2. Ringe neem leiding om gemeentes bloot te stel aan netwerke en kundiges wat toerusting bied in die ontwikkeling van nuwe geloofsgemeenskappe en kerngemeentes.
- 5.3. Ringe fasiliteer verhoudings en samewerking tussen gemeentes en ringe wanneer 'n gemeente 'n nuwe geloofsgemeenskap of kerngemeente binne die grense van 'n ander gemeente en ring wil vestig.
- 5.4. Ringe gee leiding om kerkordelike leemtes en uitdagings so te hanteer dat die Koninkryk van God steeds binne die konteks gedien word.
- 5.5. Ringe gee leiding aan gemeentes om kerngemeentes te begelei om volwaardige NG Kerk gemeentes te word wat aan al die kerkordelike bepalings voldoen.
- 5.6. In buitengewone omstandighede kan die sinodale verband 'n ring vra om die vorming van nuwe geloofsgemeenskappe te ondersoek.
- 5.7. Sinodes skep kapasiteit om ringe en gemeentes te begelei in die ontwikkeling van nuwe geloofsgemeenskappe en kerngemeentes.
- 5.8. Die Algemene Sinode skep kapasiteit vir die opleiding / toerusting vir die ontwikkeling van nuwe geloofsgemeenskappe en kerngemeentes.

## **6. LEIERSKAP IN NUWE GELOOFSGEMEENSKAPPE EN KERNGEMEENTES**

- 6.1. Die kerkraad of ring (indien dit 'n ringsinisiatief is) keur die hoofleier (pionier) van die ontwikkelende geloofsgemeenskap goed, en stel dan die ring in kennis. Die leier moet verkieslik 'n volwasse, teologies toegeruste en bekwame lidmaat van die NG Kerk wees. Indien die leier nie 'n lidmaat van die NG Kerk is nie, moet dit 'n volwasse en bekwame gelowige wees wat die belydenisgrondslag en kerklike praktyk van die NG Kerk eerbiedig.
- 6.2. Dit is verkieslik dat lidmate van die NG Kerk deel vorm van die leierspan van die kerngemeente.
- 6.3. Dit is verkieslik dat die prediking en die waarneming van die sakramente deur iemand gedoen word met bevoegdheid. Dit kan 'n predikant, 'n diensleerter of 'n ouderling/diaken wees wat preekvergunning deur die sturende gemeente se kerkraad ontvang het.

## **7. SAKRAMENTE IN NUWE GELOOFSGEMEENSKAPPE EN KERNGEMEENTES**

- 7.1. Die sakramente word onder toesig van die leierskap van kerngemeentes bedien. Die leierskap bestuur verskillende interpretasies en gebruike van die sakramente en streef na die optimale belyning met die kerkordelike bepalinge van die NG Kerk.
- 7.2. By die bediening van die sakramente word die toepaslike formuliere van die Gereformeerde tradisie gebruik.
- 7.3. Die doop
  - 7.3.1. Niemand word herdoop nie. Die viering van die doop word aangemoedig.

- 7.3.2. Doopkategese word verkieslik gedoen deur die individu of span wat iemand begelei het tot die toe-eiening van die verlossing in Jesus Christus.
- 7.3.3. Na voltooiing van die doopkategese word hy/sy verkieslik in die kerngemeente gedoop na die openbare belydenis van geloof.
- 7.3.4. Nuwe gedoopte gelowiges word aangemoedig om in te skakel by die voortgaande kategese of dissipelmaakprogramme van die kerngemeente of gevestigde (NG Kerk) gemeente.
- 7.3.5. Die doop kan deur besprinkeling of onderdompeling geskied.
- 7.3.6. Lidmate van kerngemeentes word aangemoedig om hulle babas/klein kindertjies te laat deel in die verbondsdooop aan kinders van gelowige ouers.
- 7.4. Die nagmaal
- 7.4.1. Die nagmaal word verkieslik in eredienste bedien. Indien dit tydens ander byeenkomste gedoen word, moet dit onder die toesig van leierskap wees (sien 4.3).
- 7.4.2. Kinders word toegelaat om deel te neem aan die nagmaal.
- 7.4.3. Alle gelowiges wat nie amptelik onder tug is nie, kan deelneem aan die nagmaal.

## **8. DIE STIGTING VAN NG KERK VENNOOTSKAPGEMEENTES**

- 8.1. 'n Kerngemeente moet aan die volgende vereistes voldoen om as 'n NG Kerk vennootskap gemeente te kwalifiseer:
  - 8.1.1. 'n stabiele en bekwame leierspan;
  - 8.1.2. 'n bestaande rekord van kontak en samewerking met NG Kerk gemeente(s);
  - 8.1.3. 'n missionale betrokkenheid in die gemeenskap;
  - 8.1.4. 'n formele ooreenkoms met die gevestigde gemeente of ring waarin die wedersydse verwagtinge, verpligtinge en verantwoordelikhede jeens mekaar uitgespel word.
- 8.2. Die NG Kerk-gemeente maak deel uit van die beplanning en die byeenkoms wanneer die kerngemeente amptelik 'n NG Kerk vennootskap gemeente word.
- 8.3. Die ring en sinode van die NG Kerk word in kennis gestel wanneer 'n kerngemeente amptelik 'n NG Kerk vennootskap gemeente word.

## **9. 'n KERNGEMEENTE AS LANGTERMYNBEDIENING VAN 'n GEMEENTE**

- 9.1. Wanneer lidmate van 'n kerngemeente besluit om as 'n langtermynbediening van 'n NG Kerk gemeente of 'n ring te funksioneer, word 'n skriftelike versoek tot die kerkraad of die ring gerig. Die versoekskrif sluit die volgende in:
  - 9.1.1. 'n ondersoek na die lewensvatbaarheid van die kerngemeente;
  - 9.1.2. moontlike plekke van aanbidding;
  - 9.1.3. begroting en model wat die finansiële volhoubaarheid van die gemeente uiteensit;
  - 9.1.4. voorstelle oor leierskorps vir die kerngemeente en die toerusting van leiers;
  - 9.1.5. voorstelle oor voorgenome bedieningsmodelle van die kerngemeente;

- 9.1.6. die voorgestelde naam en grense van die kerngemeente; of indien die kerngemeente nie geografies saamgestel word nie, die bedieningsfokus van die kerngemeente.
- 9.2. Indien die ring instem dat 'n kerngemeente as 'n bediening van die ring funksioneer, identifiseer die ring 'n gemeente wat die kerngemeente namens die ring en met hulp van die ring onder hulle vlerk neem.
- 9.3. Indien die kerkraad instem om die kerngemeente as 'n bediening van die gemeente te huisves, word 'n ooreenkoms deur die betrokke partye voorberei waarin die aard, voorregte en verantwoordelikhede van die kerngemeente ten opsigte van die gemeente (of ook ring) uiteengesit word. Die ooreenkoms sluit onder andere die volgende in:
  - 9.3.1. Die naam en grense van die kerngemeente; of indien die kerngemeente nie geografies saamgestel word nie, die bedieningsfokus van die kerngemeente.
  - 9.3.2. Die bedieningsmodel van die kerngemeente;
  - 9.3.3. Die leierspan van die kerngemeente en hulle verantwoordelikhede t.o.v. die kerngemeente en die gemeente of ring;
  - 9.3.4. 'n Uiteensetting van sake waaroor die leierspan van die kerngemeente volle besluitnemingsreg het, en sake waarvoor die goedkeuring van die kerkraad vereis word.
  - 9.3.5. Praktyk t.o.v. NG Kerk lidmaatskap: (Doop)kategese; belydenisaflegging; lidmaatregister en register van lede van die kerngemeente wat nie lidmate van die NG Kerk wil wees nie;
  - 9.3.6. Beleid en praktyk van die viering van die sakramente;
  - 9.3.7. Finansiële beleid en praktyk: Aard en omvang van finansiële ondersteuning deur die gemeente of ring; Finansiële bestuur en boekhouding;
  - 9.3.8. Ooreenkomste t.o.v. die gebruik van die infrastruktuur en tegniese hulpmiddels van die gemeente.
- 9.4. Die kerkraad waaronder die kerngemeente as 'n bediening sal funksioneer, reël 'n byeenkoms vir die amptelike inwerkingstelling van die gesamentlike bediening. By die byeenkoms:
  - 9.4.1. Stel die kerkraad die grense van die kerngemeente so duidelik moontlik vas en gee 'n noukeurige beskrywing van die grense van reeds bestaande gemeentes wat met die grense van die nuwe kerngemeente saamval. Indien die kerngemeente nie geografies saamgestel word nie, word die bedieningsfokus van die nuwe kerngemeente so duidelik moontlik bepaal.
  - 9.4.2. Word die inhoud van die ooreenkoms tussen die kerngemeente en die gemeente of ring verduidelik en geteken.
  - 9.4.3. Word die leierspan van die kerngemeente onder leiding van die gemeente of ring deur die lede van die kerngemeente verkies. Ten minste een ouderlinge en een diaken moet uit NG Kerk lidmate van die kerngemeente op die leierspan verkies word om die kerngemeente op die kerkraad van die gemeente met stemreg te verteenwoordig. Die leier dien ook as ouderling op die kerkraad. Indien die leier

nie 'n NG Kerk lidmaat is nie, het die leier net 'n adviserende stem op die kerkraad.

Indien geen NG Kerk ouderling of diaken deur die kerngemeente verkies word nie, wys die kerkraad uit eie geledere 'n ouderlinge en 'n diaken aan om deel te wees van die leierspan en die kerngemeente op die kerkraad te verteenwoordig.

- 9.5. Die bevestiging van hierdie kerkraadslede geskied sonder afkondiging van hulle name deur die gemeenteleraar tydens 'n erediens waar die kerngemeente en spanleiers aan die gemeente bekend gestel word. Indien daar teen 'n persoon wat verkies is, beswaar ingebring word, word die persoon se bevestiging uitgestel totdat die saak deur die kerkraad ondersoek is.

## **10. DIE STIGTING VAN 'N VOLWAARDIGE NG KERK-GEMEENTE**

- 10.1. Indien belydende lidmate van die kerngemeente oortuig is van die wenslikheid om 'n nuwe gemeente te stig, moet hulle 'n skriftelike versoek tot die kerkraad rig. Die versoekskrif moet die volgende insluit:

10.1.1. 'n ondersoek na die lewensvatbaarheid van 'n nuwe gemeente,

10.1.2. die missionale fokus van die gemeente

10.1.3. moontlike plekke van aanbidding,

10.1.4. begroting,

10.1.5. voorstelle oor leierskorps vir die gemeente en die toerusting van leiers.

- 10.2. Indien die kerkraad oordeel dat daar genoeg rede vir die stigting van 'n nuwe gemeente is, gee hy verlof dat die lidmate wat die nuwe gemeente wil vorm, mag oorgaan tot gemeentestigting. Dit beteken ook dat die betrokke lidmate 'n ooreenkoms met die kerkraad onderteken om die nuwe gemeente te stig. Die ooreenkoms om die nuwe gemeente te stig moet voorstelle bevat oor:

10.2.1. die aard van leierskap

10.2.2. die missionale bediening van die gemeente

10.2.3. finansiële volhoubaarheid

- 10.3. Wanneer die kerkraad oortuig is van die wenslikheid van die stigting van 'n nuwe gemeente en dat dit lewensvatbaar is, stuur die kerkraad die versoekskrif en die ooreenkoms saam met aanbevelings oor die volgende sake aan die skriba van die ring of die ring se gevolmagtigde

10.3.1. die voorgestelde naam en grense van die nuwe gemeente; of

10.3.2. indien die gemeente nie geografies saamgestel word nie, die bedieningsfokus van die nuwe gemeente.

10.3.3. die ooreenkoms tot gemeentestigting;

10.3.4. aanverwante sake wat die aandag van die ring moet geniet.

- 10.4. Wanneer by die ring aansoek gedoen word om die stigting van 'n gemeente, beoordeel die ring die ingekome stukke en indien die ring oordeel dat die nuwe gemeente in staat sal wees om te bestaan, word verlof tot gemeentestigting gegee.

- 10.5. Die stigting van 'n nuwe gemeente geskied deur die ring of die ring se gevolmagtigde op las van die ring, tydens 'n vergadering waarvan vier weke

vooraf in die amptelike kerklike kanale/blaaie kennis gegee is, en waarheen die volgende belanghebbendes opgeroep is:

- 10.6. Al die lede van die nuwe kerngemeente wat reeds in die NG Kerk of ander gereformeerde kerke belydenis van geloof afgelê het of wie se doop in die NG Kerk aanvaar word;
- 10.7. Lede wat gereed is om belydenis van geloof, met of sonder doop in die NG Kerk, af te lê.
- 10.8. Tydens hierdie vergadering:
  - 10.8.1. stel die ring of die ring se gevolmagtigde die grense van die gemeente so duidelik moontlik vas en gee 'n noukeurige beskrywing van die grense van reeds bestaande gemeentes wat met die grense van die nuwe gemeente saamval. Indien die ring of die ring se gevolmagtigde toestemming gee dat die nuwe gemeente nie geografies saamgestel word nie, word die bedieningsfokus van die nuwe gemeente so duidelik moontlik bepaal.
  - 10.8.2. word ten minste twee ouderlinge en twee diakens as die kerkraadslede van die nuwe gemeente verkies. Slegs persone wat die belydenis van die NG Kerk onderskryf, is verkiesbaar. Lede wat as ouderling en diaken genomineer word maar nog nie amptelik belydenis van geloof in die NG Kerk afgelê het nie, moet duidelik voor almal teenwoordig bevestig dat hulle by die eerste samekoms van die gemeente openbare belydenis van geloof sal aflê.
- 10.9. Die ring of die gevolmagtigde van die ring reël saam met die nuutverkose kerkraad 'n erediens en 'n kerkraadsvergadering na die erediens onder leiding van die konsulent, of op sy versoek, deur 'n ander predikant binne die kerkverband. Hierdie erediens vind plaas na die approbasie van die gekose kerkraadslede in die kerngemeente.
- 10.10. Indien daar teen 'n persoon wat verkies is, beswaar ingebring word, word die persoon se bevestiging uitgestel totdat die saak deur die kerkraad ondersoek is.
- 10.11. Verkose kerkraadslede wat nog nie belydende lidmate is nie, lê eers belydenis van geloof af en word ook gedoop indien hulle nog nie gedoop is nie, voordat hulle in die amp deur die konsulent bevestig word.
- 10.12. Die kerkraad benoem een van sy lede as die bewaarder van die boeke en dokumente van die gemeente totdat 'n skriba en/of kassier benoem is. 'n Inventaris van die boeke en dokumente moet opgestel word en 'n duplikaat aan die konsulent oorhandig word.
- 10.13. Indien die kerkraad op versoek van sy lidmate besluit om nie voorbereidende stappe te doen of te laat doen met die oog op die stigting van nuwe gemeente nie, het sodanige lidmate die reg om die besluit deur die ring te laat toets. 'n Afskrif van die versoek aan die ring moet minstens drie weke voor die vergadering van die ring by die betrokke kerkraad vir kennisname ingedien word.

**11. WANNEER MEER AS EEN GEMEENTE EN/OF RING BY DIE NUWE STIGTING BETROKKE IS:**

- 11.1. Indien dit blyk dat die beoogde nuwe gemeente uit gedeeltes van meer as een gemeente moet bestaan, terwyl die saak slegs deur lidmate van een gemeente aanhangig gemaak is, het die betrokke kerkraad die verantwoordelikheid om die ander kerkrade regstreeks om hul medewerking te nader.
- 11.2. Indien die aangrensende kerkrade wat genader is, weier om voorbereidende stappe te doen of te laat doen met die oog op die stigting van 'n nuwe gemeente, moet die betrokke kerkraad die ring nader vir hulp.
- 11.3. Die ring het die reg om te besluit oor maatreëls in die betrokke wyke van die gemeente(s) binne die grense van daardie ring met die oog op moontlike stigting van 'n nuwe gemeente.
- 11.4. Waar die nuwe gemeente met lidmate uit gemeentes van meer as een ring gestig word, moet die betrokke ringe onderling besluit watter ring die stigting moet waarneem.
- 11.5. Wanneer die ring 'n opdrag tot stigting van die nuwe gemeente gee, moet die kerkraad dadelik die versoekskrif en ooreenkoms laat onderteken deur die lidmate wat deel van die nuwe gemeente wil wees.
- 11.6. Die kerkraad van elke gemeente wat deel van die nuwe gemeente uitmaak, moet die versoekskrif en die ooreenkoms saam met sy aanbevelings daarvoor aan die ring voorlê.

**12. KENNISGEWING VAN DIE STIGTING VAN 'N NUWE GEMEENTE**

- 12.1. Die skriba van die ringskommissie oorhandig aan die kerkraad van die nuwe gemeente 'n uittreksel uit die notule van die ring of die ring se gevolmagtigde, bevattende die naam van die gemeente, beskrywing van die grense of, indien toepaslik, omskrywing van die bedieningsfokus, name van kerkradslede, aanbevelings, die naam van die konsulent en ander sake waarby die nuwe gemeente belang mag hê.
- 12.2. Die skriba van die ring of die ring se gevolmagtigde gee aan die skriba van die sinode se gevolmagtigde kennis van die stigting van die nuwe gemeente met vermelding van die grenslyne of, indien toepaslik, omskrywing van die bedieningsfokus, asook die name van die eerste lede van die kerkraad met die oog op publikasie in amptelike publikasies.
- 12.3. Die skriba van die sinode of die sinode se gevolmagtigde gee aan die Registrateur van Aktes kennis van die stigting van die nuwe gemeente.
- 12.4. Die naam van die nuwe gemeente word in die kennisgewing soos volg aangegee:  
Nederduitse Gereformeerde Gemeente .....
- 12.5. Indien dit by die vermeerdering van gemeentes sou blyk dat verteenwoordigers nie aangewys is vir die ondertekening van dokumente namens die nuwe gemeente vir doeleindes van uitvoering van stigting nie, moet sulke dokumente of stukke geteken word deur die voorsitter en skriba van ring of die ring se

gevolmagtigde of die gevolmagtigde van die ring binne wie se grense die gestigte gemeente geleë is.

## TUSSEN-ORDE<sup>1</sup>

### INLEIDING

Hierdie *Tussen-orde* handel hoofsaaklik met daardie gesamentlike aksies wat besondere reëlins benodig. Baie ander dinge wat tussen lidmate van ons kerke, gemeentes, ringe en sinodes kan en behoort te gebeur, word nie hier genoem nie. Gelowiges moet saam in hulle verskillende kontekste ontdek wat die Here wil hê hulle moet doen. Die bedoeling is dat in hierdie nuwe fase van ons reis saam op pad na hereniging, die deur oop is vir elke lidmaat en elke vergadering vir dit wat die Here vir hulle moontlik maak.

### AFDELING I. GEMEENTES

#### Saamgevoegde gemeentes

##### 1. Die ooreenkoms

- 1.1 Wanneer twee of meer gemeentes, wat aan ten minste twee verskillende kerke in die die NG Kerkfamilie behoort, 'n saamgevoegde gemeente wil vorm, moet elkeen van die gevolmagtigde kerkrade afsonderlik 'n besluit te dien effekte neem. Hierdie besluite sowel as die verbandhoudende bepalings word in 'n skriftelike ooreenkoms opgeneem.
- 1.2 'n Saamgevoegde gemeente kan ook 'n wyk van 'n gemeente van een van die kerke in die NG Kerkfamilie insluit. In daardie geval word die besluit waarna hierbo verwys is, geneem deur die kerkraad van die gemeente waarvan die wyk deel is. Die regte en verpligtinge – beide in hulle oorspronklike gemeente en in die saamgevoegde gemeente – van die lidmate van die genoemde gemeente, wat deel vorm van die saamgevoegde gemeente, word in die bogenoemde ooreenkoms opgeneem. Enige bepaling in hierdie *Tussen-orde* is dienooreenkomstig op hulle van toepassing. Sulke lidmate kan slegs verkiesbaar wees as ouderling of diaken in een van die gemeentes soos van toepassing in die ooreenkoms.
- 1.3 'n Besluit soos hierbo bedoel, vereis dat die approbasie van die lidmate van die gemeente, sowel as die goedkeuring van die ring of sy gevolmagtigde, verkry moet word volgens die reëlins van die betrokke kerkorde.
- 1.4 Die ooreenkoms sluit onder andere bepalings in oor:
  - eredienste,
  - die bediening van die Woord en sakramente,
  - die beroeping van leraars,

---

<sup>1</sup>Vergelyk Artikel 71 en Handeling AS 2015, Dag 5, pt 19: *Die Algemene Sinode keur die Tussen-orde goed mdo op die kerkherenigingsreis van die kerke van die NG Kerkfamilie.*

- die verkiesing van ouderlinge en diakens,
  - die funksionering van die saamgevoegde kerkraad,
  - eiendomme en finansies,
  - registrasie van lidmaatskap.
- 1.5 Die ooreenkoms word vir óf 'n beperkte óf 'n onbeperkte tydperk aangegaan. Indien die ooreenkoms vir 'n beperkte tydperk aangegaan word en nie een van die gemeentes betrokke beëindig dit by wyse van terminering nie, word dit stilswyend vir 'n soortgelyke termyn verleng.
- 1.6 Die ooreenkoms eindig by terminering. Terminering tree slegs in werking een jaar na die besluit geneem is om te termineer, tensy die meerderheid van die lede van die saamgevoegde kerkraad, sowel as die meerderheid van die kerkraadslede van elkeen van die samestellende gemeentes, afsonderlik ooreenkom op 'n korter termyn.
- 1.7 Die ooreenkoms kan na die tyd slegs verander word met die approbasie van die lidmate van die saamgevoegde gemeente.
- 1.8 In die amptelike benaming van die saamgevoegde gemeente moet die amptelike name van die samestellende gemeentes ingesluit word.
2. *Die saamgevoegde kerkraad*
- 2.1 In elke saamgevoegde gemeente is daar 'n saamgevoegde kerkraad saamgestel uit die leraars, ouderlinge en diakens – in soverre hulle lede is van die kerkraad – van die samevoegende gemeentes. Wanneer daar ten tyde van die samevoeging ander lede van 'n kerkraad dien, voltooi hulle hulle kerkordelike termyn in die saamgevoegde kerkraad.
- 2.2 In die geval van vakatures verkies die saamgevoegde kerkraad nuwe ampsdraers. Die lidmate van die saamgevoegde gemeentes sal die geleentheid kry om persone vir verkiesing te nomineer. Slegs daardie lidmate van die gemeente wat kwalifiseer in terme van die kerkorde en bepalings van die gemeente waaraan hulle oorspronklik behoort het, is verkiesbaar.
- 2.3 Die approbasie van die verkiesing en die bevestiging van die verkose ouderlinge en/of diakens vind plaas volgens die bepalings en met die gebruikmaking van die formulier van enige van die kerke betrokke.
- 2.4 Die saamgevoegde kerkraad besluit oor die dienstermyn van sy ouderlinge en diakens, en oor die moontlikheid van herverkiesing. Die maksimum dienstermyn van 'n ouderling of diaken, wat herverkiesing insluit, is vier jaar. 'n Langer termyn is slegs moontlik met die toestemming van die bevoegde ring.
- 2.5 Die ooreenkoms bevat bepalings oor die prosedure vir die beroeping van predikante. Hierdie bepalings kan nie in konflik wees met die kerkorde en bepalings van enige van die samestellende kerke nie.
- 2.6 Die beroeping, approbasie en bevestiging van 'n predikant vind plaas in ooreenstemming met die kerkorde en bepalings van die kerk waaraan die predikant behoort.
- 2.7 'n Konsulent vir 'n saamgevoegde gemeente word deur die saamgevoegde ring aangewys of, indien die gemeente nie deel is van 'n saamgevoegde ring nie, deur

een van die gevolmagtigde ringe soos tussen hierdie ringe ooreengekom. Die konsulent is verkieslik nie 'n predikant van dieselfde kerk waaraan die predikant van die saamgevoegde gemeente behoort nie.

### 3. *Verantwoordelikhede en opdragte*

- 3.1 Die lewe en werk van 'n saamgevoegde gemeente is ten volle geïntegreerd, behalwe waar dit in die ooreenkoms uitgesluit is, waar dit nie moontlik is nie of waar die saamgevoegde kerkraad anders besluit. In sulke gevalle is die spesifieke kerkordebepalings van toepassing.
- 3.2 Die saamgevoegde kerkraad handel met die gesag en verantwoordelikheid van die kerkraad van elk van die gemeentes betrokke.
- 3.3 Die ooreenkoms kan impliseer, of die saamgevoegde kerkraad kan besluit, dat sake rakende kerklike tug en dissipline en sake wat regstreeks verband hou met die regspersoon van een van die gemeentes, deur die kerkraadslede van daardie betrokke gemeente hanteer word en wat – slegs in daardie geval of soos ooreengekom deur die saamgevoegde kerkraad – optree as die kerkraad van daardie gemeente in ooreenstemming met die kerkorde en bepalings van daardie kerk.
- 3.4 Indien dit ooreengekom word dat sake rakende kerklike tug en dissipline deur die (hele) saamgevoegde kerkraad hanteer sal word, sal hierdie kerkraad hou by die prosedurele voorskrifte van die kerk aan wie die lidmaat onder tug en dissipline behoort, insluitende die voorskrifte vir appèl. Geen dissiplinêre handeling kan geneem word sonder die goedkeuring van die meerderheid van die kerkraadslede van daardie betrokke kerk nie.
- 3.5 Die saamgevoegde kerkraad vergader ten minste vier keer per jaar.
- 3.6 Een van die leraars tree op as voorsitter van die vergadering. In die geval van 'n vakature tree die konsulent/interimleeraar op as voorsitter. 'n Ouderling kan slegs met die goedkeuring van die gevolmagtigde ringe aangewys word as voorsitter van die saamgevoegde kerkraad.

### 4. *Die bediening*

- 4.1 Ten einde die Woord en/of sakramente te bedien, kan die kerkraad enige persoon uitnooi wat bevoeg is om dit in een van die kerke te doen wat deel is van die saamgevoegde gemeente, tensy anders ooreengekom. Geen persoon kan uitgenooi word wat nie bevoegdheid in enige van die kerke het nie.
- 4.2 Binne die moontlikhede wat die kerkordes en besluite van die gevolmagtigde kerke bied, besluit die kerkraad oor die liturgiese orde, liturgiese formuliere, liedboeke, Bybelvertalings en ander aspekte van aanbidding vir gebruik in die eredienste van die gemeente.
- 4.3 'n Gemeenskaplike beleid vir toelating tot die Nagmaal sal deel wees van die ooreenkoms waarop die saamgevoegde gemeente berus.
- 4.4 Sake aangaande die bediening van die predikante sal hanteer word volgens die kerkordebepalings van die kerk waaraan hy/sy behoort. Besluite in hierdie verband kan slegs geneem word met die toestemming van die meerderheid van die lede van die saamgevoegde kerkraad wat aan dieselfde kerk as die predikant

behoort. Indien 'n meerderheid nie verkry word nie, word die saak na die gevolmagtigde ring verwys vir besluitneming.

5. *Registrasie van lidmaatskap*

- 5.1 Die saamgevoegde gemeente behou die bestaande registrasie van lidmaatskap van die samestellende gemeentes. Die registrasie van lidmaatskap van die saamgevoegde gemeente sluit vir elke lidmaat 'n verwysing in na die samestellende gemeente waaraan hy/sy behoort.
- 5.2 Nuwe lidmate van die saamgevoegde gemeente kies een van die samestellende gemeentes vir registrasie as lidmaat.
- 5.3 Gedoopte kinders word as lidmate van die samestellende gemeente van hulle moeder geregistreer, tensy beide ouers anders besluit.

## **AFDELING II. RINGE**

### **Saamgevoegde ringe**

1. *Die ooreenkoms*

- 1.1 Wanneer twee of meer ringe, wat aan ten minste twee verskillende kerke in die NG Kerkfamilie behoort, 'n saamgevoegde ring wil vorm, moet elkeen van die gevolmagtigde ringe afsonderlik 'n besluit te dien effekte neem. Hierdie besluite sowel as die verbandhoudende bepalings word in 'n skriftelike ooreenkoms opgeneem.
- 1.2 Voordat 'n besluit soos hierbo bedoel, geneem word, gee die ring al die gemeentes in sy gebied die geleentheid om hulle menings skriftelik te gee. So 'n besluit vereis dat die toestemming van die (streek)sinode(s) of sy gevolmagtigde verkry word volgens die reëlins van die betrokke kerkorde.
- 1.3 Die ooreenkoms sluit onder andere bepalings in oor:
  - die funksionering van die saamgevoegde ring,
  - die spesifieke funksies van die ring,
  - eiendomme en finansies.
- 1.4 'n Saamgevoegde ring sluit al die gemeentes in wat deel is van die onderskeie afsonderlike ringe. Na konsultasie met die gevolmagtigde ringe kan die gevolmagtigde (streek)sinode(s) of sy gevolmagtigde 'n gemeente toelaat om, op versoek, deel te word van 'n ander ring.
- 1.5 Die ooreenkoms word óf vir 'n beperkte óf vir 'n onbeperkte tyd aangegaan. Indien die ooreenkoms vir 'n beperkte tyd aangegaan word en nie een van die ringe betrokke beëindig dit by wyse van terminering nie, word dit stilswyend vir 'n soortgelyke aantal jare verleng.
- 1.6 Die ooreenkoms eindig by terminering. Terminering tree slegs in werking een jaar na die besluit geneem is om te termineer, tensy die meerderheid van die lede van die saamgevoegde ring sowel as die meerderheid van sy lede van elk van die samestellende ringe afsonderlik, ooreenkom op 'n korter termyn.
- 1.7 Die ooreenkoms kan na die tyd slegs verander word met die goedkeuring van die (streek)sinode(s).

- 1.8 In die amptelike benaming van die saamgevoegde ring moet die amptelike name van die samestellende ringe ingesluit word.
2. *Verantwoordelikhede en opdragte*
- 2.1 Die verantwoordelikhede van 'n saamgevoegde ring sluit al die verantwoordelikhede en opdragte in wat 'n ring het volgens die kerkordes en bepalings van die samestellende kerke. Waar van toepassing handel die saamgevoegde ring – in die uitvoering van sy verantwoordelikhede en opdragte met betrekking tot gemeentes en ampsdraers – volgens die reëlings soos neergelê in die kerkorde en bepalings van die kerk waartoe die gemeente of ampsdraer behoort.
- 2.2 Die lewe en werk van 'n saamgestelde ring is ten volle geïntegreerd, behalwe waar dit in die ooreenkoms uitgesluit is, waar dit nie moontlik is nie of waar die saamgevoegde ring anders besluit. In sulke gevalle is die spesifieke kerkordebepalings van toepassing.
- 2.3 Die saamgevoegde ring handel met die gesag en verantwoordelikheid van elk van die ringe betrokke.
- 2.4 Indien 'n saamgevoegde ring deel is van twee (streek)sinodes wat nog nie self 'n saamgevoegde (streek)sinode gevorm het nie, stuur die ring afgevaardigdes na beide (streek)sinodes. Dié afgevaardigdes het slegs stemreg in die (streek)sinode indien hulle lidmate is van die spesifieke kerk waarvan die (streek)sinode deel is. Afgevaardigdes wat nie aan hierdie vereiste voldoen nie, het slegs 'n adviserende rol of tree op as waarnemers in ooreenstemming met die reëlings van daardie spesifieke (streek)sinode.
- 2.5 Die ooreenkoms kan impliseer, of die saamgevoegde ring kan besluit, dat sake rakende kerklike tug en dissipline, appèlle en sake wat direk verband hou met die regspersoon van een van die gemeentes of ringe – insluitende eiendomsaangeleenthede – hanteer sal word deur lede van die ring van daardie betrokke kerk. Slegs in dié geval, of soos besluit deur die saamgevoegde ring, kan laasgenoemde optree as die ring van daardie betrokke kerk en in ooreenstemming met die kerkorde en bepalings van daardie kerk.
- 2.6 Indien dit ooreengekom word dat sake rakende kerklike tug en dissipline deur die (hele) saamgevoegde ring hanteer word, sal hierdie ring hou by die prosedurele reëlings – insluitende die voorskrifte vir appèl – soos weergegee in die kerkorde van die kerk aan wie die ampsdraer onder tug en dissipline behoort. Geen dissiplinêre optrede kan plaasvind sonder die goedkeuring van die meerderheid van die lede van die ring van daardie betrokke kerk nie.
- 2.7 Indien dit ooreengekom word dat appèlle en sake wat direk verband hou met die regspersoon van een van die gemeentes of ringe – insluitende eiendomsaangeleenthede – hanteer word deur die (hele) saamgevoegde ring, moet hierdie ring hou by die prosedurele reëlings soos vervat in die kerkorde van die betrokke kerk.
- 2.8 Die saamgevoegde ring vergader ten minste eenkeer in twee jaar.
- 2.9 Indien 'n saamgevoegde ring deel is van twee (streek)sinodes wat nog nie self besluit het om nou saam te werk of om 'n saamgevoegde (streek)sinode te vorm

nie – soos hieronder uitgespel – moet appèlle teen besluite van daardie ring by beide die (streek)sinodes aanhangig gemaak word en hierdie sinodes of hulle gevolmagtigdes besluit saam daaroor.

### **AFDELING III. (STREEK)SINODES**

#### *1. Die ooreenkoms*

- 1.1 In die lig van die eenwording van die kerke van die NG Kerkfamilie, en met inagneming van die huidige wetlike status en bevoegdhede van die (streek)sinodes van hierdie kerke, word hierdie sinodes uitgedaag om na die beste van hulle vermoë saam te werk.
- 1.2 Wanneer twee of meer (streek)sinodes wat aan ten minste twee verskillende kerke in die NG Kerkfamilie behoort, intensief wil saamwerk, moet elkeen van die bevoegde (streek)sinodes 'n besluit te dien effekte neem. Hierdie besluite sowel as die verbandhoudende bepalings word opgeneem in 'n skriftelike ooreenkoms.
- 1.3 Indien twee (streek)sinodes wat aan twee verskillende kerke in die NG Kerkfamilie behoort dieselfde geografiese grense deel, kan hulle besluit om 'n saamgevoegde (streek)sinode te vorm. In die geval neem elkeen van die bevoegde (streek)sinodes afsonderlik 'n besluit te dien effekte. Hierdie besluite sowel as die verbandhoudende bepalings word opgeneem in 'n skriftelike ooreenkoms.
- 1.4 Voordat 'n besluit soos hierbo bedoel (paragraaf 1.2 and 1.3) geneem word, gee die (streek)sinode al die gemeentes en ringe in sy gebied die geleentheid om hulle menings skriftelik te gee. So 'n besluit vereis dat die goedkeuring van die algemene sinode(s) of sy gevolmagtigde volgens die reëlings van die tersaaklike kerkorde verkry word.
- 1.5 Die ooreenkoms sluit onder andere bepalings in oor:
  - die funksionering van die samewerkende (streek)sinodes/saamgevoegde (streek)sinode,
  - die spesifieke opdragte van die samewerkende (streek)sinodes/saamgevoegde (streek)sinode,
  - eiendomme en finansies.
- 1.6 Samewerkende (streek)sinodes sowel as saamgevoegde (streek)sinodes sluit alle ringe in wat deel is van die onderskeie afsonderlike (streek)sinodes.
- 1.7 Die bevoegde (streek)sinode(s) of sy gevolmagtigde kan 'n (saamgevoegde) gemeente of 'n (saamgevoegde) ring toelaat, op versoek, om deel van 'n ander (streek)sinode te word indien ten minste 'n tweederde meerderheid van die kerkrade van die gemeentes in daardie (saamgevoegde) ring hulle toestemming gee.
- 1.8 Die ooreenkoms word óf vir 'n beperkte óf vir 'n onbeperkte tyd gemaak. Indien die ooreenkoms vir 'n beperkte tyd gemaak is en nie een van die samewerkende (streek)sinodes of saamgevoegde (streek)sinodes betrokke dit getermineer het nie, word dit stilswyend vir 'n soortgelyke aantal jare verleng.

- 1.9 Die ooreenkoms eindig by terminering. Terminering tree slegs in werking een jaar na die besluit geneem is om te termineer, tensy die meerderheid van die lede van elkeen van die samewerkende (streek)sinodes of saamgevoegde (streek)sinodes op 'n korter termyn ooreenkom.
- 1.10 Die ooreenkoms kan slegs na die tyd verander word met die goedkeuring van die bevoegde algemene sinodes.
- 1.11 Die samewerkende (streek)sinodes of saamgevoegde (streek)sinode spesifiseer in die bogenoemde ooreenkoms watter van die verantwoordelikhede en opdragte wat hulle het, volgens die kerkordes en bepalings van die onderskeie kerke, saam uitgevoer gaan word.
- 1.12 Appèlle teen die (geratifiseerde) besluite van samewerkende (streek)sinodes of saamgevoegde (streek)sinodes sal by beide algemene sinodes ingedien word en hierdie sinodes of hulle gevolmagtigdes sal saam daaroor besluit.

### ***III/1 SAMEWERKENDE (STREEK)SINODES***

#### *1. Verantwoordelikhede en opdragte*

- 1.1 Samewerkende (streek)sinodes vergader so dikwels as wat vereis word gesamentlik vanuit die perspektief van die verantwoordelikhede en opdragte wat hulle gesamentlik uitvoer.
- 1.2 Besluite wat in 'n gesamentlike vergadering van samewerkende (streek)sinodes geneem word, is slegs van krag indien dit na die tyd in afsonderlike vergaderings van al die bevoegde (streek)sinodes geratifiseer word.
- 1.3 Die moderatuur/dagbestuur en/of die moderamen/sinodale kommissie van die samewerkende (streek)sinodes vergader gesamentlik. Hulle hanteer slegs 'n afsonderlike agenda indien dit noodsaaklik is vir redes tov wetlike verantwoordelikhede.
- 1.4 Die kommissies van die samewerkende (streek)sinodes vergader gesamentlik. Hulle hanteer slegs 'n afsonderlike agenda indien dit noodsaaklik is vir redes tov wetlike verantwoordelikhede.
- 1.5 Die gesamentlike vergadering van moderature/dagbesture berei die gesamentlike vergadering van die samewerkende (streek)sinodes voor. Die moderature/dagbesture neem saam verantwoordelikheid vir die implementering van besluite soos geneem in 'n gesamentlike vergadering van samewerkende (streek)sinodes.
- 1.6 Indien dit ooreengekom word dat appèlle en sake wat in direkte verband staan met die regs persoonlikheid van een van die gemeentes of ringe – insluitende eiendomskwessies – hanteer word in 'n gesamentlike vergadering van die samewerkende (streek)sinodes, sal hierdie gesamentlike vergadering hou by die prosedurele reëlins soos uiteengesit in die kerkorde van die betrokke kerk.

### ***III/2 SAAMGEVOEGDE (STREEK)SINODES***

#### *1. Verantwoordelikhede en opdragte*

- 1.1 In die amptelike benaming van die saamgevoegde (streek)sinode moet die amptelike name van die samestellende (streek)sinodes ingesluit word.
- 1.2 Die verantwoordelikhede en opdragte van 'n saamgevoegde (streek)sinode sluit alle verantwoordelikhede en opdragte in wat 'n (streek)sinode volgens die kerkordes en bepalinge van die samestellende kerke het. Waar van toepassing handel die saamgevoegde (streek)sinode – in die uitvoering van sy verantwoordelikhede en opdragte met betrekking tot gemeentes en ringe – volgens die reëlings soos vervat in die kerkorde en bepalinge van die kerk waaraan die gemeente of ring behoort.
- 1.3 Die lewe en werk van 'n saamgevoegde (streek)sinode is ten volle geïntegreerd behalwe waar dit in die ooreenkoms uitgesluit word, waar dit nie moontlik is nie of waar die saamgevoegde (streek)sinode anders besluit. In sulke gevalle geld die spesifieke kerkordebepalinge.
- 1.4 Die saamgevoegde (streek)sinode handel met die gesag en aanspreeklikheid van elkeen van die ringe betrokke.
- 1.5 Die saamgevoegde (streek)sinode kies sy moderatuur/dagbestuur en sy moderamen/sinodale kommissie volgens die bepalinge soos vervat in die bogenoemde ooreenkoms. Dit het saamgevoegde kommissies en wys die lede van sulke kommissies aan.
- 1.6 Die saamgevoegde (streek)sinode stuur afgevaardigdes na beide bevoegde algemene sinodes. Sulke afgevaardigdes het slegs stemreg in die algemene sinode indien hulle lidmate van daardie betrokke kerk is. Afgevaardigdes wat nie aan hierdie vereiste voldoen nie, het slegs 'n adviserende rol of tree op as waarnemer in ooreenstemming met die reëlings van daardie spesifieke algemene sinode.
- 1.7 Die ooreenkoms kan impliseer, of die saamgevoegde (streek)sinode kan besluit, dat sake rakende kerklike tug en dissipline, appèlle en sake wat direk verband hou met die regs persoon van een van die gemeentes of ringe – insluitend eiendomsaangeleenthede – hanteer sal word deur lede van die saamgevoegde (streek)sinode van daardie betrokke kerk. Slegs in die geval, of soos besluit deur die saamgevoegde (streek)sinode, kan laasgenoemde optree as die (streek)sinode van daardie betrokke kerk en in ooreenstemming met die kerkorde en bepalinge van daardie kerk.
- 1.8 Indien dit ooreengekom word dat sake rakende kerklike tug en dissipline deur die (hele) saamgevoegde (streek)sinode of sy gevolmagtigde hanteer word, sal hierdie saamgevoegde (streek)sinode hou by die prosedurele reëlings – insluitende die voorskrifte vir appèl – soos weergegee in die kerkorde van die kerk aan wie die ampsdraer onder tug en dissipline behoort. Geen dissiplinêre optrede kan plaasvind sonder die goedkeuring van die meerderheid van die lede van die saamgevoegde (streek)sinode of sy gevolmagtigde wat aan daardie betrokke kerk behoort nie.
- 1.9 Indien dit ooreengekom word dat appèlle en sake wat direk verband hou met die regs persoon van een van die gemeentes of ringe – insluitende eiendomsaangeleenthede – hanteer word deur die (hele) saamgevoegde

(streek)sinode of sy gevolmagtigde, moet hierdie (streek)sinode hou by die prosedurele reëlins soos vervat in die kerkorde van die betrokke kerk.

1.10 Die saamgevoegde (streek)sinode vergader ten minste eenkeer in vier jaar.

2. *Provinsiale konventus*

2.1 Indien al die (streek)sinodes van twee of meer kerke van die NG Kerkfamilie binne die grense van 'n provinsie van die Republiek van Suid-Afrika of in 'n naburige staat ooreenkom, kan hulle in 'n provinsiale konventus byeenkom ten einde te getuig van die voortgaande eenwording van die kerke in die politieke en sosiale konteks van daardie besondere provinsie/land, dit te vier en uit te bou, en ons gemeenskaplike diens en getuienis te bevorder.

2.2 Die konventus kies sy eie leierskap.

#### **AFDELING IV. ALGEMENE SINODES**

1. Die moderature/dagbesture en/of die moderamens/sinodale kommissies van die algemene sinodes van twee of meer kerke van die NG Kerkfamilie kan saam vergader en saam besluite neem.

2. Hierdie gesamentlike besluite het slegs gesag indien dit na die tyd in afsonderlike vergaderings van die gevolmagtigde moderature/dagbesture en/of moderamens/sinodale kommissies geratifiseer is.

#### **AFDELING V. SAAMGEVOEGDE BEDIENINGE**

1. Saamgevoegde bedieninge moet in ooreenstemming met die bestaande ooreenkomste tussen die kerke in die NG Kerkfamilie aangemoedig word.

2. Nuwe bedieninge moet slegs onderneem word na konsultasie met die ander kerke in die NG Kerkfamilie en met die eksplisiete doel om dit so ver as moontlik saam te doen.

3. Gemeentes, ringe, (streek)sinodes en algemene sinodes kan gesamentlike projekte of gesamentlike regsenteite daarstel (maatskappye, NOW's, ens), solank as wat alle relevante kerklike vergaderings saamstem, ten einde die saamgevoegde bedieninge uit te bou.

#### **AFDELING VI. BESONDERE BEPALINGS**

1. 'n Gemeente van 'n kerk in die NG Kerkfamilie wat deel is van 'n ring wie se grense oorvleuel met die geografiese grense van een van die (streek)sinodes van die ander kerke in die NG Kerkfamilie, kan aansoek doen om deelname as assosiaat-lid in die ring en/of die (streek)sinode in sy geografiese area. So 'n aansoek kan slegs toegestaan word met die toestemming van die ring, die (streek)sinode (respektiewelik die algemene sinode) van die kerk waaraan die gemeente behoort. So 'n gemeente sit ook haar deelname in haar eie kerklike strukture voort.

2. Met betrekking tot die RCA kan die RCA op haar versoek 'n besondere soort deelname toegeken word in enige van die algemene sinodes van die ander kerke in die NG Kerkfamilie volgens die kerkorde.

# AFDELING G: GEDRAGSKODE VIR PREDIKANTE VAN DIE KERK

## INLEIDING/AANHEF

Goeie en moreel gefundeerde etiese gedrag en geloofwaardige optrede of die gebrek daaraan, kan die bediening van 'n predikant maak of breek. Volgens artikel 4 van die Kerkorde verrig Christus al sy dienswerk in sy kerk en koninkryk deur sy Woord en Gees. Hy doen dit ondermeer deur gebruik te maak van die besondere ampte van bedienaar van die Woord, ouderlinge en diakens om gelowiges toe te rus vir hulle dienswerk in die kerk en wêreld. (Kerkorde 2013, artikel 4)

Aangesien ons almal deur God se Gees tot die bediening geroep is (die innerlike roeping) en deur 'n werkkring (kerkraad, ring of sinode) in diens gestel is (uiterlike roeping) wil ons getrou bly aan die Woord en ons belydenis.

Predikante – leraars, proponente, emeriti en dosente – in ons geloofsgemeenskappe, hetsy gemeentes, ringe en sinodes, asook ander instelling soos opvoedkundige instansies, kapelaansdienste, versorgingsoorde (ouetehuse, kindertehuse en rehabilitasiesentrums) moet te alle tye ons Christelike waardes en gedrag in stand hou. Hierdie gedragskode voorsien ons daarom van 'n bepaalde standaard waaraan ons gedrag gemeet word in die kerklike en geestelike sferes waarin Predikante beweeg en optree.

## VERANTWOORDELIKHEID

Die private asook openbare/publieke optrede van gelegitimeerdes kan lidmate en nie-lidmate inspireer en motiveer, maar die teenoorgestelde is net so waar. Swak en onetiese gedrag van gelegitimeerdes kan ook dikwels lidmate en veral nie-lidmate se geloofservaring negatief beïnvloed en dan word Christene se Christenskap met rede erg gekritiseer. Gelegitimeerdes moet daarom veral bewus wees van die verantwoordelikheid wat met die **roeping** van geestelike leier gepaard gaan. Die verantwoordelike aanvaarding en internalisering van hierdie gedragskode op grond van predikante se besondere roeping berus by elke individu.

Predikante staan in 'n baie besondere noue verhouding met lidmate en so word 'n sterk vertrouensverhouding gebou. Hierdie vertrouensverhouding skep dan die ruimte waarbinne die Predikant en die lidmaat so noue kontak met mekaar het, dat daar later feitlik geen geheime/probleme is wat die lidmaat nie aan die leraar openbaar maak nie. Die situasie kan meebring dat die Predikant in so 'n posisie geplaas word dat hy oor vertroulike inligting beskik wat dikwels nadelig vir die lidmaat sou wees, sou hy/sy dit op enige wyse openbaar. Verder kan die Bedienaar van die Woord ook beleef dat hy/sy in 'n bepaalde “magsposisie” in beweeg en dat hy/sy dikwels voor die versoekings kan swig om hierdie “magsposisie” te misbruik in terme van gunsies/in ruil vir sekere montere /finansiële voordele en selfs seksuele gunste. 'n Bedienaar van die Woord mag dus ook nooit uit sy/haar “magsbasis” en-of “magsposisie” lidmate manipuleer en/of misbruik nie.

Hieronder volg die Gedragskode wat 'n gelegitimeerde se gedrag en openbare optrede rig. Gelegitimeerdes wat hulle skuldig maak aan die nie-uitvoering van hierdie gedragskode stel hulle self bloot aan korrektiewe optrede soos omskryf in die Kerkorde van die Ned Geref Kerk en soos uitgespel in die Riglyne hierby aangeheg. Hierdie tugmaatreëls kan wissel van 'n mondelinge waarskuwing tot en met summiere ontslag.

## 1. **STANDAARDE**

Gelegitimeerdes sal in 'n pastoraal terapeutiese situasie:

- ander se regte en welstand altyd eerste stel.
- nie berading gee wat verder strek as binne die vermoë waartoe die leraar opgelei is nie. Waar berading buite die verwysing val, moet die leraar altyd persone verwys na 'n ander professionele persoon.
- ten alle tye vertroulikheid handhaaf.
- in geen intieme verhouding met persone betrokke raak wat vir berading aanklop nie.
- geen fisiese toenadering soek by enige persoon wat vir berading aanmeld nie.

## 2. **VERTROULIKHEID en BETROUBAARHEID**

### **Vertroulikheid**

Enige gelegitimeerde sal in alle omstandighede (berading, advies, en geestelike versorging) die mees moontlike vertroulikheid handhaaf, deur

- Alle inligting as vertroulik te hanteer
- Slegs inligting beskikbaar te stel wat volgens wet vereis word
- As inligting bekend gemaak moet word, dit eers met die betrokke persoon te bespreek

### **Betroubaarheid**

Van enige gelegitimeerde kan verwag word om altyd betroubaar te wees. Daarom

moet gelegitimeerdes so optree dat hulle vertrou kan word ten opsigte van:

- Leierskap – om met integriteit leiding te neem en ander op 'n verantwoordbare wyse te begelei
- Inligting deur dit met alle betroubaar en met die nodige vertroulikheid te hanteer
- Met bronne deur dit wat aan die predikante toevertrou is met eerlikheid en noukeurigheid te hanteer

## 3. **GEDRAG TEN OPSIGTE VAN KINDERS**

Gelegitimeerdes sal altyd in hulle kontak en werk met minderjariges 'n oop en eerlike vertrouensverhouding handhaaf deur:

- Sover moontlik in span met minderjariges te werk
- Geen fisiese kontak te maak behalwe waar dit in uiterse gevalle vir bemoediging nodig is (bv 'n hand ter vertroosting op arm) Geen kontak mag gemaak word wat as seksueel van aard geïnterpreteer kan word nie.

- Geen blootstelling aan afhanklikheidsmiddels nie
- Nie in hul privaat woonplek of pastorie te laat oornag nie
- Nie enige mediese behandeling toepas behalwe in uiterste noodgevalle nie

#### **4. REINHEID EN SUIWERHEID**

##### **Seksuele reinheid**

Geen gelegitimeerde mag vir seksuele gewin of en enige ander vorm van intimiteit die vertrouwe in hulle gestel deur die geloofsgemeenskap misbruik deur:

- In berading en/of geloofsverhoudings so betrokke te raak dat die grense van betaamlike gedrag oorskry word nie.
- Enige seksuele gunsie te vra nie
- Nie seksueel betrokke te raak by enige persoon nie

##### **Teologiese suiwerheid**

'n Gelegitimeerde moet sonder skroom bereid wees om die leer van die Ned Geref Kerk te enige tyd te respekteer, bevorder en verdedig.

Om verder, indien as Bedienaar van die Woord later enige beswaar of ander insig oor die leer ontwikkel, dit nie sal leer of bevorder voordat dit aan 'n bevoegde kerkvergadering vir 'n beslissing voorgelê is nie.

#### **5. TEISTERING**

Geen gelegitimeerde mag op enige wyse betrokke raak by 'n fisiese, psigologiese, geskrewe of verbale teistering van enige ander persoon nie, en moet 'n omgewing te skep waar professioneel opgetree word wat vry is van enige vorm van diskriminasie, intimidasie en teistering en wat die volgende uitsluit:

- Fisiese en/of psigiese misbruik
- Afbrekende taal
- Onwelkome seksuele gedrag en/of aanraking
- Seksuele grappe

#### **6. KONFLIK VAN BELANGE**

Geen gelegitimeerde mag hom/haarself skuldig maak aan enige vorm waar daar 'n konflik van belange mag ontstaan nie en;

- moet alle moontlikhede waar daar moontlik 'n konflik van belange mag wees, openbaar
- mag nie voordele trek uit posisie as gelegitimeerde nie
- waar twee of meer partye betrokke is, dit met die partye uitklaar

#### **7. ADMINISTRATIEWE AKSIES**

Gelegitimeerdes moet deursigtig en eerlik die dag-tot-dag administrasie wat van hulle in die bediening verwag word, uitvoer.

- voldoen aan die kerkregtelike sowel as sivileregtelike eise
- mag nie mag misbruik nie

## **8. GEESTELIKE EN LIGGAAMLIKE WELSTAND**

Gelegitimeerdes is self verantwoordelik vir hulle eie geestelike, fisiese, morele en emosionele welstand verantwoordelik

- moet bedag wees op tekens wat probleme uitwys
- moet onmiddellik hulp soek
- misbruik van drank en ander afhanklikheid middels is verbode
- Mentorskap is noodsaaklik

## **9. INTEGRITEIT**

Gelegitimeerdes moet integriteit toon in:

- persoonlike karakter (verhoog van God; eerlik; hardwerkend; getrou, geduldig, vredeliewend)
- persoonlike versorging (gesondheid, fisiese voorkoms, geestelike verdieping, benut van mentors)
- prediking en lering (preek en leer die Waarheid)

## **10. VERANTWOORDELIKHEID (Aanspreeklikheid)**

Gelegitimeerdes het die verantwoordelikheid om met ywer, toewyding, opregtheid en eerlikheid te dien in hul onderskeie werkkringe tov

- Finansies aan hul toevertrou
- Bedieningsverantwoordelikheid in gemeente en ander werkkring aan hul toevertrou
- Breër kerklike verband waar hul dien

## **11. BEOEFEN REGVERDIGHEID EN BILLIKHEID**

Gelegitimeerdes moet te alle tye hoë vlakke van regverdigheid en billikheid handhaaf en tot voorbeeld wees in betrokkenheid met:

- Ander personeel
- Lidmate van die geloofsgemeenskap
- Die gemeenskap waarbinne hul betrokke is
- Ander geloofsgemeenskappe

Nakoming van bogenoemde kode moet 'n lewenskeuse en verantwoordelikheid van elke gelegitimeerde wees. Alles moontlik moet gedoen word om dit te onderskryf en te onderhou.

# AFDELING H: BESLUTE WAT KERKORDE ARTIKELS EN REGLEMENTE AANVUL EN TOELIG

## DIE BELYDENIS EN ORDE VAN DIE KERK

### 1. BYBEL

#### 1.1 Skrifgebruik en Skrifgesag

Die Algemene Sinode keur die volgende verklaring goed en verwys dit na gemeentes en ringe vir bespreking:

1.1.1 Die Nederduitse Gereformeerde Kerk bely, as kerk wat in die Gereformeerde tradisie staan, dat die Bybel die Woord van God is en dat dit daarom:

1.1.1.1 *gesag* het oor ons hele lewe, omdat dit aan ons betuig dat ons nie aan onself behoort nie, maar aan die Here, sodat ons geroep word om in vertroue op Hom en in gehoorsaamheid aan Hom te leef;

1.1.1.2 *betroubaar* is, omdat ons vas glo dat God werklik is soos Hy Homself in die Skrif aan ons bekend maak: die Vader, Seun en Gees wat uit genade ons God is;

1.1.1.3 *duidelik* is, omdat die kerk hierin die helderheid van die evangelie van God se liefde en genade hoor;

1.1.1.4 *voldoende* is, omdat die Heilige Gees ons deur die Bybel alles leer wat ons hoef te weet om in God te glo en om sy wil te gehoorsaam (vergelyk NGB Artikel 7). Daarom bely ons steeds gelowig dat dié waarheid bo alles is.

1.1.2 Soos nog altyd vir die Gereformeerde tradisie, beteken hierdie belydenis vir ons nié:

1.1.2.1 dat die Bybel vereis dat ons ons denkvermoë, wat 'n gawe van God is, moet opoffer nie;

1.1.2.2 dat die Bybel gesien kan word as 'n eksakte handboek vir historiese of wetenskaplike kennis nie;

1.1.2.3 dat die hele Bybel so maklik is om te verstaan dat enige mens selfstandig en onmiddellik alles daarin kan begryp nie;

1.1.2.4 dat die Bybel vir ons die volle kennis oor alle aspekte van die werklikheid gee, sodat geen verdere menslike nadenke of navorsing nodig is nie.

1.1.3 Ons bely verder dat God deur die Heilige Gees die kerk deur die eeue in die waarheid van hierdie Woord lei. Dit beteken vir ons dat ons die Skrif as die lewende Woord van God hoor in gemeenskap met die Heilige Gees en met mekaar. Daarom was die kerke in die Gereformeerde tradisie nog altyd oortuig van die belangrikheid van 'n verantwoordelike interpretasie van die Skrif waardeur die kerk as geloofsgemeenskap onder leiding van die Heilige Gees soek na die waarheid, geregtigheid en barmhartigheid wat God deur sy Woord in ons tot stand bring. Hierdie oortuiging dat die kerk die Skrif moet interpreteer, blyk onder meer uit:

- 1.1.3.1 die klem wat van die begin af gelê is op 'n grondige kennis van die oorspronklike tale (Hebreeus, Grieks en Aramees) waarin die Bybel geskryf is, asook die soeke na die beste metodes vir verantwoordelike Skrifuitleg;
- 1.1.3.2 die beklemtoning dat die hele Skrif gelees moet word in die lig van die konteks waarin dit ontstaan het, sodat die tyd- en kultuurbetrokkenheid daarvan verreken kan word in die uitleg;
- 1.1.3.3 die soeke na reëls vir die uitleg van die Skrif (voorbeelde van sulke uitlegreëls uit ons tradisie is: dat die Skrif as totaliteit gelees moet word, dat Skrif met Skrif vergelyk moet word en dat die moeiliker dele in die lig van die makliker dele vertolk moet word en dat die Skrif uit sy hart, die evangelie van Jesus Christus, verstaan moet word);
- 1.1.3.4 die onderskeid wat in die uitleg van die Skrif gemaak is tussen verskillende dele van die Skrif wat 'n verskillende soort gesag het (byvoorbeeld die onderskeid tussen die historiese en normatiewe dele van die Skrif, asook die onderskeid tussen die kultiese en morele wetgewing);
- 1.1.3.5 die dankbare, maar kritiese luister na die manier waarop die Skrif in die geskiedenis van die kerk uitgelê is en in ons eie tyd deur medegelowiges in ons eie kerk en ander kerke uitgelê word;
- 1.1.3.6 die vestiging van kerklike praktyke vir die interpretasie van die Skrif, soos veral die prediking, maar ook kategeese, Bybelstudie, teologiese studie en andere;
- 1.1.3.7 en veral ook in die daarstel van belydenisskrifte waarin die kerk streef om die hart van die Skrifboodskap duidelik te vertolk en gehoorsaam te aanvaar.
- 1.1.4 Hoewel die kerk in elke tyd anders mag oordeel oor die beste reëls en metodes vir verantwoordelike Skrifuitleg, bly dit vir ons 'n basiese oortuiging dat die belydenis van die Skrif as Woord van God nooit teenoor verantwoordelike Skrifuitleg staan nie. Die belydenis roep ons juis op om onself, in gemeenskap met mekaar en met al die gawes wat God vir sy kerk gegee het, toe te lê op die soeke na die waarheid.
- 1.1.5 In die lig van hierdie belydenis glo ons dat God ook in die uitdagende tye waarin ons leef, sy kerk deur sy Woord en Gees in die waarheid sal lei. As Gereformeerdes verbind ons ons daartoe om, ook wat die komplekse leerstellinge en etiese kwessies van ons tyd betref, in hierdie oortuiging saam te soek na waarheid, geregtigheid en barmhartigheid. Ons glo dat hierdie soeke 'n ekumeniese strewe is, in verbondenheid met die kerk van alle eeue en die kerk dwarsoor die wêreld. Waar ons van mekaar verskil, glo ons dat ons in gesprek met mekaar moet bly, in die gebed dat God ons liefde al meer sal laat toeneem in begrip en fyn aanvoeling, sodat ons die dinge sal kan onderskei waarop dit werklik aankom (Filippense 1:9-10).

### **3. GELOOFSWAARHEDE**

- 3.1 Die Algemene Sinode herbevestig weereens die NG Kerk se standpunt oor die gesag van die Woord van God as enigste norm vir ons geloof.

- 3.2 Die Algemene Sinode herbevestig weereens dat die NG Kerk die belydenisskrifte sien as normatief in die sin dat dit volgens die Skrif ons geloof bely.
- 3.3 Die Algemene Sinode herbevestig dat die Skrif en Belydenis geles moet word binne hulle historiese konteks en dat hulle met verantwoorde hermeneutiek vertolk sal word, sodat ons die leiding van die Gees vir ons tyd kan hoor.
- 3.4 Die Algemene Sinode wys lidmate daarop dat ons met mekaar in gesprek sal tree voordat mense verdag gemaak word, of van leerdwaling beskuldig word, want verdagmaking en leuens is net soveel sonde as leerdwaling.
- 3.5 Die Sinode besef dat baie lidmate geweldige onsekerhede op baie vlakke beleef en wil lidmate verseker van deernis met hulle situasie. Die Sinode wil ook lidmate en leraars daarop wys dat, juis wat ons van die Bybel en Belydenisskrifte as antwoord hierop glo, ons weerhou van fundamentalisme (aan die een kant) en vrysinnigheid/radikale sekularisme (aan die ander kant).  
(Handelinge 2013)

#### **4. BELYDENIS VAN BELHAR**

##### **Besluite 2011**

- 4.1 Die Algemene Sinode volstaan met die besluit van 1998: "Die AS aanvaar dat die Belydenis van Belhar op sigself genome nie met die drie formuliere van eenheid in stryd is nie" en ook "aanvaar ter wille van die eenheidsproses en sy getuienis die wesenlike inhoud van die Belydenis van Belhar."  
(Handelinge 2011, p 105, pt 9, en p106, pt 13)

#### **6. BEROEPBAARHEID VAN PREDIKANTE BINNE DIE FAMILIE VAN NG KERKE**

##### **Besluite 1994**

- 6.1 Die Algemene Sinode besluit dat Kerkorde Artikels 6 en 7, reglemente 10 en 11 (nou *Reglement vir die Opleiding en Legitimasie van Predikante* en *Reglement vir die Bevoegdheid van Predikante, Proponente en Emeriti*) en verbandhoudende besluite van die Algemene Sinode oor die opleiding, legitimasie en bevoegdheid van leraars in die Ned Geref Kerk geld vir die Ned Geref Kerkverband en is as sodanig ook bepalend vir die interpretasie van die besluit van die Algemene Sinode oor die erkenning van die opleiding en legitimasie van die ander lede van die Ned Geref Kerkfamilie asook die besluit oor die oor-en-weer-beroepbaarheid van leraars binne die Familie van Ned Geref Kerke.
- 6.2 Die Algemene Sinode gee aan ringe opdrag om toe te sien dat by die goedkeuring van beroepe uit die Ned Geref Kerkfamilie daar aan die vereistes van die Ned Geref Kerk vir opleiding en legitimasie voldoen word.  
(Handelinge 1994, p 452, pt 2.8.6)

## **Besluite 2002**

- 6.3 Die NG Kerk erken die opleiding en legitimasie van die NGKA, VGKSA en RCA op voorwaarde dat dit voldoen aan die vereistes wat die NG Kerk stel vir sy eie opleiding en legitimasie.
- 6.4 Indien die opleiding van 'n gelegitimeerde van die NGKA, VGKSA en RCA nie gelykwaardig is aan die vereistes wat die NG Kerk vir sy eie gelegitimeerdes stel nie, is so 'n persoon nie sonder meer beroepbaar in die NG Kerk nie.
- 6.5 Voldoen 'n gelegitimeerde van die NGKA, VGKSA en RCA nie aan die vereistes wat die NG Kerk vir gelegitimeerdes stel nie, sal sodanige persoon die nodige aanvullende kwalifikasies moet verkry ten einde beroep te kan word na 'n NG Gemeente of benoem te kan word in 'n pos in die NG Kerkverband.
- 6.6 Die Drie Formuliere van Eenheid moet as belydenisgrondslag van die NG Kerk aanvaar word alvorens predikante van die Familie van NG Kerke in 'n gemeente van die NG Kerk bevestig kan word.  
(Handelinge 2002, pp 336-337, pt 2.3.4)

## **DIE VERGADERINGE VAN DIE KERK**

### **15. NG KERKSEEL**

Die Algemene Sinode bevestig die volgende as sy standpunt tov die NG Kerkseel: Die kerkseel is die eiendom van die Algemene Sinode; dit is 'n seel van "amptelikheid" en is beperk tot die Algemene Sinode se werksaamhede; persone/instansies kan die seel slegs gebruik met die verlof van die Moderamen; hulle moet skriftelik daarvoor aansoek doen.

(Handelinge AS 2002, p 568, pt 3.5.2).

## **DIE SAKRAMENTE<sup>1</sup>**

### **17. DOOP**

#### **17.1 Bediening van dooplidmate in skoolkoshuise**

(Handelinge 1990, p 605, punt 2.1.9.4)

#### **17.2 Doop van kinders in pleegsorg**

Die Algemene Sinode besluit dat kinders in pleegsorg gedoop kan word en lê die volgende riglyne neer:

17.2.1 Die finale besluite berus by die betrokke kerkraad wat in alle gevalle moet waak teen die misbruik van die sakramente.

17.2.2 Waar die doop van 'n kindjie gewoonlik die resultaat is van die besluite van 'n ouer(s) en 'n kerkraad, kom in die geval van 'n pleegkind ook ander instansies wat die pleegplasing bestuur, ter sprake. Daar kan eers tot die doop oorgegaan

---

<sup>1</sup>Vir die bediening van die sakramente vergelyk Artikel 49 van die *Kerkorde*.

word nadat die kerkraad deur samesprekinge met pleegouers en die pleegsorginstansie homself daarvan vergewis het dat die betrokke pleegplasing na alle waarskynlikheid van 'n langtermyn aard is.

(Handelinge 1994, p 474, punt 10.2.2.1)

#### **17.6 Doop van verbondskinders**

Die kerkraad moet toesien dat die doop van verbondskinders so gou as moontlik aangevra en bedien word.

#### **17.8 Doop van persone sestien jaar en ouer**

Persone sestien jaar en ouer wat nie gedoop is nie kan gedoop word na openbare belydenis van geloof.

#### **17.9 Erkenning van doop**

Die doop van iemand uit 'n ander kerkverband word erken as dit geskied het in die Naam van die Drie-enige God, Vader, Seun en Heilige Gees; met water bedien is; en deur 'n persoon met bevoegdheid in die betrokke kerkverband bedien is.

#### **17.10 Doop, herdoop en doopherrinnering/doopherdenking**

(Handelinge 1998, bl 417, 10.5 en bl 469-470, 1.3.6)

### **Besluite 2011**

#### **17.11 Doop**

17.11.1 Die Algemene Sinode bevestig ons gereformeerde oortuiging dat die Verbondsdoo uitdrukking gee aan die grondwaarheid van die Evangelie dat God se genade en trou te alle tye ons gelowige aanvaarding daarvan voorafgaan en selfs omsluit.

17.11.2 Die Algemene Sinode vra daarom kerkrade en predikante om die gereformeerde verstaan van die verbondsdoo met oortuiging en deernis te verduidelik en te bevestig, ook aan lidmate wat ander oortuigings oor die doop huldig.

17.11.3 Die Algemene Sinode gee terselfdertyd erkenning aan die feit dat Christelike kerke nie almal dieselfde Doopbeskouing huldig nie, maar dat ons nogtans saam met mekaar deel uitmaak van die Kerk van Christus.

17.11.4 Die Algemene Sinode gee dankbaar erkenning aan lidmate wat ten spyte van hulle ander verstaan van die doop steeds lojaal bly aan die kerkverband en wil hulle verseker dat hulle 'n geestelike tuiste in die NG Kerk het.

17.11.5 Die Algemene Sinode vra opreg verskoning vir lidmate wat op een of ander wyse rondom die doop seergekry het, en nooi hulle uit tot onderlinge gesprek waar daar op pastorale wyse saam oor die saak gesels en gebid kan word.

17.11.6 Die Algemene Sinode verseker lidmate wat die NG Kerk vanweë hulle doopverstaan verlaat het, dat die NG Kerk 'n geestelike tuiste wil wees vir alle kinders van die Here en nooi hulle hartlik uit om hulle regmatige plek in hulle plaaslike NG gemeente in te neem en saam te werk aan die koms van God se koninkryk.

## **17.12 Doopherdenking/herinnering**

### 17.12.1 Vertrekpunte vir gesprek

17.12.1.1 Die Sinode is van oordeel dat die gesprek en beredenering oor die gereformeerde vertrekpunte van die doop deur die jare in die Nederduitse Gereformeerde Kerk deurdag is en 'n rykdom van teologie ontsluit.

17.12.1.2 Die Sinode bevestig weer dat die verbondsteologie sentraal staan in die beredenering van doopherdenking of -herinnering.

17.12.1.3 Die Algemene Sinode bevestig dat in gehoorsaamheid aan die verbondsbelofte van ouers, ouers en die kerk verantwoordelikheid moet aanvaar vir die verbondsonderrig (kategese) van hul gedoopte kinders sodat hulle gelei word tot 'n toe-eiening van die heil (belydenisaflegging) wat nie aan 'n bepaalde ouderdom gekoppel kan word nie (soos tans in die kerkorde vasgestel word), en versoek daarom die Taakspan Kategese om die plek, aard en ouderdom vir belydenisaflegging te ondersoek.

17.12.1.4 Die Sinode besluit om niks by te voeg tot die gesprek oor die doop, kindernagmaal en kategese nie, maar wel net te fokus op die opdrag oor doopviering.

### 17.12.2 Terminologie

17.12.2.1 Die Sinode besluit dat die kerk eerder die woorde doopherdenking of doopherinnering sal gebruik.

### 17.12.3 Riglyne vir die herdenking/herinnering

17.12.3.1 Die Sinode bevestig dat die heil altyd en in alle omstandighede gevier moet word.

17.12.3.2 Die Algemene Sinode wys lidmate daarop dat die gereelde viering van die nagmaal die primêre plek van viering is.

17.12.3.3 Die Algemene Sinode bevestig dat die doopherinnering/viering nie as 'n her/weerdoop interpreteer mag word nie, maar direk met die verbonds-/Christelike doop saamhang.

17.12.3.4 Die Sinode besluit dat gemeentes aangemoedig word om geleenthede te skep waar doopherinnering of herdenking deel word van lidmate en gemeentes se verhaal.

17.12.3.5 Die Sinode beveel aan dat sakramentsviering 'n groter rol binne liturgie, kategese en die erediens sal speel.

17.12.3.6 Dit staan Kerkrade ook vry om toepaslike rituele te vestig wat die behoefte van sulke lidmate opvang om simbolies uitdrukking te gee aan hulle sterwe en opstanding saam met Christus. Hierdie rituele is nie Sakramente nie en vervang nie die Verbondsdoop nie.

(Handelinge 2011, pp 163-164)

## **Besluite 2013**

### **17.13 Doopherinnering / doopherdenking / samehang van sakramente**

- 17.13.1 Die Algemene Sinode ontvang die verslag as teologiese standpuntinname oor doop en dooherinnering/ -herdenking.
- 17.13.2 Die Algemene Sinode beveel die verskillende liturgieë by die kerkverband aan.
- 17.13.3 Die Algemene Sinode moedig gemeentes aan om moeite te doen om die groter geloofsgemeenskap by die doopprosesse in die gemeente te betrek en daarteen te waak om aparte doopdienste te hou.
- 17.13.4 Die Algemene Sinode versoek dat daar in die ontwikkeling van kategesemateriaal na 'n groter geïntegreerdheid tussen doop en belydenisaflegging gekyk sal word.
- 17.13.5 Die Algemene Sinode moedig gemeentes aan om lidmate gereeld kans te gee om op 'n sinvolle wyse hulle doop op verskillende maniere te herdenk.  
(Handelinge 2013)

#### **17.14 Dooherinnering en rituele**

- 17.14.1 Hierdie beswaar (Beskrywingspunt (B.15 bl 301) (bl 90 aanbevelings)) word verwys na die Taakspan wat werk oor die samehang van die sakramente.
- 17.14.2 Die volgende formulerings word aan hierdie taakspan gestuur vir oorweging as reaksie op hierdie beswaarskrif:
  - 17.14.2.1 Die Algemene Sinode neem kennis van hierdie beswaar van die gemeente oor dooherinnering, en gee die gemeente toe op die teologiese beredenering dat die doop en nagmaal nie deur ander geleenthede vervang mag word nie. Tog meen die Sinode dat die beswaar hoofsaaklik gegrond is op 'n interpretasie van 'n woord (“ritueel”) in die besluite wat die bedoeling daarmee ver te bowe gaan. Die formulering het bedoel dat daar toepaslike geleenthede geskep sal word vir viering van die heil in Christus.
  - 17.14.2.2 Die Algemene Sinode het begrip daarvoor dat sommige lidmate en gemeentes op teologiese gronde ongemaklik is oor die besluite van die 2011-Sinode rondom die erkenning van kerkrade se hantering van doopvieringspraktyke as addisionele geleenthede. Derhalwe wil die Sinode kerkrade opnuut oproep om ondubbelsinnig die regsinnige gereformeerde teologie van die sakramente te leer en in gemeentes te praktiseer.
  - 17.14.2.3 Die Algemene Sinode besluit om “doo-rituele” te ontmoedig omdat dooherinnering deel is van elke doopgeleentheid. Lidmate moet leer leef uit hulle doop. Die Algemene Sinode besluit dat oor doop en nagmaal dieper gepreek en nagedink moet word – as viering van die heil in Christus. Die simboliek en eenvoud van die doop en nagmaal moet opnuut ontdek/ervaar word.
  - 17.14.2.4 Lidmate wat die behoefte het om groot gedoop te word, of wat hulle reeds laat herdoop het, behoort pastoraal begelei te word om saam te soek na die beleving van die wonderlike genade en heil van God. Leraars behoort meer moeite te doen om in die bediening van die sakramente mense se behoefte aan troos en versekering aan te spreek.  
(Handelinge 2013)

## **Besluite 2015**

### **17.15 Doop en doopviering**

17.15.1 Die Algemene Sinode neem kennis van die ontwikkelinge oor die doop soos hierbo uiteengesit en, in herbevestiging van sy besluite van 2013 oor die sakramente, versoek die Sinode gemeentes om hierdie gesprek te kontinueer, ook aan die hand van die twee genoemde dokumente in die Agenda van die Algemene Sinode van 2013 (bl 93–119) oor doopviering en die samehang van sakramente. (Handelinge AS 2015, Dag 6, pt 4)

### **17.16 Belydenisdoop**

17.16.1 Die Algemene Sinode herbevestig weereens al die jongste besluite (2011; 2013) oor die doop wat die standpunt van die NG Kerk as Gereformeerde kerk tot uitdrukking bring en wys hiermee die gravamen af.

17.16.2 Die Algemene Sinode versoek sinodes om die noue samehang van die sakramente (doop en nagmaal) deurlopend onder aandag van gemeentes te bring, waarin die genade-karakter van die evangelie onomwonde verkondig word (verwys studiestuk van 2013 in hierdie verband).

17.16.3 Die Algemene Sinode besluit om nie weer die moontlikheid van 'n sogenaamde belydenisdoop (wat in die praktyk soos versoek, nie anders as 'n her-doop verstaan kan word nie) verder te oorweeg nie.

17.16.4 Die Algemene Sinode wys daarop dat die onderskeid wat tussen bedienaars van die woord en lidmate gemaak word, nie die gelykwaardigheid van alle ampte negeer nie. Gelykwaardig beteken nie dat hulle dieselfde is nie. Hierdie onderskeid is gebaseer op die legitimasie van predikante, wat hulle nie alleen die legitimiteit gee om die doop te bedien nie (in onderskeid van ander ampte), maar hulle ook daartoe verbind om lidmate deur leer en voorbeeld voor te gaan in die uitleef van ons Gereformeerde leer.

(Handelinge AS 2015, Dag 6, pt 4)

## **18. DOOP EN NAGMAAL: SAMEHANG VAN DIE SAKRAMENTE IN VERBONDS-TEOLOGIESE PERSPEKTIEF**

18.1 Die Algemene Sinode moedig gemeentes aan om in die *viering* van die sakramente die belydenis van die kerk voor oë te hou en die samehang van die twee sakramente te verreken.

18.2 Die Algemene Sinode moedig gemeentes aan om in die *kategetiese onderrig* die samehang van die sakramente uit te lig en die kardinale rol daarvan in die proses van geloofsformasie tot sy reg te laat kom.

18.3 Die Algemene Sinode moedig *ouers* aan om in hulle *saamleef met hulle kinders* die troosryke werklikheid van die sakramente na die oppervlak te laat kom in gesprek en lewensvoorbeeld in ooreenstemming met die doopbelofte.

(Handelinge AS 2013)

## **19. NAGMAAL**

### **19.1 Oop of geslote**

(Handelinge 1994, p 434, punt 27.6)

### **19.2 Gereelde viering van nagmaal**

19.2.1 Die Algemene Sinode bevestig 'n vorige besluit dat die volledige Christelike erediens beide Woordbediening en Nagmaalviering insluit.

19.2.2 Die Algemene Sinode moedig gemeentes weer eens aan om nader te beweeg aan die rigting van 'n weeklikse viering van die nagmaal. Die Algemene Sinode doen dit met die oortuiging dat dit die beste Bybelse praktyk is, dat die sakramente maniere is waarop God na ons kom en dat dit ook die Woordbediening kan versterk.

19.2.3 Die Algemene Sinode is daarvan oortuig dat die meer gereelde viering van die nagmaal 'n onbereikte ideaal sal bly indien die gemeente nie die geloofversterkende nut daarvan beleef nie. Gemeentes en liturje word aangemoedig om die volgende paar jaar besondere erns te maak met die inkleiding van die nagmaal.

19.2.4 Die Algemene Sinode aanvaar dat wat betref die hoe van die viering van die nagmaal die gereformeerde tradisie nooit voorskriftelik was nie. Daar is in die gereformeerde tradisie byvoorbeeld verskillende praktyke rondom die kommunie van die gemeente gangbaar. Die Algemene Sinode handhaaf die beginsel van vryheid, en versoek gemeentes om hulle in hul besluite hieroor te laat lei deur die beginsels van die Skrif en die wens dat die gemeente opgebou en gestig sal word deur die viering van die nagmaal.

(Handelinge AS 2002, p 537, punt 2.2.4.2).

### **19.3 Nagmaal in kleingroepe**

Aangesien daar by 'n toenemende aantal lidmate 'n behoefte is aan 'n nagmaalsbeleving in kleiner, meer intieme groepe, en daar geen Bybelse beswaar daarteen is nie, besluit die Sinode dat nagmaal voortaan ook in kleingroepe in die gemeente bedien mag word onder dieselfde voorwaardes as wat in die gemeentes as geheel geld.

(Handelinge AS 2002, p 537).

### **19.4 Toelating van kinders tot Nagmaal**

19.4.1 Die Algemene Sinode besluit dat

19.4.1.1 gedoopte kinders wat in Jesus Christus glo,

19.4.1.2 aan die vereistes van 1 Kor 11 voldoen, en

19.4.1.3 die begeerte het om nagmaal te gebruik tot die nagmaal toegelaat mag word.

#### **19.4.2 Praktyk van toelating van kinders by die Nagmaal**

19.4.2.1 Die Algemene Sinode besluit dat ter wille van die goeie orde en eenheid van die kerk die toelating van kinders tot die nagmaal op die volgende wyse geskied:

19.4.2.1.1 Kerkrade besluit wanneer die gemeente daarvoor gereed is. Die Algemene Sinode besluit om kerkrade te versoek om die gemeentes te begelei en toe te rus, en so tot gereedheid te voer vir toelating van kinders tot die gebruik van nagmaal

as 'n gesinsmaal. Hierdie leiding moet op 'n pastorale wyse met groot liefde en toewyding gedoen word.

#### **19.4.3 Ouers se verantwoordelikheid**

19.4.3.1 Ouers het die verantwoordelikheid om hulle kinders voortdurend te begelei en te onderrig in die volle rykdom van die betekenis van die nagmaal, net soos kerkrade die plig het om volwasse nes te begelei.

19.4.3.2 Dit is die verantwoordelikheid van elke kerkraad om spesifieke reëlings te tref oor die wyse waarop die toelating plaasvind.

19.4.3.3 Die Algemene Sinode beklemtoon dat ouers hulle kinders moet begelei met die oog op die kinders se deelname aan die nagmaal en om die besondere geleentheid te benut om saam met hulle kinders die nagmaal te gebruik.

19.4.3.4 Die Algemene Sinode versoek kerkrade om deurlopend aandag te gee aan die toerusting en begeleiding van ouers sodat hulle hulle kinders kan begelei in die deelname aan die nagmaal.

19.4.3.5 Die Algemene Sinode besluit:

19.4.3.5.1 By die toelating van kinders tot die nagmaal verval belydenisaflegging as toelatingsvoorwaarde vir die nagmaal.

19.4.3.5.2 Die praktyk van kategeese en belydenisaflegging word gehandhaaf in ooreenstemming met die vorige besluite van die Algemene Sinode.

(Handelinge 1998, p 432, 4)

#### **19.5 Kinders aan die Nagmaalstafel**

19.5.1 Die Algemene Sinode handhaaf sy besluit van 1998 dat gedoopte kinders wat in Jesus Christus glo, aan die vereistes van 1 Kor 11 voldoen, en die begeerte het om nagmaal te gebruik, tot die nagmaal toegelaat mag word.

19.5.2 Die Algemene Sinode keur die volgende aanbevelings van die Moderamen (Agenda 2002 bl 344) as beginsel-standpunt goed:

19.5.2.1 Kerkrade het 'n deurlopende verantwoordelikheid om doop- en belydende lidmate toe te rus en te begelei vir die Christelike leer en lewe.

19.5.2.2 Kerkrade het daarom ook 'n verantwoordelikheid om die besluit van die Algemene Sinode 1998 oor die toelating van kinders tot die nagmaal uit te voer. In hierdie proses moet daar deurlopende begeleiding van ouers en kinders plaasvind, omdat die ouers so 'n belangrike rol by die kind se sinvolle gebruik van die sakrament speel. Kerkrade kan hiervoor die prediking, kategeese, die pastorale werk van predikant, ouderling en diaken en ander vorme van begeleiding, inligting en voorligting gebruik.

19.5.2.3 Met betrekking tot die toelating van dooplidmate tot die nagmaal tref elke kerkraad toepaslike reëlings in die lig van plaaslike omstandighede. Wykskerkraadslede en/of kategete kan ook in die opsig saam met die ouers betrek word.

(Handelinge AS 2002, p 552: 15/16).

## DIE ARBEID VAN DIE KERK

### 22. KERKLIED

#### 22.1 AMPTELIKE LIEDBUNDEL

Die Algemene Sinode bevestig sy besluit dat die nuwe *Liedboek van die Kerk* die amptelike liedbundel van die NG Kerk is en doen 'n beroep op al die gemeentes om dit met ywer te benut. (Handelinge AS 2002, p. 536, pt 2.1.1.3).

#### 22.2 FLAM

22.2.1 Die Algemene Sinode ondersteun die samestelling en werkswyse van Flam

22.2.2 Algemene Sinode moedig gemeentes aan om gebruik te maak van hierdie teologiese- en musikaal-gekeurde nuwe kontemporêre liedere.

#### 22.5 VONKK EN FLAM: CCLI

Die Algemene Sinode versoek gemeentes om vir die gebruik van VONKK- en FLAM-liedere by CCLI te registreer en ook erns te maak met die noukeurige rapportering aan CCLI van die VONKK- en FLAM-liedere wat gebruik word.

(Handelinge 2011, p 84, pt 23)

### 23. OUTEURSREG EN SANGBUNDELS

23.1 Die Algemene Sinode bevestig sy besluit dat die nuwe *Liedboek van die Kerk* die amptelike liedbundel van die NG Kerk is en doen 'n beroep op al die gemeentes om dit met ywer te benut.

23.2 die Algemene Sinode moedig gemeentes aan wat liedere elektronies projekteer, om te verseker dat die nodige lisensie(s) uitgeneem is en jaarliks hernu word.

(Handelinge AS 2002, p 536, pt 2.1.1.3 en p 573, pt 8.3).

### 29. KERKHERENIGING

#### Besluite 2013

#### 29.1 THE ROAD MAP TO CHURCH REUNIFICATION: DRC – URCSA

##### REQUIREMENTS

Spirituality	Discernment	Obedience
Commitment	Capacity	Innovation
Consent	Mandatory power	Timeous
Co-operation	Delegation	Inclusiveness
Co-ownership	Vision	Communicative intent
Expertise	Purposeful	Credibility

**Stage 1:** Point of departure. Signing of *Memorandum of Agreement* by Executives and ratification by General Synods. End of stage 1: October 2013

**Stage 2:** Formal decision taken by General Synods or General Synodical Commission mandated by General Synod to start the church orderly process to church reunification.

An urgent effort to be made to get the two other churches in the DRC-family on board before proceeding to stage 3.

**Stage 3:** Convene joint meetings of the churches' Executives, Moderatures and/or Synodical Commissions and continue to do so.

**Stage 4:** General Synods of the churches mandate the following commissions to act on their behalf *ad interim*: (a) The Leadership of the Churches (Executive, Moderamen and/or General Synodical Commission) to take preliminary or in principle decisions on behalf of the Church and report back to General Synod; (b) The Steering Committee for Church Reunification constituted by a majority of members not acting in the Leadership. The Steering Committee must be composed to ensure continuity and credibility, to maintain objectivity and to dispose of persuasiveness; (c) The Task Teams, among a Church Order Commission responsible for the drafting of an Common Set of Rules (Tussenorde) for the Churches <sup>see foot note</sup>, the Concept Church Order for a Reunited Church and the obtaining of legal advice from a Panel of Legal Advisors. The principles already agreed on in the *Memorandum of Agreement* must be contained in the Concept Church Order (organic synodical-presbyterial structure, missional structure, diversity of language and culture, unification of congregations, presbyteries and synods, the autonomy of the local congregation combined with the authority of the presbytery, synod and General Synod and the confessional basis with the inclusion of the Belhar Confession).

**Stage 5:** Convene a joint General Synod, take joint decisions regarding church reunification and related issues, and ratify decisions by own General Synod. First joint General Synod may coincide with a General Ministers Conference. First General Synod shall be a celebration and festive occasion. In future general synodical meetings will take place on the same date and at the same venue. Joint decisions will be taken and be ratified as soon as possible afterwards in own meeting.

**Stage 6:** Report back to the General Synods (jointly and seperately) on the Common Set of Rules, on proposed amendments to the existing Church Orders to make church reunification church orderly and legally possible, and on the Concept Church Order. General Synods take the decision to approve, apply and later to amend the Common Set of Rules. The Common Set of Rules has authority over the Churches' own Church Order on a spelled out issue.

**Stage 7:** All Synods and Congregations enjoy the opportunity to respond to the content of the Concept (Draft) Church Order by making their proposal and/or accepting it in principle. A time frame is set within which to respond.

The final draft for the Concept Church Order is approved by the Churches' Synods and Church Councils/Consistories, with the approbation/consent of the members of the Congregation. A time frame is set for this action. The decision of each Church Council and Synod, taken in terms of the applicable Church Order, is conveyed to existing General Synods of the Church.

**Stage 8:** The General Synod of the Church takes a final decision to reunite and approve the Concept Church Order with a two-thirds majority.

The General Synod of the Church takes the necessary transitional decisions regarding the transfer of activity, property, funds, etc.

The General Synod of the Church takes a decision to dissolve the General Synod as meeting (not as juristic person, that may continue to exist) and appoints delegates to a Conventus and the General Synod of the Reunited Church.

**Stage 9:** The Conventus convenes on the date and time set forth by the Steering Commission. Report back from the General Synods of the Churches is given and the Church Order of the proposed Reunited Church is approved.

**Stage 10:** The General Synod of the Reunited Church is constituted.

#### **FOOT NOTE: COMMON SET OF RULES**

1. The *Common Set of Rules* is provided to serve the process of reunification and represents an important phase in the process of the churches to know each other, while experiencing and growing together in unity, reconciliation and justice.
2. The *Common Set of Rules* is a set of church orderly provisions which gives a legal base to cooperation between the churches on the road to reunification.
3. The *Common Set of Rules* does not remove/abrogate the articles, regulations or rules of the churches. The articles, regulations or rules stated in the church order are applicable as they stand, except in case where the common set of rules specifically makes room for exceptions.

#### **29.2 VERDERE BESLUIE OOR KERKHERENIGING**

29.2.1 Die Algemene Sinode is dankbaar oor die vordering in die gesprek en verhouding met die VGKSA en onderskryf die werk van die Moderamen in die verband.

29.2.2 Die Algemene Sinode keur die Memorandum van Ooreenkoms met die VGKSA sover dit kerkordelik en regtens haalbaar is.

29.2.3 Die Algemene Sinode keur die *roetekaart* vir 'n kerkherenigingsproses goed sover dit kerkordelik en regtens haalbaar is.

29.2.4 Die Algemene Sinode bevestig dat sinodes, ringe en gemeentes hulle selfstandigheid en verantwoordelikheid ten opsigte van besluitneming en bedieningstrukture in 'n nuwe kerkverband mag behou.

29.2.5 Die Algemene Sinode keur die beoogde Algemene Predikantekonferensie goed en versoek die kerkverband om dit moontlik te maak vir leraars om teenwoordig te wees.

29.2.6 Die Algemene Sinode keur die daarstel van 'n Loodskomitee vir Kerkhereniging en 'n Taakspan vir 'n Tussenorde en Konsepkerkorde goed, en dra die samestelling daarvan aan die moderamen op.

29.2.7 Die Algemene Sinode spreek weereens sy wens uit dat al vier kerke van die NG Kerkfamilie in een kerkverband moet tuiskom en dra dit aan die Moderamen op

om in die onderhandelinge met die VGKSA asook die NGKA en die RCA alles moontlik te doen om dit moontlik te maak.  
(Handelinge 2013)

## AKTUELE EN ETIESE SAKE

### 30. **BEDIENING VAN BEVRYDING**

#### **Besluite 2011**

- 30.1 Die Algemene Sinode bely met blydskap die oorwinning van Jesus Christus oor al die manifestasies van die duiwel, bose magte, boosheid en kwaad in hierdie wêreld.
- 30.2 Die Algemene Sinode aanvaar dat hierdie oorwinning in baie gevalle nog nie ten volle sigbaar is nie, dat ons dikwels oorweldig is deur hierdie boosheid wat groter is as onself, ook juis weens die swakheid van die mens, die verleiding van die sonde en die gebroke werklikheid.
- 30.3 Die Algemene Sinode aanvaar daarom dat ons as kinders van God nog steeds in 'n geestelike stryd gewikkel is teen die boosheid in al sy manifestasies in die wêreld, maar veral teen die kwaad wat in elke mens skuil.
- 30.4 Die Algemene Sinode bevestig weer eens dat dit van uiterste belang is dat die kerk sal leef vanuit die geloofsperspektief dat, hoewel die Bose gelowiges steeds bedreig soos 'n brullende leeu en versoek soos 'n engel van die lig, die bose deur die lewe, sterwe en opstanding van Jesus en die uitstorting van God se Gees oorwin en aan bande gelê is.
- 30.5 Daarom meen die Algemene Sinode dat enige sogenaamde bediening van bevryding wat die geloofswaarheid oor die lewe en werk van Jesus en die Gees van God misken, geen bediening van die evangelie is nie en ook geen vryheid bring nie.
- 30.6 Die Algemene Sinode moedig daarom alle gelowiges aan om deur die krag van die Heilige Gees (in die gees van die oorwinning van Jesus) die boosheid die stryd aan te sê deur spesifiek te fokus op die genadige verlossingswerk van Christus, sodat die kerk die ware kenmerke van Evangeliese gehoorsaamheid (liefde, genade, vergifnis en versoening) sal vertoon.
- 30.7 Die Algemene Sinode aanvaar die werklikheid dat daar 'n wye diversiteit van interpretasies en toepassing van die Bybelse boodskap oor die bose en demone binne die NG Kerk is. Daar is ruimte vir lidmate wat aan die werklike en persoonlike aard van die duiwel en demone glo, en daar is ruimte vir lidmate wat die Bybelse spreke oor die bose en duiwels anders interpreteer.
- 30.8 Die Algemene Sinode oordeel dat die getuienis van leraars en lidmate van die NG Kerk dat hulle in hulle bediening wel mense teëgekomp het van wie hulle oortuig was dat hulle deur bose magte of demone gedemoniseer was – en ook hulle getuienis dat 'n bediening van bevryding baie van hierdie mense van kwellings, vreesagtigheid, haat teenoor God en sy gebod bevry het – nie sonder

meer afgewys moet word nie. Die Sinode aanvaar dat daar verskillende interpretasies is oor die werklikheid al dan nie van gedemoniseerdheid. Dit geld ook vir die interpretasie oor wie en wat agter bepaalde bevrydinge lê.

30.9 In die lig daarvan is dit die oordeel van die Algemene Sinode dat 'n bediening van bevryding as 'n buitengewone bedieningshandeling onder bepaalde voorwaardes toegelaat sou kon word eerder as om dit geheel en al te verbied. Die voorwaardes waaronder so 'n bediening toegelaat sou kon word, hou in dat:

30.9.1 die bediening van bevryding as 'n buitengewone bediening beoefen sal word en nie as deel van 'n roetine-pastoraat nie;

30.9.2 dit onder toesig van en met rapport aan die kerkraad en die ring gedoen word;

30.9.3 die persoon ook vir mediese evaluering verwys moet word. Daar rus 'n swaar verantwoordelikheid op persone wat so 'n bediening beoefen om mense nie skade te berokken deur siekte (onder meer psigiatrisse verstourings) as besetenheid of gedemoniseerdheid te behandel nie;

30.9.4 daar met sorg gewaak word teen 'n animistiese verstaan van die skepping en teen die neiging om te dink daar skuil magiese kragte in sekere voorwerpe; teen lang konfronterende gesprekke met bese magte, asook teen die gepaardgaande triomfalisme wat straal uit sensasionele byeenkomste van bevryding;

30.9.5 daar verreken moet word dat die Gees van Christus in mense wat aan Christus behoort en sy Naam bely, leef. Bedieningspraktyke wat die algenoegsaamheid van die werk van Christus minag en daarmee die gereformeerde belydenis van die volkome verlossingswerk van die genadige God in Jesus op die spel plaas, word afgewys.

30.10 Die Algemene Sinode beseef dat die verskillende kulture in ons land ons duidelik bewus gemaak het van die veel-fasettige aard van die siening oor die Bese; dat daar kontekste is waarin daar 'n werklike vrees vir eksterne bese magte is wat baie mense se lewens oorheers en dat hierdie lewenservaring ernstig opgeneem behoort te word. Die Algemene Sinode moedig daarom sy eie ampsdraers en lidmate aan, wat in sulke kontekste werk, om op verantwoorde wyse besondere aandag hieraan te gee met die doel om die radikale verlossingswerk van Christus met oorgawe te verkondig.

(Handelinge 2011, pp 97-98, pt 18)

### **Besluite 2013**

30.11 Die AS vervang die huidige punt 7 van die 2011-besluit met die verbeteringsvoorstel (aangepas) wat die Oostelike Sinode in hul beswaarskrif stel, te wete:

Die AS aanvaar die werklikheid dat daar 'n wye diversiteit van interpretasies en toepassing van die Bybelse boodskap oor die bese en demone binne die NG Kerk is. Daar is lidmate wat die persoonlike aard van die duivel en demone aanvaar, en daar is lidmate wat die nie-persoonlike aard van die duivel en demone aanvaar. Albei standpunte erken die realiteit van die bese.

(Handelinge AS 2013)

- 33. GRONDHERVORMING EN LANDELIKE ONTWIKKELING**  
**OPDRAG GRONDHERVORMING EN LANDELIKE ONTWIKKELING**  
(A.12.11.2 Grondhervorming, landelike ontwikkeling en landbou bl 243 pt 1.3)
- 33.1 Dit is geen onbekende feit dat die grondkwessie en restitutie, behoud en verkryging van eiendomsreg, werksgeleentheid en lone, voedselsekerheid en veiligheid in die brandpunt staan nie.
- 33.2 Die volgende sake en gebeure het die afgelope maande die intensiteit van hierdie kwessies en die gesprek daarvoor verhoog:
- 33.2.1 Druk op die staat om grondhervorming te versnel en grond te onteien sonder behoorlike of enige vergoeding.
- 33.2.2 Die regerende party se eeufeesviering van die *Natives Land Act* van 1913.
- 33.2.3 Die voortgesette gewelddadige wyse waarop plaasaanvalle uitgevoer word en die onvermoë om die spiraal van geweld te deurbreek.
- 33.2.4 Stakings en gewelddadige betogings wat uitgeloop het op ontwrigtende optrede, saakbeskadiging en lewensverlies.
- 33.2.5 Die statutêre verhoging van die minimumloon vir plaaswerkers en werksgeleentheid wat daardeur verlore gaan.
- 33.2.6 Onsekerheid oor die uiteindelijke uitkoms van die regering se Groenskrif oor grondhervorming, waarop die regering nie op 19 Junie 2013, soos vooraf gesê is, amptelik gereageer het nie.
- 33.2.7 Die uitspraak in die Konstitusionele Hof oor Minerale Regte op 18 April 2013 wat verreikende implikasies vir die kwessie van grondonteiening en die toepassing van Artikel 25 van die Grondwet het.
- 33.2.8 Bevoordeeldes van grondrestitusie wat met mekaar in hofsake gewikkel is oor die verkryging van private eiendomsbesit waar grond steeds in kommunale of staatsbesit bly.
- 33.2.9 Tradisionele leiers se onwilligheid om kommunale grond te verdeel en sodoende die uitvoering van die *Security of Tenure Act* van 1997 en die *Land Tenure Security Act* van 2010 verhinder.
- 33.2.10 Die volgehoue vernietiging van landbougrond deur mynbedrywighede en die nie-nakoming van wetsvoorskrifte wat dit probeer verhinder.
- 33.3 'n Groot deel van die landbougemeenskap is lidmate van die NG Kerk. Afgesien daarvan dat die Kerk 'n *profetiese verantwoordelikheid* teenoor die owerheid het, het die Kerk ook 'n *pastorale verantwoordelikheid* teenoor sy lidmate.
- 33.4 Die kompleksiteit van grondhervorming en die impak daarvan op die landbousektor en landelike ontwikkeling, moet nie onderskat word nie. Talle rolspelers is by 'n verskeidenheid van sake betrokke. Standpunte loop dikwels uiteen. Dit sal 'n groot fout wees as die Kerk oningelig en veralgemenend te werk gaan in die nakoming van sy profetiese en pastorale verantwoordelikheid. Die Kerk wil aan God se kant staan as dit kom by die waarheid, geregtigheid, billikheid en menswaardigheid. Die Kerk wil veral 'n stem wees vir diegene wat nie oor die mag of middele beskik om vir hulleself te praat nie.

GRONDHERVORMING, LANDELIKE ONTWIKKELING EN LANDBOU  
(A.12.11.2 Grondhervorming, landelike ontwikkeling en landbou bl 248 pt 5):

- 33.5 Die Algemene Sinode versoek die Moderamen om binne die raamwerk van die verslag voort te gaan om op so veel as moontlike vlakke versoening en sinvolle oplossings te bemiddel.
- 33.6 Die Algemene Sinode verwys die verslag na die onderskeie sinodes om dit na goeddunke en binne konteks op die tafel van gemeentes te plaas, in die hoop dat dit die NG Kerk se sinvolle bydrae op voetsoolvlak/gemeentevlak sal verhoog.
- 33.7 Die Algemene Sinode versoek die Moderamen om, as NG Kerkfamilie en ekumeniese vennote, die aangeleenthede in die verslag waaroor ernstige kommer heers dringend met die Nasionale Regering op te neem.
- 33.8 Die Algemene Sinode is diep verontrus oor die morele verval in die land, maar veral binne die landbousektor (vergelyk Agenda 2013, pp 246-247, punt 4.6.1.4). Dit behoort as 'n prioriteit binne die NG Kerkfamilie hanteer te word – met 'n duidelik geformuleerde uitkomsgebaseerde omkeer-strategie.
- 33.9 Die Algemene Sinode is diep verontrus oor die impak wat veral bogrondse mynbedrywighede in sekere vrugbare dele van die land op die landbou en die omgewing het en doen 'n beroep op die regering om deur streng wetstoepassing en volhoubare gemeenskapsontwikkeling 'n einde daaraan te maak.
- 33.10 Die Algemene Sinode doen 'n beroep op lidmate in die landbousektor om die gesins- en familielewe van hulle werkers te koester, hulle onderwys te verseker en kerklik met hulle mee te leef.
- 33.11 Die Algemene Sinode versoek sy Taakspan vir Ekologie om die moderamen dringend met advies oor hidrobreking te voorsien met die oog op standpuntformulering.  
(Handelinge AS 2013)

#### **34. SELFDEGESLAGVERBINTENISSE**

##### **Besluite 2019**

Die NG Kerk se Algemene Sinode is daartoe verbind om geloofsonderskeidend wysheid te vind oor moeilike etiese sake. Die Bybel, as die Woord van God, is die basis van ons nadenke oor ons identiteit en dissipelskap. Na 'n lang en moeisame proses van studie, gesprek, luister en onderskeiding het die Sinode nou die volgende besluit oor selfdegeslagverhoudings geneem:

1. om die 2015-besluit van die Sinode op grond van prosedurele redes ter syde te stel;
2. dat
  - 2.1. Die Algemene Sinode neem kennis dat verskille in die kerk ten opsigte van Skrifhantering en Skrifuitleg tot vasgelooptheid gelei het, en dat voortgaande besinning oor verantwoordelike Skrifuitleg steeds nodig is.
  - 2.2. Die sinode bely egter dat die eenheid van die kerk gefundeer is in 'n eenheid met

Christus en die belydenisgrondslag, en dat hierdie eenheid nie verbrokkel wanneer

daar oor Skrifhantering en Skrifuitleg ten opsigte van hierdie saak verskil word nie,

maar verryk en verdiep word.

3. Die sinode is verbind tot 'n voortgaande en nederige diepe luister na mekaar, met respek vir mekaar se uiteenlopende benaderings, Skrifhantering en hermeneutiek.
4. Die Algemene Sinode moedig gemeentes aan om voort te gaan met die skep van gespreksruimtes vir gesonde geloofsonderskeidende gesprekke oor hierdie (en ander) teologies-etiese kwessies, en toe te sien dat:
  - 4.1 hierdie ruimtes inklusief en divers bly;
  - 4.2 nie oor ánder te praat nie, maar eerlik en broos vanuit die eie posisie, en
  - 4.3 daar werklik erns gemaak word met die Woord van God.
5. Die Algemene Sinode respekteer kerkrade se reg om geloofsonderskeidende gesprekke in hulle eie kontekste te voer en moedig kerkrade aan om deurdagte en verantwoordelike besluite te neem.
6. Die Algemene Sinode moedig kerkrade aan, om by die aanwysing van persone in die ampte, lidmate se:
  - 6.1 doop, belydenis, roeping, spiritualiteit en getuienis van leer en lewe,
  - 6.2 toegang tot die sakramente,
  - 6.3 integriteit van verhoudings, en
  - 6.4 geskiktheid vir die spesifieke rol in ag te neem
  - 6.5 ongeag ras, geslag, klas of seksuele oriëntasie en -identiteit.
7. By die legitimasie van teologiese studente, moet die studente se:
  - 7.1 doop, belydenis, roeping, spiritualiteit en getuienis van leer en lewe,
  - 7.2 toegang tot die sakramente,
  - 7.3 integriteit van verhoudings, en
  - 7.4 teologiese- en bedieningsvorming in ag te neem, ongeag ras, geslag, klas, of seksuele oriëntasie en -identiteit.
8. Die Algemene Sinode erken dat daar:
  - 8.1 kerkrade en predikante is wat nie hulle weg oopsien om burgerlike verbintenisse tussen persone van dieselfde geslag te bevestig nie,
  - 8.2 ook kerkrade en predikante is wat wel hulle weg oopsien om burgerlike verbintenisse tussen persone van dieselfde geslag te bevestig.
9. Die sinode wil graag die ruimte wat vir almal geskep word, om volgens hulle oortuiging op te tree, bevestig. Ook dat daar 'n span saamgestel word wat elke

streeksinode sal besoek om hierdie saak duidelik en deeglik deur te werk. Dit kan

ons help om 'n ingeligte besluit te neem.

10. Die Algemene Sinode dra dit aan ATLAS op om 'n formulier te ontwikkel vir die bevestiging van burgerlike verbintenisse tussen persone van dieselfde geslag.
11. Die Algemene Sinode
  - 11.1 betreur dat die verloop van die debat en die besluite in die kerk die afgelope jare lidmate verwar en seergemaak het;
  - 11.2 vra gay-lidmate en hulle families wie se menswaardigheid wetend en onwetend misken is, uitdruklik om verskoning vir die pyn wat hulle in die kerk beleef het;
  - 11.3 verbind hom daartoe om in die gees van hierdie besluit ruimtes te skep vir gesprek waarin almal se menswaardigheid gerespekteer word.
  - 11.4 Die Algemene Sinode bedank gay-lidmate wat volgehou het met waagmoedige en konstruktiewe gesprekke in die kerk.
12. Die Algemene Sinode dra dit aan ATLAS op om voort te gaan met studie oor die huwelik en menslike seksualiteit met die oog op terugvoer aan die volgende sinode.

Die volgende besluite is saam met die bogenoemde besluit, steeds geldende besluite van die NG Kerk:

### **Besluit 2023**

1. Die Algemene Sinode 2023,
  - 1.1 het kennis geneem van al die verslae, beskrywingspunte en gravamina oor die besluit van die Algemene Sinode 2019 oor selfdegeslagverbintenisse. Hierdie stukke was vooraf in die agenda opgeneem en is aan die vergadering voorgelê;
  - 1.2 het na aanleiding van hierdie dokumente opnuut 'n openhartige geloofsonderskeidende gesprek oor die 2019-besluit gevoer. Daar is onder andere in kleiner tafelgesprekke én in die groter vergadering na 'n verskeidenheid van standpunte geluister;
  - 1.3 het onder die indruk gekom van verwarring, verwonding en vervreemding wat deur baie lidmate oor 'n lang tydperk in hierdie prosesse beleef is. Ons is opreg jammer dat dít gebeur het;
  - 1.4 erken dat daar 'n diepe verdeeldheid hieroor in ons kerkverband bestaan. Dit belemmer ons meelewing met mekaar, ons getuienis oor die versoening in Christus, en ons vervulling van ons roeping; en
  - 1.5 het óók bewus geword dat daar 'n opregte verlange in ons Kerk leef na groter eensgesindheid in ons getuienis en roeping nou, al is ons in hierdie saak nie eenstemmig nie.
2. Die Algemene Sinode 2023 bevestig

- 2.1 dat ons voortgesette nadenke, gesprek en besluitneming oor menslike seksualiteit en selfdegeslagverbintenisse, ten diepste voortvloei uit ons belydenis oor die Skrif as Woord van God. Ons gebed is dat wanneer ons dit lees, ons deur God gelei sal word tot meer geduld met mekaar, 'n beter verstaan van sy boodskap aan ons, en 'n groter afhanklikheid van God; en
- 2.2 dat ons nadenke, gesprek en besluitneming oor selfdegeslagverbintenisse binne die raamwerk van ons Kerkorde én die grondwet en regstelsels van ons onderskeie lande geskied. Daarin word die beginsels van nie-diskriminasie, die waardigheid van alle mense en die vryheid van geloofsoortuiging en -assosiasie beskerm.
3. In die lig van bogenoemde, volstaan die Algemene Sinode 2023 daarom met die besluit van 2019, en beklemtoon ons:
  - 3.1 dat die huwelik as 'n lewenslange verbintenis tussen een man en een vrou, 'n Godgegewe veilige ruimte is waarin die waardes van liefde en trou, wedersydse respek en versorging tot vervulling kom;
  - 3.2 dat daar onder ons verskillende sieninge oor die status van selfdegeslagverbintenisse bestaan;
  - 3.3 dat alle vorme van losbandigheid en promiskuïteit verwerp word;
  - 3.4 dat daar ruimte geskep is vir kerkrade en predikante wat hul weg oopsien om burgerlike verbintenisse tussen persone van dieselfde geslag te bevestig, asook vir hulle wat nie hul weg daartoe oopsien nie.
4. Die Algemene Sinode 2023 besluit derhalwe, om in die uitvoering van hierdie besluit, dit nie net as 'n etiese- of kerkregtelike kwessie te hanteer nie, maar in die eerste instansie pastoraal in gemeentes waar ons mekaar as medegelowiges liefhet, bemoedig en God saam wil dien.
5. Die Algemene Sinode wysig Artikel 32 van ons Kerkorde sodat dit sal lui:
  - 5.1 wysig Artikel 32 van ons Kerkorde sodat dit sal lui:
 

“Die sinode word saamgestel uit afgevaardigdes van gemeentes wat geografies 'n eenheid vorm en maklik vergader. Die groepering kan deur die Algemene Sinode/Algemene Sinodale Moderamen gewysig word op versoek van en met goedkeuring van die betrokke sinode(s)/sinodale kommissie(s).”
  - 5.2 besluit om aan die hand van Artikel 45 van die inwerkingstelling van die wysiging op te skort onderhewig daaraan dat –
    - a. Die besluit verwys word na samestellende sinodes/sinodale kommissies om insette van hul te bekom ten opsigte van die prosedure vir die uitvoering van Artikel 32; en
    - b. die insette soos bekom deur die ASM in oorleg met die ATR goedgekeur is.
6. Die Algemene Sinode dra dit aan die Moderamen (ASM) op om:
  - 6.1 in konstruktiewe gesprek met die samestellende sinodes oor ons besluit rakende selfdegeslagverbintenisse en hul hantering van die besluit, te bly; en

- 6.2 om die samestellende sinodes en ringe in daardie sinodes, konstruktief te ondersteun in hul verdere gesprekke met gemeentes, kerkrade, leraars en lidmate wat 'n behoefte daartoe het.

## **HUWELIK, PROMISKUÏTEIT EN SELFDEGESLAG VERHOUDINGS**

### **Die AS 2007 het die volgende besluite bevestig:**

1. Die Algemene Sinode herbevestig die besluit van 2004 dat, volgens ons verstaan van die Bybel, slegs die verbintenis tussen een man en een vrou as 'n huwelik beskou kan word.
2. Die Algemene Sinode bevestig ook die besluit van 2004 dat sowel heteroseksuele as homoseksuele promiskuïteit ten sterkste veroordeel word.
3. Die Algemene Sinode besluit dat, in die lig wat ons tans het, homoseksuele verbintenisse en huwelike nie as 'n alternatief vir die huwelik aanvaar kan word nie.

(uit Handeling AS 2007, pp 204-205, pte 12.2 en 12.3)

### **Die volgende aanbevelings is ook verder goedgekeur:**

Die Algemene Sinode

1. bevestig dat vorige besluite insake homoseksualiteit, selfdegeslag verbintenisse en huwelike gewysig en/of vervang is met nuwe besluite;
2. bevestig dat vorige besluite oor die huwelik en promiskuïteit steeds die geldende besluite is;
3. versoek dat hierdie besluite volledig in die Kerkordeboek opgeneem word;
4. neem kennis dat besluite oor selfdegeslag verbintenisse vir gemeentes buite die RSA onderworpe is aan daardie land se wetgewing;
5. besluit dat hierdie verslag met die oog op persverklarings die boodskap is wat die

Algemene Sinode aan die wêreld bekend sal maak as die huidige amptelike standpunt van die Algemene Sinode.

Die Algemene Sinode is daarvan bewus dat al hierdie besluite op verskillende maniere toepaslik is in die lande waarin ons gemeentes teenwoordig is.

Die Algemene Sinode onderneem om met behulp van 'n taakspan sinodes te ondersteun wanneer daar verder nagedink word oor die betekenis en waarde van die bostaande besluite. Die Sinode hoop dat die bostaande besluite lewegewende ruimte sal bied vir gelowiges met verskillende oortuigings oor die aangeleentheid.

Die vergadering van die Algemene Sinode het in 'n baie goeie gees plaasgevind. Die

lede is daartoe verbind om die besluit oor Selfdegeslagverbintenisse ten volle te ondersteun.

## **35. HUWELIK EN SAAMWOON**

### **Besluite 2011**

#### **35.11. HUWELIK EN SAAMWOON: PASTORALE VERSORGING**

Die Sinode versoek leraars om in pastorale hantering van pare-in-verhouding, hulle met deernis te begelei van onvolledige verbintenisse na die omvattende, Bybelse verbintenis van die Christelike huwelik, en hierdie ideaal nooit af te water nie.

#### **35.12 HUWELIK: ROL EN PLEK**

35.12.1 Die Algemene Sinode bevestig die plek en waarde van die Christelike huwelik in die kerk en die gemeenskap en motiveer leraars en lidmate om die duursaamheid daarvan te bevorder.

35.12.2 Die Algemene Sinode versoek leraars en lidmate om gesonde huwelike aktief te bevorder en moeite te doen met huweliksvoorbereiding en huweliksverryking, omdat die idee en praktyk van huwelike verskraal het.

35.12.3 Die Algemene Sinode motiveer gemeentes om jaarliks op die tweede Sondag van Februarie wêreldhuweliksdag te vier.

### **Besluite 2013**

35.14 Die Algemene Sinode probeer om tans die volgende perspektiewe ten opsigte van saamwoonverhoudings te stel in die besef dat dit saamhang met omvattende sake soos die huwelik, egskeiding en seksuele etiek van gelowiges, wat deurlopend met deernis en sensitiwiteit deur die kerk onderskei en begelei moet word. Die verskillende punte hieronder moet daarom deurgaans met mekaar in verband gelees word.

35.15 Die Algemene Sinode besef dat die huwelik soos ons dit vandag ken die produk van eeue se ontwikkeling is. Daarom kan sommige huweliksgebruike soos in die Bybel beskryf, byvoorbeeld leviraatshuwelike en die vrou as besitting van die man, nie sonder meer dien as riglyne vir hoe Christelike huwelike vandag behoort te wees nie.

35.16 Die Algemene Sinode is daarvan oortuig dat die historiese ontwikkeling van die huwelik in die Bybel en in die geskiedenis vir ons duidelike riglyne bied van wat 'n Christelike huwelik is: 'n vaste, formele ooreenkoms tussen twee persone van die teenoorgestelde geslag om hulle lewens in alle opsigte met mekaar te deel in 'n lewenslange verbintenis waarin seksualiteit 'n eksklusiewe karakter dra, geseën of bevestig deur die kerk, gesluit in die teenwoordigheid van getuies, sover as moontlik in die gemeenskap van gelowiges en verkieslik erken deur die staat as 'n wettige huwelik.

35.17 Die Algemene Sinode oordeel dat, in die lig van bostaande, gelowiges met reg die huwelik 'n gawe van God noem en dat seksuele gemeenskap buite so 'n vaste, formele verbintenis/verhouding nie aan Christelike riglyne voldoen nie.

35.18 Die Algemene Sinode is daarvan bewus dat saamwoonverhoudings (wat die seksuele insluit) vandag 'n werklikheid in die samelewing is. Daar is verskillende

redes waarom mense saamwoon. Sommige mense woon saam omdat hulle seksuele eksklusiwiteit nie as 'n belangrike aspek van 'n verhouding beskou nie. Hierdie verhoudings is weens die nie-permanente en selfsugtige aard daarvan, eties onaanvaarbaar.

- 35.19 Die Algemene Sinode is egter bewus daarvan dat daar ander redes is waarom sommige pare saamwoon. Sommige woon saam met die argument dat hulle seker wil maak dat hulle in alle opsigte by mekaar pas, voordat hulle trou. Van hierdie verhoudings streef in sekere opsigte na die Bybelse waardes van liefde, respek en eksklusiwiteit. Tog is dit minder as wat die Christelike verstaan van die huwelik verwag en word dit ontmoedig.
- 35.20 Die Algemene Sinode wil mense wat in 'n saamwoonverhouding leef, aanmoedig om die verbintenis nog vaster te maak deur die kerklike en staatkundige aspekte in plek te kry.
- 35.21 Die Algemene Sinode beskou die reëlings van mediese fondse en pensioenskemas wat voordele van mense ontnem wanneer hulle na die dood van 'n eggenoot/eggenote weer in die huwelik tree, as eties problematies en onderneem om nogeens met die betrokke owerhede hieroor in gesprek te tree.
- 35.22 Die Algemene Sinode aanvaar dat al die implikasies rondom die bevestiging van 'n enkel kerklike huweliksverbintenis nog nie uitgeklaar is nie en is daarom op hierdie stadium nie ten gunste van so 'n reëling nie.

(Handelinge AS 2013)

## **A TOT Z - BELEID**

Beskikbaar op die amptelike webblad van die NG Kerk: Algemene Sinode, dokumente.



Lig in die duisternis,  
hier vir God, mekaar en die wêreld

© 2026 | NG KERK VRYSTAAT



LEWENDE  
WATER



Van Heerdenweg 20, Wilgehof, Bloemfontein 9301  
Tel: +27 (0) 51 406 6700 | E-posadres: daf@ngkvs.co.za  
Posbus 11412, Universitas 9321

[www.ngkerkvrystaat.co.za](http://www.ngkerkvrystaat.co.za)

NAMPOPARK BOTHAVILLE  
R30, Bothaville 9660 | [www.grainsa.co.za](http://www.grainsa.co.za)



# VAN DIE BRON

— VLOEI DIT VERDER —

ESEGIËL 47:1-12